





Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
4902/A







Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
4902/A



Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
4902/A





Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
4902/A


K 4902/A N IV 16/p

Acc: 39


~~11/80~~  
86

Ver. 30408 1/2









70865  
BENEDICTI  
PERERII VALEN-  
TINI

*E Societate Jesu.*

DVERSVS FALLACES  
ET SUPERSTITIOSAS ARTES,

ID EST,

DE MAGIA, DE OBSERVATIONE SOM-  
niorum, & De Divinatione Astrologica.

*Novij* LIBRI TRES.

*Leggingen.*




• Cum gratia & Privilegio Casareae Maiestatis.

INGOLSTADII,


Ex Officina Typographica DAVIDIS SARTORII.

*Anna M. D. XCI.*









CAMILLO

CAETANO PATRI-


ARCHAE ALEXAN-

DRINO

BENEDICTVS

PERERIVS

S. D.



RIASUNT GENERARE-  
rum, CAMILLE Patriarcha  
illustrissime, in quarum stu-  
dio & observatione mortali-  
nimi vesana quadam libidine vel potius  
ne noscendi quæ futura sunt, fædis & no-  
illuduntur fallacijs atque impijs errori-  
lligantur: Somnia, & natalitia Astrolo-  
m Predicta, atque Artes Magica. Ne-  
verò earum rerū pestilens vis, priuatos  
um aut singulos homines, verum etiam  
ripes ac Reges ipsasq; ciuitates & Respu-  
s inuasit, infecit, ac perdidit. Ac licet  
generis humani pestes omnibus ferè secu-

A 2

lis



## EPISTOLA

Tacitus  
historiarū  
lib. I.

listum sapientes viri firmissimis rationibus  
profligare, tum prudentes Rerum publica-  
rum rectores ac principes seuerissimis dam-  
natas edictis & atrocissimis pœnis addictas,  
è societate hominum exterminare flagran-  
tissimè cupiuerunt, obnixèq; contenderunt.  
perparum tamen adhuc profectum est. Adeo  
enim malum hoc in animis hominum hære  
infixum, ut penitus extrahi vix queat, ne  
eius sanandi potens atque efficax ullum iam  
remedium inueniri posse credatur. Itaque  
hic usu venit quod de Mathematicis scite  
quidam vereq; dixit: Genus hominum, in-  
quit, potentibus infidum, sperantibus fallax  
quod in ciuitate nostra & vetabitur semper,  
& retinebitur. Sed nihilominus tamen mi-  
hi quidem valde utiliter ac salutariter fecis-  
se visi sunt, qui doctis aduersus eas artes edi-  
tis libris, vanam & fallacem ac perniciosam  
esse hominum generi, nimis curiosam & su-  
perstitiosam earum rerum observationem a-  
pertè demonstrarunt. Quorum ego prudens  
consilium, piumq; studium, atque utilem co-  
natum æmulatus, tres aduersus eas artes li-  
bros confeci, unum de Magia; alterum de  
Obser-



## DEDICATORIA.

*Observatione somniorum; tertium de Diuinatione astrologica. Ac primus quidem liber planè nouus est fœtus, nunc primum lucem aspiciens: quæ reliquis autem duobus libris disputantur, ea ferè sunt in Commentarijs nostris partim in Daniele, partim in Genesim explicata. Sed quia non pauci eos Commentarios non legent, aut quod eos propter studiorum diuersitatem non iuuat legere, aut quia non vacat propter occupationes, putavi me pergratum plurimis facturum, si, quo latius horum librorum pateat utilitas, separatim eas disputationes, atque unum in volumen, idq; modicum inclusas, typis excudendas curarem: ratus scilicet fore, ut eas ipsas disputationes, tum propter exquisitam multisq; optatam eiusmodi rerum cognitionem, tum etiam propter paruitatem commoditatemq; voluminis, & plures, & auidius atque utilius legant. Has ego lucubrationunculas apparere volui sub tuo nomine*  
*CAMILLE Præsul ornatissime: quem omnes qui norunt, non possunt non amare propter singularem ingenij ac morum suauitatem; & quod vera animi bona cum amplissimis*




EPISTOLA DEDICAT.

*natura ac fortuna bonis adequasti, admirari & obseruare coguntur. Video sanè perexiguum esse munus, nec dignum tuæ nobilitatis ac dignitatis amplitudine: sed est tamen amoris & obseruantia plenissimum; & quāti ego te faciam, quantumquē Caetanā familiam colat societas nostra, certissimum testimonium.*



BENE.





## BENEDICTI

## PERERII LIBER

## P R I M V S

qui est

## D E M A G I A.



VPLICEM esse Magiam hic liber ostendit; alteram quidē Naturalem & veram, ex occultis rerum naturis & virtutibus profectam, intimamq; ac præstantissimam Philosophiæ partem, & admirandorum effecttricem operum, ab omniq; alienam superstitione, & à Dæmonum artificio ac maleficio puram; sed paucissimis tamen mortalium exploratè perceptam: Alteram verò (quæ vulgo iactatur & celebratur) ab omni ratione ac veritate vacuam, fallacem item & noxiam, Dæmonumq; fraudibus & maleficijs implicatam, ob idq; meritò infamem & abominabilem, & è societate hominum exterminandam. Hinc præterea cognoscet lector quatenus vtraque Magia progredi, & qualia quantavé opera possit facere, & an mira quæ videtur facere posterior Magia, verè talia sint, qualia spectantibus videntur, an verò præstricta oculorum acie, spectantium fallant existimationem, nec veram habeant earum rerum quas repræsentant vim & naturam,



sed nudas tantum atque inanes earum rerum similitudines & imagines ferant: Denique quæ videntur & vulgo creduntur Magorum miracula, quibus rebus differant à veris miraculis, quibusue notis & signis facile diiudicari & internosci queant. Libuit autem ante ipsum operis vestibulum, velut in conspectu lectoris ponere generales sententias & capita disputationum quæ hic tractantur, quò scilicet cupidius ille, huius libri lectionem adeat, & ex ipsa lectione eam capiat vtilitatem, cuius ei afferendæ utilitatis flagrans desiderium, nec dubia spes, ad huius nos voluminis scriptionem impulit.

# INDEX CAPITVM ET DISPUTATIONVM LIBRI PRIMI, QUI EST DE Magia.

## P R I M A.

**A** Nomnia quæ feruntur à Magis facta, sint vel ab illis, vel ab alijs conficta.

II. An omnes effectus Magia reuera tales sint quales videntur.

III. An sit aliqua Magia naturalis, & quæ aut qualis ea sit, & vnde eam homines discant.

IV. An sit aliqua Magia non naturalis, & Demonum magisterio atque artificio hominibus tradita.


V. An spiritus illi, quorum magisterio & auxilio mira faciunt Magi, sint boni an mali.

VI. Quæ opera admiranda possint Demones, aut per se ipsos, aut per Magos facere.

VII. Quas



- VII. *Quas res Demon nec per se, nec per Magos possit efficere.*
- VIII. *An opera Magorū sint Verè miracula, & quemadmodum à Veris miraculis differant & inter nos queant.*
- IX. *Quotuplex sit Magia, & primo de Magia Astronomica.*
- X. *De Arte Cabalistica.*
- XI. *De Necromantica, id est, Mortuorum ex Inferis ad Vivorum conspectum & colloquia evocatione.*
- XII. *An per artem magicam possit Verum aurum fieri ab Alchemistis.*
- XIII. *De origine Magia, & his qui in ea clari ac nobiles fuerunt.*
- XIV. *An Magia studium & usus sit licitus.*
- XV. *De Magis Pharaonis, quorum mentio fit in libro Exodi: & qui nominatim fuerunt illi qui restiterunt Mosi.*
- XVI. *An prodigia quæ Magi Pharaonis fecerunt, reuera fuerint talia, qualia videbantur, nec ne.*
- XVII. *Qua ratione & artificio, prodigia illa fuerint à Magis facta.*





## CAPVT PRIMVM.

*AN QVAE A MAGIS FACTA ESSE  
vel sermonibus vulgi feruntur, vel à scriptoribus man-  
data sunt litteris, omnia sint fabulosa, ficta & fal-  
sa; an verò aliqua fuerint, vti narrantur,  
verè ab illis gesta.*



ON EST DVBIUM QVIN EORVM QVAE  
de Magis aut dicuntur aut scribuntur,  
quamplurima sint ficta & falsa: nam  
plerique hominum nimis sunt credu-  
li & superstitiosi, & rebus admirandis facile ca-  
piuntur; cum etiam docti viri & Philosophi, vt  
inquit Aristoteles, quoniam fabula continet a-  
liquid nouum & mirabile, fabulis oblectentur.  
Quis enim non videt, quæ Ouidius narrat in li-  
bris Metamorphoseos, omnia ficta esse à Poëtis,  
sicut illa de Circe & Medea; & de socijs Diome-  
dis in aues conuersis quæ longo post tempore  
circa templum Diomedis volitabant; de socijs  
Vlyssis, quos Circe mutauit in bestias; de Arca-  
dibus qui traiecto quodam stagno vertebantur  
in lupos; de socero Medee, quem illa à senectute  
ad iuuentutē reuocauit; de draconibus, qui-  
bus simul iunctis Medea volauit per aëra, & de  
alijs id genus fabulis, quas Poëtæ cum ad oble-  
ctationem legentium, tum ad mysticam homi-  
num eruditionem adinuenerunt? Negari ta-  
men non potest multa miratu dignissima verè à  
Magis esse facta. Nam scriptura in Exodo com-  
memorat opera Magorum Pharaonis, & 1. Reg.  
cap. 28. scribitur de Phitonissa quæ suscitauit  
Samue-

*Arist. lib 1.  
Metaphys.*

*Exod. 7.*



Samuelem, & Psalmo 57. de venefico incantante sapienter aspidem, ob id obturantem aures suas : & Matth. 24. *Surgent, inquit Dominus, pseudopropheta, & dabunt signa & prodigia non utique alia arte quàm magica.* Ex historijs Ecclesiasticis notum est quæ opera admiranda Simon Magus ediderit magicis incantationibus : quâobrem (vt fertur) à Romanis publicam statuant meruit hac inscriptione: SIMONI DEO SANCTO: vt narrat Iustinus martyr in Apologetico, Irenæus libro primo contra Valentinum, Tertul-  
 lianus in Apologetico, Eusebius libro secundo historiæ Ecclesiasticæ. Propter quæ prodigia idem Simon tanta in admiratione fuit apud Samaritas, vt quemadmodum Lucas scribit in Actis Apostolorû capite octauo, de illo diceretur: *Hæc est virtus Dei quæ vocatur magna.* Narrat beatus Hieronymus in vita Hilarionis, cum quidam iuuenis virginem DEO sacram ad turpes amores illicere nullaratione potuisset; eum ad magicas artes conuersum, quas apud Memphin Ægypti didicerat, adeo illis profecisse, vt virgo infano illius iuuenis amore fureret. Porro quæ de Strygibus vulgo circumferuntur, non sunt in totum falsa, sed multa illis admiranda accidere, qui ea compererunt, viri fide digni, sicut Syluester in opere suo de Strygibus, & Alphonsus de Castro in eo quod scripsit de Punitione hæreticorum, non illi quidem tanquam dubia & incerta, sed tanquam sibi notissima & exploratissima tradiderunt.

*Iustinus  
martyr.  
Irenæus.  
Tertullianus.  
Eusebius.*

MIRA sunt quæ Philostratus in libris De vi- *Mira opera  
ta Apol- Magorum*



*ex Philo-  
strato.*

ta Apollonij memorat vel Brachmanas Indo-  
rum, vel Gymnosophistas Æthiopū, vel ipsum  
Apollonium gessisse. Tale est illud quod is nar-  
rat libro tertio & capite tertio, vidisse Apollo-  
nium apud Indos gemina dolia, vnū imbrium,  
alterum ventorum; illud, cum nimia siccitate  
India premebatur, apertum nebulas emittebat  
vniuersam illam terram humectantes: nimios  
autem imbres occlusum cohibebat: alterum  
adapertum efflabat ventos regionem perflan-  
tes, quò salubrius esset cœlum. Tale etiam est  
illud quod ab eodem proditur libro tertio, ca-  
pite octauo, cum Apollonius cum Iarcha & a-  
lijs Brachmanis mensæ accubuiſſet, tripodes la-  
pideos sua sponte fuisse motos, & ab æreis pin-  
cernis calices in gyrum circumlatos esse, certa  
mensura vinum & aquam miscentes & cyathos  
proferentes. Nec sileri debet quod Philostratus  
libro quarto, capite decimosexto scribit de pu-  
ella quæ tanquam mortua portabatur ad sepul-  
chrum: cuius funeri occurrens in via Apollo-  
nius, tanquam secreto quædam illi admurm-  
rans & insusurrans, ad vitam & integram vale-  
tudinē reuocauit. Nec minus mirabile est quod  
idem auctor narrat libro sexto, capite tertio de  
statua Memnonis, quam cū radius solis circa  
eius exortum attingebat, & ad os eius peruenie-  
bat, statua more hominum loquebatur. His ad-  
de quod ab eodem memoratur eiusdem libri  
sexti capite quinto, iussu Vespersionis, qui prin-  
ceps erat gymnosophistarū, apud Æthiopes, vl-  
limum quandam voce quidē clara & distincta,  
sed tenui admodum & quasi fœminea salutasse  
Apol-



Apollonium. Sed illud miratu dignissimum, quod Philostratus tradit capite secundo, libri octavi, Apollonium cum esset in prætorio Domitiani Imperatoris, ut putabatur, ab eo condemnandus, repente ex omnium oculis euanuisse. Quamobrem tanto in honore fuit Apollonius apud posteros, ut eum Hierocles cum CHRISTO Domino nostro conferre ausus fuerit. Sed eius audaciam fregit, insaniamque coar-

*Eusebius  
in libro contra Hieroclem.*

guit Eusebius Cæsariensis: Alexander autem Mammeas Imperator Romanorum in suo Larario imagines CHRISTI, Abrahæ & Apollonij habebat, quod hoc tres maxime omnium miraretur & coleret.

VERVM, sicut à principio dixi, eorum quæ Magi fecisse dicuntur, quamplurima falsa sunt vel ab ipsis vel ab alijs conficta, & superstitiosis nimiumque credulis hominibus persuasa. Quis enim vera concedat quæ Maga illa apud Virgilium libro quarto Æneidos promississe dicitur:

*Hæc se carminibus promisit soluere mentes*

*Quas velit; ast alijs duras imittere curas,*

*Sistere aquam fluuijs, & vertere sidera retro,*

*Nocturnosque ciere manes, mugire videbis*

*Sub pedibus terram, & descendere montibus ornos.* *Plinio null-*

Quocirca Plinius nullam esse putauit Magiæ vim atque potestatem, & quæ de Magis feruntur, omnia esse vana falsaque: totamque Magiam reiicit & damnat. Nam libro 30. capite 2. Im-

mensum, inquit, & indubitatum exemplum est falsæ artis quam dereliquit Nero. Non enim ad eam discendam Neroni defuit vel ingenium,

*vel*



vel diligētia, vel quēlibet facultas, nec studium  
 cum eius discēda auidissimus esset : quin etiam  
 ad eam docendam Tyridates Armeniorum rex  
 nobilissimos Magos secum ducens venit ad e-  
 um, canisq; magicis eum initiauit : sed is regnū  
 quidem à Nerone accepit ; Magiam autem quæ  
 nulla est, docere eum non potuit. Proinde ita  
 persuasum sit, intestabilem, irritam, inanem es-  
 se, habentem tamen quasdam veritatis vmbas,  
 sed in his veneficas artes pollere, non magicas.  
 Hæc Plinius. Cui vt concedo plurima Magorū  
 esse vana & falsa; ita esse talia omnia non assen-  
 tior. Esse autem pleraque Magorum promissa  
 non solum inania & falsa, sed etiam incredibi-  
 lia & ridicula, demonstrat Plinius lib. 26. cap. 4.  
 his exemplis; Magi aiūt Æthiopide herba amnes  
 ac stagna siccare: coniectu, tactu, clausa omnia a-  
 periri: Achimenide coniecta in aciem hostiū, tre-  
 pidare agmina, ac terga vertere : Latacē dari so-  
 litam à Persarū rege Legatis, vt quocunq; venis-  
 sent, omnium rerū copia abundarēt. Apud De-  
 mocritum inuenitur compositio medicamenti,  
 quo pulchri, boniq; & fortunati gignātur liberi.  
 Et lib. 25. cap. 9. Circa herbam, inquit, quā nostri  
 Verbenacā vocant, Magi mire insaniūt: hac per-  
 unctos impetrare q̄ velint, febres abigere, ami-  
 citias cōciliare, nulliq; non morbo mederi. Le-  
 ge apud Aul. Gelliū lib. 10. cap. 12. & apud Plini-  
 um lib. 28. cap. 1. quæ fabulantur Magi de Cha-  
 maleōte tradita à Democrito magicę artis prin-  
 cipe, qui, quo tempore Hippocrates medicinā,  
 eodem magicas artes in Græcia celebrauit, hoc  
 est, circa bellum Peloponnesiacum, anno post  
 Romam

*Figmenta  
 Magorum  
 Plinio.*

*Aul. Gel-  
 lii.  
 Pliniss.*



Romam conditam trecentesimo : vt auctor est  
Plinius lib. 30. cap. 1.

## CAPVT II

**AN OMNES EFFECTVS MAGIAE**  
*sint simulati & tantum apparentes, hoc est, non ta-*  
*les reuera quales videntur; an verò sint aliqui eius*  
*effectus etiam veri & naturales, nempe ta-*  
*les reuera quales viden-*  
*tur.*

**N**ONNVLLOS effectus Magorum naturales,  
& veros esse, tum ex sacris literis, tum ex a-  
lijs probatis historijs compertum est. Nam ope-  
ra Magorum Pharaonis vera fuisse, satis indicat  
scriptura cap. 7. Exodi; itaq; sentiunt Origenes  
& Augustinus. Id quoque declarat Samuel à  
Phitonissa suscitatus; quem fuisse verū Samue-  
lem, licet nonnulli in dubium verterint, tamen  
auctor libri Ecclesiastici cap. 46. nos dubitare  
non finit. Ad hæc Dominus noster ait venturos  
pseudopphetas tempore Antichristi, qui fa- *Matth. 24.*  
ciant prodigia & portenta magna: quæ S. Pau-  
lus vocat mendacia, non quod omnia per se & *2. Theff. 2.*  
sua natura sint futura falsa; sed quòd fiēt ad per-  
suadendum falsum, & ad decipiendos homines,  
& quòd putabuntur esse vera miracula, hoc est,  
supernaturalia opera, cum non sint talia. Nón-  
ne DEVS Deuteronom. 13. denunciat venturos  
pseudopphetas prædicentes futurum aliquod  
portentum, quod ita veniet, vt ab illis fuerat  
prædi-



prædictum? Dæmones item naturali solertia  
 quæ summa illis est, & scientia cunctarum re-  
 rum naturalium quam propter peccatum no-  
 amiserunt; deniq; longissimi temporis experi-  
 entia qua pollent, occultas & admirandas re-  
 rum facultates & virtutes, ipsarumq; rerum in-  
 ter se vel sympathiam vel antipathiam, & quem-  
 admodum inuicem applicari & temperari de-  
 beant, quò mirabiles & inusitados effectus pro-  
 ducant, optimè norunt, & per Magos ministris  
 suos præstare possunt. Atque hæc est doctrina  
 B. Augustini in lib. 3. de Trinitate, cap. 7. & 8. in  
 libro Octogintatrium quæstionum, quæst. 79.  
 in quæstione 22. in Exodum, à Christianis Philo-  
 sophis iuxta & Scholasticis Theologis recepta.  
 Neque possumus negare (sunt enim multis Ro-  
 manæ historiæ scriptoribus prodita) duarum  
 Romanarum mulierum duo facta per quæ me-  
 morabilia. Cum enim mater deorum ex Pess-  
 munte Phrygiæ, naui adueheretur Romam; in-  
 dicitur hæsisse in Tiberi, ut non hominum, ne  
 boum vi moueri loco posset. Q. Claudia vesta-  
 lis quò suam castitatem probaret, discinxit si-  
 zonamq; naui alligans, eam quo volebat, dedu-  
 xit. Thucia quoque vestalis quò suam etià pro-  
 baret pudicitiam, aquam Tiberi haustam cre-  
 bro tulit usq; ad capitolium, anno urbis cond-  
 itæ sexcentesimo nono, ut tradit Plinius lib. 2.  
 cap. 2. Nec possumus inficiari opera Magorum  
 homines scæminas ué inflammari ad libidines,  
 ad amores antè exosos: cuius rei exemplum a-  
 fert S. Hieronymus in vita Hilarionis à nobis  
 supra commemoratum. Quanquã duo illa quæ  
 virg



irgines illas vestales egisse diximus, putat S. Thomas in Quaestionibus de Potentia, quaest. 6. *Notabilis* rt. 5. etiam ministerio bonorum Angelorum, *sententia* DEO sic volente, castitatis virtutem & praestanti- *B. Thomas* am commendare & probare hominibus, fieri potuisse.

CETERVM plurima Magorum opera esse simulata, fallentia oculos spectantium, nudamq; tantum eorum quae repraesentant imaginem, non autem veram naturam habentia, multi tradiderunt atq; compererunt; & ego facile credo. Tales fuerunt (si tamen fuerunt) admirandae metamorphoses, quas à Varrone proditas commemorat B. Augustinus lib. 15. de Ciuitate Dei, cap. 17. & 18. de socijs Vlyssis à Circe mutatis in varias bestias, de socijs Diomedis in aues conuersis, de Arcadibus traiecto quodam stagno transformatis in Lupos, de stabularijs quibusdā mulieribus, quas narrat B. Augustinus suo tempore in Italia viatores quibus caseum dabant veneficijs imbutum, mutare solitas in iumenta, eorumq; opera ad portanda onera aliquandiu vfas, rursus in pristinas hominum figuras reformasse.

Tale quoque fuit quod Philostratus lib. 4. capite 5. tradit accidisse Apollonio: erat enim quaedam lamia quae speciem gerēs pulchre mulieris, simulabat se captam amore cuiusdam Menippi iuuenis formosi, ei velle nubere. Die igitur nuptijs dicato mulier illa conuiuium apparauit lautissimum, maxima auri, argenti, ornamentorum, omnis generis vini & dapum copia instructissimum, quo cum ingressus esset Apol-  
B
lonius,



Ionius, ad eos qui aderant conuersus, inquit: Tantalii hortos videtis, qui sicut Homerus scribit, apparebant esse aliquid, cum nihil tamen essent: talem enim esse hunc omnem apparatus existimare debetis: neque enim quæ apparet materia, vlla subest, sed materiæ duntaxat simulachrum est & imago. Hæc autem sponsa, vna est è numero lamiarum, quas aliqui laruas, aliqui lemures appellant. Sunt autem ad amorem & venerem pronæ, & humanas carnes vehementer expetunt, venereorum cupidine allicientes eos quos cupiunt postea deuorare. Atque his dictis totus ille apparatus ex oculis omnium euauit: & illa mulier sese Lamiam esse confessa est, & voluisse Menippum voluptatibus explere, vt eius postea corpus deuoraret: consueuisse enim pulchrorum iuuenum corporibus vesci, vbi ad summam sanguinis abundantiam peruenissent. Non sunt admodum dissimilia quæ 26. quæst. 5. cap. Episcopi, de nonnullis strygibus narrantur, quas dæmones delusa earum imaginatione credere faciebant, longa terrarum spatia per aëra equitando conficere, & cum Diana & Herodiade in amœnissimis locis iucundissimè epulari & ludere; cum neque verè transferrentur, neque personis, quibus credebant, adessent, sed tantum imaginationum ludificatione.

Hoc etiam euidentissimis rationibus probari potest. Magi enim promittunt se ex lapidibus vel lignis leones vel lupos subito producere posse; & nonnunquam in spectaculis ex terra faciunt subito existere leones vel lupos: constat autem



autem eiusmodi animalia perfecta citra supernaturalem DEI potentiam nulla ratione gigni posse nisi ex semine; nec ad iustam magnitudinem, nisi statis temporum interuallis peruenire posse. Dicuntur etiam mortui à Magis reuocati ad vitam, sicut traditum est de puella illa quam Apollonius reuiuiscere fecit, & de Alceste quondam ab Hercule ad vitam restituta. Plinius etiā lib. 7. c. 37. narrat Asclepiadem celeberrimū tempore Pompeij Magni medicū, quendā hominē mortuū ē funere retulisse & seruasse. Non posse autē *Nulla vi  
et arte  
magica pos-  
se mortuos  
reuiscere* Magos verē mortuos ad vitam reuocare, ita cōcluditur: Si animus hominis est mortalis, non potest semel extinctus idem numero reuiuiscere; si autem est, uti verē est, immortalis, non potest ullis hominum vel dæmonum artificijs, vel *re* ullis naturalium agentium viribus rursus ad corpus suum animandum viuificandumq; reuocari: nam cum sit immaterialis & incorporeus, est supra omnis naturæ corporeæ facultates; nec ullius rei creatæ potestati subiacet. Necessē est igitur, resurrectiones mortuorum quæ à Magis factæ narrantur, vel esse fabulosas, vel fuisse simulatas, & tantū in speciem factas.

## CAPVT III.

## AN SIT ALIQUA MAGIA NATURALIS.

**L**ICET iam vsus obtinuerit ut nomen Magiæ ferē in malam partem accipiatur, pro ea tamen mirum arte quæ opera & adminiculo dæmonum res mirabiles vel facit vel facere simulat;

B 2

& Ma-



& Magi vulgo dicantur qui ex cōmercio quod habent cum dæmonibus, res stupendas efficiāt, veluti sunt præstigiatores, incantatores, Necromantici, & alij malefici homines: Attamen nec nomen Magiæ absolutè & præcise sumptum hoc significat, nec à principio sic fuit vsurpatum, sed vniuersè pro quadam facultate, per quam homines efficiēbant res inusitatas & admirandas ratione quadam occulta, & alijs hominibus incognita. Sic generaliter sumpta Magia dupliciter diuidi potest: altera enim est naturalis, altera non naturalis. Naturalem voco, quæ cognitione & applicatione quarundam singularium virtutum, quæ sunt in rebus naturalibus, quæq; latent ferè mortales, agentia & patientia suo loco & tempore, & sicut opus est inuicem componendo & temperando, effectus quosdam inusitados & admirandos, & quorum ratio videtur incomprehensibilis, moluntur. Magia autem non naturalis dicitur, quæ etiam mira efficit, verumtamen non vtens viribus agentium naturalium, sed sola dæmonum opera & ope. Naturalis autem Magia rursus triplex tradi potest: alia enim dici potest humana, quia humano studio & diligentia comparatur; altera Diuina, quæ per reuelationem vel à DEO, vel ab Angelis bonis percipitur: Tertia, Dæmoniaca quam dæmones tradunt ijs hominibus, qui se illis impia societate & fœdere deuinxerunt.

*Triplex  
Magia naturalis.*

*Esse naturalem quandam Magiā.* Es se autem Magiam quandam naturalem quæ est secretior quædam & abstrusior sapientiæ pars, & quæ occulta quadam cognitione & vsu quarundam rerum naturalium mira perficit.



eit, nullo modo viris doctis dubitandum est.  
 Quis enim vel tinctus duntaxat literis philoso-  
 phicis; nescit esse multas virtutes rerum natura-  
 lium occultas, mirabilium rerū effectrices, quas  
 si quis benè nosset, & ad vsum accommodare  
 sciret, haud dubie mira posset efficere. Multa  
 sunt naturæ miracula incomptæ adhuc ratio-  
 nis, & (vt Plinij verbis vtar) in naturæ maiesta-  
 te penitus abdita. Hæc, si quis hominum illis re-  
 bus naturalibus occultè vtens, faceret, Magus  
 vulgo diceretur, & non nisi auxilio dæmonum  
 talia facere crederetur; cum tamē opera illa es-  
 sent naturalia, & naturaliter à causis naturali-  
 bus profecta. De miraculis naturæ integrum li-  
 brum scripsit Aristoteles, qui inscribitur De Ad-  
 mirandis auditionibus; quanquam eum non-  
 nulli adscribunt Theophrasto. Plinius cum alijs  
 libris multa, tum plurima secundo libro Natu-  
 ralis historiæ prodidit, & Proclus in libro De Sa-  
 crificio & Magia, & beatus Augustinus libro 21.  
 De Ciuitate DEI, cap. 4. & 5. Albertus Magnus  
 lib. 2. Mineralium, Tractatu 2. cap. 1. 11. & 17. &  
 Fracastorius in lib. De Sympathia, & Ficinus li-  
 bro 4. Theologiæ Platonis, cap. 1. multaq; eius  
 generis sparsa leguntur in libris Cardani de sub-  
 tilitate & varietate rerum; quorum hîc nonnul-  
 la ex Plinio recensebo lib. 2. cap. 96. Iuxta Har- *Miracula*  
 pafa oppidum Asiæ, cautes stat horrenda vno *natura.*  
 digito mobilis, eadem, si toto corpore impella-  
 tur, resistens. Duo sunt montes iuxta flumē In-  
 dum, alteri natura est, vt ferrum omne trahat,  
 alteri, vt respuat; Itaque si sint clauī in calciamē-  
 to, in altero auelli non posse, in altero sisti. Et  
 B 3 cap.



cap. 105. Hæc est natura Naphtæ circa Babylo-  
 niam profluens bituminis liquidi modo, vt in  
 eam vñdecumq; visam protinus transfiliat ignis.  
 Ita ferunt à Medea pellicem crematâ, postquam  
 sacrificatura ad aras accesserat, corona igne ra-  
 pta, & cap. 107. In Nymphæo exit è petra flam-  
 ma quæ pluuijs acceditur, & cap. 103. In Dodone  
 Iouis fons cùm sit gelidus, & immerfas faces ex-  
 tinguat; si extinctæ admoueantur, accendit. In  
 Illyrijs supra fontem frigidum expansæ vestes  
 accenduntur. Idem Plinius libro vltimo, cap. 4.  
 Adamas (sic Græcè dictus, quòd nec ferro, nec  
 igne dometur) hircino tamen rumpitur sangui-  
 ne: & cum magnete lapide in tantum dissidet,  
 vt iuxta positus ferrum non patiatuŕ abstrahi;  
 aut si admotus magnes apprehenderit, rapiat at-  
 que auferat. Verùm nihil esset mirabilius ma-  
 gnete, si vis eius non adeo nobis esset nota & ex-  
 plorata. Nam rationem cur ferrum ad se trahat,  
 & acum nauticam sua vi tactam eatenus agitet,  
 quoad illa directo septentriones spectet, quis  
 nobilium philosophorum non diligentissimè  
 inuestigauit? quis autem adhuc comperit aut  
 satis explicauit? Sed omnia excedit miracula  
 Echneis pisciculus quem Latini vocant Remo-  
 ram, cuius meminit Aristoteles lib. 2. De Histo-  
 ria animalium cap. 14. sed Plinius libro 32. cap.  
 11. non solum ab antiquis de eo prodita, sed etiã  
 sibi suisq; temporis hominibus planè cognita &  
 explorata tradens, ait eum semipedalem esse, li-  
 maci magnæ similem, adhærentemq; nauigijs  
 licet ea sint ingentia cursuq; incitatissimo ferã-  
 tur, eorum tamen ita frenare impetum, vt stare  
 cogat,

*Remora  
piscis.*



cogit, non labore vlllo, nec renitendo, nec aliter quàm adharendo. Fertur Actiaco bello tenuisse prætoriam nauim Antonij properantis circumire, & exhortari suos, donec iret in aliã. Ideoq; cæsariana classis impetu maiore protinus venit. Tenuit etiã eius memoria Caij principis ab Astura Antium remigantis quinquiremem quadringentorum remigum viribus propulsam, eiusq; adhærens gubernaculo: feruntq; Cæsarem peculiariter miratum quomodo adhærens tenuisset, nec idem polleret in nauigium receptus. Hactenus ex Plinio. Nec modo quæ ratione carent, sed etiam homines mira edere & non cernentibus incredibilia cùm alij testificati sunt, tum haud dubium reliquit S. Augustinus multis certisq; eius rei positis exemplis. Nouimus, inquit, lib. 14. de ciuitate DEI, cap. 23. hominum quorundam naturas multum ceteris dispares, & ipsa raritate mirabiles, quædam vt volunt de corpore suo facientium, quæ abj nullo modo possunt; & audita vix credunt. Sunt enim qui aures moueant, vel singulas vel ambas simul. Sunt qui totam cæsariem, capite immoto quantum capilli occupant, deponunt ad frontem, reuocantq; cùm volunt. Sunt qui eorum quæ deuorauerunt, incredibiliter plurima & varia, paululum præcordijs cōtrectatis, quod placuerit, integerrimum proferunt. Nonnulli ab imo sine pædore vlllo, ita numerosos pro arbitrio sonitus edunt, vt ex illa etiam parte cantare videantur. Ipse sum expertus sudare hominem solere cum vellet, notum est quosdã flere cùm volunt, atque vbertim lachrymas fundere.



Presbyter fuit quidam nomine Restitutus in parœcia Calamensis Ecclesię, qui quibuscunque volebat, ita se auferebat à sensibus & iacebat similis mortuo, vt non solum vellicantes & pungentes minime sentiret, sed aliquādo etiam igne vreretur admoto, sine vlllo doloris sensu: nec in eo vllus inueniebatur anhelitus. Hęc ibi Augustinus.

*Sphæra Archimedis.*

IAM verò Sphæram illam quam tradit Cicero primo libro Tusculanarum disputationum, & secundo libro de Natura deorum ab Archimede primū, & deinde à Possidonio factam, omnes cœlestiū orbium conuersiones suis motibus clarissime perfectissimeq; representantem, quis humanum ac non potius diuinum aut dæmoniacum inuentum & opus credidisset? Huc etiam referri potest quod Albertus capite tertio libri sui De moribus Animalium commemorat, duos in Germania natos esse pueros, quorum altero iuxta domorum ostia incedente, omnia ostia versus latus sinistrum illius aperiebantur, tametsi clausa essent: idemq; contingebat alteri puero illius fratri, versus latus eius dextrum; & hoc dicit vidisse multos, negatq; id referri posse aliò, quàm in proprietatem occultam quæ vtriq; in eorum ortu indita est à cœlo: quanquam ego vereor ne illud non fuerit verum: aut si fuit, non puto id naturaliter sine interuentu & opera dæmonum fieri potuisse.

*Qualis Magia Persarū.*

SI igitur tam mira sunt naturæ opera; cur nō sapiens reconditori naturalium rerum cognitione vsusq; præditus similia facere posset? Atq; hæc est Magia naturalis, Tales erant apud Persas Magi



Magi (ait Philo in libro, Quod omnis probus sit liber) naturæ scrutatores præ veritatis cognoscendæ studio, qui per otium diuinas virtutes contemplantur clarius, & alios ijsdem initiant mysterijs. Et in libro De specialibus legibus. Veram, inquit, Magiam, hoc est, Perspectiuam scientiam, per quam Naturæ opera cernuntur clarius, vt honestam expetendamq; non plebeij solum testantur, sed etiam Reges regum maximi, præsertim Persici, tam curiosi harum artium, vt regnare non liceat nisi familiariter cum Magis versato. B. Hieronymus exponens secundum Danielis caput: Magi, inquit, sunt, qui de singulis philosophantur, nec malefici sunt, sed Philosophi Chaldæorum, & ad artis huius scientiam reges quoque & principes eiusdem gentis omnia faciunt. Vnde & Magi in Saluatoris nostri natiuitate primi, ortum eius intellexerunt. Huius artis excellenti peritia, censet Philostratus Apollonium Tyaneum mira que de eo narrantur, effecisse, idemq; sensit de illo Iustinus martyr in Quæstionibus ad Orthodoxos, quæstione vigesimaquarta ita scribens: Apollonius, vt vir naturalium potentiarum & dissensionum atque consensionum earum peritus, ex hac scientia mira faciebat, nō auctoritate diuina. Hanc ob rem in omnibus indiguit assumptione idonearum materiarū, quæ eum adiuuarent ad id perficiendum quod efficiebatur. Et Apollonij quidem opera quoniam facta sunt ex scientia rerum naturalium ad corporalem actionē hominum, non euertit DEVS. Sic ibi Iustinus. Huius Magiæ naturalis fiducia ausus est Archi-

*Matth. 2.  
Iustini  
martyris  
testimoniū  
de Magia  
Apollonij  
Tyanei.*



*Archime-  
dis scientia  
potentia.*

*Plutar-  
chus in  
Marcello.*

*Columba  
ligna vo-  
lans.*

*Caput æ-  
neum lo-  
quens.*

*Mira ope-  
ra Boëtij.*

medes admirandum illud theorema ponere.

QUANTVM LIBET onus quibuslibet viri-  
bus mouere: nec posuit modo, sed & apertissi-  
mè demonstraui: & quia id regi Hieroni in-  
credibile videbatur, speculationē illam ad pra-  
xim traduxit, ingentem nauem onerariā quam  
ingens hominū turba, vix maximo labore mo-  
uere poterat, hominibus multis ponderibusq;  
impositis, procul absidens, quieta impellens ma-  
nu, vi quadam multifidæ machinæ, tranquillo  
quasi mari prolaberetur, ad se adduxit. Cumq;  
Marcellus maximo exercitu terra mariq; Syra-  
cusas obsideret; Archimedes ad vrbis propu-  
gnationem, mirabiles terribilesq; omnis gene-  
ris machinas telaq; huius Magiæ naturalis sciē-  
tia adinuenit, quibus tantas hostium strages pas-  
sim edebat, vt Romani incredibili admiratione  
terroreq; perculsi, dicerent se non contra homi-  
nes, sed contra deos pugnare. Quid dicam de  
stupendo illo Architæ pythagorici commento?  
à quo plerique nobilium Græcorum tradunt, &  
apud Aul. Gellium lib. 10. cap. 12. Phauorinus  
Philosophus pro certo confirmat, simulacrum  
columbæ è ligno ratione quadam mechanica  
factum, volasse; ita erat scilicet libramētis su-  
spensum, & aura spiritus inclusa atque occulta  
concitum. Hac etiam arte ferunt Albertum Ma-  
gnum, caput æneum, quod maxima spectantiū  
admiratione loqueretur, fabricasse. Seuerinum  
etiam Boëtium, in epistola quadam siue à Cas-  
siodoro, siue à Theodorico ad eum scripta  
dicitur, huius artis vi, miracula fecisse, hoc  
est, vt metalla mugirent, æneus anguis sibilaret

auce



aves simulatæ dulcissimè canerent, homines ærei in aëre buccinarentur. Verùm de his satis, illudq; ratum & indubitatum sit, esse quandam Magiam naturalem, quam qui tenent (paucissimi autem benè tenent) possunt mira facere, quæ rude vulgus putat opera & auxilio dæmonum fieri: Tum quia opera illa sunt inusitata; Tum quod secreta quadam ratione & alijs occulta fiant. Quamobrem plerique putant eiusmodi homines habere consortium cum dæmonibus, & non nisi eorum ope illa præstare. Talem de se fuisse hominum opinionem, quodam loco scribit Galenus, & Boëtius libro primo de consolatione, prosa quarta, queritur se, propter recôditoris Philosophiæ cognitionem, & quarundam rerum mirabilium effectum, tanquam magicis & maleficis artibus imbutum, fuisse accusatum & damnatum.

MAGIÆ autem naturalis, non humano studio partæ, sed à DEO vel Angelis bonis acceptæ, manifestum est argumentum perfectissima rerum omnium naturalium scientia diuinitus infusa Salomoni: per quam verisimile est, eum mira effecisse, aut certe si voluisset facere potuisset. Iosephus certè libro octauo de Iudaicis antiquitatibus ait, Salomonem instituisse occulta quadam remedia ad pellendos morbos & fugandos dæmones. Incantationes, inquit, composuit quibus morbi pelluntur, & coniurationum modos reliquit scriptos, quibus ita fugantur dæmones, vt deinceps nunquam reuerti audeant: atque id sanationis genus etiã suo tempore apud Iudæos in vsu esse; & se vidisse Eleazarum

*Naturalis  
Magia Sa-  
lomonis.  
3. Reg. 2.*

zarum



zarum Iudæum, præfente Vespasiano alijsque Principibus, multos à dæmonibus vexatos, hac ratione liberaſſe. Modus curationis erat hic: admoto naribus dæmoniacci annulo, ſub cuius ſigillo incluſa erat ſpecies cuiuſdam radicis à Salomone indicatæ, ad eius olfactum, per naſum cōtrahebatur dæmonium, & collapſo mox homine, adiurabatur dæmonium ne amplius rediret, Salomonis mentione facta, & incantationibus eius recitatis. Diſceſſus autem dæmonis ab homine, illud erat indicium, quod iuſſu Eleazari egrediens, vas plenum aqua ibi poſitū, inuiſibiliter euertebatur. Hæc ex Iosepho. Sed proſecto illa ratio eiſciendi dæmonem, non ex Magia naturali, ſed ex ſuperſtitioſa & Diaboli artificio compoſita proficiſcebatur; nec eam credibile eſt inſtitutam eſſe à Salomone, niſi forte poſtquam is DEI gratiam perdidit, in cultum idololatriæ prolapſus. Iuuenis etiā Tobias, mirabilem vim eius piſcis quem in Tigri ceperat, Angelo Raphaele docente, cognouit. nam ſic Tobix dixit Raphael (vt legitur cap. 7. illiº libri) *Cordis eius particulam ſi ſuper carbones ponas, ſumus eius extricat omne genus demoniorum, ſiue à viro, ſiue à muliere, ita vt ultra non accedat ad eos: ſel autem eius, valet ad vngendos oculos, in quibus fuerit albugo & ſanabuntur.* Simili remedio piſcis, Gregorius Turonenſis Epiſcopus, cum puer eſſet, diuinitus admonitus, patrem ſuum à grauiffimo morbo liberauit.

NON NVNQVAM etiam Magiam naturalem diſcunt homines à dæmonibus. Sic enim Magos Pha-



Pharaonis eam didicisse, certum est. Immo ferè, qui hanc Magiam tenent, cum sint homines minimè probi, & Philosophiæ aliarumq; liberaliũ doctrinarum rudes & imperiti, non dubium est, quin vel ipsi eam artem à dæmonibus didicerint, vel ab his quibus eam dæmones tradiderunt. Vix enim vlli mortalium, aut certè paucissimis, nec nisi ijs qui acerrimo fuerint ingenio, & longinqui temporis diligenti obseruatione vñ, talis Magia naturalis cōtingere potest.

## CAPVT IIII.

*AN SIT ALIQUA MAGIA NON naturalis, hoc est, quæ non ad naturam, sed ad dæmones necessariò referri debeat.*

**M**VLTA faciunt Magi, quæ nullo modo effici possunt per causas naturales, sed ea necessariò referri debent ad aliquas substantias incorporeas, quæ occultè cum ipsis Magis & per ipsas operantur. Magi enim nonnunquam faciunt statuas è ligno vel alia materia factas, nullo extrinsecus impellente, moueri ex se motu progressiuo & humano, quin etiam loqui & respondere ad quæstiones de varijs rebus propositas: si id fieret naturaliter, cum natura nunquam det operationem aliquam, nisi dando formam, ex qua illa operatio procedit, supradictæ verò actiones, sint tantummodo animalium perfectiorum, & quædam propriæ hominis, oporteret in illa statua productam fuisse animam sentiētem perfectam, & animam rationalem. At nec huiusmodi



iufmodi animæ poffunt effe fubiectiuè in tali materia, qualem habent illæ ftatuæ, quippe quæ carent vita & fenfu; nec animalia perfecta poffunt generari nifi ex femine à fui fimilibus; nec potelt natura fimul & generare animal perfectum, & perfectam illi magnitudinem dare: Neceffe igitur elt, prædictas operationes ftatuarum, non à natura, fed ab aliquo dæmone, qui intra illam ftatuam latet, proficifci. Deinde, Magi quædam manifeltant occultiffima, & quæ ratione humana nota eis effe non potuerant; veluti furta clam facta, thefauros alicubi reconditos, res quæ in remotiffimis regionibus geruntur, quæ quifq; olim vel dixit vel fecit, denique prædicunt quædam futura; hæc autem opera funt mentis, & quidem fublimioris atque præltantioris, quàm elt humana. Præterea Magi cùm volunt mira illa facere, certis quibusdam veftibus induuntur, ducunt quafdam lineas, defcribunt figuras, pingunt characteres, & alia quædam adhibent, quæ per fe nec vim habent naturalem producendi illos effectus, nec præparandi materiam ad illos producendos, aut accipiendos: non igitur Magi opera illa faciunt per caufas naturales.

AD HÆC, fupra omnis naturæ corporeæ poteltatem elt illud quod nonnunquam faciunt Magi; vt ad eorum præfentiam, & fores & alia loca quæ claufa funt, repente patefiant; interdum etiam fe vel alios repente ex hominũ confpectu fubducunt, quod de Apollonio Tyaneo memoriæ proditum elt: is enim cum fifteretur in prætorio ante Domitianum Imperatorem, repente




repente ex oculis omnium euanuisse dicitur. His accedit quod Magi non faciunt hæc, nisi pronuntiando certas quasdam voces & verba, in quibus totam illi, vel maximam vim artis Magicę ponunt; voces autem & verba, cum ex se non habeant aliam vim quàm significandi, vel quodammodo afficiendi auditum, non possunt esse causa vt aliquid fiat, nisi dupliciter; vel ratione rerum quę illis verbis dicuntur, quę res intellectę ab audientibus, eos variè afficiunt & mouent, præsertim adiuncta decenti conuenientię actionis & pronuntiationis ratione; & hoc modo oratorum & concionatorum verba, mouere solent audientes; sed hic modus mouendi, non nisi ad audientes qui intelligunt, pertinere potest: Vel mouent verba, propter suauitatem modi, quo modulatè & artificiosè cum suauitate & dulcedine auditum afficiunt; qua ratione non solum homines, sed etiam animalia vocibus musicis variè affici & permoueri cernimus; neutrum autem horum reperitur in vocibus Magorum, non igitur per illas voces, tanquam per causas naturales, illos suos effectus producant. Iam verò, cum Magi ad faciendum quod volunt, adhibeant quasdam inuocationes, obtestationes, comminationes, sacrificia, prostrationes corporum, & alia eiusdem generis; quis non liquido cernit hæc non posse referri ad naturam corpoream, ratione & intelligentia carentem, sed ea naturę alicui incorporeę & intelligenti, cuius Magi opem implorant, & sine cuius concursu, quod intendunt efficere nõ possunt, exhiberi?

*Quomodo  
voces pos-  
sunt esse  
causa effi-  
cientes ali-  
quarum  
rerum.*

Postre-



Postremò, ne quis vel ambigendi, vel cauillandi reliquus sit locus, illud meo iudicio omnem tollit dubitationem, quod non solum Magi miranda illa opera per seipfos faciunt, sed quasi quædam dictata tradentes alijs, eadem per illos perficiunt: quin etiam vsu venit quosdam planè ignorantes, an illa essent vel à demone tradita, vel magicis prauitatibus infecta, fidem tamen habentes illis sibi dictatis, eisq; vtentes, mira etiam fecisse; quod apertè demonstrat, facultatem eiusmodi res perficiendi non esse naturalem. Non me fugit, Petrum Apponensem, Cardanum, maxime verò Pomponatium in libro De Incantationibus, eiusmodi opera Magorum, exclusis dæmonibus, ad solas causas naturales conatos esse referre; sed frustra & infelicitè. Verùm eorum opinionem infrà explicabimus & refellemus. Sciendum autem est, hanc nostram sententiam quam hîc docuimus & confirmauimus, ab omnibus Platonicis fuisse probatam & literis traditam; hoc enim sensit Plotinus, Porphyrius, Iamblicus, Proclus: hæc etiam fuit & Pythagoreorum doctrina, immò ante hos omnes idem in Pimandro sensit & docuit Mercurius Trismegistus.



CAPVT



## CAPVT V.

AN SPIRITVS ILLI QVORVM OPERA & auxilio Magi mira faciunt, sint boni, an mali.

SUBSTANTIAS incorporeas quæ fauent Magis, eosq; iuuant, ad illa opera facienda, quæ non sunt per causas naturales, sed excedunt naturæ corporeæ potestatem, non esse bonos Angelos, sed malos, quos trito iam vocabulo Dæmones appellamus, multis sanè firmis manifestisq; argumentis ostendi & concludi potest. Primò, eiusmodi spiritus iubent se à Magis adorari tanquam deos, sibiq; sacrificia fieri; hoc autem est proprium dæmonum, qui honorem diuinitatis, quem à principio affectantes assequi non potuerunt, decipiendis hominibus, aliquo modo obtinere cupiunt. Boni autem Angeli, eiusmodi honores non solum non optant, sed etiam vehementer auersantur. Vnde legimus in Apocalypsi, Angelum quendam prohibuisse ne Ioannes ipsum adoraret, dixisseq; : *Vide ne feceris; conseruus enim tuus sum, &c.* DEVM adora. Deinde Magi sunt homines flagitiosissimi, & artibus magicis abutuntur ad inferendum exitium alijs, hoc est, ad patranda adulteria, furta, homicidia, atque adeo infanticidia: boni autem Angeli, nec maleficis hominibus fauent, & ab eiusmodi sceleribus abhorrent. Posthæc, Magi mul-  
 i miscent mendacia multasq; fallacias, quibus homines circumueniunt, & decipiunt: ad quod Angeli boni cooperari non possunt. Præterea,  
 C Magi

Apoc. 19.



*Quomodo  
Magi Dæ-  
monibus  
imperant.*

*Matth. 12.  
Luc. 11.*

Magi inuocando eos quorum abutuntur opera, minantur illis quædam impossibilia nisi venerint: & cum venerunt, imperant illis, & cogunt ne inde discedant; hoc autem imperium non possunt habere homines in Angelos bonos: habent autem in Dæmones, vel quia superior dæmon, cum quo Magi habent societatem, & fœdus fecerunt, cogit inferiores dæmones parere iussis Magorum; vel simulant dæmones se cogi à Magis, cum tamen id voluntarie faciant, nec ab illis cogi queant, quò facilius decipiant homines, tantam vim & auctoritatem Magorum admirantes, & illis fidem adhibentes. Quod autem Dominus noster argumentatur, se non eijcere dæmones potestate principis dæmonum, quia non potest Satanæ Satanam eijcere; alioqui regnum eius diuideretur, nec diu stare posset; intelligendum est de perfecta eiectione dæmonis ab homine, hoc est, tam ex corpore eius quàm ex animo; vel de eiectione quæ proficiscitur ex odio dæmonis, & desiderio euertendi imperium quod habet in homines. His adde, quia ut benè, inquit Eusebius lib. 5. De præparatione Euangelica cap. 7. vnde potuerunt Magi disce- re verba illa & cæremonias quibus dæmones aduocant, eosq; vel loco, vel anulo, vel vasi, vel statuæ vel alijs rebus adesse cogunt? Vnde scire quibus sacrificijs, libamentis aut suffimentis dæmones auertantur & fugentur, vel oblectentur & alliciantur? & alij quidem dæmones, alijs rebus; vnde, inquam homines hæc discere potuissent, nisi ab ipsis dæmonibus?

Qvii



QVID quod non est credibile, hominē posse imperare Angelis bonis, eosq; vel reluctantes cogere & compellere ad aliquid faciendum; quod tamen Magos facere disertissimis verbis declarauit Porphyrius Philosophus in epistola ad Anebonum Ægyptium, quam Eusebius lib. 5. De præparatione Euangelica capite sexto scriptis suis inseruit; ex ea verò nonnulla quæ ad rem præsentem maximè pertinent, hic adscribam. Proponit autem in ea epistola Porphyrius nonnullas dubitationes circa ea quæ Magi faciunt Dæmones inuocando. Prima dubitatio est, Quomodo Magi inuocant & obsecrant dæmones tanquam superiores, & eisdem tamen tanquam inferioribus imperant, & quod volunt, facere eos cogunt. Secunda: Cur Dij Magorum iubent homines esse iustos, ipsi autem à Magis iussi, multa patrant iniqua & flagitiosa. Tertia: Nolunt illi exaudire Magum, qui nō multis diebus ante se abstinerit à Venere, ipsi tamen iussu Magorum illicitiunt & incitant homines ad turpes & nefandas libidines. Quarta: Volunt Magum inuocaturum ipsos, ante ab esu carniū abstinere; cum ipsi tamen nidore ac sanguine cæforum animalium maximè oblectentur. Quinta: ei qui mortuum tetigit, ad operationes magicas accedere non licet; cum tamen mortuis & cadaueribus animalium res magicæ ferè peragantur. Sexta: Magi minantur Soli & Lunæ & Dijs cœlestibus, dicentes se concisuros cœlum & arcana Isidis edicturos, & Osiridos membra Typhoni tradituros, nisi Dij adueniant & respondeant ipsis; absurdū tamen videtur, Deos quasi

*Dubitatio-  
nes nouem  
Porphyrij  
de ijs qua  
faciunt aut  
dicunt Ma-  
gi inuocan-  
do Dæmo-  
nes.*



infantes, eiusmodi fictis minis & terroribus commoueri. Moueri autem eos istis minis, Chere-  
mon sacer scriba testatur, & hæc esse illa inquit,  
quibus Dæmones maxime coguntur. Septima:  
preces autem & orationes, quibus vtuntur Ma-  
gi inuocantes suos Deos, inanes & ridiculæ vi-  
dentur; sic enim eos compellant: Tu, inquit,  
qui è limo emerfisti, qui sedes in loco, qui nau-  
gio nauigas, qui singulis horis formam commu-  
tas, & in singulis Zodiaci signis commutaris.  
Atq; his precationibus & adiurationibus aiunt  
Deum se hominis visui subijcere. Octaua: Quid  
sibi volunt verba illa barbara, & nihil planè si-  
gnificantia, quibus Magi vtuntur ad deos suos  
aduocandos? nam si ad verborum significatio-  
nem Dij respiciunt, quacumq; voce eadem res  
significetur, mouebuntur: non enim dij sunt  
Ægyptij vel Scythæ, vel illis linguis vtuntur, aut  
illas tantum norunt. Nona: cùm dæmones sint  
supra ordinem rerum sensibilium, quomodo  
possunt rebus sensibilibus vel allici, vel etiam  
cogi? quare aut Magorum malignitate hæc om-  
nia sunt excogitata, qui nostras passiones DEO  
attribuere ausi sunt; aut aliter homines de DEO  
cogitant, quàm rei veritas habeat. Hæc in illa  
epistola Porphyrius. Iamblicus autem, quem  
Simplicius & alij ob magnam peritiam rerum  
diuinarum, cum incredibili studio & religione  
coniunctam, diuum prænominare solent, in li-  
bro, quem De Mysterijs Ægyptiorum scripsit,  
ad supradictas omnes Porphyrij dubitationes  
respondere conatur: sed eiusmodi sunt omnia  
eius responsa, vt mihi quidem videantur esse  
magis



magis incredibilia & absurda, maioribusq; implicata difficultatibus, quàm illę ipsę, quę propositę sunt dubitationes.

SED quæret aliquis, cur Dæmones non nisi *Notabilis dubitatio.* sub certis quibusdam cœli constellationibus, & nō nisi certis quibusdam, vel lapidibus, vel herbis, vel figuris aut alijs signis adhibitis, aduocentur à Magis, nec aliter opera magica fiant? Respondeo, id quidem facere dæmones varias ob causas. Primo vt inducant homines in eum errorem, vt credant esse aliquod numen & diuinitatem in stellis, easq; pro Deo adorent & colant. Deinde, vt simulâdo per stellas multa maleficia, multaq; incommoda & detrimenta inferri hominibus, infamēt eas, & exosas reddant hominibus. Præterea, quia dæmones, cum non nisi per causas naturales operentur, animaduertunt, secundum certas aliquas constellationes, materiam circa quam operari volunt, magis affici & præparari ad effectus illos accipiendos. Hinc fit, vt nonnunquam dæmones secundum incrementa Lunę, maximè quosdam vexent, qui propterea vocantur Lunatici, quos Dominus sanasse dicitur in Euangelio Matthei cap. 4. & 13. cum enim cerebrum hominis, auctore Aristotele, sit omnium corporis partium humidissimum, ideoq; maxime subiiciatur potestati Lunę, quę magnam habet potentiã & vim commouendi humores, in cerebro autem perficiantur actiones interiorū sensuum, hinc fit, vt dæmones secundum incrementa Lunę, maxime perturbent phantasiam hominis, quia vident tunc cerebrum eius ad id esse magis præparatū.



Porro dæmones, sicut dixit beatus Augustinus 21. De ciuitate DEI, cap. 6. alliciuntur herbis, lapidibus, animalibus, carminibus alijsq; ceremonijs, non tanquam animalia cibis, sed vt spiritus signis, ea ratione, vt hæc illis exhibentur in signum diuini honoris, cuius illi sunt cupidissimi. De hoc vide S. Thomam prima parte, quæst. 115. art. 5.

## CAPVT VI.

*QVAE OPERA ADMIRANDA POSSINT facere Dæmones vel per se ipsos, vel per Magos.*

**D**V o sunt hîc ponenda ex sacris literis satis manifesta, vnum est, Dæmones per se ex vno loco in alium moueri, & quidem maxima celeritate. Legimus enim in libro Iob, Satan DE O interroganti vnde veniret, respondisse: *Circuiui terram & perambulauî eam*, & Dominus in Euangelio ait quendam spiritum nequam egressum ab homine quem tenebat, perambulasse per loca arida & inaquosa, & iterû assumptis alijs septem spiritibus nequioribus se, ad eundem illum hominem reuertisse: & Petrus admonet fideles vt sobrij sint & vigilent, quoniam aduersarius eorum diabolus, tanquam leo rugiens circuit, quærens quem deuoret. Alterum quod hoc loco ponimus est, dæmonem non solum posse mouere seipsum, sed etiam alia corpora, ex vno loco in alium transferendo. Id quoque ex sacris literis certum est: Dæmones enim per peccatum non perdiderunt dona naturalia:

*Iob. 1. & 2.*

*Matth. 12.*

*1. Pet. 5.*



turalia: sicut igitur Angeli naturali vi mouent  
 orbes cœlestes, sic Dæmones possunt mouere a-  
 lia corpora: & sicut Angelus ille Prophetā Ha-  
 bacuch capillo capitis apprehensum, ex Iudæa,  
 Babylonem vsq; transportauit, indeq; reporta-  
 uit in Iudæam, ita posset dæmon idem facere;  
 quin imò id eum fecisse certum est: legimus e-  
 nim diabolum, Dominum nostrum tulisse in  
 pinnaculum templi, & in montē excelsū. Nec  
 hoc loco disputandum est, an talis virtus moti-  
 ua dæmonis, sit distincta ab intellectu & volun-  
 tate eius: nam distinctam esse equidē arbitror,  
 licet pleriq; negent. Verū eius quæstionis tra-  
 ctatio aliena est huic loco. Nec definitio nunc  
 quāta sit virtus motiua dæmonis, vel quot cor-  
 pora aut quanta mouere queat & non amplius,  
 id enim incognitum mortalibus puto; existimo  
 tamen in dæmonibus superioribus maiorem es-  
 se hanc vim motiuam, inferioribus verò mino-  
 rem: sicut enim eorum naturę sunt vel perfe-  
 ctiores vel imperfectiores, ita quoq; eorum po-  
 tentiæ sunt vel fortiores vel imbecilliores. Nam  
 quia Angelus est terminatæ speciei & definitæ  
 naturæ & perfectionis; ideo nec potest esse vbi-  
 que locorum, neq; potest quantacunque velo-  
 citate quantumlibet corpus mouere. Præterea  
 sciendum est, duplicem esse dæmonum actio-  
 nem, quæ à Philosophis vocatur transiens, alte-  
 ram immediatam quæ immediatè proficiscitur  
 à dæmone, & hæc est motus localis quo mouet  
 corpora; nam sicut intelligentiæ non per aliqua  
 media instrumenta, sed immediatè mouent or-  
 bes cœlestes; sic dæmones immediatè possunt

*Dan. 14.**Matth. 4.**Duplex a-  
ctio dæmo-  
num tran-  
sientis.*



mouere corpora secundum locum. Altera eorum operatio transiens, est mediata, nempe quæ motionem localem ab ipsis factam cōsequitur: dæmones enim afferendo ex varijs locis & inuicem applicando causas naturales & agentia inuicem & patientia componendo, varios produciunt effectus; qui effectus immediatè quidem existunt ex causis naturalibus, mediate verò à dæmonibus qui illas causas præsentis fecerunt, & materijs quæ ab illis aptæ sunt pati accommodarunt. His positis, quænam opera mira dæmones possint facere, demonstramus.

*Opera quæ  
possunt Dæ-  
mones fa-  
cere.*

*Iob. i.*

PRINCIPIO, per motum localem multa possunt dæmones facere, quæ fidem excedere videantur, quorum nonnulla hic subijciam exempla. Primo possunt ignem ex superiore aëris parte demittere, quo multa consumant & perdant: possunt etiam immittere vehementes & turbulentos ventos, qui magna diruant ædificia, sicut fecisse legitur aduersus Iob: *Cecidit (inquit scriptura) ignis de cælo & tactas oues puerosq; consumpsit: & repente ventus irruit à regione deserti, & concussit quatuor angulos domus, quæ corruens oppressit liberos tuos & mortui sunt.* Potest dæmon grauissimas tempestates & procellas in mari excitare, vel aquas maris ab imo commouendo, vel per concitatissimos ventos. Potest terram magnis motibus concutere, vel immittendo vehementem aliquem spiritum in cauernas terræ, vel in illis inclusum vehementissime agitando. Sic fortasse fieri potuit, quod narrat Philostratus de duobus dolijs, quæ vidit Apollonius apud

Indos,



Indos, quæ aperta, imbres & ventos emittebant; clausa verò eadem cohibebant atq; compescebant. Secundo potest transferre ex vno loco in alium quantumvis remotum, vel homines, vel animalia, vel quæuis alia corpora. Sic Diabolus CHRISTVM tulit in pinnaculū templi & in montem excelsum, & historia Ecclesiastica narrat, Simonem Magum à Daemonibus per aëra euectum esse in cœlum. In historijs etiam Gentiliū traditum est, nonnunquam visos esse serpentes, dracones & homines per aëra volantes; quin etiam Albertus tradit nonnunquam boues seu vitulos pluissē: quod hac ratione factum esse existimandum est. Tertio potest dæmon subito res præsentēs ē conspectu hominum subtrahere, atque ita reddere inuisibiles; sicut Apollonius cum esset in conspectu Domitiani Imperatoris, repente ex oculis omniū excessit, & nisi volumus fabulam fuisse id, quod de Gyge memorat Plato & Cicero, hac etiam ratione dicemus, Gygem cum volebat, potuisse latere oculos præsentium & spectantium, idq; fecisse, non vi & potestate eius annuli quem gestabat, vt illi tradunt, sed potius Daemonum artificio. Quarto potest facere, vt statux vel alię res inanimatę ambulent & incedant more hominum, Dæmone illas mouente, & motum moderante: sic factum est quod ex Philostrato supra commemorauimus, de tripodibus lapideis, & pincernis æreis, qui apud Iarcham præsentē Apollonio, in conuiuio per se mouebantur, & more famulorum ministrantium mensis, & pocula & fercula conuiuii suo loco & tēpore præbebant. Quinto:

C 15

possunt



*Statua lo-  
quentes  
more hu-  
mano.*

possunt facere, vt statuę, arbores, animalia lo-  
quantur more humano; qua ratione fieri po-  
tuit, quod narrat Valerius Maximus lib. 1. cap.  
vlt. de simulachro Iunonis Monetę, quod Ro-  
mani Veijs Romam transferre religionis ergo  
cupiebant. Cũ enim quidam militum per io-  
cum interrogaret illud simulachrũ an Romam  
migrare vellet; velle se respondit: qua voce au-  
dita, iusus in admirationem & religionem ver-  
sus est. Simulachrum etiam Fortunę muliebris,  
à matronis Romanis cum æde sua consecratũ,  
bis locutum esse, idem Valerius auctor est, his  
verbis: Ritẽ me matronę vidistis, ritẽ me con-  
secraftis. Et Caio Volumnio & Seruio Sulpitio  
Cos. dicitur, bas humano sermone locutus;  
bello etiam Punico secundo fertur Gneo Do-  
mitio, bouem dixisse: Caue tibi Roma. Huc  
quoque pertinet quod narrat Philostratus, cum  
Apollonius esset cum Gymnosophistis Æthio-  
pum, quorum princeps erat Thespecion, eius  
tacito iussu, arborem vlmum humana voce A-  
pollonium salutauisse. Nec putandum est vel  
leones, vel arbores, vel alias res inanimas modo  
hominum loqui posse, sed Dæmonem esse qui  
sermone illos articulatos & humanis similes in  
aëre formet iuxta, vel intra illa corpora: Sic An-  
gelus qui occurrit Balaam ei mortem intentans,  
fecit vt eius asina loqueretur: nam etiam vide-  
mus esse quosdã qui per organa vel alia instru-  
mẽta musica, tanto artificio modificare ac tem-  
perare possint flatũ quo illa pulsantur & reso-  
nant, vt voces & cantus hominũ emulari & red-  
dere videãtur. Sexto; possunt facere vt animalia  
mirabili

*Num. 22.*



mirabili quadam ratione se ipsa moucant, & quædam agant, quæ sine intelligentia & ratione, nec ea quidem vulgari, sed admodum solerti & prudenti minimè fieri posse videatur: tale est quod narrat Valerius lib. 1. cap. 8. quod est de Miraculis, de serpente illo Æsculapij, quem Romani quasi volentem & intelligentem, & quædam rationis ac religionis, nec non diuinitatis cuiusdam signa dantem, Epidauro Romam aduexerunt. huius etiam generis est quod narrat Philostratus lib. 5. cap. 15. de leone quodam mansuetissimo, qui loro, veluti canis, in Ægypto per vrbes ducebatur, contrectantibus se non modo non nocens, sed etiam blandiens; qui ad genua Apollonij modo supplicantium hominum humiliter se abiecit: quem aspiciens Apollonius, ad eos qui aderant, Hic, inquit, leo me rogat vt vos doceam hominis animam illum habere: fuit enim hic quondam Amasis Ægypti rex. quæ simul atque dixit Apollonius, leo miserabiliter fremens, lachrymabilem rugitum edidit, tum dentibus infrendens, cum plorare videretur, vbertim lachrymas fundebat. Hunc, inquit Apollonius Leonem, cenfeo Leontopolim mittendum, & in templo collocandum: regem enim in regiam belluam conuersum, tanquam, egenum mendicare indignum iudico. Hæc ille, quæ omnia arte magica Apollonij & opera Daemonum facta sunt, quod facilius error Pythagoricus de transmigratione animarum humanarum in varia bestiarum genera, hominibus persuaderetur. Septimo: quod in historijs Romanorum legitur, & à nobis supra est commemoratum,

*Fabula Leonis, Apollonij.*



ratum, Claudiam mulierē Vestalem, quod suam pudicitiam probaret, nauim ita hærentem in Tiberi, vt multi eam homines loco mouere non possent, Zona sua quo volebat, nullo labore traxisse: Et Tucciam item Vestalem, aquam Tiberi hauſtam, ad Capitolium vsque cribro tulisse: hæc, inquam, facta sunt opera Dæmonis, qui & nauim occultè promouebat, & aquam ne per cribrum dilaberetur, suspensam tenebat. Octauo: potest facere, vt subitò globus aliquis igneus vel flamma appareat, vel circum aliquem fulgeat; sicut Plinius lib. 2. cap. 107. Seruio Tullio dormienti, ex capite flammam emicuisse; & L. Martio in Hispania interemptis Scipionibus cōcionanti, & milites ad vltionem exhortanti, arfisse simili modo. Nono: potest aquas fluminū dirimere & eas retro pellere, ita vt flumina retro fluere videantur: quod Plinius suo tempore accidisse scribit lib. 2. cap. 103. his verbis: Amnes retro fluere, & nostra vidit ætas Neronis principis annis supremis, sicut in rebus eius retulimus. Decimo: potest Dæmon varia corpora variè formata assumere, eaque mouere, ita vt homo vel Angelus, vel leo, aut aliud quoduis animal videatur; idq; facit vel ad exterrendos, vel ad decipiendos homines. Legimus enim, B. Antonio dæmones in varijs animalium formis, & quidem horribilibus ac terrificis, ad eū perterrefaciendum & à sancto proposito remouendum apparuisse. Sic accipiendum est quod scribit Valerius Maximus lib. 1. cap. 8. Romanis apud lacum Reginum pugnantibus cum acie Tusculanorum, Castorem & Pollucem Romanarum

*Amnes retro fluere.*  
*tes.*



narum partium propugnatores, visos hostiles copias penitus fudisse: & Publ. Vatinio noctu urbem petenti, obuios esse factos duos iuvenes, excellenti forma, albis equis infidētes, nuntiantes illo ipso die Persam regem à Paulo fuisse captum: quod ita euenisse postea compertum est. Vndecimo: potest Dæmon representare varias figuras cuiuslibet rei, vel auri, vel gemmarum, vel dapum, vel hominum. Nam sicut fictores sculptoresque ex materijs sibi subiectis, varias formas & figuras rerum effingunt, & interdum tales, vt veræ ac naturales videantur, sicut traditur de illis vuis à Zeuxide pictis, adeo perfecte naturales vvas reddentibus, vt eas ab auiibus appetitas esse dicatur. Sic Dæmon ex ære condensato vel alia quauis materia, cuiuslibet rei figuram effingere potest: cuius rei supra ex Philostrato exemplum posuimus, lamix cuiusdam quæ Menippo quem decipere volebat, maximas opes, pretiosa ornamenta, magnā copiam vini & epularum ostentabat; quæ Apollonius ostendit esse tantum inania simulachra & imagines earum rerum quæ videbantur. Duodecimo: possunt concitare & conturbare humores, vel spiritus qui sunt in corpore humano, disiungere etiam atque distrahere partium compages & connexiones, qua re grauissimos morbos & acerbissimos cruciatus efficiunt; sicut in ijs qui à Dæmonibus torquentur, cernere licet. Decimotertio: possunt etiam spiritus animales, qui interiorū sensuum functionibus peragendis inseruiunt, ita mouere & conformare, vt res quasdam vel præteritas, vel præsentes,

vel

*Plinius li-  
bro 35. cap.  
10.*



vel futuras representent: possunt etiam eosdem spiritus, in quibus insunt species rerum sensibilibus, extrinsecus per sensus exteriores impressæ, usque ad ipsos sensus exteriores deuoluere, ita ut etiam qui vigilant, videantur sibi aliquid videre, audire & facere quod reuera non est: hoc enim videmus accidere phreneticis: quod igitur homini vi alicuius morbi contingit, dubitandum non est etiam id dæmonum artificio in homine effici posse. Decimoquarto: possunt dormientium phantasmata mouere & conformare ad representandum aliqua futura quæ demones cognoscunt esse futura, ut ita decipiant homines fidem habentes somnijs, & ex ipsis actiones humanas vel suas, vel aliorum cognoscere & dirigere velint: atque hinc quidē ortum duxit diuination per somnia, cuius diuinationis exempla sunt quamplurima apud Valerium Maximum lib. 1. & apud Ciceronem in libris de Diuinatione. Simili Dæmonum artificio, fidem & veritatem inuenit apud Gentiles Augurum & Aruspicum disciplina, per volatū vel garritum auium diuinans, vel per inspectionem extorum animalium cæforum, vel per electionē sortium: eiusmodi enim rebus Dæmon se ingerit & immiscet, quod mentes hominum superstitionibus imbuat, & varijs erroribus implicet. Nam quod in Romanis historijs traditur, in Victimæ optimæ quam Iulius Cæsar immolauerat, extis non esse inuentum cor, & in alijs vel iecur, vel principem aliam partem corporis nō esse repertam, non alia ratione quàm Dæmonis occulta vi, partes illas ablatas esse credendum est. Decimoquinto:



quinto : possunt Dæmones sensus exteriores immutare & seducere dupliciter, Primo extrinsecus, obijciendo sensibus varia sensibilia non vera, hoc est, non talia qualia videntur, sed solas eorum imagines & simulachra; vel intrinsecus commouendo spiritus & humores, quorū commotione etiam sensus exteriores variè afficiuntur & turbantur, vt non rectè iudicent de suis obiectis; id quod cernimus sensibus exterioribus phrenericorum accidere. Decimosexto : possunt varias passiones vel amoris vel odij, vel timoris vehementer excitare in homine; idq; facere dupliciter, vel obijciendo species rerum, quæ ad tales passiones excitandas plurimū valent; vel interius mouendo phantasmata ad similes res representandas, vel agitando & accendendo humores qui sunt harum passionū materia, nimirum vel sanguinem, vel atram aut flauam bilem. Atque hæc sunt & alia horum similia quæ Dæmones per motum localem facere possunt, & interdum quidem faciunt: neque enim quæcumque possunt facere, licet eis facere, sed quantum eis per diuinam prouidentiam permissum est. habent enim potentiam à DEO restrictam & quasi ligatam, quam eis interdum laxare solet DEVS, vel ad exercendos bonos, vt aduersus Iob; vel ad puniendos malos vt aduersus Achab & Prophetas eius. Sicut enim Dæmones, permissu DEI, ingressi in porcos, præcipitarunt eos in mare: sic homines in omnia malorum tam culpæ quàm pœnæ genera deturbarent; si eis DEVS quantam vellent potentiae ac mālitiæ suæ exercendæ potestatem faceret.

PER

*Iob 1. 2*  
*3. Reg. 22.*  
*supra 18.*



PER alteram porrò actionem Dæmonum, quæ non est motus localis eorum, sed eum consequitur, hoc est, per actiones causarum naturalium, quas Dæmones inuicem applicarunt & temperarunt, mira quoque Dæmones possunt efficiere. Sunt enim singulares quædam virtutes occultæ & ignotæ hominibus, sunt, inquam, in certis quibusdam aquis, terris, succis, gemmis, lapidibus, herbis, lignis, animalibus, & in ipso hominis corpore mirabilium ac penè incredibilium operum effectrices: quarum rerum exempla, supra tractando tertiam quæstionem, nonnulla posuimus, sed plurima reperiuntur apud Solinum, Plinium & Albertum in libris de Mineralibus & Animalibus. Hæ virtutes quibus in rebus naturalibus insint, vbi locorum lateant, quibus cum rebus componi & misceri ac temperari debeant, quo tempore tempestiuè & opportunè ad operandum adhiberi oporteat, notissimum est Dæmonibus; quas etiam vndecumque & quocumque voluerint, maxima facilitate, celeritateq; clàm homines transferre possunt. Huiusmodi autem effectus, quatuor ob causas sunt hominibus admodùm mirabiles. Primo quia sunt noui & inusitati. Secundo quia modus quo Dæmon illos molitur, est occultus & inuisibilis. Tertio quia sicut homines variè temperando & accommodando res naturales possunt aliquos effectus producere, quos nonnunquam per se causæ naturales produxissent, sicut patet in arborum insitionibus, in distillationibus aquarum, in ciborum & condimentorum confectionibus, & in medicamentorum



torum compositionibus; sic Dæmones, effectus aliquos singulares, per causas naturales possunt producere, quos ipse per se nunquam produxissent. Quarto quia ut inquit S. Thomas 3. libro aduersus Gentes, cap. 103. & prima parte, quæst. 110. art. 2. ad 3. cum Angeli vel Dæmones adhibent causas naturales ad effectus aliquos procreandos, utuntur eis tanquam instrumentis, non secus quam medicus utitur herbis ad sanandum; ex instrumento autem procedit effectus, non tantum virtuti eius respondens, sed etiam ea superior & præstantior, nempe respondens virtuti principalis agentis à quo mouetur ad operandum illud instrumentum; quemadmodum securis non solum secat, sed etiam facit lectum vel mensam, vel hominis statuam, ut est instrumentum hominis ex arte operantis: & calor naturalis qui est in semine, vel in animali, non solum calefacit, rarefacit, aut segregat, sed etiam generat sanguinem carnes & ossa, in virtute animæ vel animalis cuius est instrumentum. Sic etiam causæ naturales interdum producunt effectus præstantiores suis ipsarum virtutibus, ex eo quod sunt instrumenta Angelorum vel Dæmonum à quibus mouentur & reguntur. Posset igitur Dæmon plurimos morbos arte medicinæ quam homines callent incurabiles, magna celeritate ac facilitate sanare: tum quia nouit optimè omnes morborum etiam abstrusorum causas & affectiones; tum quia scit omnia genera remediorum, & idoneam eorum applicationem; sed non omnes tamen posset sanare, quia sunt morbi aliqui simpliciter incurabiles.

D

CAPVT



## CAPVT VII.

QVAS RES DÆMON NEC PER  
*Magos, nec per se ipsum possit effi-  
 cere.*

PER motum localem, qui est immediata eius  
 operatio transiens, multa non potest facere  
 Dæmon. Primo enim, vt inquit S. Thomas in  
 Quæstionibus de Potentia, quæst. 16. art. 8. Et 3.  
 libro aduersum Gentes, cap. 108. non potest de-  
 struere aut subuertere ipsum vniuersum; sunt  
 enim Dæmones partes vniuersi, pars autem non  
 habet vim atque potestatem in totum cuius est  
 pars, & vt inquit Paulus ad Hebr. 2. *Non subie-  
 cit DEVS Angelis orbem terre.* Nec possunt peruer-  
 tere ordinem vniuersi, cum auctore Aristotele,  
 bonum vniuersi sit ordo: Non possunt item  
 perturbare, vel suis locis commouere principes  
 partes mundi, ex quibus eius integritas coale-  
 scit. Non possunt sistere cælum vel motum eius  
 in contrarias partes agere. Non possunt elemē-  
 tum aliquod ex vno loco in alienum transferre.  
 Non possunt facere vt detur vacuum, cum va-  
 cuum tollat coniunctionem, connexionem atq;  
 subordinationem omnium partium vniuersi, in  
 quo eius conseruatio atque gubernatio consi-  
 stit. Dixi non posse Dæmonem eiusmodi res  
 facere, vel simpliciter, vel secundum po-  
 tentiam ordinariam eis à DEO concessam, &  
 quam eis concedi poscit æquissima diuinæ pro-  
 uidentiae ratio. Et cum Dæmones habeant  
 vim motiuam definitam, alij quidem maiorem,  
 alij



alij verò minorem, non possunt quantumlibet corpus, quantalibet velocitate mouere, ne dum in instanti. Non possunt facere vt duo corpora sint simul in eodem loco, vel vnum corpus in duobus locis simul, vel vt vnum penetret dimē- siones alterius. Nec potest Dæmon distans à cor- pore, illud mouere secundum locum, quia mo- uens & mobile debent esse simul: alioqui posset mouere per vacuum, & per quantamcunq; di- stantiam. Non potest transferre corpus de ex- tremo ad extremum, & non per medium.

MVLTA quoque sunt, quæ per alteram actio- nem Dæmonum quam mediatam diximus, cu- iusmodi est naturalis alteratio, corruptio, gene- ratio rerum naturalium, non possunt à Dæmo- nibus effici. Non enim potest Dæmon imme- diatè producere vllam formam substantialem vel accidentalē; cum enim sit incorporeus, non potest immediatè alterare materiā corpoream, vnde formæ naturales educuntur. Secundo, non potest aliquid creare ex nihilo, tum quia id re- quirat infinitam virtutem actiuam, qualē DEVS solus habet; tum quia nec motus localis Dæmo- nis, nec operatio quam per causas naturales exercet, in nihilo recipi, aut circa nihil versari possunt. Tertio, non potest ex quolibet facere quodlibet. Quarto, nec per quamlibet causam vel instrumentum potest quemlibet effectum producere: sicut medicus non potest per quam- libet medicinam, quemlibet morbum sanare, nec artifex per quæuis instrumenta, quodcunq; voluerit opus perficere: atque hoc est quod Au- gustinus compluribus locis docet, nec Dæmo-



nes nec Angelos esse creatores rerum, nec posse transmutare formas rerum, nec materiam corporalem ad nutum illis obedire. Quinto, non possunt Dæmones producere formas substantiales non præuijs alterationibus & præmissis dispositionibus. Sexto, nec possent eas in instanti, aut quantumlibet paruo tempore producere. Septimo, non possunt quamlibet rem naturalem immediatè in quamlibet alià transmutare, etiam adhibendo causas naturales. Octauo, non possunt animalia perfecta sine semine producere; quare si visi sunt vnquam vel ex lapidibus & lignis producere equos vel leones, vel ex nubibus pluere vitulos, non est putandū sic eos fuisse generatos, sed vel aliunde inuisibiliter per Dæmones illuc translatos, vel non fuisse vera animalia, sed eorum tantum imagines & simulachra cernentium oculos fallentia. Nono, nec potest animal producere subitò secundum perfectam magnitudinem & virtutē eius: deniq; quod superat vires agentium naturalium, quodq; naturali eorum dispositioni & ordini repugnat, & ad quod virtus agentium naturalium nullo modo se extendit, id fieri à Dæmone nequaquam potest. Decimo, non potest peruertere atque immutare ordinem qui est inter formas & dispositiones rerum naturalium, vt possit posteriores inducere non inductis prioribus, aut extremas non inductis medijs. Vndecimo, non potest mortuos ad vitam reuocare propter causam suprascriptam. Duodecimo, non potest impedire ne agens naturale habens omnia requisita ad agendum, non agat. Disputari posset



posset hoc loco an vlla res naturalis habere possit vim in Dæmones, expellendo eos, vel etiam actiones impediendo, propter id quod dicitur in libro Tobia, cap. 6. & 8. de iecore cuiusdam piscis cuius fumo fugabantur Dæmones in perpetuum, & de melodia Dauidis qua expellebatur spiritus malus à Saule. Vide 1. Reg. cap. 16. & 4. Regum, cap. 3. Lyranum & Burghensem super primum Regum, cap. 16. & ibidem Tostatum quæst. 40. Vide Iosephum octauo Antiquitatum de radice Salomonis, cuius adoratu Dæmon exibat per nares eius hominis quem tenebat. Verum hac de re nostram lector disputationem & sententiam reperiet in alio libro qui hunc proxime sequitur, & in quo eam quæstionem tractamus explanantes illa verba quæ sunt in Cantico trium puerorum: *Benedicite cete & omnia quæ mouentur in aquis, Domino.*

## CAPVT VIII.

*AN OPERA MAGORVM SINT VERA  
miracula, & quomodo à veris miraculis differant ac dignoscantur.*

**A**D MIRANDA Magorum opera non solum Ethnici, sed etiam nostri Theologi interdum vocant miracula, vel quia verorum miraculorum sunt simillima, vel æstimatione hominum, quod ea ipsi nec facere, nec quemadmodum facta sint intelligere possunt, non naturæ, sed diuinitatis opera existimantium. Et sanè nonnulla faciunt Magi in speciem non dissimilia



*Exod. 7.*

lia eorum quæ faciunt sancti : namq; Magi Pharaonis similiter vt Moses, & virgas suas vertierunt in serpentes, & aquam mutarunt in sanguinem; & magnam ranarum vim subito produxerunt. Sanant interdum Magi ægrotos, & Dæmones ex corporibus hominum eijciunt. Nec tamen hæc operū similitudo facit vt Magorum opera vera sint miracula; alioquin miraculum non esset idoneum declarandę probandęq; Deitatis atque veritatis argumentum; quare ratio fidei & doctrinæ Christianæ, quæ miraculis tanquam veris diuinæ potentia sigillis obsignatur, & quasi quibusdam fulcris quodammodo sustinetur, omnino periret. Docere igitur conuenit hoc loco, cur eiusmodi Magorum facta non sint miracula, & quibus rebus differant, quibusue notis atque insignibus à veris miraculis internoscantur.

*Quid sit  
miraculū.*

TRIPLICITER igitur potest intelligi aliquid esse miraculum. Primo simpliciter & absolute, nempe comparatione cuiuslibet naturæ; hac significatione, nullum planè est miraculum: nihil enim est, quod diuinæ potētia & sapiētia comparatione, miraculū dici queat. Nam miraculū alicui dicitur, q̃ eius & facultatē & intelligentiā excedit: DEVS autē nihil est quod admirari possit, quippe cum & causas omnium quę sūt, optime nouerit, & ipse princeps causa sit efficiēdi omnia. Nam qui per ludum & iocum ( vt est in Prouerbis Salomonis ) ex nihilo mundum condidit, quid ei magnum, ne dum miraculū esse queat? cum vt est apud Esaiam cap. 40. & in libro Sapientia, cap. 9. Omnes gentes totusq; terrarum orbis

*Prouerb. 8.*



orbis apud ipsum fit tanquam gutta roris antelucani, & quasi pulvis, & tanquam inane & nihil. Deinde potest appellari miraculum respectu hominum, qui quæ sunt ipsis inusitata, & quorum causas ignorant, quoniam ea maximè admirantur, dicunt miracula: qua ratione non modo Dæmonum & Magorum, sed etiam sapientum hominum inuenta quædam noua, & artificiosa opera, qualia fuerunt illa Architæ & Archimedis, quæ supra cōmemorauimus, miracula nominantur. Sed verè ac propriè miraculum, dicitur opus quod ideo verè ac meritò mirandum est, quia omnis naturæ creatæ vim atque potestatem excedit. Hoc autem multis modis potest euenire: namque excessus naturæ creatæ, vel est in eo quod fit, quale nullo modo natura potest facere; cuiusmodi est, vt duo corpora simul sint in eodem loco, & se permeent, vel vt corpus humanum euadat immortale, impassibile & gloriosum: atque hæc tenent primum locum & gradum in miraculis. Vel excessus est non in eo quod fit, sed in eo velex quo vel in quo res fit: potest enim natura producere aurum vel arborem, sed non ex nihilo; potest dare vitam, sed non mortuo; potest item facultatem videndi largiri, sed non nato cæco: & hæc secundum locum in miraculis tenent. Vel excessus nec est in eo quod fit, nec in eo ex quo aut in quo fit, sed vel in modo, vel in ordine, vel in alia quapiam circumstantia, alijsuè rebus cum quibus omnibus naturaliter opus illud fit; Exempli causa, potest medicus sanare agrotum, verum non subitò, nec absq; medicina: potest

*Tres gradus verorum miraculorum.*



*Quinque  
differentia  
verorum  
miraculo-  
rum à fal-  
sis & simu-  
latis.*

Magus vel Dæmon, vel etiam natura ex ligno  
producere serpentem, verum non immediate:  
atque hic est infimus miraculorum gradus & lo-  
cus. Sed quia hæc breuiter diximus, vereor ne  
obscurè dicta sint; quare quò melius intelligen-  
tur, latius explicabuntur. Dæmonum & Mago-  
rum miracula non vera, differunt à veris mira-  
culis, quæ in scripturis & historijs Ecclesiasticis,  
à seruis D E I facta legimus, his quinque modis;  
Dignitate virtutis efficiētis, Qualitate eorum  
qui faciunt, Diuersitate factorum, Modo facien-  
di, & Fine cuius gratia sunt vera miracula, cum  
(vt supra diximus) omnis naturæ creatæ vim  
exuperent, solius D E I potestate possunt effici:  
nam quamuis per Angelos vel seruos D E I fieri  
videantur; illi tamen non agunt virtute sua, sed  
D E I cuius sunt administri & tanquam instrumē-  
ta. Magi autem opera sua faciunt, vel virtute  
quarundam rerum naturalium quibus vtuntur  
occultè; vel opera Dæmonum, qui clām Magis  
auxiliantur. Vera miracula licet interdum faci-  
ant etiam homines mali; rarò tamen, nec nisi ad  
confirmationem veritatis, & diuinæ virtutis de-  
clarationem: ferè autem magi homines sunt  
flagitiosi & malefici, quos proinde diuinis hu-  
manisq; legibus consulere & adire prohibemur.  
Quæ faciunt Magi, vel sunt tantum phantastica  
& simulata, & ideo nec diuturna; vel sunt perni-  
ciosa, vel inutilia: vera autem miracula, sunt o-  
pera solida & vera, vtilissima hominibus, & non  
nisi magna aliqua necessitate & vtilitate facta.  
Magi, opera sua faciunt, vel per causas natura-  
les, vel ope Dæmonum, vtuntur multis præsti-  
gijs,



gijs, mendacijs, ludificationibus hominum, figuris, characteribus, verbis vel nihil, vel absurda significantibus, alijsq; superstitiosis ceremonijs; miscentq; sacra profanis: namq; nonnulla verba sacra quæ vsurpant, adiunctis superstitiionibus foedant & contaminant. Docent enim ea dici debere sub certo quodam constellationum situ, certoq; loco & tempore, toties signo crucis facto, tot candelis accensis adhibitis, vel filis, aut velis, aut chartis, quas vel pueri vel virgines tantum tetigerint: adhibent etiam quædam, quæ nihil prorsus ad effectum producendum pertinent, sed ridiculam habent vanitatem. dicunt enim oportere tali hora & toties, & tali aqua lauiare faciem, radere capillos; hac, vel illa veste indui. Sed quod impietatis plenissimū est, sanguinem ex humano corpore mittunt, eoq; libamina quædam consecrant, nomina quorundam demonū vsurpant, quibusdam animalibus familiariter vtuntur, & cum eis colloquūtur, Dæmonibus sacrificant, nomen & fidem CHRISTI abiurant, prohibent homines signare se signo crucis, & alia faciunt partim superstitiosa, partim ridicula, partim penitus execranda. Nihil tale sancti faciunt edendis miraculis, sed vel interiore vel etiam exteriori supplicatione & inuocatione diuinæ virtutis, vel facto signo crucis, vel aliquibus verbis sacris recitatis, miracula operantur. Ad extremum, cur vel Dæmones vel magi faciant illa sua miracula, nō est obscurum; nimirum vel lucri, vel gloriæ & honoris cupiditate, sibi diuinum nomen & cultum aucupantes; vel vt veritatem peruertant & falsitatem



tem hominibus persuadeant; vel ad patranda maleficia, veluti furta, adulteria, homicidia. Sancti autem faciunt miracula, non sua causa, cum & diuitias contemnant, & honores fugiāt; sed vt DEVM honorent, Ecclesiam ædificent, hominesq; non solum corpore, sed multo etiam magis animo iuuent. Qui igitur sanæ mentis est, & studiosus veritatis amatorq; virtutis, non erit ei difficile vera miracula à falsis discernere: qui autem flagitiosè viuit, & CHRISTI doctrinam odit, nec studio veritatis, sed vanæ curiositatis cupiditate miracula quærit; is iusto DEI iudicio permittitur, vt quia veritati consentire & acquiescere noluit, circumueniatur mendacijs & falsis miraculis persuasus, peruersam doctrinam falsaq; dogmata, pijs verisq; repudiatis, amplectatur. Hoc est enim quod docuit beatus Paulus in 2. epist. ad Thessal. cap. 2. præmonēs venturum Satanam vel Antichristum in omni virtute, in signis & prodigijs mendacibus, & in omni seductione iniquitatis; nō quidem omnibus, sed ijs qui charitatem veritatis non receperunt, vt salui fierent. his enim mittet DEVS operationem erroris vt credant mendacio, & iudicentur omnes qui non crediderunt veritati, sed consenserunt iniquitati.

## CAPVT IX.

## QUOTVPLEX SIT MAGIA.

**V**ARIAS Magiæ species, ne hanc artem in totum vel commendemus, vel damnandā execrandamq; existinemus, & ne hoc institutū tracta-



tractationi desit, vel tantum indicare conuenit. Ac primò, quam alij Magiæ varietatem tradiderint, ostendamus. Plinius lib. 30. cap. 2. complures Magiæ species ab Osthane principe eius *Varia spe-* artis doctore traditas esse commemorat. Nam- *cies Magiæ.* que, ait, & ex aqua, & ex sphæris, & ex aëre, & stellis, & lucernis ac peluib<sup>9</sup>, securibusq; & multis alijs modis, diuina promittit: præterea umbram, inferorumq; colloquia. Hæc ibi Plinius. Sed Iamblicus in libro suo de Mysterijs Ægyptiorum, Proclus in libro de Sacrificio & Magia, & Porphyrius in libro de Sacrificijs duplicem faciunt Magiam, sicut etiam ex Porphyrij doctrina refert beatus Augustinus lib. 10. de Ciuitate DEI, cap. 9. Alterum vocant Theurgiam, nempe bonam & laudabilem, qua certis quibusdam hostijs & sacrificijs, munditia quadam animæ & corporis alijsq; sacris cæremonijs, bonos ac beneficos dæmones inuocant, quorum afflatu & auxilio, & occulta manifestant, & futura prænunciant, & mira edunt opera, quæ supradicti scriptores miris laudibus in cælum efferunt. Alteram appellant Goëtiam, & Necromantiam quæ mortuos excitat & consulit, & per eos responsa de rebus occultis vel futuris reddit. Dicitur Goëtia à planctu, quo circa mortuorum sepulchra eorum animæ ex inferis euocantur: Necromantia verò, quia sit diuination ex mortuis euocatis petita. Suidas autem distinguit Magiam, quam ait Persarum esse inuentum, in Goëtiam, Magiam proprie dictam, & Pharmatiam. Magia, inquit, est inuocatio Dæmonum, scilicet beneficorum ad aliquod bonum



num conficiendum; cuiusmodi Apollonij Tyanei prædictiones fuerunt. Goëtia fit per coactionem & inuocationem mortuorum; sic enim dicta est à planctu qui fit circa sepulchrum. Pharmatia verò fit, cum aliquid porrigitur alicui sumendum ore, quod mortem ei sit allaturum; vel vehementes aliquas perturbationes & mutationes, aut corporis aut animi in eo fit effecturum, certis incantamentis præparatum. Hæc Suidas.

N O B I S autem omnes Magiæ species hac ratione & ordine distingui posse videntur. Magia, alia est Naturalis, quæ per res naturales singulari quorundam hominum artificio adhibitas mira facit: Altera est non naturalis, quæ Demonum inuocatione & ope utitur ad operandum. Hæc in Theurgiam & Goëtiā & Necromantiam, de quibus paulò ante diximus, rectè diuiditur. Nam si quæ sunt aliæ, ad has species commodè reuocantur. Illa, quam naturalē diximus, partim est physica, cui<sup>9</sup> nomine medicinā etiā complectimur, quæ circa occultas rerū naturalium virtutes, rerū mirabilium effectrices, versatur; partim est Mathematica; cuius excellenti peritia, quàm mira fecerint Architas & Archimedes, supra cōmemorauimus. Rursus Magia tam naturalis, quàm non naturalis, bipartito diuiditur: altera enim habet veros & naturales effect<sup>9</sup>; altera simulatos tantum, nec tales reuera quales videntur: hanc vno vocabulo Præstigiaticem appellamus, suis enim præstigijs adeo præstringit & eludit sensus humanos, vt faciat videre quæ non sunt, & non videre quæ sunt; id<sup>3</sup> vel interuen-



teruentu & adminiculo Dæmonum, vel operatione naturalium agentium, vel incredibili tractu atque agitatione manuum. Itaque qui edit panem, videtur farinam spueri: qui vinum bibit, per frontem aut iugulum id reijcere; videntur gladij vorari; ingens vis euomi acuum minorum, & zonularum, quarum rerum circulatorum miri sunt artifices. Hæc diuiditur in Opticam, & Pharmaticam: illa, manuum, digitorum aliarumq; partium corporis incredibili agilitate & motione, defixum in res obtutum spectantium frustratur; hæc collyrijs, suffumigationibus, alligationibus, potionibusq; sensus interiores & exteriores ita perturbat, vt secus quàm reuera est, iudicent de sensibilibus exterioribus. Vtitur etiam illa prior laminibus, annulis, imaginibus, speculis vario situ varioque modo positis & transpositis.

MAGIÆ porrò Naturali, quidam duas alias species adiungunt, alteram vocant Astronomicam, alteram Cabalisticam, quæ an sint meræ nugæ & quorundam hominum commenta, an reuera aliquid solidi habeant & præstent, nunc paucis diiudicandum est. Astronomicam appellant, quæ certas quasdam imagines & figuras, annulos, sigilla, statuas & alia quædam horum similia fabricatur, in quibus, eius cultores & defensores affirmant, cœlestium corporum virtutes & influxus recipi, receptosq; miros effectus præstare. Sed hæc vana sunt, nec modo à christiana veritate & pietate, sed etiam à philosophica ratione & disciplina longè remota. Virtus enim cœlestis per se vniuersalis est & indeterminata

*Contra  
Magiam  
Astronomicam.*



nata ad hunc vel alium quemlibet effectū producendum; determinatur autem per causas naturales particulares: Illæ autem imagines & figuræ astronomicæ, non sunt causæ naturales, nec habent vim, aut efficiendi quippiā, aut præparandi materiam ad hunc vel illum effectum recipiendum. Deinde cœlum naturaliter operatur; illæ autem imagines sunt ingenio & artificio hominū inuentæ, & pro eorum arbitrio adhibitæ; non igitur per illas, virtus cœlestis modificari aut determinari potest. Postea, lignum quocunque modo figuretur, non potest in se recipere immediatè formam equi vel leonis; nec vitrum aut aurum formam plantæ: multo igitur minus huiusmodi materiæ, propterea quod ab ipsis Astronomis variè figurentur, idoneæ habilesq; reddentur ad certas quasdam virtutes siderum recipiendas, & ad aliquos mirabiles effectus producendos. Adhæc, quæ est naturalis conuenientia illarum Astronomicarum imaginum cum cœlo? neque enim est vel secundum figuram, vel secundum naturam, vel motum vel qualitates; quomodo igitur res naturales sine ipsis figuris non sunt idoneæ ad diuinos illos siderum influxus accipiendos, signatæ autem & adornatæ istis imaginibus, statim fiunt idoneæ? His accedit, quod insignia visu effectūq; sidera, si Mathematicis demonstrationibus credimus, ampliora sunt quàm vniuersa terra; quomodo igitur influxus illorum ad vnā imagunculam astronomicam restringitur, vt non etiam per alias res quamplurimas tali figura carentes diffundatur? Nullus igitur nouus effectus ab huiusmodi



iusmodi Magia astronomica proficiscitur; & si quis fortè cernitur aliquando, is non earū imaginum aut siderum potentia, sed occulta demonum opera, quò eiusmodi fraudibus mortales circumueniant, proficiscitur.

## CAPVT X.

## DE MAGIA CABALISTICA.

SED venio ad Cabalisticam, quam Philosophi quidam Iudeorum, & de nostris nonnulli vanitatis magis quàm veritatis studiosi, & res curiosas atque inauditas quàm veras & solidas discendi audiores, affirmant scientiā esse Mosi primum à DEO in monte Syna traditam; deinde non quidem literarum monumentis, sed ore tenus à prioribus, per quandam veluti manuum traditionem & receptionem, posteris traditam, adhuc fuisse conseruatam: ideoq; dictam esse cabala, quod verbū Hebraicè idem sonat quod Latine recipio; nimirum eam doctrinam posteriores à prioribus ore tenus auditione accipiebant, & animo memoriaq; custodiebant: quæ etiam ratione ferunt veteres, disciplinam Pythagoricam multis sæculis esse conseruatam. Complectitur autem hæc Magia Cabalistica vniuersam Philosophiam, diuinam & humanam, nec non & naturalem: omniumq; rerum doctrinam mysticè ac symbolicè continet; nō eam, more aliarum humanarum disciplinarum, rationibus & argumentis disputationibusq; tractans, sed numeris, figuris, ac Symbolis: itaq; in ea singulæ literæ, figuræ, nomina, elementa, apices,



pices, lineæ, puncta, accentus, spiritus, & si quid aliud est minutius, profundissimam quandam & abditissimam ingentium rerum significatricem doctrinam habent. Hanc Magiam qui benè teneat, eum nihil non pollere aiunt, omnia scire & præscire, naturæ imperare, cunctasq; res ei obedire; hac Mosen prodigia illa fecisse in Ægypto & in deserto; hac Iosue, Eliam, Eliseum, Isaiam, Danielelem, Samuelem tot tantaq; fecisse miracula. Dicunt enim, nomina quæ DEVS per Adamum cunctis rebus secundum suas cuiusq; rei proprietates imposuit, fuisse Hebraica, quibus rerum omnium substantiæ, qualitates & proprietates exprimantur: quocirca his nominibus naturales res appellanti, confestim res omnes se illi subiiciunt, & eius obsequio se totas addicunt. Huius amentię expers non fuit VViclef, qui vt memorat Thomas VValdensis in opere suo de Sacramentalibus, dixit, in statu innocentię Adam imposuisse nomina animalibus secundum naturales eorum proprietates; quibus nominibus appellata ab homine, statim ei obediissent, eiusq; omnia iussa fecissent: & huius rei reliquias remanere in exorcistis & incantatoribus, & ad id magnam vim habere voces hebræas. Cuius sententię doctam copiosamq; refutationem lege apud ipsum VValdensem.

*Refellitur  
Cabalistica  
ars.*

VERVM adeo est inerudita, insulsa & ridicula hæc Cabalistarum opinio, vt nihil æquè mirum sit quàm vlli hominum sanæ mentis aliquando eam probari & persuaderi potuisse, sed ita est profecto, sunt ingeniorum similiter vt hominum monstra quædam, & portenta è quibus eiusmodi



eiusmodi opinionum cōmenta & deliramenta  
profiscuntur. Principiò, nonné incredibile  
est, Solem & Lunam & cætera astra, elementa  
item & stirpes cū ratione careant, diuinam il-  
lam vim quæ latet in vocibus hebræis sentire,  
eaq; sic affici & permoueri, vt homini pro eius  
arbitrio pareant? Sed esto, nouerint illam vim,  
vel omnes res naturales, vel certè animâtes aut  
homines; num ideo eiusmodi nominum appel-  
latione eas continuò moueri necesse est? Si quis  
mihi proponeret nomen, totam meam substan-  
tiam omnesq; proprietates perfectissimè decla-  
râs, num eo nomine appellatus ab illo, cogerer  
eius imperio obsequi & quæcunque ille vellet,  
facere? Si reconditissimam illam vim & effica-  
ciam vocum hebræarum quam iactant Cabali-  
stæ, paucissimi hominum intelligunt, nec nisi  
qui illa eâdem ante sunt initiati, quomodo eam  
agnoscent & sentient bruta, ceteraq; non ratio-  
ne modo sed etiam sensu carentia? Cur tribu-  
unt tantam vim vocibus & characteribus he-  
brææ linguæ, quam omnium vetustissimam &  
primam ferunt, cum certè constet alios esse cha-  
racteres hebræos qui nunc extant, quàm qui o-  
lim fuerant ante captiuitatem Babylonicam?  
quod beatus Hieronymus in Prologo galeato  
affirmate scribit. Certum, inquit, est, Esdram  
post captam Hierosolymam, & restorationem  
templi sub Zorobabele, alias literas reperisse,  
quibus nunc vtimur, cum ad illud vsque tem-  
pus iidem Samaritanorum & Hebræorum cha-  
racteres fuerint. Nec verum est, in lingua he-  
bræa reperiri voces quæ omnium rerum natu-

E

ras,



Iosua 10.

ras, infimasque differentias & proprietates exprimant; nec in declarandis rebus vberior est aut significatior hebræa lingua quam græca vel latina: nec vllum est nomen in vlla lingua, quod simul alicuius rei & substantiam & differentias atque proprietates tam genericas quam specificas atque indiuiduales aperiat: nec in vocibus hebræis per se sumptis, plura maiora latent mysteria, quam vel in Græcis vel in Latinis. Legimus in scriptura, quomodo Moses & Aaron per virgam eis à DEO traditam plurima maximaque fecerint prodigia. Legimus Iosue retinuisse cursum Solis & Lunæ, cum dixisset: *Sol contra Gabaon ne mouearis, & luna contra vallem Aialon. Stetitque sol in medio cæli, & non festinauit occumbere spatio vnus diei. Nec fuit antea & postea tam longa dies, obediens Domino voci hominis & pugnante pro Israël.* Narrantur etiã Samuelis, Eliæ, Elisæi & Danielis miracula, nec tamen vsquam de istis Cabalisticis mysterijs vlla mentio aut verbum fit; si tanta est Cabalisticæ Magiæ vis & potestas, vt cælis imperet, solem sistere aut retrocedere cogat, maria diuidat, flumina siccet, totamque naturam commutet, & sibi ad nutum obedire faciat, cur isti sapientes Cabalistæ, eius artis peritissimi, talia nunquam patrarunt, vel etiam nunc patrare possunt? Certè Philosophi Iudæorum qui sibi hanc sapientiam arrogant, si quid ea pollerent, ad excutiendum iugum durissimæ seruitutis, quo miseri iam mille & quingentis annis oppressi tenentur, vti debuissent.

CAPVT



## CAPVT XI.

## DE NECROMANTIA.

**D**E Necromantia nōnihil dicamūs, vt qualis quantaūe sit eius vis, vel potius fraus & fallacia, ostendamus. Necromantici profitentur se animas mortuorum euocare posse, ex ijsquē cognoscere multa quæ sunt occultissima, vel etiam futura; animas autem mortuorum, præsertim eorum qui flagitiosè vixerunt, aut violenta morte de vita deturbati sunt, Magis eas inuocantibus adesse, respondere, multaquē manifestare, docet Porphyrius lib. 2. De Abstinentia animalium. nam cum de prauis & fallacibus dæmonibus dixisset, mox subdit hæc de animabus: Tales, inquit, sunt & animæ mortuorum, quæ vitijis oppletæ è corpore migrarunt; conflantur enim etiam tunc, iræ & concupiscentiæ perturbationibus, & in naturam conuersæ dæmonum, similes illorum redduntur, noxiæ ac turbulentiæ; in varias se vertunt formas, ac modo conspicuas se oculis præbent, modo recondunt, & ita eludunt aciem tum intuentium, tum etiam cogitantium. Et quodam alio loco: Præterea, inquit, anima quæ corpus suum violenter reliquit, expoliata ad hoc ipsum deinde se adnouet, ibiquē moras trahit. Vnde nonnunquam visæ sunt animæ lamentari: nam animæ carentium sepultura, circa corpora immorantur, quibus malefici sæpius abutuntur ad ministerium suum explendum, compellentes animas à positione corporis vel partis cuiusdam assumptione. Quocirca qui vaticinantium animalium in-

*Porphyrius de reuocatione animarum ex inferis.*



finuari sibi animas optant, præcipua illorum membra deglutientes, veluti ceruorum vel talparum, vel aliorum accipiunt, & ita præsentem sibi faciunt animam, DEI ritu vaticinantem: talis enim anima vnà cum sui corporis integra sumptione, in corpus humanum se penitus ingerit. Hæc Porphyrius.

*An fuerit  
Verus Sa-  
muel qui  
per Phyto-  
nissam rep-  
sentatus est  
Sauls.*

MAGNAM sanè huic arti fidem facere videtur, quod legitur primi libri Regum, capite vigesimo octauo Pythonissam rogatu regis Saulis, excitasse à mortuis animam Samuelis, fecisseq; vt Sauli de euentu impendentis belli consulenti, quæ mox ei euentura erant prænunciaret. Et quidem beatus Augustinus libro 2. ad quæstiones Simpliciani, respondens ad tertiam quæstionē, & in libro de octo Dulcitij quæstionibus, quæstione sexta disputat in vtramque partem, an fuerit ille verus Samuel, an potius Dæmon specie & figura Samuelis; propensior tamen est ad credendum, illum non fuisse verum Samuelem, sed eius imaginem & simulachrum, arte diabolica formatum, & aspectui Saulis præsentatum: appellari autem in scriptura Samuelem, quòd illum habitu, specie & auctoritate representaret. Non enim rarò tum in communi hominum loquendi consuetudine tum in sacris literis rerum imagines & simulachra, nominibus ipsarum rerum appellantur. Hoc idem citra dubitationem vllam traditur in libro secundo de Mirabilibus sacre scripturæ cap. 2. & in libro Quæstionum veteris & noui Testamenti quæst. 27. qui libri, nomine beati Augustini in eius Operibus numerantur. Ter  
tullianus



tullianus in libro De Anima, nō solūm hoc probat, sed contrariam sententiam omninō improbat: nam loquens de Samuele, hæc scribit: Ecce hodie eiusdem Simonis hæreticos tanta præsumptio artis magicæ extollit, vt etiam Prophetarum animas ab inferis mouere se spondeant: & credo, quia mendacio possunt; nec enim Pythonico tunc spiritui minus licuit animam Samuelis effingere, post DEVM mortuos consulente Saule. Absit autem vt animam cuiusquā sancti, nedum Prophetæ, à dæmonio credamus extractam, certi quod ipse Satanas transfiguretur 2. Cor. 11. in angelum lucis, nedum in hominem lucis, etiam Deum se asseueraturus, signaq; portentosiora editurus, ad euertendos, si fieri possit, electos. Hæc Tertullianus. Quibus verbis alijsq; proximè consequentibus apertè docet nō fuisse illum verum Samuelem. S. Thomas prima parte quæst. 89. art. 8. & secunda secundæ quæst. 95. art. 5. ad 2. & quæst. 174. artic. 5. ad 4. dubitanter de hoc loquitur, secutus nimirum Augustinum: idemq; fit in Decretis 25. Quæstione 5. cap. Nec mirum. Sed vt Lyrano & Tostato, & ni fallor etiam, B. Augustino, lib. De cura pro mortuis agenda, cap. 15. Sic etiam mihi probabilius est, immò certum est, fuisse verā animam Samuelis quæ Sauli apparuit, exercente quidem Pythonissā artem suam magicam, sed non eius artis vi & potentia, sed DEI imperio ab inferis excitatam, quæ dispensatione diuina Pythonissam & Saulem latente, ostendit se aspectibus iniqui regis, diuina eum sententia percussura; vt impius rex, quæ post mortem supplicia suæ im-



pietati debita passurus erat, iam tum acerbissimo doloris sensu prægustaret. Nec ad hoc probandum aut persuadendum opus est testimonijs vel argumentis, cum id in sacra Scriptura perspicuè traditum sit. Nam in libro Ecclesiastici, cap. 46. sic est: *Et post hoc dormiuit Samuel, & notum fecit regi, & ostendit illi finem vite sue, & exaltauit vocem illius de terra in prophetia, delere impietatem gentis.* Et sanè B. Augustinus libro illo De cura pro mortuis agenda, & S. Thomas secunda secundæ non obscure significant, si liber Ecclesiastici tanquam sacer & canonicus recipiatur, necessariò sentiendum esse, verum Samuelem apparuisse Sauli. Loquuntur autem illi conditionaliter de auctoritate libri Ecclesiastici, non quod nō eum p̄ sacro & canonico haberēt; sed quia nec Hebræi eum recipiunt & reponunt in libros Canonicos, & quidam Catholicorum olim, de eius auctoritate dubitarunt. Quare nobis vt de eius libri fide & auctoritate, sic nec de vero Samuele Sauli post mortem prophetante, dubitare licet. Nec obstat huic sententiæ, quod ille Samuel dixisse legitur Sauli: *Cras tu & filij tui mecum eritis*; cū certum sit diuersas esse sedes post mortem, bonorum & impiorum, & in Euangelio legatur Abraam dixisse illi epuloni, inter se, & ipsum, maximum & intransibile chaos intercedere: hoc, inquam, non obstat. Nam illa verba Samuelis, vt benè interpretatur S. Augustinus respondens ad tertiam quæstionem Simpliciani; non ad æqualitatem felicitatis, sed ad similem conditionem mortis referri debent:

*Luca 16.*



debent: vt fit sensus; Cras & non amplius eris inter viuos, sed inter mortuos, inter quos ego sum, quin etiam & tunc, & vsque ad CHRISTI Domini resurrectionem, omnes tam boni quàm mali, apud inferos, licet sedibus disclusi, detinebuntur.

SED redeo ad Necromantiã, quæ olim multis locis & apud multas gentes celebratissima fuit. Osthanes apud Plinium lib. 30. cap. 2. hu- *Antiquus Necromã-  
tia vsus.* ius artis nobilissimus professor, promittebat quorumlibet mortuorum excitationes & colloquia cum viuis: & sanè maioris est admirationis, quod extremo illo capite subdit Plinius: Adolefcētibus nobis, inquit, visus Apion grammaticæ artis, prodidit Cynocephaliã herbã, quæ in Ægypto vocaretur Osyrites, diuinã non in viuos modo, sed etiã in mortuos habere potentiam, eaq; se euocasse vmbas ad percūctandum Homerum qua patria quibusq; parentibus genitus esset. Cicus Asculanus in commentarijs quos in sphæram edidit, nominat librum qui olim extabat, & inscribatur SCRIPTVRA CHAM; opus magicæ ac maleficæ impietatis plenum, continens elementa & praxim Necromantiæ. Tertullianus lib. De Anima, vbi de inferis & defunctorum euocatione differit: Publica, inquit, iam literatura est, quæ animas etiam iusta ætate sopitas, etiam proba morte disiunctas, & prompta humatione dispunctas, euocaturam se ab inferorum incolatu pollicetur. Fuerunt quondam multa apud varias gentes loca, Necromantiæ vsu nobilitata, vbi & à defunctis oracula & responsa petebantur. Homerus lib. 11.



Odysseæ Cymmericum oraculū ad Auernum Campaniæ lacum celebrat, quo Vlysses concessit, vt Thyresiam de reliquo itinere suo consuleret, cuius etiam meminit Strabo libro quinto Geographiæ. Tesprotium in Epiro Orpheus celebre fecit, in eo manes cantu permulcendo, & Euridicę coniugi ad superos reditum impetrasse creditum fuit. Vnde Virgilius libro sexto *Æneidos*:

*Si potuit manes accersere coniugis Orpheus,  
Trecia fretus cythara fidibusq; canoris.*

Apud Lucanum Erictone venefica Theßala mortuum euocat, qui Sex. Pompeio exitum Pharsalicę pugnæ denunciet. Phigaria Arcadię ciuitas, habuit huiusmodi Necromantas, à quibus occulta & futura sciscitari vñtatum fuit. B. Augustinus lib. 9. de ciuitate DEI, cap. 11. citat Apuleium affirmantem animas hominum dæmones esse; & ex hominibus fieri lares, si meriti boni sunt; Lemures autem aut laruas, si mali; qui nullis bonis sedibus in terra vagatione puniuntur, inane terriculamentum bonis hominibus, ceterū noxium malis. Cum verò incertum est quæ cuiq; sortitio obuenerit, vtrum lar sit an larua, manes deos nominant, & fanis atq; ceremonijs vulgo admittuntur, vt oracula reddant, vt in Bœotia Amphiaraus, in Africa Mopsus, in Ægypto Osiris, alius alibi gentium, Æsculapius vbique. Hæc ex Apuleio: quem ibi Augustinus verè grauitèr refellit. Et apud Tertullianum in libro De Anima sic habes; Nosomanas propria oracula, apud parentum sepulchra mansitando captare, Eraclides scribit. Cel-



tas apud virorum fortium busta, eâdem de causa abnoctare, Nicander affirmat.

VERVM has omnes mortuorum, quæ arte Necromantica fiunt, apparitiones, vanas & fallaces esse non est dubitandum: plerasq; enim ab ipsis Necromantis alijsq; fictas esse compertum est. Si quæ autem reuera contigerunt, in his existimandum est, nō animas defunctorum apparuisse viuis, sed ipsos Demones tales se ostendisse Necromantis, vel eos consulentibus, tales, in quâ, habitu, specie, ætate, voce & affectu, quales fuerant olim mortui, cum inter viuos versarentur. Hanc ego opinionem, vt proculdubio veram putem, rationibus testimonijsq; & experimentis adducor. Ratio nec obscura nec sanè infirma sit ea, qua S. Thomas prima parte quæst. 117. art. 4. hoc ipsum confirmat. Non potest, inquit, anima separata, naturali virtute sua, mouere aliquod corpus: cū enim sit naturalis forma humani corporis, non habet vim mouendi secundum locum, nisi corpus quod informat & viuificat: nam etiam cum est vnita corpori, si sit aliquod membrum mortificatum, non obedit animæ ad motum localem. Quare animæ defunctorum, nec assumere corpora, nec cum illis ad viuos venire possunt. Deinde, Necromantes non habent vim & imperium in animas defunctorū quæ sunt in cælo, nec quæ sunt in Purgatorio; non enim conuenit aut decet animas sanctorum, impijs Necromantarū artibus subiacere: neq; in animas quæ sunt in inferno; nam cum illuc sint à DEO tanquam in carcerem detruse, vt eternas scelerum suorum poenas luant,

*Confutatur Necromantia.*

*Argumentatio beati Thomæ contra Necromantiam.*



nulla inde vi possunt efferri, nec nisi DE I man-  
 dato egredi: nō est autē credibile, DEVM id con-  
 cessurum Necromantis, per quos Dæmon satagit  
 mortales decipere, & à veri DEI cultu auertere:  
 sic enim DEVS artem Necromanticam & per se  
 infamem, & toties à se in sacris literis, reprobam,  
 extremoq; mortis supplicio cōdemnatam, non  
 solum honoraret, sed etiam fide cultuq; apud  
 mortales dignam redderet. Profecto, si cui mor-  
 tuorum reditus ad viuos concedendus fuit, vi-  
 debatur concedendus diuiti illi, cuius men-  
 tio fit apud Lucam cap. 16. qui obnixè rogabat  
 Abraam, vt de ijs qui simul erant in inferno, a-  
 liquē mitteret ad amicos cognatosq; suos mo-  
 nendos, vt benè viuendo, diras, & perpetuas in-  
 ferni pœnas euaderent; nec tamen ei concessum  
 est. Non inficior, animas quæ sunt in Purgato-  
 rio, nonnunquam apparuisse viuis: id enim B.  
 Gregorius in quarto libro Dialogorum nonnul-  
 lis & quidem certis probat exemplis. Nec equi-  
 dem nego, etiam animas beatas vel Martyrum,  
 vel aliorum Sanctorum, descendere in terras  
 hominibus eorum auxilium implorantibus, o-  
 pem & solatium laturas: id enim confirmat B.  
 Augustinus in lib. De cura pro mortuis agenda,  
 cap. 16. exemplo B. Felicis Nolæ Episcopi, quem  
 ciuibus suis Nolanis, cum à Barbaris oppugna-  
 rentur, apparuisse & subuenisse, asseruit Augu-  
 stinus, se non incertis rumoribus, sed certis te-  
 stibus audiuisse: Hæc, inquam, non nego; sed  
 aio animas mortuorum, cum apparent viuis,  
 non id facere sua voluntate & arbitratu, nec na-  
 turali potestate, multoq; minus vi & potētia ar-  
 tis



tis Necromanticæ, sed id fieri singulari quodam DEI consilio, voluntate ac potestate. Nec animas defunctorum interesse rebus viuorum, minus est miraculum secundum B. Augustinum loco supra dicto, & secundum B. Thomam prima parte, quæst. 89. art. 8. ad 2. quam vel illuminatio cæci, vel alia quæ in magnis DEI miraculis numerantur. Adscribam hîc in hanc sententiam B. Augustini verba ex eo loco quem proxime indicaui: Verum ista, inquit, diuinitus *Augustini* exhibentur, longè aliter quàm sese habet vltimus ordo, singulis creaturarum generibus attributus. Non enim ideo putandum est viuorum *observantia* rebus quo sibi interesse posse defunctos, quoniam quibusdam sanandis vel adiuuandis Martyres adsunt: sed ideo potius intelligendum est per diuinam potentiam Martyres viuorum rebus interesse, quoniam defuncti per naturam propriam, viuorum rebus interesse nō possunt. Hæc Augustinus.

SE D audiamus Tertullianum qui in libro De *Notabilis* Anima, vbi de inferis & animarum euocatione *Tertulliani* agit, hanc nostram sententiam grauissimis differtissimisque verbis comprobauit: Necromantia, inquit, secunda est idololatria, in qua se Dæmones perinde mortuos fingunt, quemadmodum in illa deos. Quid ni? cum & dii mortui sint? Itaque inuocantur quidem defuncti, sed Dæmones operantur sub eorum obtentu. Hanc autem fallaciam Diaboli sub personis defunctorum delitescens (ni fallor) etiam rebus probamus, cum in exorcismis nostris, interdū Dæmon aliquem se ex hominibus affirmat, interdum



*Luce 16.*

*Cur Dæ-  
mones si-  
mulant*

dum gladiatorem vel bestiarium, sicut & alibi Deum, nihil magis curans quàm hoc ipsum excludere quod prædicamus, ne credamus animas vniuersas malorum ad nihilum redigi; vt & iudicij & resurrectionis fidem turbent. Et tamen ille Dæmon, postquam circumstantes circumuenire tentauit, instantia diuinæ gratiæ victus, id quod in vero est, inuitus confitetur: Sic etiã in Necromantia quæ iam quiescentes animas euellere ab inferis creditur, & conspectui exhibere, non alia fallaciæ vis est, operatior planè, quia & phantasma præstatur, & corpus effingitur, nec magnum illi exteriores oculos circumuenire, cui interiorem mentis aciem excæcare, perfacile est. Nulli autem animæ omninò inferos patere, satis Dominus in argumento illo pauperis requiescentis & diuitis ingemiscens, ex persona Abrahæ sanxit, non posse relegari renunciatores dispositionis infernæ, quod vel tunc licere potuisset & Moyfi, & Prophetis crederetur. Sed etsi quasdam reuocauit DEI virtus in documentum iuris sui, non idcirco communicabitur fidei & audaciæ Magorum & fallaciæ somniorum & licentiæ poëtarum: nam in hac mortuorum resurrectione qua DEI virtus in corpora animas repræsentat, solida & contrectabili & satiata veritate præiudicatum est hanc esse formam veritatis, vt omnem mortuorum exhibitionem incorporalem, præstigias iudices. Hæc Tertullianus. Simulant igitur Dæmones, animas defunctorum secundum Augustinum & Chrysostomum, quorum testimonia loco supra dicto memorat S. Thomas, quo facilius errores Genti-



Gentilium animis hominum inserat ad eos de- *animas de*  
 cipiendos. Primum enim sic Dæmon facilius *mortuo-*  
 homini quicquid vult persuadet : namque ho- *rum.*  
 mines animabus defunctorum, vel parentum,  
 vel cognatorum, vel amicorum suorum quos  
 diligunt, & à quibus se diligì non dubitant, li-  
 bentius & promptius credunt, quàm Dæmoni  
 quem naturaliter horrent. Deinde, ita persua-  
 det hominibus, infernum non esse carcerem  
 perpetuum, ex quo non liceat aliquando egre-  
 di: nec esse adeo graues & perpetuas inferni pœ-  
 nas, sicut homines putant. Adhæc sic facit, vt ho-  
 mines putent, animas etiam post mortem habe-  
 re corpora, vel posse quælibet se in corpora in-  
 duere, vel in quælibet hominum aut bestiarum  
 corpora migrare: qua re concipitur error Py-  
 thagoricus de transmigratione animarum, eoq̃  
 concepto labascit fides & spes christianæ resur-  
 rectionis. Præterea, hac ratione faciunt Dæmo-  
 nes, vt viui mortuos vel tanquam terrificos &  
 noxios sibi metuant, & varijs superstitionibus  
 placare sibiq̃ conciliare studeant; vel tanquam  
 beneficos sibiq̃ vel amicitia vel necessitudine  
 deuinctos, nimium superstitiosè diligant & co-  
 lant; vel tanquam animas hominum quorun-  
 dam apud mortales, aut sapientia, aut fortitudi-  
 ne, aut potentia clarissimorum, non humanis  
 modo, sed diuinis etiam honoribus prosequan-  
 tur atque venerentur.

H v g o sancti Victoris lib. 6. Eruditionis Di- *Varia spe-*  
 dascalicæ, cap. 5. numerosius & enucleatius eam *cies Ma-*  
 de qua disputauimus, Magiæ varietatem enar- *gia secun-*  
 rans, ad hunc modum scribit: Magicæ repertor *dum Ha-*  
 primus *gonem.*



primus creditur Zoroastres. rex Bactrianorum; quem nonnulli asserunt ipsum esse Cham filium Noë, sed nomine mutato, hunc postea Ninus rex Assyriorum bello victum interfecit, eiusq; codices artibus maleficiorum plenos igne cremari fecit. Scribit autem Aristoteles de hoc ipso, quod vsque ad bis & vicies centum millia versuum eius de arte magica ab ipso dictata, libri eius vsque ad posteritatis memoriam traduxerunt. Hanc artem postea Democritus ampliavit tempore quo Hippocrates in arte Medicinæ insignis habebatur. Magia, in Philosophia non recipitur, sed est extrinsecus falsa, professione, omnis iniquitatis & malitiæ magistra, de vero mentiens: & veraciter lædens animos, seducit à religione diuina, culturam Dæmonum suadet, morum corruptionem ingerit, & ad omne scelus ac nefas mentes sequacium impellit. Hæc generaliter accepta, quinque complectitur genera maleficiorum: Manticem, quod sonat diuinationem, & Mathematicam vanam, Sortilegia, Maleficia, Præstigia. Mantice autem quinque continet species sub se; Primam, Necromantiā, quod interpretatur Diuination in mortuis. *νεκρός* enim Græcè, id est, mortuus Latinè; & *νεκρὸν* cadaver dicitur; vnde est diuination quæ fit per sacrificium sanguinis humani quem Dæmones ficiunt, & in eo delectantur effuso. Secunda, est Geomantia, id est, Diuination in terra. Tertia, Hydromantia, id est, Diuination in aqua. Quarta, est Aerimantia, id est, Diuination in aëre. Quinta, est Diuination in igne, quæ dicitur Pyromantia. Varro enim quatuor dixit esse, in quibus diuination



natio constaret, terram, aquam, aërem, ignem. Prima ergo, id est, Necromantia, ad infernum videtur pertinere; secunda ad terram; tertia ad aquam; quarta ad aërem; quinta ad ignem. Mathematica diuiditur in tres species, in Aruspici-  
nam, in Augurium, in Horoscopicam. Haruspices sunt dicti quasi horuspices, id est, horarum inspectores, qui obseruant tempora in rebus agendis; vel haruspices quasi haras inspicientes; qui in extis & fibris sacrificiorum futura considerant. Augurium vel auspicium aliquando ad oculum pertinet: & dicitur auspicium, quasi auispicium, quia in motu & volatu auium attenditur: aliquando ad aures pertinet, & tunc dicitur auguriū, quasi garritus aurium, quia aure percipitur. Horoscopia, quæ etiam Constellatio dicitur, est, quando in stellis facta hominū quæ-  
runtur; sicut Genethliaci faciunt, qui natiuitates obseruant, qui olim specialiter Magi nuncupabantur; de quibus in Euangelio legimus. Sortilegi sunt, qui sortibus diuinationes quærunt. Malefici sunt, qui per incantationes dæmoniacas siue ligaturas, vel alia execrabilia remediorum genera, cooperatione Dæmonum atq; instructu nefanda perficiunt. Præstigia sunt, quando per phantasticas illusiones circa rerum im-  
mutationem sensibus humanis arte dæmoniaca illuditur, Sunt ergo omnes simul vndecim. Sub Mantice, quinque, id est, Necromantia, Geomantia, Hydromantia, Aërimantia, Pyromantia. Sub Mathematica, tres, Haruspicina, Auspicium, Horoscopia. Postea tres aliæ, id est, Sortilegium, Maleficia, Præstigia, Præstigia dicitur Mer-  
curius



curius primus inuenisse: Auguria Phryges inuenerunt: Haruspicinam & Sortilegia Tages primus Etruscus tradidit: Hydromantia primum a Persis venit. Hactenus Hugo.

## CAPVT XII.

AN PER ARTEM MAGICAM VERUM aurum fieri possit ab Alchimis.

**S**I verum & perfectum aurum ab Alchimistis potest effici, haud dubie chymica facultas vna de præcipuis Magiæ partibus censenda est; nimirum tale opus Magiæ, tum propter vim & potentiam artis maximè admirandum esset: tum propter magnitudinem vtilitatis, optatissimum atque gratissimum mortalibus accideret.

*Scaliger* Audiat lector quid eruditus vir Iulius Scaliger  
*contra Car-* ea de re scriptum reliquerit. Triplex est, inquit,  
*dannū exer-* Magia; vna hîc infima & nostras, sanè & fœda &  
*ciat. 327.* sordida cum cantuunculis, cadaueribus, & funi-  
bus suspendiosorum: quæ si quis attrectare au-  
deat, etiam mereatur. Altera ex astris deducit  
vires in specula, sigilla, annulos, tabellas: Tertia  
diuina est. Nomen apud vulgus odiosum fecit  
colluies impostorum. At Magus apud Persas,  
nihil aliud quàm sapientem sonat: sed propter  
*Smerdes* Smerdis proditionem & perfidiam, nomen Ma-  
*Magus in-* gorû infensum diu fuit. Hac Magia Dominum  
*uasi regnū* IESVM fuisse promissum regem, cognouerunt  
*Persarum.* Magi, qui ad eum adorandum longinquis è re-  
*Herodotus* gionibus profecti sunt. E Syrorû libris hæc de-  
*lib. 3 & Ju-* scriptum. Aiunt Magiæ & transmutatorix ar-  
*stinus lib. 1.* tis  
*Matth. 2.*



tis vires, vias, & fines esse perquam similes. Opus & finem Chimistarum, esse corpus in corpus: Opus & finem Magiæ, esse spiritum in corpore. Magi suas affectiones, violentias appellant, propterea quod vires suas, supra eas quæ naturæ ordine fieri videntur, exercent. Chimistæ suum opus nominant Fortitudinem: hoc enim significat decantatum illud, Elixir, in cuius fide omnem oppignorant naturam. Sic eo loco Scaliger. Ergò digna cum primis inquisitione ac disputatione res est, vtrum nō modo ex solis causis naturalibus, & in solis naturalibus locis, atque ordine tantum modoq; naturali aurum generari queat, verum etiam per artificialem viam ac rationem, quam iactant Chimistæ, perfectum vsque quaque aurum, & tale omnino, quale est naturale, possit effici.

DVPLEX circa hanc quæstionem Philosophorum est sententia: multi negant, quidam vero aiunt. Nos primo loco aliorum sententias enarrabimus ac perpendemus: extremo autem loco etiam quid sentiamus ipsi, & similis vero iudicemus, breuissimè indicabimus.

## EXPONITVR SENTENTIA EORVM

*qui negant verum aurum posse fieri ab Alchimistis.*

**A**VICENNA in quibusdam suis commentarijs in libros Meteororum, vt refert Ægidius in 3. Quodlibeto, quæst. 8. de Alchimistico auro ita scripsit: sciant artifices Alchimix, species metallorum mutari non posse, quamuis  
F                      similia

*Auicenna*



similia illis fieri possint; & quamuis Alchimistæ queant tingere ipsum æs colore quo volunt, donec sit multum simile auro, & abstergere immundicias plumbi, ita vt videatur argentum, semper tamen secundum substantiam manebunt æs & plumbum.

*Auerroës.*

AVERROES in Paraphrasi super primum librum de Generatione animalium, explanando primum caput, in eandem sententiam hæc scribit: Similiter etiam si datur aliquid artificiale valde simile naturali, tanta poterit esse similitudo, quod existimabitur esse idem specie, & si ars Alchimix habet esse, hoc est, quod potest fieri in ea. Et ibidem Auer. declarat sicut se habent mures ex putri materia, ad mures ex semine, inter eos enim est tanta similitudo, vt quamuis reuera inuicem differant specie, tamen vulgo putentur esse eiusdem speciei, ita etiam aurum alchimisticum se habere ad verum & naturale aurum. Idem sentit Auicenna, cuius verba paulò infrà memorabuntur initio capitis proxime sequentis.

*B. Thomas.*

S. Thomas in secunda secundæ conditionallyter loquens de auro alchimico quæst. 77. art. 2. ad primum ait: Si aurum quod fit ab Alchimistis, non sit verum & tale, quale fit à natura, eius venditionem pro vero fraudulentam & iniustam esse; sin autem fiat verum aurum ab Alchimistis, id licite pro vero auro vendi posse, nihil enim prohibere, artem vtendo causis naturalibus naturales & veros effectus producere. Sed quid ipse simpliciter & absolutè sentiret de auro alchimico, satis perspicuè declarauit



sunt in 2. sent. dist. 7. quæst. 3. art. 1. ad quintum, ita scribens: Potest quidem ars virtute naturalium agentium aliquas formas substantiales inducere in materiam; sunt tamen quædam formæ quas nullo modo ars potest efficere, quod propria actiua & passiua earum non potest inuenire atque adhibere, sed benè aliquid simile illis efficere, sicut Alchimistæ faciunt aliquid simile auro quantum ad accidentia exteriora, sed tamen non faciunt verum aurum, quod forma substantialis auri non est per calorem ignis quo vtuntur Alchimistæ, sed per calorem solis in loco determinato, vbi viget virtus mineralis; & ideo tale aurum non habet operationem consequentem speciem; & similiter in alijs, quæ eorum operatione fiunt.

ÆGIDIUS in tertio Quodlibeto quæst. 8. *Aegidius.* affirmat Alchimistas posse quidem facere metallum aliquod quod tantum constet ex permutatione aliorum simplicium metallorum, cuiusmodi est electrum, quod dicitur constare ex tribus partibus auri & vna argenti; & quia sæpè in venis metallicis vnum metallum confunditur & permiscetur cum alio, Alchimista per actionem ignis segregando & separando aurum, quod erat permixtum cum alio metallo, videbitur de nouo facere aurum; tantum autem abest, vt possit verum aurum facere, vt ne simile quidem vero auro ita effici queat, vt non possit aliquo modo dignosci & discerni. Porro existimat Ægidius aurum alchimisticum non posse sine peccato vendi pro auro naturali; non solum quia incertum pro certo & falsum pro vero ven-



*Ægidius  
negat au-  
rum chi-  
micum li-  
cite vendi  
posse pro  
vero.*

ro venditur, sed etiam quia in medicinis adhi-  
betur aurum ad confortandum cor, & morbos  
quosdam profligandos; maximum autem peri-  
culum esset, ne aurum alchimisticum propter  
diuersam rationem constitutionis, nimium læ-  
deret complexionem humani corporis, eiq; in-  
figne aliquod detrimentum afferret. Quod au-  
tem verum aurum confici nequeat, Ægidius ita  
probat, vel potius declarat. Cernimus in vno  
quoque genere entium, quædam illius generis  
esse perfecta, alia verò imperfecta; perfectorum  
autem generationem esse determinatam tam  
secundum principium actiuum & secundum  
materiam, quàm secundum locum in quo fit:  
Imperfectorum autem minimè: Exempli cau-  
sa, in genere animalium, quæ sunt perfectiora,  
ita se habent natura, vt equus non generetur  
nisi ab equo, & ex sanguine menstruo equæ, &  
intra matricem; at mures possunt generari ex  
femine & sine semine, intra matricem & extra.  
Idem perspicitur in plantis; idemq; similiter  
contingit in elementis, nam purus ignis elemē-  
taris, nec generari, nec conseruari potest, nisi in  
suo loco naturali, id est, in concauo Lunæ; ergo  
similiter etiam eueniet in metallis; quare cum  
aurum sit perfectissimum omnium metallorū,  
habebit determinatum agens & materiam, &  
locum naturalem, & propriam venam quæ la-  
tet intra sinum & ventrem terræ, extra quem  
locum, aurum nullo modo confici possit. Neq;  
valet illud, quod posset afferri contra hoc quod  
diximus: nimirum si mures qui sunt perfectio-  
res auro, possunt generari extra matricē, multo  
magis



magis aurum effici poterit extra suum locum naturalem; & , si serpentes fuerunt arte magica producti à Magis Pharaonis, vt legimus in Exo- *Exod. 7.* do, cur non etiam poterit effici verum aurum industria & beneficio artis? Hoc inquam nō valet, nam eadē ratione probari posset, cum mus sit perfectior qualibet planta, & mus generari queat sine semine, quamlibet etiam plantā posse absque semine procreari; quod falsum est: nihil ergo prohibet, quod est imperfectiūs alio simpliciter, esse perfectiūs illo secundū quid. Quamobrem quod aurum requirat determinatum locum suæ generationis, nō arguit ipsum simpliciter esse perfectiūs aliquo animali, sed tantū secundū quid. Hæc ex Ægidio.

CONCILIATOR in differentia 209. sic ait: Me- *Concilia-  
tor.* tallū non potest fieri per artem, & in aliud transmutari; cū ars solum faciat permutationem in accidentibus, non autem in substantia; vel fortasse si possibile est, tamē id est homini ignotum, vnde Commentator tertio, De anima ait; Dicitur de multis artificijs, quod videntur esse possibilia, sed sunt causarum ignotarum. vt v. g. Alchimia, etsi talis ars constituatur, fortasse hoc erit per accidens, & inspiratione diuina potius quā artis humanæ sapientia. Non enim (inquit Conciliator) ars eo peruenire potest, vt agentia & materiam, cum tempore, modo, & alijs circumstantijs, sciat ita proportionare, vt inde nouum constituatur metallum. Quod si apparenter videatur, id erit, quia ars fallaciam eius humano ingenio nequit detegere. Vnde aurum arte constructum, vim non puto habere con-  
F 3 fortandi



fortandi cor, sicut habet aurum à natura productum. Fideles mihi tamen experti, dicunt argentum decoctione per artem fieri verum, non tamen videtur apparenter lucrari, probationibus omnibus quibus vtuntur, exploratum.

QVIDAM rerum metallicarum peritissimi, de quibus etiam subtiliter & accurate scripserunt, dixerunt, primum atque summum fundamentum, quo nititur ac sustentatur ars Alchimie, nullum esse: quo licet intelligere, ipsam artem (si tamen ars dicenda est quæ in se nihil veri & certi habet) inanem & fallacem esse. Et enim Alchimistæ putant materiam omnium metallorum esse sulphur & argentum viuum, quam obrem profitentur se ex varia sulphuris & argenti viui inuicem permixtorum temperatione, posse quodlibet metallum efficere: in quo sanè vehementer falluntur. Nam si sulphur & argentum viuum est materia auri & argenti, ergo in venis in quibus generatur aurum & argentum, apparerent aliqua vestigia sulphuris & argenti viui; similiter etiam in venis sulphuris & argenti viui, reperirentur aliqua indicia auri vel argenti; sed ipsi qui totam pene vitam curiosissime lustrandis, & considerandis venis, locisque metallorum consumpserunt, nunquam tale aliquid reperire potuerunt. quare falsa est opinio Alchimistarum, & aurum quod ab ipsis fit ex sulphure & argento viuo, non est verum aurum: non enim, ut dictum fuit, talis est materia veri & naturalis auri. Aurum autem quod fit ab Alchimistis, licet simillimum videatur vero auro, falsum tamen esse multis modis cognosci & iudicari

*Non esse  
materiam  
omnium  
metallorum  
sulphur &  
argentum  
vium.*



dicari potest, nempe vel ex pondere; vel ex eo, quia non sustinet vim ignis; vel ex eo quia iniectum in vrinam, amittit colorem suum; vel quia non est ductile in tenuissimas laminas; vel denique quia non habet naturalis auri proprietates, quarum in primis illa commendatur, confortandi cor humanum. Hæc illi.

CARDANVS lib. 17. de subtilitate hæc scribit: *Cardanus.*  
 sunt verò chimica inuenta, vitrum ducere in longissimas lineas, tenax aut prædurum effice- *Inuenta &*  
 re posse. Vidi ego dudum sphaeram exiguam ex *opera artis*  
 vitro, quæ omni conatu illisa solo lapideo, non *chimica.*  
 comminuebatur, sed resiliebat ad trabes. Eiusdem facultatis chimicæ est, vitrum albis lineis interstinguere, celare in eo imagines, falsas fabricare gemmas, purgare caphuram, metalla miscere, immutare, aut nobiliora imitari. Exemplum verò fallacis Alchimicæ vide apud eundem in 10. lib. De varietate rerum, cap. 51. Quo in loco etiam hæc subiungit: Aurum & argentum facere, seu ex alijs metallis ea conficere, aut gemmas factitare, aut viles in nobiliores transmutare, nemo non optare debet vt sciat; at quid horum fieri possit, difficile scitu admodum est; & si hoc etiam sciuerimus, longè difficilior est scire, quomodo fiat. Quæ autem ab Alchimis fiunt, ea vel ad voluptatem pertinent, vel ad vsum; ad voluptatem sunt gemmæ & metalla nobiliora; ad vsum tincturæ, colores, materiæ uasorum & alia similia. Circa quodlibet autem horum, tria excogitari possunt, vel vt fiant, quod maximum est; vel vt purgentur; vel vt perficiantur. Horum primum, de metallis, adhuc sub  
 F 4 iudi-



*Utilitates  
artis chi-  
mica.*

iudice lis est an fieri possit; secundum & tertiū, fermè inuentum est ad summam perfectionem. ac licet ars chimica non faciat verum aurum, quattuor tamen præstat magnas utilitates. Prima est, quia potest vnum metallum facere simillimum alij, vt ferrum æri, & æs auro & argento, idq; clarius apparet in gemmis. Secunda, cum id quod in aliquo potentia continetur, per vim ignis excitat, extrahit, & ad perfectionem perducit. Tertia, cum ea quæ superflua sunt, vi sua absumendo detegit, vt cum ex calce alumen excipitur, quod non genitum est vi ignis, sed exceptum; ita fit id q, vocant multiplicationē, cum ex terra ipsa quæ aliquid cōtinet quod cōtinetur, excipiunt. Quarta, Ars chimica vi ignis multas facere potest compositiones atque separationes, non minus vtilēs & lucrosas ijs quæ ab Alchymistis tam anxie quæruntur & ambitiosè promittuntur transmutationibus. Hæc Cardanus. Ex quibus verbis perspicitur eum arbitrari chemicam illam auri generationem, vel esse impossibilem, vel propemodum impossibilem.

DECLARATVR OPINIO EORVM  
qui defendunt Alchimiam.

*Opinio A-  
uicenna.*

ALBERTVS in libro suo 3. de Mineralibus. cap. 9. hanc de facultate Alchimix quæstionem pertractans, primū exponit sententiam Auicennæ quæ fuit hæc: sciant (inquit Auicenna) artifices alchimix species metallorum permutari non posse, quamuis aliquid illis simile fieri possit; quod enim differentia specifica aliquo



aliquo tollatur ingenio, non credo possibile; sed expoliatio accidentium non est impossibilis, vel saltem diminutio eorum: non enim permittitur species metallorum, nisi prius in primam materiam metallicam reducantur, & sic iuuamine artis deducantur in speciem metalli quod voluerit. Atque idem quoque sentisse ait Haltem Philosophum præcipuum in physicis & in mathematicis, deinde Albertus subiungit ea quæ sequuntur: Oportet nos dicere, Alchimicos pe- *Sententia*  
 ritos, non aliter operari quàm peritos medicos, *Alberti*  
 qui per medicinas purgatiuas purgant materias *Magni.*  
 corruptas & nocentes sanitati, & postea per remedia confortantia naturam, iuuant virtutem naturalem, vt digerendo, sanitatem inducant: quæ sanitas est effectus & naturæ & artis; sed illius effectiuè & principaliter, huius autem organicè & instrumentaliter: sic Alchimistæ primo benè purgantes materiam argenti viui & sulphuris insitam omnibus metallis, confortât; deinde deducunt virtutes elementares & cœlestes tali materiæ inhærentes ad proportionem mixtionis metalli quod intendunt inducere; & tunc ipsa natura operatur, & non ars nisi organicè iuuando & expoliendo vt diximus; & sic verum aurum & argentum educere, & facere videntur: quod enim virtutes elementares & cœlestes faciunt in vasis naturalibus, hoc etiam faciunt in vasis artificialibus, si artificialia formantur ad modum vasorum naturalium: & quod facit natura calore solis & stellarum, hoc faciet ars calore ignis; dummodo sic contemperetur, vt non excedat virtutem se mouentem & infor-



mantem quæ est in metallis : huic enim cœlestis inest virtus, quæ primo commiscuit eam, & hæc inclinatur ad hoc vel ad illud per artis iuuamē. Alchimia igitur per hunc modum procedit, id est, corrumpens vnum, à sua specie remouēdo, & cum iuuamine eorum, quæ in materia insunt, alterius speciem inducendo. quare omnium operationum alchimicarum melior est illa quæ procedit ex eisdem, ex quibus procedit natura; sicut ex purgatione sulphuris, per decoctionem & sublimationem & expurgationem argenti viui, horumq; bona permixtione cum materia metalli, in his enim & ex virtutibus horum, omnis metalli species inducitur. Qui autem per alba albificant, & per citrina citrinant, manente specie prioris metalli in materia, proculdubio deceptores sunt, & verum aurum atque argentum non faciunt; & hoc modo ferè omnes vel in toto, vel in parte procedunt. propter quod ego experiri feci aurum alchimicū quod ad me delatum est, & postquam sex aut septem ignes sustinuit, tandem amplius ignitum consumitur & perditur & quasi ad fecem reuertitur. Hæc Albertus. Ecce supradictis verbis Alber- tus, non solum docet verum aurum posse fieri per Alchimiam, sed etiam quis modus eius sic efficiendi sit possibilis, & quis impossibilis, manifestè declarat.

*Quinque  
rationes  
pro Alchi-  
mistis.*

QVI D A M Ianus Lacinius, qui de facultate chimica in transmutandis metallis multa di- sputauit, eiusq; disputationis summam memo- rat Cardanus loco supradicto, probat arte chi- mica posse confici verum aurū, his rationibus.

Primò,



Primò, metalla sunt quædam pura & concocta, vt aurum & argentum: quædam cocta sed impura, vt æs, ac ferrum: quædam cruda & impura, vt vtrumque plumbum; sed impura repurgari, cruda concoqui possunt, igitur ex ære, ferro & plumbo, aurum & argentum fieri potest. Quod autem talia concoqui possint, demonstrat ex sententia Aristotelis 4. Meteororum vbi de concoctione agit. De purgatione dubium non est, quippe cum proprium sit ignis separando purgare. Deinde propinquitas, paruumque causarum discrimen, hoc idem suadet, cum ab iisdem omnia fiant. Supponit autem omnia metalla constare sulphure & argento viuo; quæcumque verò similia sunt, facillè inuicem transmutantur, eoq; magis, quod natura videtur semper perfectissimum intendere in omni genere, velut aurum; quæ igitur imperfecta sunt, artis beneficio perfici posse videntur; tum vt ad finem, tum vt ad motus ipsius perfectionem perducantur. Postea, si ars auctore Arist. in 2. Phys. & 4. Meteororum est imitatrix naturæ, cum natura concoquendo purgandoq; ex sulphure & argento viuo, aurum argentumq; perficiat, cur non etiam idem simili ratione operans ars possit efficere? Adhæc, ea dici debent secundum naturæ ordinem copulata & inuicem transmutabilia, quæ non habent omninò diuersas operationes sed easdem, in eo tantum differentes, quod quædam habent eas imminutas & imperfectas, velut fœtus, infantis comparatione, ouum pulli, aurelia papilionis. At plumbum, æs, ferrum, argentum, nullas habent operationes ab auro distinctas,



stinctas, sed quas illud habet, utpote liquefcere, duci, graue esse, nitere, ignibus resistere; easdem habent hæc, sed vitiatas & imminutas; non enim ita splendent, non sunt adeo grauia, minus resistunt ignibus, non tota liquefcunt, non tam tenuiter ducuntur; igitur hæc dici debent aurum imperfectum, & beneficio artis perducì queunt ad perfectionem auri. Atque hoc putat Cardanus esse maximum argumentum quod pro Alchimis afferrì possit. Postremò, idem astruit exemplo ranarum, quæ statim, ob præparationem materiæ, ex puluere generantur. Sunt autem ranæ perfectiores auro, & ut animalia perfecta, non solum partium similiarium compositione, sed etiam instrumentorum compositione indiguerunt. Auicennam quoque citat dicentem, vitulum in nubibus generatum semiuiuum excidisse inter imbres. Generantur etiam ex iuenculo strangulato apes, ex Basilico scorpiones, ex elixatura Anatis sub dio expositæ bufones, ex Asinis vespæ, ex equis Scarabæi, ex mulis locustæ, aque, quibusdā in locis cōuertuntur in lapides: aër cōcussus inter duriora corpora, repente transit in ignē, fumus metallorū, præcipue plumbi, cogit argentum viuū, cortex mali punici ferrum mutat in chalybem. Si igitur hæc tam admiranda & pene incredibilia fieri possunt, atq; adeò quotidie fieri videmus, cur incredibile videatur, posse ab Alchimis verū aurum cōfici? Hæc ille disputat pro Alchimis.

*Antonius  
Mirandulanus.*

ANTONIUS Mirandulanus, Philosophus nostræ memoriæ præstans, & in Aristotelis doctrina excellenter versatus, in illo suo opere quod



quod scripsit de Euerfione singularis certaminis libro 19. sect. 7. hanc de Alchimis sententiam pronuntiat. Dicimus veram esse Alchistarum opinionem quod aurum possit fieri, & ab arte & à natura, quia transmutare possunt argentum viuum, & alia quæ ad id requiruntur, ita vt fiat eadem materia: sicut non solum à natura sed etiam ab arte animalia, vt scorpiones, generari possunt. Verum quia illud aurum fit rarissimè & cum maxima difficultate, multa enim quæ ad id concurrunt, facillimè impediri possunt, idcirco non videtur fieri posse; sed rei difficultas non arguit impossibilitatem. Non est autem danda opera illi arti, non quia non sit vera, sed quia tantæ est difficultatis, vt sit vtilius eam omittere quàm exercere: & multi quidem ditissimi ad magnam inopiam redacti sunt, propterea quod maximis sumptibus impensis, vel nunquam assecuti sunt quod hæc ars pollicetur, vel certe rarò & parum, ita vt sumptus longè sit maior lucro, quare satius est alijs artibus certioribus operam dare, quæ maiori ex parte operam suam præstant, quàm huic quæ rarissimè propter res naturæ absconditas, finem suum assequitur. Hæc Mirandulanus.

EXPLICATVR BREVITER OPINIO  
auctoris.

**N**OBIS autem propositam quæstionē phi-  
losophicè considerantibus atque perpen-  
dentibus, tria videntur hac de re valde proba-  
bilia dici & firmari posse; vnum est, nullam esse  
ratio- *Sententia auctoris de auro alchymisti-*



*Calor cœ-  
lestis & e-  
lementaris  
non differ-  
unt specie.*

rationem philosophicā, vel necessariā, vel etiam  
admodum probabilem, qua demonstretur ra-  
tionem chemicam efficiendi verum aurum, esse  
impossibilem. Cur enim putetur impossibile?  
An quia nihil eorum quæ sunt à natura potest  
fieri ab arte? at hoc in generatione multorum  
animalium, aliarumq; rerum quæ opera & mi-  
nisterio artis non secus generantur quàm à sola  
natura, falsum esse cognoscitur. An quia (vt vo-  
lebat Ægidius) nihil eorum quæ sunt in genere  
suo perfectissima, potest produci nisi vno mo-  
do, id est, solum ab agente suo naturali? Verum  
si Ægidius verisimili aliqua ratione hoc proba-  
ret, aliquantulum fortasse valeret ad persuadē-  
dum: cū autem nullam huius rei probatio-  
nem afferat, qua facilitate ab eo id dicitur, eā-  
dem planè à nobis contemni ac reijci potest. An  
denique quia aurum naturale generatur virtute  
caloris cœlestis, aurum verò chemicum efficitur  
à calore igneo, qui duo calores cū multū  
inter se differant, non poterunt eundē effectum  
præstare? sed hæc ratio dupliciter peccat. Pri-  
mū enim falsum est calorem cœlestē & igne-  
um specie inuicem distingui: cū enim ab eo-  
dem contrario, hoc est, à frigore similiter cor-  
rumpantur, cū ab eadem causa interdū pro-  
ducantur nimirū à lumine, cū se inuicem  
intendant atq; augeant, cū ad productionem  
ignis & mixtorum simili ratione conducant, fie-  
ri nō potest, vt ea ratione qua calores sunt, spe-  
cie distinguantur inter se: differunt igitur ea re  
solum, quòd calor cœlestis propter ordinatum  
cœli



cœli motum, est valde temperatus & accōmo-  
 datus ad generationem & conseruationem re-  
 rum sublunarium, quam ob causam appellatur  
 salutaris & viuificus: calor autem igneus ex se  
 non est temperatus, sed agit quantum potest a-  
 gere, & res sibi subiectas tandem destruit atque  
 interimit, quocirca vocatur à Philosophis de-  
 structiuus & corruptiuus rerum. Verum si hic  
 calor aliunde corrigatur atque temperetur, ni-  
 mirum vel à facultate animæ, vt in animalibus  
 contingit, vel ab arte, vt fit in multis mixtis &  
 medicamentis quæ à calore igneo, moderatio-  
 ne artis procreantur; efficietur profectò vt ca-  
 lor igneus talis propemodum euadat, qualis est  
 cœlestis. Deinde, experientia manifestè osten-  
 dit quædam animalia similiter generari posse ca-  
 lore igneo atque calore cœlesti. Nam apud Æ-  
 gyptios pulli calore igneo ex ouis excluduntur  
 atque procreantur. Quam rem Iulius Scaliger,  
 vir propter excellentem omnium disciplina-  
 rum eruditionem admirandus, in ijs quæ scri-  
 psit contra Cardanum exercitatione 23. pulchrè *Animalis*  
 describit his verbis: In Ægypto ad Cayrum fu- *generari*  
 mos construunt alij alio multiplici fornice im- *posse solo*  
 posito: in quorum tholi supremi medio, fora- *calore i-*  
 men est, per quod calor vis, quæ immodica *gnis, argu-*  
 possit officere, subit atq; exhalat: in imo ignem *mentum*  
 accendunt temperatum: Quorum multas cen- *Iulij Sca-*  
 turias in fornicum superiore planitie disponūt: *ligeri.*  
 statis diebus erumpit pullorum turba, quos illi  
 non numero sed mensura venales habent: mo-  
 diolum statuunt sine fundo: quem vt implerūt,  
 tollunt, neque hæc fabula est, sed fabulæ ipsi qui  
 negant.



*Ex auripigmento, teste Plinio, fieri verum aurum.*

negat. Hæc Scaliger. Ceterum posse ex alijs metallis verè aurum effici, pbari argumento & experimèto posset auripigmèti, ex quo perfectum aurum posse fieri, testis est Plinius, qui rem non prius temporibus sed sua ætate factam testatamq; commemorans, ita scribit lib. 33. cap. 4. Aurum faciendi est etiam vna ratio ex auripigmèto quod in Syria foditur pictoribus, in summa tellure, auri colore, sed fragili lapidum specularium modo. Inuitaueratq; spes Caium principem auidissimum auri; quamobrem inisit excoqui magnum pondus: & planè fecit aurum excellens, sed ita parui ponderis, ut detrimentum sentiret, illud propter auaritiam expertus, quanquam auripigmenti libræ 14. permutaretur: nec postea tentatum ab ullo est. Sic Plinius.

*Cum non videatur esse vera ars Alchimia.*

ALTERVM verò, quod eadem de re probabilissimè potest asseri, illud est, chemicam rationem efficiendi verum aurum non quidem physicè, sed moraliter ut aiunt, loquendo vel impossibilem, vel propemodum impossibilem videri; non propter ullam rationem philosophicam quæ adhuc ab ullo sit allata, sicut ostensum est, sed propter ipsam experienciã quæ in rebus naturalibus, moralibus atq; artificialibus, summi argumèti firmissimæq; rationis vim debet obtinere. Etenim cum plurimi in chemicæ facultatis tractatione & exercitatione diu multumq; laborauerint, & in veri auri effectiõnem acerrimis studijs atque incredibili cupiditate incubuerint, nemo tamen adhuc fuit præter vnum aut alterum probatis proditum historijs, quem liquido constet verum aurum & omni ex parte proba-



probatum ac perfectum effecisse. Quod si effectio auri per artem chemicam est possibilis, cur ea cum tamdiu & tam multum optata, quæ sita, & procurata fuerit, nondum tamen reperta & vñitata fuit? nam quia possibilis est generatio animalium, medicamentorum, aliarumq; multarum rerum non solum per naturam, sed etiam per solertiam & industriam humanam, iam pridem inuentæ sunt artes, quæ huiusmodi res & verè & facilè possunt perficere; cur igitur idem non contingit in auro chimico? nisi quia vel talis modus efficiendi tale aurum simpliciter est impossibilis, vel si est possibilis, nondum tamen is est humano ingenio, & fortasse non potest esse, exploratè perfectèq; cognitus. Atque hoc argumentum ab experientia ductum, non solum apud Philosophum naturalem, qui nunquam à rebus sensatis experientiaq; comprobatis, vel transuersum (vt aiunt) digitum discedit, sed etiam apud quemcumque hominem sanæ mentis rectiq; iudicij plurimum valere debet. Quod si habent isti, vt iactant, veram certamq; artem faciendi aurum, cur sibi primum non faciunt tantum auri, vt nullius egeant, sed bonis omnibus quæ parari auro possunt, abundant? At enim videre licet istos, semper egentes & mendicos, quique per vana promissa, alienis opibus exauriendis, suam quoquomodo egestatem subleuare, suamq; famem explere cupiant.

AD extremum, illud non tantum probabiliter dici, sed etiam pro vero certoq; confirmari potest, artem chemicam, licet ea fortassis sit utilis in distillationibus & alijs rebus quas superius



*Non esse  
permissen-  
dum in Re-  
publica &  
sum Alchs-  
mia.*

ex sententia Cardani memorauimus, tamen in eo quod spectat ad effectiōem veri auri quam illa profitetur atque in primis pollicetur vanam esse, noxiam ac perniciosam Reipublicæ. Primò, Quia aut nunquam, aut rarissimè præstat quod promittit, ex quo non semel factum est, vt multi ad extremam inopiam atque paupertatem redacti fuerint; vnde rectè quidā ait, Alchimistas non efficere aurum sed absumere; non implere crumenas, sed magis deplere & exhaurire. Deinde, quia faciunt falsum aurū falsamq; monetam, atque gemmas pro veris passim distrahunt, atque diuendunt, ex quo Respublica hominumq; societas magnum caperet detrimentum. Postremò, quia verum aurum non rarò adhibetur in medicinis ad exhilarandum & roborandum cor: aurum autem chemicum cū vel non sit verum aurum, vel certè imperfectius sit auro naturali, vel non vtiq; habeat eiusmodi proprietates, aut certè non ita vitales & salutare humano corpori, quare non sine discrimine salutis & periculo vitæ, in medicinis adhiberetur. Hæc igitur nobis visa sunt de chimica facultate efficiendi verum aurū probabiliter posse disputari.

### C A P V T XIII.

DE ORIGINE MAGIÆ ET IIS QVI  
in ea clari fuerunt.

**O**RIGINEM Magiæ, præsertim eius quam diximus non esse naturalem, variè tradunt scriptores. Philo libro De specialibus legibus  
censet



censet ex vera & naturali Magia adulterata &  
 corrupta natâ esse fallacem & quæ vulgo propriè  
 dicitur Magia, ita scribens : Ex hac adulterata &  
 deprauata, descendunt quas proprio maxime  
 vocabulo malas artes dicimus circulatorum a-  
 riolorumq; studia, mulierum, mancipiorumq;  
 nequissimorû expiationes & lustrationes profi-  
 tentium, mutationesq; amoris in odium, aut ex  
 aduerso in amorem odij, per quasdam passio-  
 nes amatorias & incantamenta idonea : atque  
 his dolis circumueniunt homines & ingentium  
 malorum atque ruinarum sunt causæ, non pri-  
 uatis modò hominibus aut familijs, sed ciuita-  
 tibus, regnis & prouincijs. Quamobrem huius-  
 modi artes, meritò lege Mosaica, grauissimis  
 propositis pœnis prohibentur. Hæc Philo. Ve-  
 tus tamen opinio est plurimorum scriptorum  
 probata consensu, principem huius Magiæ do-  
 ctorem & quasi parentem fuisse Zoroastrem, vel  
 Persen, vt Plinius & Diogenes Laërtius vocant;  
 vel Bactrianum, vt Diodorus Siculus & alij no-  
 minant. Et Plinius lib. 30. cap. 1. ita de eo scri-  
 bit : Sine dubio in Oriente orta est Magia, in Per-  
 side à Zoroastre, vt inter auctores conuenit. Eu-  
 doxus Zoroastrem hunc, sex millibus annorum  
 ante Platonis mortem fuisse prodidit; sic & A-  
 ristoteles; Hermippus, qui de tota ea arte dili-  
 gentissimè scripsit, & vicies centum millia ver-  
 suum à Zoroastre cōdita, indicibus quoque vo-  
 luminum eius positis explanauit, præceptorem  
 à quo institutus est Zoroaster, tradidit Azona-  
 cem quinque millibus annorum priorem bello  
 Troiano. De quo Zoroastre mira alijs locis scri-  
 bit

*Philo de o-  
rigine Ma-  
gia.*

*Zoroastres  
Magia pa-  
rens.*



*Plin. lib. 7.* bit Plinius : Vnum enim eum (inquit) mortali-  
um eodem quo natus est die risisse, cerebrumq;  
ita ei palpitalle, vt impositam repelleret manū,  
futuræ præfagio scientiæ : viginti annis in deser-  
to Magiæ vacantem, caeco vixisse ita tempera-  
to, vt vetustatem non sentiret. Iustinus quoque  
historicus libri primi initio, inuentorem artis  
Magiæ facit Zoroastrem : idemq; sentit B. Au-  
gustinus lib. 21. De ciuitate DEI, cap. 14. Solum,  
inquit, Zoroastrem quando natus est, ferunt, ri-  
sisse, nec ei boni aliquid monstrosus ille risus  
portendit : nam magicarum artium fuisse per-  
hibetur inuentor, quæ quidem illi nec ad præ-  
sentis vitæ vanam felicitatem contra suos ini-  
micos prodesse potuerunt; à Nino quippe As-  
syriorum rege, cū esset ipse rex Bactrianorum,  
bello superatus est. Suidas etiam ait, Magiam  
inuentum esse Persarum, apud quos Magi ma-  
gnam fidem & auctoritatem habuerunt. Auctor  
Historiæ Scholasticæ enarrans historiam libri  
Geneseos, cap. 39. Ninus, (inquit) vicit Cham  
qui adhuc viuebat & regnabat in Bactria, seu in  
*Cham idē* Thracia, vt alij volunt, & vocabatur Zoroaster  
*qui Zoroa-* inuentor artis Magiæ, qui & hanc, & septem li-  
*stres.*iberales artes in quatuordecim columnis scri-  
psit; septē æneis, & septem lateritijs, contra du-  
plex orbis excidium quod timebatur, vnum per  
aquas, alterum per ignem. Ninus verò libros  
eius combussit. hinc etiam orta sunt idola. Hæc  
ille. Verū de antiquitate Zoroastris non con-  
uenit inter scriptores : nam Eudoxus & Aristo-  
teles, vt ex Plinio retulimus, volunt eum anti-  
quiorem fuisse Platone, sex millibus annorum :

Hermip-



Hermippus autem vel (vt citat Laërtius) Hermodorus Platonius in libro De disciplinis facit eum quinque millibus annorum bello Troiano vetustiorē; è contrario autem Xantus Lydius, vt refert Laërtius, multo recentiorē eum facit, hoc est, sexcentis duntaxat annis ante Xerxis transitum in Græciam. Sed illi nimium multos computant annos, hic nimium paucos. Constat enim Zoroastrem fuisse tempore Nini primi Assyriorum regis, quo regnante natus est Abraam: ab ortu autem Abraæ, vsque ad primam Olympiadem fluxerunt anni mille centum septingenti & paulò amplius sexaginta: nam qui plures quam ceteri annos monarchiæ Assyriorum & Medorum vsque ad Cyrum attribuerunt, illi mille trecentos sexaginta, huic trecentos quinquaginta assignarunt. Cœpit autem Cyrus regnare initio quinquagesimæ quintæ Olympiadis: Secundum hanc igitur laxissimam computationem, à Nino & Zoroastre vsq; ad primam Olympiadem, numerantur anni mille quadringenti nonaginta quatuor. Bellum porro Troianum septem & quadringentis annis præcessit Olympiades: Xerxis transitus in Græciam, in 75. excessus Platonis in 108. Olympiadem incurrit. Ex quo apparet multitudinē illam annorum, quam Eudoxus, Aristoteles & Hermippus tribuunt antiquitati Zoroastris, vel esse fabulosam, vel annos illos non quales nostri sunt, sed quales Ægyptij & Arcades habuerunt, hoc est, trimestres, esse censendos. Nec dissimile fuit eodē in loco Plinij, quippe qui ait Mosē multis annorum millibus posteriorem fuisse Zoro-

*Laërtius  
initio Ope-  
ri.*



astre; cum subtilissima Chronologiæ ratione compertum sit, paulò amplius sexcentis annis Mose priorem fuisse Zoroastrem.

*Cassiani de  
origine Ma-  
gia opinio.*

*Gen. 6.*

APVD Cassianum Serenus abbas collat. 8. cap. 21. originem Magiæ & omnium maleficarum artium altius repetit, nimirum etiam ante diluuium, ex eo tempore quo filij DEI, vt scriptura narrat, permisti sunt filiabus hominum. ait enim, scientiam omnium rerum cœlestium & sublunarium quam Adam à DEO acceperat, tradidisse ipsum filio suo Seth, cuius semen eam seruauit incontaminatam, & donec diuifum à sacrilega propagine Cayn perdurauit, eam doctrinam ad DEI cultum, & ad vtilitatem vitæ communis exercuit: cum verò fuisset impiæ generationi permixtum, ad res profanas atque noxias, quæ piè didicerat, instinctu Dæmonis deriuauit; curiosasq; ex ea maleficiorum artes atque præstigias ac magicas superstitiones audacter instituit. Sed quomodo hæc curiosa & malefica doctrina diluuium non perierit, in causa fuit Cham, vt antiquæ ferunt traditiones, qui superstitionibus & sacrilegis artibus fuit infectus, easq; artes, cum in arcam in quam cum Noë patre suo iustissimo, & sanctis fratribus ingressurus erat, inferre non auderet; diuersorum metallorum laminis, quæ scilicet aquarum non corrumperebuntur iniuria, & durissimis lapidibus qui vim ignis non sentirent, insculpsit: quæ diluuium peracto, eadem qua ille celauerat curiositate perquirens, sacrilegiorum ac perpetuæ nequitie seminarium transmisit in posteros. Hac itaque ratione illa opinio vulgi qua creditur Ange-



Angelos vel maleficia, vel diuersas artes hominibus tradidisse, in veritate completa est. Hactenus Abbas Serenus.

SED mihi verius sentire videntur, qui Diabolum primum Magicarum artium auctorem & parentem faciunt, à quo mortales earum cognitionem acceperint, & vsum didicerint. Et sanè primum Magiæ vsum & effectum memoria repetentibus, haud improbabiler videri potest, Magiæ vsum vnà cum mundo cœpisse, & quidem in Paradiso, salua etiam tunc & integra illibataq; hominis innocentia. Ibi enim Diabolus formam sibi induens serpentis, vel occultè per verum & naturalem serpentem Euam alloquens, blandissimis deceptam promissis, ad vitum pomum maximo sui suæq; totius humanæ sobolis exitio, edendum induxit. Nec mirum videri debet si Diabolum Magiæ auctorem faciamus; cùm ipse, vti apud Ioannem capite octauo Dominus noster dixit: *Homicida sit ab initio, & in veritate non steterit, quia non est veritas in eo. Cum loquitur mendacium, ex proprijs loquitur, quia mendax est & pater mendacij.* Rectè igitur Lactantius libro secundo Diuinarum institutionum, omnium maleficarum artium inuētores & magistros fuisse Dæmones, confirmat his verbis: Eorum inuenta sunt Astrologia & Aruspicina & Auguratio, & quæ dicuntur Oracula, & Necromantia & ars Magica, & quicquid præterea malorum exercent homines vel palàm, vel occultè: quæ omnia per se falsa sunt, vt Sibylla Erythræa testatur. Hæc & alia multa in

*Prima origo Magicarum artium à Demone.*

*Lactantius.*



*Praclara  
Cypriani  
sententia.*

eandem sententiam eo loco Lactantius commemorat. Sed nemo grauius & elegantius omnes Magiæ species omnesque fallacias ex Dæmone profectas esse ostendit quàm Cyprianus in libro de Idolorum vanitate: Nequissimi, inquit, spiritus, sub statuis ac imaginibus consecratis delitescent. hi afflatu suo vatum pectora inspirant, extorum fibras animant, auium volatus gubernant, sortes regunt, oracula efficiunt, falsa veris semper inuoluunt: nam & falluntur & fallunt, vitam turbant, somnos inquietant, irrepunt in corpora, mentes terrent, membra distorquent, valetudinem frangunt, morbos laceffunt, vt ad cultum sui cogant, vt nidore altarium & rogis pecorum saginati, remissis que constrinxerant, curasse videantur. Hæc est de illis medela, cum illorum cessat iniuria; nec aliud illis studium est à DEO homines auocare, & ad superstitionem sui, ab intellectu veræ religionis auertere: cum sint ipsi pœnales, quærunt sibi ad pœnam comites, quos ad crimen suum fecerint errore participes. Hi tamen adiurati per Deum vnum à nobis, statim cedunt & fatentur, & de obsessis corporibus exire coguntur. Videas illos nostra voce & operatione, quasi flagris cædi, igne torreri, eiulare, gemere, deprecari, vnde veniant, aut quando discedant, ipsis etiam qui se colant audientibus confiteri, & vel exiliunt statim, vel euanescent gradatim, prout fides patientis adiuuat, aut gratia curatis adspirat. Hinc vulgus in odium nostri nominis cogunt, vt nos odisse incipiant homines antequam nosse, ne cognitos aut imitari possint, aut damnare non possint. Hæc Cyprianus. SED



SEd ne christianorum hominum duntaxat hæc videatur opinatio, excitabo etiã testes Philosophos Græcorum, & quidem nobilissimos. Aristoteles in primo de Philosophia libro, vt Laërtius initio sui Operis memorat, Magos Ægyptijs antiquiores esse, p̄didit, duoq; iuxta illos esse principia, bonum Dæmonem, & malum: alterum ex his Iouem & Onomasdem, alterum Plutonem & Arimanium dici: quod Hermippus quoque in primo de Magis ait, atque Eudoxus & Theopompus, qui & reuicturos homines, iuxta Magorum sententias dicit, immortalesq; futuros: & vniuersa illorum mysteria & effectus precationibus quibusdam constare. Ista Eudemus quoque Rhodius tradit. Hæc Laërtius. Verùm nihil luculentius testimonio Porphyrij: quod libro 5. De præparatione Euangelica, cap. 7. his verbis refert Eusebius: Magicæ artis dij Gentilium & inuentores & doctores fuerunt. Vnde namque homines quibus rebus Dæmones colantur & cogantur, quàm ab ipsis Dæmonibus discere potuissent? Neque putes id à nobis tantùm dici: Porphyrius testis citetur, qui in libro De responsis sic ait: Non solùm felicem conuersationem suam, verùm etiam quibus rebus gaudeant & quibus alligentur, Dij hominibus significârunt. Adhæc quibus rebus cogantur, & quæ sibi afferenda sint, & quos dies vitare oporteat, figuras quoque ipsas simulachrorum quales esse debeant, & in quibus locis ipsi versentur, & omninò nihil est, quod ab ipsis dijs homines non didicerint. Atque hæc Porphyrius ex varijs Proserpine responsis demon-

*Porphyrius.*



*Exod. 7.*

strat & confirmat. Quid ergo mirum, Magicæ artis & inuentionem & studium & vsum fuisse antiquissimum? Certè nos supra à Mundi vsq; primordijs, Magicæ originem repetiuimus, & liber Exodi satis clare ostendit, iam tempore Mo-  
 fis, hoc est, plusquam trecentis annis ante bellum Troianum, Magiam claram & celebrem fuisse, Magosq; magna apud eam gentem, & sapientiæ & diuinæ cuiusdam virtutis auctoritate & existimatione floruisse, vtpote qui se Mosi opponere ausi fuerint, similiter illi mira quædam operantes. Nec DEVS per Mosem tam graues poenas aduersus Magos constituisset, nec tam seuerè eorum consuetudinem & congressum Iudæis interdixisset, nisi iam tunc eorum ars, sicut hominibus exitiosa erat, sic nota & celebris fuisset. Porro circa belli Troiani tempora claram fuisse Magicæ famam, non obscure indicat Homerus, præsertim in Vlyssis erroribus, adeò vt totum opus nō aliunde constet. Siquidem Protea & Syrenum cantus apud eum, non aliter intelligi volunt; Circe vtique & inferorum, euocatione hoc solūm agi. Deinde apud Thessalas vrbes diu Magia, magna celebritate viguit. Orpheus quoque magnam ei fidem & auctoritatem addidit. Sed primus extat, vt inquit Plinius, de eo commentatus Osthane Xerxem regem Persarum bello quod Græcis intulit, comitatus, qui velut femina artis portentosæ sparfit; obiter infecto quocunque commeauerat mundo; & hic maximè ad rabiem, non auiditatem modo scientiæ eius Græcorum populos egit. Sed ante hunc, clarissimum in ea arte Pythagoræ nomen fuit.



fuit. Is autem quem dixi Pythagoras, & post eum Empedocles, Democritus & Plato ad hanc discendam nauigauere, exilijs verius, vt inquit Plinius, quàm peregrinationibus susceptis, hanc reuerſi prædicauere, hanc in arcanis habuere. Sed maxime omnium Democritus, & aliorum ſuiſq; editis de ea voluminibus, eodem tempore in Græcia, quo medicinam Hippocrates, hoc eſt, circa Peloponneſiacum Græciæ bellum, & annum Romæ conditæ trecentefimum, eam illustrauit. Multis poſt hos ſæculis, Apoſtolorum temporibus apud Brachmanas Indorum Iarchas, & apud Gymnoſophiſtas Æthiopum, Teſpeliſon Magiæ exiſtimatione illuſtres fuerunt: quo tempore Simonem cognomento Magum, *Simon Magus.* propter hanc artem multum claruiſſe, omnis loquitur Eccleſiaſtica hiſtoria. Is Apoſtolorum *Aſtor. 8.* æmulus, non apud Samaritas modò, ſed apud Romanorum quoque principes, ad magicas eiuſ præſtigias attonitos, honores etiam diuinos obtinuit: ex quo velut parente, multiplex hereticorum ſoboles prognata, & ſub Chriſtiano nomine magicas artes profeſſa, religionem & diſciplinam chriſtianam apud ignaros, infamem & odioſam fecit. Verùm omnes ante ſe poſtq; eiuſ artis famæ celebres, longè ſuperauit Apollonius Tyaneus, eiuſ per diſcendæ ſtudio totum penè orbem peruagatus, & cum ijs congreſſus quicunque tunc in ea clari habebantur. Is Magiæ ſcientia tantam nominis claritatem gloriâq; ſibi comparauit, tantaq; ſui admiratione hominum animos impleuit, vt à multis eiuſ ſapiëntiam operatq; æſtimantibus, & viuus & mortuus quaſi



*Vnde tanta  
Magia au-  
thoritas.*

quasi DEVS haberetur. Taceo hîc Plotinum, Porphyrium, Iamblichum, Proclum, Apuleium aliosq; Pythagoricæ ac Platoniciæ sectæ plurimos, qui Magiâ & coluerunt studiofissimè, & pugnacissimè defenderunt, & tanquam inter omnes sapientiæ partes clarissimam, vtilissimamque, summis laudibus prædicauerunt. Sed quæret aliquis, quomodo Magia artium omnium vanissima & fraudulentissima, tantum in toto terrarum orbe totq; seculis valuit? Huic quæstioni respondens Plinius primo capite tricesimi libri. Auctoritatem, inquit, ei maximam fuisse nemo miretur: quandoquidem sola, artium, tres alias imperiosissimas humanæ mentis complexa, in vnam se redegit. Natam primùm è Medicina, nemo dubitat, ac specie salutari irrepsisse, velut altiore sanctioremq; quàm medicinam: ita blandissimis desideratissimisq; promissis, addidisse vires religionis, ad quas maximè etiam nunc caligat humanum genus. Atque vt hoc quoque suggererit, miscuisse artes mathematicas, nullo non auido futura de sese sciendi, atque ea è cœlo verissimè peti credente. Ita possessis hominum sensibus triplici vinculo, in tantum fastigium adoleuit, vt hodieq; etiam in magna parte gentium præualeat, & in Oriente regum regibus imperet. Hæc Plinius.

*Religio &  
disciplina  
Christi te-  
nebras Ma-  
gia & ve-  
terum ma-  
leficarum*

CETERVM illud hoc loco magno nostro gaudio ingentiq; gloria Christianæ religionis considerandum est, cum primum Euangelicæ doctrinæ lux mundo affulsit, omnium magicarum fraudum caliginem fuisse discussam atque dissipatam. Simul enim fides CHRISTI prædicat & rece-



& recepta mundo fuit, omnis magicarum ar-  
 tium, oraculorum, vaticinationum ceterarūq;  
 diabolicarum fraudum vis concidit, defecit, e-  
 uanuit. Post Euangelium (inquit Tertullianus  
 in libro de Idololatria) nusquam inuenies aut  
 Sophistas, aut Chaldaeos, aut Incantatores, aut  
 Coniectores, aut Magos, nisi planè punitos. Vbi  
 sapiens? vbi literator? vbi conquistator huius æ-  
 ui? Nonne infatuauit DEVS sapientiam huius  
 sæculi? Sic Tertullianus. Atque hæc ita fore, vti  
 cernimus euenisse, multò antè CHRISTVS DO-  
 minus discipulos suos docuerat: nam apud Io-  
 annem cap. 12. dixit: *Nunc iudicium est mundi,*  
*nunc princeps huius mundi eijcietur foras: & ego si*  
*exaltatus fuero à terra, omnia traham ad me ipsum:*  
 Et apud Lucam capite 11. *Cum fortis armatus cu-*  
*stodit atrium suum, in pace sunt ea quæ possidet. Si*  
*autem fortior eo superueniens vicerit eum, vniuersa*  
*eius arma aufert in quibus confidebat, & spolia distri-*  
*buit.* Quantum (inquit Eusebius libri primi De  
 præparatione Euangelica, cap. 2.) recepta CHRI-  
 STI fide mundus profecerit, ipsis oculis cerni-  
 mus. Non enim Persæ qui eum secuti sunt, ma-  
 tres suas nefandis nuptijs cognoscunt: non hu-  
 manis vescuntur carnibus Scythæ, nec carissi-  
 mos, falsa religione impulsæ liberos iugulant:  
 non Massagetæ ac Derbices propinquos atque  
 affines suos senectute confectos immolant, aut  
 eorum carnes epulantur: non Tybareni senes  
 suos præcipitare, Hyrcani rapaci auium generi,  
 non Caspij canibus proijcere solent; quæ qui-  
 dem antea religiosissimè facièbant: nunc verò  
 euange-

atrium &  
 Mundo dis-  
 cussis.

Esai. 29.

1. Cor. 1.

ibidem.



euangelica virtute vndique hæc tetra, foeda & immania flagitia explosa sunt. Quis iam doctrinam christianam amplexus, Deos putat aut inania & surda simulachra, aut maleficos Dæmonas in eis habitantes, aut partes mundi quæ cōspiciuntur, aut mortuorum vmbas, aut etiam animalium vel abiectissima & nocentissima? quibus tamen rebus vniuersæ penè gentes ante prædicationem Euangelij diuinos honores cultusq; tribuebant. Non satis existimari potest, inquit Plinius lib. 30. cap. 1. quantum Romanis debeatur, qui sustulere monstra, in quibus hominem occidere religiosissimum erat, mandati etiam saluberrimum. Quis ergo satis æstimet, quantum debeant CHRISTO, cū aliæ gentes, tū in primis & gens & vrbs Romana, cū ius fidei ac doctrinæ beneficio, maximis est malis liberata, summisq; beneficijs affecta? Roma enim (vt ait B. Leo sermone primo De natiuitate Apostolorum Petri & Pauli) DEVM suum ignorans, cū penè omnibus dominaretur gentibus, omnium gentium seruiebat erroribus: & magnam sibi videbatur assumpsisse religionem, quia nullam respuebat falsitatem, in qua diligentissima superstitione habebatur collectum, quicquid vsquam fuerat vanis erroribus institutum, vnde quantò est per Diabolum tenacius illigata, tantò fuit per CHRISTVM mirabilius absoluta.



CAPVT



## CAPVT XIV.

AN MAGIÆ STVDIVM ET  
vsus sit licitus.

**D**VPLICEM supra Magiam fecimus; vnā naturalem, alteram non naturalem. Naturalis cū sit doctrinæ Physicæ, Medicæ, ac Mathematicæ pars nobilissima, per se bona & honesta est, hominūq; studio & cognitione dignissima. Fortassè autem eius studium & tractatio publica meritò prohiberi posset in Republica, videlicet, si timeretur ne ea in vulgus prodita, multi (quæ est humani ingenij ad mala procliuitas) ad perniciem exitiūq; aliorum abuterentur. Nam licet medicina quoq; abuti possint medici, & ob eandem causam etiam prohibenda videretur; attamē alia est ratio Medicinæ, alia Magiæ: nam Medicina, & eius vsus est per se necessarius mortalibus, & abusus manifestior est, quàm vt omninò celari queat; ideoq; punitu ac emendatu facilius. Magiæ verò, nec vsus societati hominum est per se necessarius, & est abusus occultus: latet enim per quas res & qualiter Magia operetur. Quamobrem valde timeri potest, ne, quò est occultior in operando, eò magis fiducia impunitatis, lubrica sit ad nocendum.

MAGIA verò non naturalis, præsertim quæ *Destudio* commercio & fœdere inito cum Dæmone *Magia.* nitur, dupliciter addisci potest, vel speculatiuè tantum, vel etiam practicè, hoc est, vel noscendi tantum causa, vel etiam vtendi & exercendi. Nuda cognitio Magiæ per se mala non est: omnis



nis enim cognitio veri bonum quoddā & perfectio est intellectus; si enim cognitio malorum bona non esset, DEVS eam non haberet; atqui DEVS omnium bonorum pariter atque malorum scientiam perfectissimam habet, si per se mala esset cognitio huius Magiæ, ergo nulli prorsus eam discere aut nosse liceret. Quomodo igitur Ecclesiæ Doctores & rectores, huius Magiæ vanitates, fallacias, maleficia, impiasq; superstitiones detegere & confutare possent? quomodo probare, mira illa quæ faciunt Magi, vel esse meras imposturas vel opera Dæmonum, vel occultarum virtutum naturalium effecta? quomodo demonstrare, nullum opus Magorum verè posse dici miraculum? quomodo docere, CHRISTI miracula multum differre ac præstare Magorum miraculis, & nec Magos virtute diuina operari, nec CHRISTVM eiusq; seruos miracula magicis artibus edidisse? Atq; hoc animo & consilio nō nullis Magiæ studere concessum est. Nos christiani (inquit Tertullianus libro De Anima) fallacem Magiam non socia conscientia, sed inimica scientia nouimus, nec inuitatoria operatione, sed expugnatoria dominatione tractamus multiformem hanc lucem mentis humanæ, totius erroris artificem, salutis pariter, animæq; vastatricem. Itaq; mihi quidem videtur rectè dixisse Ioan. Picus Mirandulanus: Quò quis est Magiæ peritior, eò clarius eum cernere quantum inter Magorum & CHRISTI atque sanctorum miracula interfit. Sed studium eius potest tripliciter non esse bonum; vel si quis illud præferat studijs vtilioribus, & tantum propter inanē quādam



dam curiositatem illud capeſſat; vel ſi ad malè agendum id referre velit; vel ſi propter imbecillitatem mentis periculum ſit, ne huius Magiæ fraudibus & ſuperſtitionibus circumueniatur. Meritò igitur id ſtudioj publicè chriſtianis vetitum eſt, nec vlli niſi permiſſu rectorum Eccleſiæ conceditur.

V s v s autem huius Magiæ in totum damnatus eſt & vetitus, nō ſolū lege diuina & Eccleſiaſtica, ſed etiam ciuili, nec chriſtianorum tantū, ſed etiam Gentilium. Non eſt autem vſus Magiæ licitus: aut enim ibi eſt peccatum infidelitatis, ſi quis Dæmoni credens, tribuat ei diuinum numen: aut eſt peccatum idololatriæ, ſi oblationibus & ſacrificijs cultum Dæmonibus adhibeat: aut ſaltem eſt peccatum inobediētiæ, quia tam Magus quàm qui opera Magi vtitur, facit contra prohibitionem diuinam & eccleſiaſticam. Cauſa autē huius prohibitionis triplex eſt; Primò, quia is peccat in ſe ipſum, committens ſe in magnum diſcrimen, ſcilicet deceptum magicis fraudibus in graues errores labendi. Deinde iniuriam facit Eccleſiæ, cum Dæmone habens commercium & familiaritatem, qui eſt omninò præciſus ab Eccleſia eiꝰ aduerſarius. Poſtremò grauiffimè DEVM offendit, dum cōfugit ad Diaboli opem & auxilium; quaſi non ſit omnipotens & homini abunde prouidens & conſulens DEVS chriſtianorum. Quàm grauibꝰ autem, & minacibus verbis DEVS & vſum & ſtudiū huius Magiæ prohibeat, ex varijs ſcripturæ locis liquidò cernitur. In capite 19. Leuitici ſic habes: *Non augurabimini, nec obſeruabitis*

*De vſu Magiæ.*

*Magia vſu  
ita diuini  
legibus.*

*H*

*ſomnia*



somnia. Non declinetis ad Magos, nec ab ariolis aliquid sciscitemini, ut polluamini per eos. Et capite sequenti 20. Anima que declinauerit ad Magos & ariolos, ponam faciem meam contra eam, & interficiam illam de medio populi sui. Et cap. 18. Deutero: Non inueniatur in te qui sciscitetur ariolos, & obseruet somnia & auguria: nec sit maleficus, nec incantator, neque qui Pythones consulat, aut quærat à mortuis veritatem. Omnia enim hæc abominatur Dominus; & propter istiusmodi scelera delebit has gentes in introitu tuo. Et 4. lib. Reg. cap. 1. Ochoziæ regi Israël qui miserat nuncium ad consulendum Beelzebub deum Accaron de ægritudine sua: Elias hæc renunciari iussit: Nunquid non est DEVS in Israël, ut eatis ad consulendum Beelzebub deum Accaron? Quamobrem hæc dicit Dominus; De lectulo super quem ascendisti, non descendes, sed morte morieris. Et lib. 2. Paralipomenon, cap. 33. inter alia scelera regis Manassis, hæc connumerantur: Obseruabat somnia, sciscitabatur auguria, maleficis artibus inferuiebat, habebat secum magos & incantatores; multaq; mala operatus est coram Domino, ut irritaret eum. Cuius seuerissimi præcepti hanc rationem reddit Philo in libro De specialibus legibus: Non finit noster legislator procrastinari veneficorum supplicia, sed absq; mora vult exigere: quod dilatio, noxijs opportunitatē peccandi præbeat, ceteris metum asserat, existimantibus, quicquid illorum vitæ accedit, suæ securitati decedere. Idcirco sicut viperas, scor-

Egregia  
Philonis  
sententia.



scorpiones, aliasq; venenosas bestiolas, priusquam mordeant aut sauciant, aut etiam se commoueat, sine mora ad primum aspectum occidimus, præcauendo naturalem eorum malitiam priusquam noceant: eodem modo eiusmodi homines plectendi sunt, qui magicis suis artificijs & maleficis artibus incautos homines non solum errore implicant, sed in graues calamitates intrudunt. Sic Philo. Quàm essent autem hæ artes magicæ, & Apostolis & nascentis Ecclesiæ christianis abominabiles & exosæ, vel vnus locus qui est in 19. capite libri De Actis Apostolorum, apertissimè declarat, vbi sic legimus: *Multi ex his qui fuerant curiosa sectati, contulerunt libros, & combusserunt coram omnibus.* Vt autem & multitudinem & pretium librorum intelligeremus; subditur, eos quinquaginta denariorum millibus fuisse æstimatos. illos autem libros de rebus curiosis, Chrysostomus, Augustinus, Beda, Oecumenius alijq; de rebus magicis scriptos fuisse interpretantur. Restat vt de Magis Pharaonis, qui se opposuerunt Mosi, nonnulla disputemus.

## DE MAGIS PHARAONIS,

Exodi 7.

SACRA Scriptura narrat Pharaonem aduersus Mosén iussisse accersiri sapientes & maleficos, qui per incantationes Ægyptiacas & arcana quædam similia fecerunt, tribus prioribus prodigijs à Mose factis: sapientes vocat, vel Astrologos, vel Philosophos, præsertim Magiæ natura-

Exodi 7.

H 2

tura-



turalis peritos: Maleficos autem, qui Magiam illam quam supra nominauimus, non naturalem, tenebant & exercebant. Itaque horum nomine significantur præstigiatores, Necromantici, & qui magicis artificijs abutuntur ad patranda scelera, velut adulteria, furta, homicidia, atque ob id dicuntur malefici: nam & faciunt mala, & malo modo, nimirum Dæmonum auxilio cum multis item fraudibus, mendacijs & hominum deceptionibus. Dicuntur autem, ut refert Iosephus libro secundo Antiquitatum, illi Magi fuisse sacerdotes: apud Ægyptios enim tales erant existimatione omnis sapientiæ sacerdotes, quales apud Indos Brachmanes, apud Æthiopes Gymnosophistæ, apud Græcos Philosophi, & apud Iudæos Prophetæ. Dicit autem Scriptura, eos operari solitos per incantationes Ægyptiacas, & per quædam arcana: nam operabantur cantando quædam verba modo carminum: sed quia vel verba illa erant secreta, Onkelus vertit, susurrationes: vel modus quo operabantur, erat secretus & occultus, idè vocantur arcana. Dicuntur autem Ægyptiaca, non quod primum in Ægypto inuenta fuerint, sed quia verbis & ritibus Ægyptiacis constabant; vel quia non idem est genus & modus incantationum apud omnes gentes, sed alius alibi gētium. Septuaginta interpretes vocāt Sophistas & Pharmacos, id est veneficos & incantatores, Onkelus Magos, Aquila vertit *νεφιστας*, id est, occultorum cognitores, & patratōres.

CAPVT



## CAPVT XV.

*QVI FVERINT ILLI MAGI QVI  
resisterunt Moysi coram Pharaone.*

**S**CRIPTVRA neminem eorum nominatim appellat: Sed B. Paulus posterioris Epistolæ ad Timotheum cap. 3. ait Ianne & Mambre restitisse Moyfi. Chrysostomus illum locum exponens ait, Paulum illorum duorū nomina comperta habuisse ex antiqua certaꝫ Hebræorum traditione, vel ex SPIRITVS sancti reuelatione. Sic etiam Theodoretus & Theophylactus. Alij dicunt fuisse librum quendam apocryphum, qui inscribebatur liber Iannis & Mambres, ex quo libro volūt Paulum transcripsisse illorum Magorum nomina. Quod probare videtur Origenes Tractatu 35. in Matthæum, vbi exponēs verba illa Pauli, ait nomina illa Magorum non inueniri in scripturis publicis, sed in secreto quodam libro qui inscribitur. Liber Iannis & Mambres. Quapropter nonnulli epistolam illam Pauli reijcere ausi sunt, tanquam apocryphis vtentem testimonijs: cū tamē, inquit Origenes, nemo adhuc ausus sit reijcere priorem epistolam ad Corinthios, in cuius capite 15. citatur sententia quædam ex Menandro Poëta. Hactenus ex Origene. à quo non discrepat vulgo putatus Ambrosius eundem illius epistolæ locum explanans, exemplum, inquit, hoc de apocryphis est: Iannes enim & Mambres fratres erant magi vel venefici Ægyptiorū, qui arte Magiæ suæ, virtuti DEI quæ per Mosē operabatur, emulatiōe cōmentitia resistere se posse putabāt.

H 3

Sed



*Exod. 8.*

Sed cum Moyſi virtus in operibus creſceret, humiles facti, cum dolore vulnerum fateri coacti ſunt DEVM in Moſe operari. Gelafius Papa Diſtinct. 15. ſancta Romana Eccleſia, hunc librum Iannes & Mambres inter apocryphos numerās, reprobat. Horum etiam Magorum meminit Plinius lib. 30. cap. 1. & vocat Iamne & Iotape, falſò dicens eos fuiſſe ludæos: ſed in eo præterea fallitur, quòd iſtos multis annorum millibus fuiſſe dicit poſt Zoroaſtrem; cum ex Iuſtini libro primo conſtet Zoroaſtrem fuiſſe tempore Nini primi Aſſyriorum regis, quo regnante natus eſt Abraam, à cuius ortu uſque ad tempus iſtorum prodigiorum, non niſi quingentiquinque anni fluxerunt; quin ab ipſo diluuiò non amplius ſeptingentis nonagintaſeptem præterierunt. De his quoque Numenius Pythagoricus in 3. lib. De bono ita ſcribit: Iannes & Mambres, Ægyptij erant, magicis artibus adeò præpotentes, ut Muſæo Iudæorum duci, viro DEO coniunctiſſimo, ſoli reſiſtere poſſe à cunctis Ægyptijs iudicati ſint: multas enim calamitates quas Muſæus Ægypto intulit, ſoluere viſi ſunt. Hæc refert Euſebius libro 9. De præparatione Euangelica, cap. 3. Hos autè Magos fratres fuiſſe, & Ambroſius loco ſupradictò affirmat, & ex narratione B. Macharii Palladius commemorat. Sed quia in Macharij & Palladij mentionem incidimus; nō alienum fuerit hoc loco quæ narrat Palladius vitam Macharij ſcribens de mirabili horum Magorum ſepulchro ab ipſo Machario viſa & comperta, & deinde narrata Palladio, hîc adſcribere. Dicebat Macharius Iannem &

*Memoria-  
bilis hiſto-  
ria.*

H 4

Mam-



Mambrem fuisse fratres, propter magicæ artis excellentiam, maximam apud Pharaonem & Ægyptios tunc temporis habētes auctoritatem atque potestātē: qui dum viui essent, intra quādam Ægypti solitudinem, in hortis quibusdam sepulchrum sibi construxerunt ex lapidibus quatuor pedum magnitudine, multumq; auri illic condiderunt, & omnis generis arbores plātauerunt, & maximum aquæ puteum foderunt, sperantes fore vt post suum obitum in illo paradiso delicijs fruerentur. Hic autem locus, vt communi illius regionis fama ferebatur, à Dæmonibus tenebatur atque custodiebatur. Incessit Machariū cupido visendi locum, profectusq; cum iam propē accessisset, obuiā illi occurrerunt ad septuaginta Dæmones varijs formis, alij clamantes, alij exilientes, alij magno cum fremitu in eum stridentes dentibus, alij figura coruorū in eum inuolantium, quibus euanescentibūs, ingredienti iam in paradisum, occurrit Diabolus cum districta romphæa ei minitans: quem facto crucis signo repellens, ingressus est locum; omniaq; contemplatus, reperit cadum æneum, catena ferrea pendentem ex puteo, iam tempore consumptum, & fructum malorum punicorum, quæ nihil intus habebant, fuerant enim arefacta sole; & plurima aurea donaria. Hæc

Palladius de sepulchro horum Ma-

gorum ex Macharij relatione.

H 4

CAPVT



## CAPVT XVI.

AN PRODIGIA QVÆE MAGI ILLI  
fecerunt, fuerint vera, an tantum si-  
mulata.

*Exod. 7. & 8.*

*Prima opi-  
nio, fuisse  
veros ser-  
pentes.*

MAGNA quæstio est, varijs scriptorum sen-  
tentijs in vtramque partem agitata, an ser-  
pentes illi seu dracones, in quos scriptura nar-  
rat virgas à Magis proiectas, fuisse Ægyptiacis  
incantationibus atque arcanis conuersas, fue-  
rint veri & naturales serpentes, nō minus quàm  
is in quem virga Aaron mutata fuit, an potius  
fuerint simulachra quædam tantum & imagines  
serpentum qui à Dæmonibus, serpentum modo  
mouebantur. Quod autem de serpentibus Ma-  
gorum diximus; de aqua mutata in sanguinem,  
& ranis productis itidem intelligi volumus.

MULTI & graues scriptores existimarunt  
serpentes illos fuisse naturales: hoc enim docet  
Theodoretus in Quæstionibus suis in Exodum  
quæst. 18. idemq; apertius & copiosius B. Augu-  
stinus libro 3. de Trinitate, cap. 7. & 8. & in libro  
octogintatrium quæstionum quæst. 79. quem in  
hoc ferè secuti sunt Theologi Scholastici. S.  
Thomas affirmatissimè hoc tradit in Commen-  
tarijs super 24. caput Euangelij secundum Mat-  
thæum, & prima parte quæst. 14. art. 4. in ean-  
dem inclinat sententiam B. Bonauentura 2. Sen-  
tentiarum, Distinct. 7. quæst. 2. Caietanus adeò  
clarum id esse inquit in scriptura, vt in dubium  
minimè verti possit. hoc etiam sentiunt Lyr-  
nus, Tostatus & Paulus Burgenlis, & confirmari  
potest



potest argumentis B. Thomæ desumptis ex prima parte, loco supra citato.

VERVM ex aduerso multo plures & antiquiores, nec minus doctrina & antiquitate præstantes, prodigia illa Magorum non fuisse veros & naturales effectus sed tantum simulatos, & apparentes, & artificio quodam magico ac diabolico spectantium oculis imponētes, & senserunt, & scriptis suis prodiderunt. Nam Iosephus lib. 2. Antiquitatum ait illos serpentes Magorum, specie verorum serpentum reptasse, sed fuisse præstigias, veritatis specie hominibus non admodum cautis imponentes. Simile quippiam innuit Philo libro primo De vita Moïsis hoc factum Magorum enarrans. Iustinus martyr in libro Responsionum ad quæstiones Orthodoxorum, in responsione ad quæstionem 26. Quæ, inquit, à Moïse facta sunt miracula, quia diuina virtute sunt edita, facta sunt mutatione rei propositæ, in naturam eius quod efficiebatur: at, quæ à Magis, opera Dæmonis sunt facta, spectantium oculis præstigias offundebant, ut qui serpens non esset, eum viderent quasi serpentem, & non sanguinem quasi sanguinem, & non ranas quasi ranas. Tertullianus in libro De anima: Possunt, inquit, & solent Dæmones phantasmata præstare, & corpora fingere, quibus exteriores oculos circumueniant. Corpora enim videbatur Pharaoni & Ægyptijs magicarum virgarum dracones: sed Moïsis veritas, mendacium eorum deuorauit. Gregorius Nissenus: Qui ex virga Moïsis, inquit, factus est serpens, verè animatus, Magorum virgas reuera ligna, visus autem deceptione

*Aliera opinio non fuisse veros serpentes.*

H 5

ser-



serpentes, facile deuorauit. Græcus interpret, quem citat Catena in Exodum ait, illos serpentes Magorum fuisse meras præstigias, nihil verorum serpentum præter speciem & imaginem habentes. hoc etiam super cap. 7. Exodi affirmant Rupertus, Rabanus & Hugo de S. Victore. Idem quoque satis indicat Ambrosius interpretans cap. 3. posterioris epistolæ ad Timotheum: Iannes, inquit, & Mambres virtuti Dei quæ per Mosem operabatur, commentitia æmulatione resistere conati sunt. Eundem Pauli locum explanans B. Hieronymus: Sicut, inquit, illi Magi artis magicæ præstigijs Mosis, sic nonnulli argumentorum fallacijs, christianæ veritati ac simplicitati resistere, ac illudere conantur.

*Auctoris  
sententia  
fuisse ve-  
ros illos  
Magorum  
serpentes.*

NEVTRA hæc opinio euidenter ex sacris literis, aut humanis rationibus, vel probari vel reprobari potest: videtur tamen aliquanto probabilior B. Augustini sententia. Scriptura enim Exodi 7. iisdem verbis eodemq; modo narrat virgam Aaron versam esse in serpentes & item virgas Magorum: ergo si ille Aaron fuit verus serpens, pariter etiam serpentes Magorum veri fuisse videntur. Ibidem quoque dicitur virgam Aaron deuorasse virgas Magorum, hoc est, serpentem ex virga Aaron factum, deuorasse serpentes ex Magorum virgis factos, non diceretur autem deuorasse illos, nisi fuissent veri serpentes. Deinde sequenti capite octauo traditur Magos defecisse in tertio signo, nec potuisse producere ciniphes: ex quo satis intelligitur, verè & non in speciem tantum eos duo priora signa fecisse.



fecisse. Moses item detexisset fallaciam, si non fuissent veri serpentes. Quid quod scriptura vocat simpliciter serpentes, & ex nulla circumstantia narrationis colligi potest eos non fuisse veros serpentes: nec repugnat fuisse veros, ergo probabile valde est veros & naturales serpentes fuisse.

## CAPVT XVII.

QVOMODO MAGI FECERINT ILLOS  
*serpentes.*

QVATVOR vel quinque modis cogitare possumus Magos fecisse serpentes, sanguinem, & ranas; duobus vel tribus in speciem tantum & simulatè, duobus alijs, vere. Primò enim species & phantasmata virgarum & serpentum, aquæ & sanguinis & ranarum quæ erant in phantasia & imaginatricè facultate, Dæmones commouendo & turbando spiritus in quibus erant illæ species, potuerunt facere vt illæ species refluèrent ad sensum communem vel etiam ad sensum visus; verbi gratia, primò species virgæ mox ea sublata, species serpentis: ita vt videretur virga conuersa in serpentem. Vide hæc tractata apud S. Thomam prima parte, quæst. 114. & 111. artic. 3. & 4. idemq; in alijs fieri cernitur. Namq; in somno motu vaporum ascendentium in cerebrum, atque descendentium, refluentibus speciebus rerum sensibiliū ad primum sensitiuum, dormientes videntur sibi & videre & audire: & vi morbi idem contingit phreneticis. Deinde potuit fieri, vt Dæmon virtute aliqua naturali occulta, spectantium visum ita inficeret

ret



ret vel turbaret, vt viderentur esse quæ non erant, & non esse quæ aderant: quemadmodum ægrotus corrupto palato & gustatu, dulces cibos iudicat amaros. Tertio modo potuerunt Dæmones virgas illas Magorum subitò conuertere in serpentes, applicando illis inuisibiliter aliqua agentia naturalia nobis ignota, ad producendos serpentes potentissima & efficacissima. Quarto modo fieri potuit vt Dæmones non aduertētibz qui spectabant, virgas à Magis proiectas, subito è conspectu illorum clàm auferrent, & pro illis serpentes mole æquales ipsi, vel ante præparatos, vel aliunde tunc celerrimè asportatos, intuentium oculis subijcerent, ita vt virgæ in serpentes viderentur esse conuersæ. Potuit etiam quinto modo illud fieri, vt Dæmones virgas illas in modum & formam serpentum figurarent, vel figuram serpentum illis affingerent, & in illis motum qualis est verorum serpentum, ipsi efficerent.

Qui negant illos serpentes Magorum, fuisse veros & naturales, eos necesse est sequi vel duos priores modos, vel certè quintum modum. Sed contra priores duos modos illud pugnat, quod scriptura ait factos esse serpentes, non igitur solum erant in imaginatione vel aspectu intuentium, sed extra quoque erant serpentes: non enim dixisset scriptura, Magorum virgas versas esse in serpentes. Contra quintum modum facit quod scriptura dicit, serpentem factum ab Aaron, deuorasse serpentes Magorum: quomodo autè deuorasset illos, nisi fuissent veri serpentes. B. Augustinus, S. Thomas, Bonauentura, Caieta-



Caietanus & Burgensis sequuntur tertium modum; qui tamen sicut nec Lyrano, nec Toftato, ita nec mihi fit probabilis. Certum enim est, nec Dæmones potuisse immediatè producere serpentes, sed tantùm adhibendo causas naturales eorum productrices. Certum etiam est, nullum agens naturale naturaliter operando posse subito producere formam ex materia non ante disposita & præparata. Certum etiam est, diuersas formas exigere diuersas materiæ præparationes, & quò formæ sunt nobiliores, eò plures & operosiores præparationes deposcunt: maior enim præparatio fit materiæ ad formā mixti quàm ad formam elementi, & maior ad formam animalis perfecti, quàm vel mixti inanimati vel plantæ. His positis, quæ secundùm veram Philosophiam negari non possunt, quæramus an Dæmones produxerint illos serpentes immediatè ex virgis: at materia virgæ est admodum remota & aliena recipiendæ formæ serpentis. Si dicant non immediatè ex virga productos esse serpentes, sed varijs transmutationibus præmissis: at tot & tam variæ transmutationes subito fieri non potuerunt, statim enim atque Magi proiecerunt virgas, apparuerunt serpentes. Quid quod, cum naturaliter producitur serpens, non statim producitur magnus, sed primo paruus, deinde paulatim acquirit iustam magnitudinem: at illi serpentes statim producti sunt magni, nimirum æquales virgis Magorum, non enim visum fuisset virgas mutatas esse in serpentes, nisi serpentes fuissent æquales virgis.

CAIETANVS vt vim harum rationum ab ipso.



*Gaietanus  
refellitur.*

ipso, ut arbitror, præuisam effugeret, duo reperit effugia; alterum est, eo tempore quod effluxit, dum Pharaon vocauit Magos, & ipsi ad eum adierunt, Dæmones vltimam dispositionem pro forma serpentis induxisse in illas virgas, atque ita cum proiectæ fuerunt, statim potuisse produci serpentes: alterum est, licet agens naturale per se non possit ex virga & subito producere serpentem, tamen ut est instrumentum Dæmonis, illud posse; sicut motus & lumen cœli multa producunt quæ sunt ipso nobiliora, quatenus sunt instrumenta intelligentiæ mouentis. Sed contra primum effugium facit illud, quod sic non fuissent illæ virgæ, non enim potest manere forma virgæ cum vltima & proxima dispositione materiæ & formæ serpentis, præterea dubium est an illi serpentes seu ut alij vertunt, dracones potuerint aliter generari quàm ex semine. Secundum effugium nihil valet: nam licet agens naturale ut est instrumentum vel hominis vel Angeli, possit vel citius vel melius aliquid facere, tamen non ob id potest ex qualibet & in qualibet materia effectum suum producere, nec potest posteriorem formam inducere non indutis prioribus. Posterior enim & nobilior forma, præsupponit necessariò priores; & sicut inter formas, ita inter earum dispositiones, est ordo naturaliter immutabilis, ut non possit esse posterior in materia nisi antea fuerit prior. Præterea verus sanguis naturaliter non potest produci nisi in animali, & per calorem animalis, & per certa instrumenta quæ in solo sunt animali.

RE-



RESTAT igitur quartus modus supra expo-  
 positus, qui & Lyrano & Tostato mihiq; fit ve-  
 rissimior: nam secundum eum modum defen-  
 dimus fuisse veros serpentes, atque ita euadi-  
 mus difficultates obiectas contra primum, se-  
 cundum & quintum modum: nec tamen dici-  
 mus eos productos fuisse ex virgis, ne vrgea-  
 mur illis rationibus quibus tertius modus pre-  
 mitur. Vnus tantum scrupulus hæret, quomo-  
 do si non fuerunt serpentes producti ex virgis,  
 dicantur virgæ conuersæ in serpentes? sed re-  
 spondendum est, scripturam id dixisse non quod  
 ita fuerit secundum veritatē, sed quia ita vide-  
 batur & estimabatur spectantium iudicio. Nam  
 & hoc quoq; dicere oportet eos qui negant illos  
 fuisse veros serpentes; & Caietanū qui vult illas  
 virgas habuisse vltimā dispositionē pro forma  
 serpentis: sic enim non poterāt esse veræ virgæ,  
 vt ostendimus, sed secundū speciem tantū; qua-  
 re secundum eum, nec Magi proiecerunt veras  
 virgas, nec verę virgę sunt cōuersæ in serpentes.

*Auctoris  
 sententia,  
 quomodo  
 facta sit  
 Magis illa  
 Virgarum  
 in serpen-  
 tes mutatio*

SED dicet aliquis, cur pmisit Deus vt Magi qui  
 cōtradicebant Mosi, prodigia facerēt, cum ea res  
 & diuinam virtutē quę p Mosē operabatur, ob-  
 scurare videretur, & Pharaonis animū magis in  
 perfidia & inobedientia obfirmatū & obstinatū  
 redderet? Ad hoc Chrysost. homil. 46. in Acta  
 Apostolorū, ita respondet: Permisit DEVS Magis  
 aliqd aduersus Mosē, ne Magus putaretur esse  
 Moses: Permisit illos docere omnes quantū Ma-  
 gia imponat sensibus: vltra aut non deceperunt,  
 sed ipsi se victos confessi sunt: & non potest, in-  
 quit, sine certamine clara esse victoria, & quod po-  
 ten-

*Cur Deus  
 sit passus  
 illa prodigi-  
 a fieri a  
 Magis.*



tentior est hostis, eò illustriorem reddit eius gloriam à quo se victū esse ipse confitetur: sicut Magi victos se à Mose cōfessi clariore eius gloriam effecerunt. Theod. in Quæst. suis in Exod. quæst.

18. Ne quis, inquit, suspicaretur Mosē arte magica mirabilia fecisse; p̄misit DEVS Magos similia aliqua facere, vt quantū inter diuinam virtutē & magicas operationes interesset, tum euidentia rerū, tum etiam Magorū confessione, clarissime innotesceret. Mutat Aaron virgam in serpentē, mutant etiam Magi virgas suas in serpentes: sed serpens Aaron præualens, Magorū serpentes deuorauit. Mutant Magi aquam in sanguinem: sed nō rursus possunt sanguinē mutare in aquam, sicut fecit Moses: p̄ducunt rānas, sed eas auferre sicut Moses non possunt: & qui maiora animalia fecerunt, minora, id est, ciniphes, facere nō potuerūt. Deniq; nec vlcera ipsi cauere, nec vlcerū dolorē quo vehemēter afflictabantur mitigare, nedum auferre potuerunt. Quamobrē Mosē longē superiorē quā ipsi essent, & diuinā virtutem quæ operabatur, artibus suis magicis præstantiorem confessi, dixerūt: *Digitus DEI est hic.*

*Exodi 7.*

Verū nos quia hunc de Magia librum, vt perspicuitate orationis, & varietate atque ordine disputationum, delectuq; probabiliorū sententiarum, firmiorumq; rationum; sic breuitate (quæ magna est legendi discendiq; illecebra) commendatum lectori & probatum esse cupimus, expositis iam quæ ad propositi à nobis argumenti tractationem & explicationem pertinebant, hīc ei finem imponamus.

BENE-



**BENEDICTI**  
**PERERII, LIBER**  
**SECVNDVS,**

qui est

*DE OBSERVATIONE SOM-*  
*NIORVM.*

**N**ON vnum est genus nec vna  
 somniorum ratio; quocirca nec  
 par est omnium causa, vt eque o-  
 mnia vel approbari vel improbari  
 debeant. Multa quidem somnia derident sacræ  
 literæ: alia, etiam damnant: quædam verò cõ-  
 mendant ac venerantur. Sunt enim pleraque  
 inania: nec pauca sunt naturalia, ex certis natu-  
 ræ causis profecta. Sunt idem alia Dæmonis cal-  
 liditate ac malitia mortalibus iniecta: denique  
 nonnulla diuinitus hominibus data sunt. Dili-  
 gens porrò somniorũ tractatio, pulcherrimam  
 per se ac iucundissimam parit cognitionem, &  
 ad obscuros diuinæ scripturæ complures locos  
 illustrandos valet plurimum: regendæ verò ac  
 moderandæ hominum vitæ utilissima esse po-  
 test. Sed in primis ad redarguendam quorun-  
 dam hominum inscitiam (sed verius dixerim,  
 stoliditatem & vecordiam) qui nimis curiosè &  
 I  
 anxie



anxiè ac superstitiosè obseruât somnia, per magno est adiumento. His ego rebus adductus, de somniorum natura, varietate ac veritate nōnullas quæstiones scitu maximè dignas atque vtilis hoc libro explicandas suscepi.

INDEX QVÆSTIONVM LIBRI SECVNDI QVI EST  
de Somnijs

P R I M A

**Q**uestio: An somnijs habenda sit fides.

II. De causis verorum somniorum.

III. Quibus signis dignosci queant somnia diuina à non diuinis.

IIII. Cur DEVS in somno arcana homines doceat.

V. Cur à DEO somnia dentur indoctis hominibus sapius quàm sapientibus.


VI. Cur diuina somnia nonnunquam sint obscura & perplexa.

VII. An licitum sit homini christiano obseruare somnia.

VIII. Cuius hominis sit ritè interpretari somnia.

IX. An in somno vsus rationis & voluntatis liber esse queat.

X. De somnio Salomonis, in quo donum sapientia à DEO promissum ei & tributum est.



QVÆ.



QVÆSTIO PRIMA,  
AN VLLA SOMNIIS HABENDA  
sit fides.

**N** diuersa, vulgi ac sapientum super hac re distrahuntur sententiæ: quamquam vno verbo ea quæstio posset expediri facta somniorum distinctione: nonnullis enim somnijs sine dubitatione fides habenda est: plerisque tamen penitus deroganda. Nimirum, aut omnibus, aut nullis credere somnijs, par est vecordia, & videtur extremæ vtrumque vel stoliditatis, vel contumaciæ. Sed profectò, & scitum, & verum est illud Ciceronis dictum: nihil tam absurdè dici posse, vt non ab aliquo Philosophorum dicatur. Quid enim esse potest magis *ἀλογον & ἀδύνατον*, quàm omnia somnia vera & credenda esse arbitrari? Ecce tibi Prothagoras, vnus sanè ex illo priscorū philosophorum senatu, omnibus somnijs fidem ar- rogat, magna auctoritate decernens, veritatem & falsitatem non ipsa natura rerum, sed sola estimatione hominum constare: hominem esse mensuram omnium & tale vnumquodque esse, quale videtur homini, siue sobrio, siue vinolento, siue sano, siue insano, siue vigilantī, siue dormienti. Affines huic errori fuere quidam Stoici, nimio plus superstitiosi, ac penè fanatici philosophi: qui nulla reiiciunt somnia, in omnibus esse rati vim significandi, ac denotandi aliquid. Existimari tamen aiunt, quædam somnia inania & falsa, quòd sint admodum tenuiter expressa,

*Cic. in 2. de  
Divinatione.*

*Omnia so-  
mnia esse  
vera, Pro-  
thagora &  
Stoicorum  
opinio.*



*Xenophanes & Epicureorum opinio omnia somnia esse vana.*

ob idque obscura, & ad intelligendum difficilia: & quia propter ambiguitatem, varias ad res videntur posse applicari, propterea nihil certum ex eorum obseruatione nobis constare: præsertim verò quòd ad eorum somniorum vim dispiciendam, par hominum solertia & sagacitas non facile inueniatur. Ex aduerso, his contraria sentientes Xenophanes Colophonius, vel ipsa vetustate memorabilis philosophus (nascentis enim in Græcia philosophiæ propemodum equalis fuit) mollis item ac delicatæ Epicuræ disciplinæ sectatores, omnium somniorum fidem & auctoritatem sustulerunt. Non esse autem ullis credendum somnijs, sic illi argumentabantur. Vna vis est, eademque natura omnium somniorum: par igitur credendi aut omnibus, aut nullis ratio esse debet. Sed plerisque somnijs non esse credendum, confessio est omnium: nihil ergo causæ est, cur plerisque reiectis, aliquibus præcipuè credere debeamus. Adijce, quòd si quædam somnia vera & certa sunt, aliquas esse certas ipsorum effectrices causas necesse est. At quas? naturam, inquiunt, & Deum. Sed natura quidē amica est ordinis & constantiæ; in somnijs nullus ordo inest, sed plena temeritatis inconstantia. Dei autem maiestate alienum & indignum videtur, obire Deum lectos dormientium, concurrere grabatos, & stertentibus iniicere somnia, quæ illi expergiscentes, vel non recordentur, vel non intelligant, vel etiam contemnant, vel si curanda sibi putent, stulta impleti superstitione, dies noctesque animi pendeant, aut inani impendentium malorum metu perterriti, aut fallaci



fallaci futurorum expectatione bonorum elati. At, quantò & rationi conuenientiùs, & Dei præstantia dignius, atque vtilitati hominum consultiùs fuisset, visa dare non sordidis & indoctis hominibus, sed optimis & sapientibus viris, non dormientibus, sed vigilantibus, nempe magis ad intelligèdum idoneis: nec per circuitiorem, & anfractus, atque ænigmata, sed propriè, apertè, & explicatè significare Deum, quod ab homine vellet intelligi.

HÆC isti de somnijs balbutiūt, in totum ea *Vera sententia de somnijs.* vel approbantes, vel damnantes; videlicet per extrema, veritati deuia, inerrātes. Sed vera sententia, quasi media insitens via varia facit somniorum genera: quorum plurima tanquam inania, & ab omni ratione vacua, nec vlla fide *Pleraque sumnia esse Vana.* digna, planè abiudicat & reijcit. Hoc, cum luce Solis clarius sit, superuacaneum est argumentari. Id enim quotidiana docet experientia, totas quotidie noctes somniamus, quotum igitur quodq; de tot somnijs, verum euadit? Euadit quidem aliquod nonnunquam verum, sed quia id rarissimè, ac sine ratione vlla contingit, nihil afferri potest, cur non casu & temerè accidisse credatur. Idem quoque ratio ipsa fateri cogit. Nam quæ alia est istiusmodi somniorum causa nisi quia spiritus, sentienti animæ, præsertim autem phantasix, cuius est fingere somnia, deseruiētes, in quibus insident atq; inhærent, rerum in vigilia perceptarum reliquiæ, ac vestigia, quas in scholis appellamus species, eiusmodi inquam spiritus, in somno vaporibus cibi potusq; caput subeuntibus agitati, & huc illuc iactati, varia

*Causa somniorum.*



reddūt visa & somnia, sed propter inordinatam eorum spirituum iactationem, valdè incomposita, sarpè etiam turbulenta & distorta, denique talia, vt nullam vim significandi aliquid habere queant. Sic profectò sunt somnia, vt quæ in nubibus variè figurantur, vel animantium, vel aliarum rerum similitudines & imagines, quas cernimus breuissimo tempore in alias, atque alias commutari, & mox dissolui omnes, ac penitus euanescere. Has imagines, qui certam vilius rei significationē facere putaret, obtusus & excors haberetur, at non minoris videtur inscitix, certas significandarum rerum notas, & signa eiusmodi somnijs attribuere. Si ebriorum, phreneticorum, & insanorum visa negligimus, & pro nihilo ducimus, æquè profectò ridenda, & contemnenda sunt somnia, quin eò magis, quod plerunque magis ipsa sunt inordinata, cōfusa, & monstrosa. Facetè quidam, sed verè tamen, dixit, si natura sic esset comparatum, vt ea dormientes agerent, quæ somniant, fore omnino necessarium, vt alligarentur, omnes, qui cubitum irent, quippe magis ridicula & absurda, magisq; incredibilia, quàm vlli faciant infani, facturos esse somniantes. Hanc quoque sententiam confirmat diuina scriptura, deridens leuitatem & vanitatem eorum, qui somnijs, hoc est, rebus futilissimis ac mendacissimis credendo, dignos se præbent, qui omnium irrisione ludantur. Itaque in libro Ecclesiastæ capite quinto sic est: *Vbi multa sunt somnia, plurimæ sunt vanitates, & innumeri sermones.* In libro item Ecclesiastici capite

*Testimonia  
diuina scri-  
ptura de  
vanitate  
somnia.*



capite 34. ita legimus: *Somnia extollunt imprudentes, quasi qui apprehendit umbram, & persequitur ventum, sic & qui attendit ad insomnia, multos errare fecerunt somnia, & exciderunt sperantes in illis.* Denique, cum scriptura vult significare aliquid vanum, instabile, fugax, & fallax, somniorum comparatione, ac similitudine persæpè declarat.

CAETERVM, vt plurimis somnijs abesse veritatem, fidemq; non est negandum, ita quædam esse vera, & certa somnia, fatendū est. Nam si nullis insomnijs, quidquam veri & certi esset, inscien- *Multa somnia esse vera.* ter profectò, ac superstitiosè clarissimi medicorum, somnia, quæ frequenter agris contingunt, ad eorum morbos diiudicandos curandosq; tam subtiliter & curiosè obseruaret. Stulto item labore physiologi se fatigarent, somniorum causas, vires, ac significationes tãto studio, & diligentia venando ac speculando. Mendaces præterea essent tot superiorum temporum historia, clarissimis testatæ consignatæq; monumentis, refertæq; exemplis verorum somniorum, quæ ad verbum cum rerum euentis mirificè conuenerunt. Quid in sacris literis quot memorantur somnia, non vera & certa modò, sed etiam diuinorum mysteriorum plenissima, Repetat memoria lector somnia Abraç, Abimelech, Iacob, Laban, Ioseph, Pharaonis, Salomonis, regis Nabuchodonosor, Danielis, Mardochæi, Iudæ Machabæi: in nouo autem Testamēto, somnia beati Ioseph, Magorum, vxoris Pilati, denique somnium D. Pauli, quod à Luca in

*Matth. i. & 27.*



*Act. 16.* lib. de Actis Apostolorum narratur. Hanc som-  
*Homeri cō-* niorum distinctionem, etiam Homerus poëti-  
*mentum ad* co more, fabularum integumentis velatam, si-  
*significan-* gnificauit, cum duas finxit portas, vnam cor-  
*dam & ero-* neam per quam emitterentur ad homines vera  
*rum atque* somnia: alteram eburneam, per quam ederentur  
*falsorum* falsa. Homerum imitatus, vt ferè solet, Vir-  
*somniorum* gilius lib. 6. Æneidos, eandem sententiam ex-  
*distinctio-* pressit his versibus:

*Odyf. 7.*

*Sunt gemina somni porta, quartum altera fertur  
 Cornea, qua veris facilis datur exitus vmbri,  
 Altera candenti perfecta nitens elephanto,  
 Sed falsa ad cælum mittunt insomnia manes.*

*Mac. lib. 1.  
 cap. 3*

Cur autem poëta, veris somnijs corneã por-  
 tam, falsis eburneam assignauerit, causam expo-  
 nit Macrobius in eo commentario, quo somni-  
 um Scipionis explanauit.

## QVÆSTIO II.

### DE CAVSIS VERORVM SOM- niorum.

*Varia de  
 somniorum  
 causis, au-*

**D**ICTVM est, alia esse somnia falsa, & alia ve-  
 ra: reiectis igitur falsis, vera contemple-  
 mur. Verùm, quia quæ sint vera somnia, & quo  
 insigni atque nota internoscantur à falsis, planè  
 intelligi non potest, nisi verorum somniorum  
 causas omnes rimemur, & aperiamus, propterea  
 quid ab alijs de huiusmodi causis creditum &  
 proditum sit, hoc loco docere conuenit. Hip-  
 pocrates in libro de Insomnijs, duo statuit som-  
 niorum verorum genera; alterum nominat di-  
 uinum,



pinum, alterum naturale. Diuina somnia, inquit *Horū sin-*  
 à Deo mitti, & semper memorabiles aliquos ca- *rense.*  
 sus, insignesq; vel ad lætitiā & tristitiā, vel ad *Hippocra-*  
 fœlicitatem & miseriam, siue priuatam, siue pu- *tes.*  
 blicam, euentus portēdere, horum autem som-  
 niorum interpretationem, ex vatibus, rerumq;  
 diuinarum interpretibus petendam esse. Tale  
 fuisse dicitur somnium Cyri maioris, qui mo-  
 narchiam Persarū condidit, ad cuius pedes dor-  
 mientis, sol visus est, terq; ab illo appetitus ma- *Somnium*  
 nibus, ter se conuoluens, elapsus est. Quo som- *Cyri.*  
 nio magi Persarum sapientes, significari respon-  
 derunt, eum triginta annos, & ita sanè contigit,  
 imperio potiturum. Naturalia somnia, ex causis  
 ferè intra corpus dormientis latentibus, existere  
 putat Hippocrates, atque hisce somnijs affectio-  
 nes ipsius corporis aut bonas, aut malas, indica-  
 ri, hoc est vel plenitudinem ac redundantiam,  
 vel contra inopiam atque inanitatē, vel aliquem  
 eorum, qui sunt in corpore humorum, aut cor-  
 ruptum, aut suo loco motum, aut inordinatē &  
 immoderatē agitatū. Horum verò somnio-  
 rum obseruationem & coniectationem spectare  
 ad medicum, eamq; ad dirigēdas ordinandasq;  
 curationes permagni referre arbitratur. Plato *Plato.*  
 in Conuiuiō, somnia vera & prænuntia futuro-  
 rum, à dæmonibus proficisci existimat: demo- *Dæmonum*  
 nes enim esse medios inter Deum, qui est im- *natura &*  
 mortalis & incorporeus, atque homines corpo- *munus se-*  
 ratos & mortales: quippe cū sint ipsi & cor- *cundum*  
 porei, quales nos sumus, & immortales, qualis est *Platonem.*  
 Deus. Deum namque censet Plato nō immisce-  
 re se rebus humanis, nec proximè cum homini-



bus societatem aliquam & consuetudinem habere, sed commercia & colloquia inter Deum, hominesq; siue vigilantibus ipsis, siue dormientibus, per dæmones agitari & confici. Nimirum, dæmonum munus & officium esse inquit, preces & vota hominum referre ad Deum, & Dei munera & auxilia deferre ad homines: per hos, vaticinia, incantationes, magia, omnisq; diuinandi ratio, & prodigiorum effectio, ad homines peruenit. Itaque dæmones esse Dei nuncios, interpretes, & ministros: hominum verò esse quasi patronos, aduocatos, magistros, & vt fictio Apulei verbo dicam salutigerulos. Atq; hæc non solius Platonis, sed ante Platonem etiam Empedoclis & Pythagoræ fuit sententia: de qua, & contra quam, in libro 8. de ciuitate Dei. cap. 20. & 21. & in lib. 9. acutè docteq; disputat Augustinus. Aristoteles in libello quem inscripsit de Diuinatione ex somnijs ducta, negat vlla dari hominibus à Deo somnia. Vera autem somnia, inquit, vel esse naturalia quædam signa, & ex naturalibus causis profecta, quæ scilicet periti Philosophi & medici vtiliter obseruant: vel esse quodammodo principia quædam eorum, quæ postea vigilantes acturi sumus: nonnunquam enim in quiete quædam occurrunt, quæ videntur ad aliquid agendum posse conducere, quibus post, somno excitati ad benè agendum accommodatè vtimur, & iuuamur. Stoici tres causas verorum somniorum constituunt. Primam Deum, qui cum sit rerum omniū scientissimus & prouidentissimus, hominiquè beneuolus ac beneficus, quo sit homo cautior, dat ei somnia, quæ

*Aristoteles.*

*Stoici.*



quæ sint ipsi futurorum indicia, & eorum, quæ agenda ipsi cauendaq; sunt, documenta. Alterâ causam ponunt fatum, quo cuncta sunt velut æterna quadam serie, nexuq; colligata: siquidem rerum omnium futurarum, putant Stoici, & antecedentes causas, & præcurrētia signa, tum alijs in rebus, tum etiam in ipsis somnijs præmitti. Tertiam causam faciunt naturam animi nostri, quæ, diuina est: animus enim hominis, exterioribus sensibus per quietem consopitis, & ab omni actione vacantibus, ipseq; negotijs curisq; omnibus solutus ac liber, vegetior fit & habilior ad intelligendum, tunc enim clarius præterita meminit, præsentia sentit, futura prouidet. Porphyrius, veritatem somniorum refert, partim ad innatas animis hominum notiones, & velut insignitas rerum omnium notas, quas ex altera vita detulit animus, ad hoc corpus veniens: sed eo vehementer obrutus, atque oppressus, non potest eas vigilātibus sensibus cernere: in quiete verò, clariùs ei apparent, atque innotescunt. Partim refert somnia ad dæmones: ad bonos quidem bona, & veracia: ad malos autem, praua, fœda, & fallacia. Synesius multa disputat de spiritu phantastico, quod est vehiculum animæ, eo namque medio, ceu quodam vinculo, cum terrestri hoc corpore colligatur & copulatur: in quo item solutus corpore animus, ex vno loco in alium mouetur, atque in eo maleficiorū penas persoluit apud inferos, nec sine eo dum est in corpore, quicquam potest intelligere. In hūc porrò spiritum, omnium quæ sunt, fuerunt, eruntq; simulachra imprimuntur, & in eo lucent tanquam.

*Porphyrius  
quid de  
veritate  
somnia  
sensit.*

*Synesius  
mira sed  
falsa ratio  
de spiritu  
phantastico.*

*co.*



tanquam in speculo, præsentium quidem rerum, clariora, præteritarum autem, quo sunt vetustiores, minus perspicua, minima vero futurarum, quæ scilicet nec sunt, nec fuerunt vnquam. Sed quia futuri effectus, in potestate causarum cohibentur, quasdam habent prægressiones, & præcursiones signorum, quæ hoc minus manifesta sunt, quo illa longius absunt, atque in hoc genere, ponenda censet somnia. Quapropter, ferè obscuris imaginibus & similitudinibus, res per somnia significantur, non æqualiter tamen, sed prout varia est illius phantastici spiritus temperies & ratio, similiter vt in speculis, pro varietate eorum materiæ aut figuræ, variæ ac dissimiles redduntur imagines. Monet præterea Synesius non parum conferre ad quietam & veraciam in somno visa percipiendam, benè præparare hunc spiritum phantasticum, moderato nempe victu, honestis studijs, & actionibus, sedandisque animi perturbationibus. Pythagoras certè iturus cubitum, cantu & sono lyre somnum captabat, atque hac ratione ad bona lætaque somnia accipienda, se ipse comparabat: ob eandemque causam, esu fabæ suis interdicebat: quod haberetis cibis inflationem magnam, tranquillitati mentis vera quærentis contrariam. Verùm hæc de spiritu phantastico à Synesio prodita, nugæ sunt, & Pythagoræorum ac Platoniorum figmenta, vel ipsis poëtarum fabulis inaniora veritatis, atque incredibilia.

*Mos Pythagoræ.*

SED, vt aliquid etiam ex auctoribus Ecclesiasticis delibemus, beatus Gregorius in quarto libro Dialogorum cap. 48. sex causas colligit somnio-



mniorum: Aut enim, inquit, ex plenitudine, vel D. Gregor.  
 inanitate corporis somnia existunt, aut ex antecede-<sup>sex causas</sup>  
 tibus diurnis cogitationibus & curis: aut ex illusione<sup>somniorum</sup>  
 demonis, aut ex cogitatione hominis simul & illusione<sup>tradit.</sup>  
 demonis, aut ex reuelatione Dei, aut denique ex  
 cogitatione hominis simul & reuelatione Dei. Easde  
 sex causas somniorum, cum idē Gregorius com-  
 memorasset in lib. 8. Moraliū, cap. 13. mox eas  
 aptis diuinæ scripturæ sententijs & exemplis il-  
 lustrat atque confirmat. Duo, inquit, prima, quæ  
 diximus somniorum genera, omnes experimento co-  
 gnoscimus: quatuor autem reliqua in sacris literis in-  
 uenimus. Nisi enim somnia plerumq; ab occulto hoste  
 per illusionem fierent, nequaquam scriptura dixisset,  
 Ecclesiast. 34. Multos errare fecerunt somnia, & illu-  
 siones vane, vel certè in Leuit. cap. 19. non esset scri-  
 ptum, Non augurabimini, nec obseruabitis somnia.  
 Quibus verbis, cuius sint detestationis, ostenditur,  
 quæ augurijs coniunguntur. Rursus nisi aliquando  
 ex cogitatione simul & illusione procederent, Salomon  
 minimè dixisset Ecclesiast. quinto capite, multas cu-  
 ras sequuntur somnia. Et nisi aliquando somnia ex  
 mysterio reuelationis orirentur, Ioseph Geneseos 31.  
 praferendum se fratribus, per somniū non videret, nec  
 Mariæ sponsum, vt ablato puero in Aegyptum fugē-<sup>Matth. 2.</sup>  
 ret, per somnium angelus admoneret. Rursum, nisi a-<sup>Daniel. 2.</sup>  
 liquando somnia ex cogitatione simul & reuelatione  
 procederent, nequaquam Daniel visionem Nabucho-  
 donosor edisserens, à radice cogitationis inchoasset, di-  
 cens



*cens: Tu rex cogitare cœpisti in stratu tuo quid esset futurum post hæc. Hæc ibi Gregorius. De causis igitur somniorum, sic ab alijs proditum est.*

*Quatuor  
causæ vero  
eum som-  
niorum.*

*Prima cau-  
sa aliqua  
corporis af-  
fectio.*

EGO causas somniorum, quæ ad significandum aliquid valent, & digne sunt obseruatione, diligenter scrutatus, eas ad quatuor præcipuas reuocari posse animaduerti.

PRIMA causa continet aliquam corporis affectionem, quæ in ipso corpore præpollet, ac præualet, vt si flaua, vel atra bilis, pituitosusque humor, aut sanguis redundet, aliud uero aliquid vitiatum & corruptum immoderate iactetur in corpore. Galenus in libro de Præfagijs, quæ ducuntur ex somnijs, narrat quendam somniasse alterum crus factum esse sibi lapideum, mox autem cœpisse illum ea parte corporis fieri paralyticum. Præterea qui instante crisi sudaturi sunt, sæpè somniant se sudare, aut in balneo calidis aspergi aquis, aut in flumine lacu uero natare. Illud quoque nonnunquam usu venit, vt quod dormientes agimus; aut patimur, etiã somniemus, vt qui in somno sudant, aut febris corripiuntur, itidem se affici somnient. Proditum est à Plinio in libro septimo, capite quinquagesimo, P. Cornelium Ruffinum dormientem amisisse visum, idque cum sibi accideret, etiam ipsum somniasse.

*Secunda  
animi ve-  
hementis per-  
turbatio.*

ALTERA causa somniorum spectat ad aliquem vehementem concitatumque animi affectum & perturbationem, amorem dico, spem, metumque, & odium. Nam qui ardentè amant, frequenter amores suos somniant: qui timent, minacibus & terrificis in somno visis sæpè turban-



bantur. Huc etiam pertinet verus consuetudo,  
 & vitæ, quam agimus, exercitatio. Piscator enim  
 ferè somniat maria, lacus, flumina, retia, pisces:  
 venator, nemora, saltus, montes, ferasq; : miles  
 tubarum sonitus, fragores armorum, vulnera,  
 sanguinem, cædes. Lepidè quidam apud Theo-  
 critum piscator, *omnis, inquit, canis panes somniat,*  
*& ego pisces.* Continet eadem hæc causa antece-  
 dentes vigilatium curas & sollicitudines, & quæ-  
 cunque nos vehementer premunt, & angunt:  
 quarum rerum, sæpissimè in somno, similia visa  
 contingunt. Quamobrem in libro Ecclesiastæ,  
 cap. 5. scriptum est, *Multas curas sequuntur somnia.*  
 In hoc genere somniorum, equidè reponerem *Somnium*  
 somnium illud Annibalis, & proditum, & cre- *Annibalis*  
 ditum à multis. Ardebat Annibal insatiabili o- *Italia Va-*  
 dio Romani nominis, omniq; cupiditate perdè- *sticatem*  
 di funditùs imperiù Romanum flagrabat: quò *portendens*  
 autem faciliùs id perficeret, bellum ex Hispania  
 transferre in Italiam cupiebat, arcem imperij  
 Romam, petiturus. Cùm igitur varijs super ea  
 re cogitationibus ac deliberationibus æstua-  
 ret, visum habuit in somno, mirè proposito suo, vo-  
 toq; respondens. Visus ipsi est iuuenis, specie su-  
 pra humanam, qui se diceret à Ioue missum du-  
 cem ei ad inuadendam Italiam, iussitq; ne respi-  
 ceret, quid retrò & à tergò fieret. Pavidus primo  
 Annibal, non est ausus oculos ab illo quoquam  
 deflectere. Sed, prout est humanū ingenium ad  
 verita pronum, diu temperare oculis nō quinit,  
 respiciensq; vidit, horrendum non visu modo,  
 sed etiam dictu ostentum, belluam vastam &  
 imma-



immanem, multis circumplicatam serpentibus, quacunque incedebat, omnia proterentem, atq; peruerentem: cœlum item nigerrimis vnde- quaque occæcatum nubibus, densosq; ac fulguribus mixtos præcipitare nimbos. Attonito Annibali, percontantiq; ex illo suo duce, quid illud monstri & portenti esset, respondit ille, vastitatem esse Italię, pergeret ipse porrò ire, quò parabat, nec præterea quicquam inquireret, fineretq; in occulto esse fata. Atq; hoc quidem somnium ex antegressis in vigilia Annibalis cogitationibus & curis extitit: sed eius tamen somnij veritatem, rei euentus satis superq; comproba- uit: plus enim mali Annibal Italię attulit, quàm illo fuerat viso præmonstratum.

*Tertia dæ-  
monum cal-  
liditas.*

*Quadam  
somnia mit-  
ti à dæmo-  
ne.*

TERTIAM causam somniorum, ego pote-  
stati & calliditati dæmonis adiudico. Is enim  
multa dormientibus inspirat, & suggerit som-  
nia, semper insidiosè ac malitiosè, quo videli-  
cet quacunque possit ratione incommodet, ac  
noceat homini. Esse autem quorundā somnio-  
rum dæmonem architectum, atque effectorem,  
eò liquet, quòd ex sacris literis planè intelli-  
gitur, obseruationem somniorum adeo exosam  
esse Deo, vt ea magorum, augurum, & incanta-  
torum maleficijs aggregata, extremis damnetur  
supplicijs. Nimirum non aliam ob causam, vt  
interpretatur beatus Gregorius in lib. 4. Dialo-  
gorum, cap. 48. nisi quia dæmon plerunque se  
somnia immiscet, implens noxia superstitione  
hominum animos, eosq; non tantum vanè de-  
ludens, sed etiam perniciosè decipiens. Hoc ge-  
nere somniorum solitum esse olim dæmonem  
genti-



gentibus impietate cæcis multifariam illudere, constat argumento Æsculapij, Serapidis, & Amphiarai: nam vt apud Philostratum, Pausaniam, & Strabonem scriptum est, templa eorum ad-euntibus, qui varijs morborum generibus affli-ctabatur, fama erat tres illos vulgò existimatos, quasi Deos singulorum morborum curationes per somnia præscribere consueuisse. Ex hoc ge-*Somnium Alexandri Magni.*  
nere fuisse reor nobile illud somnium Alexan-dri Magni, scriptorum, qui res eius prodiderūt, auctoritate, apud multos fidem promeritum. Cum enim in quodam prælio Ptolemæus, qui primus post Alexandrum Ægypti rex fuit, vene-nato telo ictus, summo cum dolore ex eo vul-nere moreretur: assidens ei Alexāder, somnoq; sopitus, vidit in quiete draconem radiculam o-re ferentem, simulq; commonstrantem, quò il-la loci nasceretur, quæ scilicet præsentissimam vim haberet Ptolemæum, multosq; milites eo-dem teli genere vulneratos, protinus sanandi. Quæsitæ herba, inuenta, adhibita, mox con-secuto, qui promissus fuerat effectu. Sunt autem *Duo gene-ra somnio-rum demoni-*  
duo somniorum dæmonis præcipua genera, al-terum pertinens ad occultarum rerum demon-strationem & significationem. Potest enim dæ-mon naturales effectus ex certis causis aliquan-do necessariò prouenturos, potest quæcunque ipsemet postea factururus est, potest tam præsentia, quàm præterita, quæ hominibus occulta sunt, cognoscere, & hominibus per somnium indica-re. Alterum somnij genus vim habet concitandi perturbationes animi, agitatæ turbatisq; , qui sunt in corpore humoribus & spiritibus, quò  
K nimi-



nimirum inflammentur homines, vel ad libidinem, vel ad odium & vindictam, vel alios prauos animi affectus.

*Quomodo  
internosci  
possint so-  
mnia da-  
monum ab  
alijs som-  
nijs.*

DVPLICITER porrò, & quidem satis probabiliter, coniectari potest, quæ somnia missa sint à dæmone: primò quidem, si frequenter accidant somnia significantia res futuras, aut occultas, quarum cognitio non ad vtilitatem, vel ipsius, vel aliorum, sed ad inanem curiosæ scientiæ ostentationem, vel etiam ad aliquid mali faciendum conferat: eorum somniorum auctorem esse dæmonem, non temerè credetur: quippe qui ea ratione tentet animos hominū vana imbueret superstitione, quin etiam crimine impietatis obstringere. Deinde, si sobrijs, castis, & religiosi viris, tetra, obsœna, plenaq; crudelitatis, & impietatis somnia sæpenuerò contingant, ea proficisci à dæmone, non immeritò existimabitur. Dæmon enim conatur impuris somnijs pollueret ac fœdare dormientium corpora, vt eius fœditatis, etiam animos expergiscentium, quodammodo participes faciat. Quod si ne hoc quidem assequi potest, illud saltem curat, vt pios homines talibus visis contristando, perturbando, & affligendo, ad orationem, ad charitatis officia, ad diuinorum sacramentorum perceptionem, segniores, frigidioresq; reddat. Cuius diabolicæ calliditatis & malitiæ, luculentissimum in vigesima secunda Collatione cap. 6. Cassianus narrat exemplum. Verum hac de re Iustinus Martyr in responsione ad quæstionem vigesimam primam Orthodoxorum, disertè doctèque sententiam suam exposuit. Nam cum hæc sibi



sibi ab illis posita esset, quæstio, ad eam ipse quæ- *Quarta*  
 stionem ita respondet, vt nos hîc diximus. Re- *causa som-*  
 stat quarta & vltima somniorum causa, quam *niorum di-*  
 diuinam ritè nominare possumus: cuius potif- *uina.*  
 fimum gratia omnis hæc nostra instituta est di-  
 sputatio, huic enim, vel declarādæ, vel illustran-  
 dæ, adhuc prædicta deseruiunt. Somniorum au-  
 tem, quæ à Deo missa sunt, exempla, passim in  
 diuinis libris sunt obuia: nos suprâ ex sacris li-  
 bris multa protulimus, pluraq; possent afferri,  
 si quis omnia vellet colligere. Cæterum vt vis &  
 natura diuinorum somniorū plenius planiusq;  
 cognoscatur, quæstiones aliquot more schola-  
 stico, distinctè quidem, sed carptim, breuiterq;  
 perstringam, multa etiam, breuitati seruiens, le-  
 ctoris cogitationibus integra illibataq; refer-  
 uabo.

### QVÆSTIO III.

QVIBVS SIGNIS COGNOSCI  
 queat, sit aliquod somnium à Deo missum,  
 necné.

DVPLICITER, prout nunc mihi succur- *Duplex ratio*  
 rit, deprehendi potest, quodnam à Deo sit *cogno-*  
 missum somnium. Primò quidem, ex præstantia *scendi di-*  
 rerum, quæ per somnium significantur: nimi- *uina som-*  
 rum, si ea per somniū innotescant homini, quo- *nia.*  
 rum certa cognitio, solius Dei concessu ac mu-  
 nere potest homini contingere, huiusmodi sunt,  
 quæ vocantur in scholis Theologorum, futura  
 contingentia, arcana item cordium, quæq; inti-  
 mis animorum inclusa recessibus, ab omni pe-  
 nitus



nitus mortalium intelligentia oblitescunt, denique præcipua fidei nostræ mysteria, nulli, nisi Deo docente manifesta. Somnium igitur quod eiusmodi rerum cognitionem & demonstrationem cōtinebit, diuinum esse existimari poterit. Deinde, hoc ipsum maximè declaratur interiori quadam animorum illuminatione atq; commotione, qua Deus sic mentem illustrat, sic voluntatem afficit, sic hominem de fide & auctoritate eius somnij certiores facit, vt Deum esse ipsius auctorem, ita perspicuè agnoscat, & liquiddo iudicet, vt id sine dubitatione vlla credere, & velit, & debeat. Huc spectat memorabilis illa in

*Memorabilis sententia D. Gregorij.* lib. 4. Dialogorum, cap. 48. B. Gregor. sententia: Sancti viri, ait Gregorius, inter illusiones, atque reuelationes, ipsas visionum voces & imagines, quondam intimo sapore discernunt, vt sciant quid à bono spiritu percipiant, & quid ab illusore patiantur. Nam si erga hæc mens hominis cauta non esset, per deceptorem spiritum, multis se vanitatibus immergeret, qui nonnunquam solet multa vera prædicere, vt ad extremum valeat animam ex vna aliqua falsitate laqueare. Hactenus Gregorius: apud quem hanc ipsam sententiam, sed plenius ac luculentiùs tractatam, in lib. 8. Moralium, cap. 13. lector inueniet. Quemadmodum igitur naturale mentis nostræ lumen facit nos euidenter cernere veritatem primorum principiorum, eamq; statim, citra vllam argumentationem, assensu nostro complecti: sic in somnijs à Deo datis, lumen diuinum animis nostris affulgens, perficit, vt ea somnia, & vera & diuina esse intelligamus, certoque



toꝝ credamus. Rectè igitur illud traditur in libro Ecclesiast. cap. 34. *Nisi à Domino missa fuerit visitatio, ne des in somniis cor tuum.* ex quo significatur, nonnulla somnia dari hominibus à Deo, animos eorum mirabiliter visitante.

HÆC autem Dei per somnia visitatio, sicut *Varijs modis Deus afficit homines per somnia.* ex diuinis literis colligitur, multis & diuersis fieri solebat. Nonnunquam enim Deus per somnia turbabat, & terrebat hominem, sicut de Abimelech, & Laban narratur in libro Geneseos: *Terrebis me,* inquit Iob 47. *per somnia, & per visiones, horrore concuties me.* Aliquādo in somno hortatur & incitat hominem Deus ad magnū quidpiam & arduum subeundum, certam spem prosperi exitus præsignificando: velut in Gedeonis & Iudæ Machabæi somnijs euenit. Sæpè monet & docet, quid hominem agere, aut fugere oporteat: talia fuere beati Ioseph & Magorum somnia: huc spectant illa verba, quæ sunt in cap. 33. libri Iob. *Quando homines dormiunt in lecto, tunc aperit aures virorum, & erudiens eos, instruit disciplinā.* Quin etiam solebat olim Deus spiritum propheticum nonnullis in somno largiri: nam in libro Numerorum, cap. 12. ait Deus: *Si quis fuerit inter vos Propheta Domini, appareba illi in visione, aut per somnium loquar ad illum.* Et apud Ioëlem in cap. 2. inter alia Spiritus sancti dona, numerantur somnia. Legimus etiam in 3. Reg. Salomoni fuisse à DEO promissum in somno prudentiæ, & sapientiæ donum. Interdum quoque futura alicuius viri excellentia, dignitatis & gloria,



*Genes. 37.* gloria, præmonstrata est per somnium, id quod  
*Esth. 11.* adolescenti Ioseph, & Mardochæo accidisse legimus in sacris literis. Quibusdam præterea in somno patefacta sunt diuina mysteria, cuiusmodi fuit somnium Iacob de illa mystica scala, & Danielis de regno Christi. Denique præsignificauit aliquando Deus, & prædocuit futuros rerum humanarum euentus: cuius generis fuere somnia Abræ, *Genes. 15.* Pharaonis, *Genes. 41.* & Nabuchodonosor, *Danielis 2. & 4.*

*Varijs modis diuina contingunt somnia.*

VARIIS item modis diuina somnia hominibus contigerunt, interdum cum magna corporis & animi commotione & horrore, sicut accidit Abræ, & Nabuchodonosor. Nonnunquã datum est alicui somniũ, sed non eius somnij intellectus, sicut in somnijs Pharaonis & Nabuchodonosor animaduertere licet. Danieli tamẽ, ceterisq; prophetis, simul cum somnijs, intelligentia eorum diuinitus suggerebatur. Quamquam duorum somniorũ, quibus Ioseph supra fratres ipsius futura dignitas & potestas præsignabatur, nulli tunc datus est intellectus: sed postea ipso euentu, successuq; rerum, veritas eorum somniorum cognita est, atque comprobata. Illa quoque in somnijs diuinis varietas cernitur: alia enim clara sunt, & aperta, euidenter res ipsas significantia, vt fuere somnia beati Ioseph, triũ Magorum, & D. Pauli: alia vero sunt inuoluta & obscura, per varias similitudines rectè aliquid insinuãtia, huiusmodi fuere somnia Pharaonis de septem spicis, & bobus, & Nabuchodonosor de statua & arbore, nec non & pincernæ, atque pistoris ipsius Pharaonis. Adhæc, inter-

*Matthæi*

*1. & 2.*

*Actor. 16.*

*Genes. 41.*

*Daniel. 2.*

*Genes. 40.*



interdum videtur in somno loqui cum homine, vel Deus ipse, vt in somnio iacob, & Salomonis, vel angelus, vt in somnijs beati Ioseph, vel homo aliquis, vt in somnio D. Pauli. Præterea sæpè Deus vltro mittit somnia, nonnunquam etiam rogatus, quemadmodum interpretationem somnij, quod acciderat Nabuchodonosor, Deus in quiete tradidit Danieli, qui eam ab ipso vigilans intentissima preceatione postulauerat. Quin fuisse quondam apud Hebræos admirabilem quandam rationem & consuetudinem in rebus maximè dubiis atque grauissimis, consulendi Deum, vt quod verum esset, aut quod factum esset opus, per somnia indicaret, ex cap. 28. primi libri Regum, intelligitur. Postremò quædam somnia diuinitus data respondent antecedentibus in vigilia hominum cogitationibus & curis, ad hoc genus referri debet primum somnium Nabuchodonosor, à Daniele 2. capite narratum, itemq; primum beati Ioseph, quod in capite primo narrat D. Matthæus, atque illud Annibalis supra memoratum, illud quoq; Scipionis Æmiliani, à Cicerone, vel acutè confictum, vel disertissimè narratum.

Genes. 1.

3. Reg. 3.

Matth. 1.

et 2.

Actor. 16.

Daniel. 2.

## QVÆSTIO IV.

CVR DEVS IN SOMNO ARCAN A  
sua hominibus referet.

CVM animus hominis in somno, minimè docilis, minimeq; habilis ad percipiendas res diuinas esse videatur, dignum sanè videtur inquisitione, cur Deus per somnia & arcana suæ

K 4

pro.



*Quinque  
causa cur  
dormienti-  
bus multa  
diuinitus  
reuolentur.*

*Habilior a-  
nimus no-  
ster in som-  
no ad per-  
cipiendas  
diuinas re-  
uelationes.*

prouidentia, & myſteria rerum cœleſtium, non raro docere homines voluerit. At enim uerò, multas eius rei, variasq; cauſas afferre poſſumus. Primam cauſam tangit Hippocrates in principio libri de Inſomnijs, animam hominibus in uigilia varijs diſtingui occupationibus, grauibus diſtineri negotijs, curisq; diſtrahi: per ſenſus item exteriores euocari ad ea, quæ extra ipſum ſunt, & per varia eorum ſenſuum ſpectacula diuagari, multipliciq; rerum humanarum ſtrepitu interpellari, & à ſui, rerumq; cœleſtium conſideratione auocari, incertis præterea fluctuare deliberationibus, varijsq; ſtudijs & affectibus æſtuare, qui nō ſinunt eum, quod uerum & rectum eſt, id aut liquidò cernere, aut incorruptè iudicare. Contrà uerò in quiete & ſomno, ab eiufmodi omnib⁹ interpellationibus & impedimentis vacuus & liber animus, ſibi totus præſens & præſto eſt, ſibiq; attendit, in ſe ſuas omnes vires, atque facultates collectas & coniunctas habet, expeditus & acer ad intelligendum, atque omnium, quæ illi extrinſecus obiecta ſint, ampliſſimè ac faciſſimè capax. Alteram eiufdem rei cauſam hanc ponere licet, quæ vigilantes accipimus, ea ſolemus ſubtiliter ratiocinando diſcutere & examinare, reuocare ad calculos, atque humanæ rationis trutina diligenter expendere: ad rationis enim normam exigimus omnia: cui ſi congruant, quæ nobis oblata ſunt, à nobis approbantur, ſi diſcrepent, abiudicantur atque reiſciuntur. In ſomno autem res ſibi obiectas animus hominis citra examen accipit, paratior promptiorq; ad viſis diuinitus datis



datis credendum, atque obsequendum. Con-  
 stat autē inter omnes qui de rebus diuinis scri-  
 pserunt, ad eas res non tantū intellectu, sed e-  
 tiam affectu, & quodam animi quasi sensu, gu-  
 stuq; percipiendas, satius esse agi & regi homi-  
 nem extrinsecus, quā ipsum agere se, & audi-  
 torem esse potius, quā arbitrum, & existima-  
 torem, deniq; simpliciter credere potius, quā  
 causas credendi disquirere & expendere. Ter-  
 tia causa ex Aristotelis libello, qui inscribitur de  
 Diuinatione, quæ fit ex somnijs, desumpta est:  
 ait ille, *Quemcunque motum, quo animus dormien-*  
*tis extrinsecus pulsatur & cietur, quamuis leuem &*  
*exiguum, magnam tamen habere vim commouendi*  
*animum, vehementerq; in ipsum imprimi, atque altè*  
*in eo inharere: id autem fieri propter noctis silentium,*  
*& sensuum exteriorum vacationem & quietem, atq;*  
*omnium, quæ animi intentionem remittere solent,*  
*vacuitatem, tunc enim sensibus somno consopitis, lan-*  
*guenteq; corpore, quæ extrà sunt, nequaquam senti-*  
*untur.* Quapropter opportunissimè Deus eo tē-  
 pore docet hominem sine vlla eius perturbatio-  
 ne, sine aliorum hominum obseruatione, deni-  
 que sine vllius rei interpellatione: præsertim  
 autem, quia quò magis animus noster à sensuū  
 confociatione, & corporis contagione abstrahi-  
 tur, tantò videtur effici vegetior, & acrior ad res  
 diuinas intelligendas. In somno autem, qui est  
 imago quædam & repræsentatio mortis, vide-  
 tur animus quodam modo seiugari à consortio  
 corporis, eiusque vinculis, si non omninò, certè

Aristoteles.

K 5

aliqua-



aliquatenus relaxari. Quartâ causam esse arbitror, vt ea re ostendatur, quantò sit Deus potentior, & efficacior ad hominem docendum & erudiendum, quàm sit alius quiuis homo: quippe homo hominem docere, nisi vigilantem, audientem & attendentem non potest: Deus autem, etiam altissimè dormientem, atque somniantem. Quo satis declarat se in omnes humani animi vires, ac facultates summum imperium, & efficacitatem habere. Quintam causam equidem posuerim, ne videlicet quispiam existimaret, mortem auferre homini omnem scientiam: aut non esse aliam viam rationemq; comparandi scientiam, quàm per sensum, discursumque rationis, & ex antecedenti aliarum rerum cognitione. Auerrores quidem super libello Aristotelis de Diuinatione per somnia, in commentario suo, non audet inficiari prophetiam posse homini accidere, vel in somno, vel per reuelationem, negat tamen ea ratione vel artes, vel scientias speculatiuas posse vlli contingere. Vna, inquit, est natura hominis: vnus igitur duntaxat erit intelligendi, & discendi modus, scilicet internuntijs sensibus, varijs item praeceptis experimentis, diligentiq; ratiocinatione. Nam si prater communem, & vsitatum discendi modum, esset hic alter per somnia, vel reuelationem, cum is multo sit facilior, atq; praestantior, ille alter quò difficilior & laboriosior est, ed magis fuisset superuacaneus, non igitur datus esset homini. Deus namq;, & natura nec frustra quicquam faciunt, & de ijs, quae possunt fieri, quod melius & praesta-

*Contra A-  
uerrotam.*



*præstabilius est, nunquam non faciunt.* Sic ille. Quæ sanè argumentatio, non esset planè infirma, si quisquam diceret, nemo tamen nostrum id dicit, modum illum discendi per somnia, vel per reuelationem, aut esse homini naturalè, aut esse frequentem, & vsitatum. Verùm hæc Auerrois commenta, vt alia eiusdem, de scientia, potentia, & prouidentia Dei, & humani animi natura, ex inscitia diuinarum rerum, & impietatis fonte redundantia, quàm sint inerudita, obtusa, falsaq; satis liquet vel solis exemplis, quæ memorantur in sacris literis, Adami, Salomonis, Danielis, multorumq; Prophetarum, quibus multarum rerum scientia subitò data est à Deo: quin etiam Beseleel, & Oliab, quos in libro Exodi proditum est, subito diuinitus edoctos, Mosaicum *Gen. 2.* tabernaculum, simul cum omnibus eius instru- *3. Reg. 3.* mentis atque ornamētis, summa arte perfecisse. *Exod. 31.*

## QVÆSTIO V.

CVR A DEO SOMNIA DENTVR

*obscuris & indoctis hominibus, non autem  
sapiantibus.*

VEL hac vna ratione Aristoteles & Cicero *Error Ari-* omnium somniorum, quæ diuina credun- *stotelis &* tur, fidem & auctoritatem eleuari, & eludi posse *Ciceronis.* putauerunt. Nam, si quæ somnia, inquit, darentur hominibus à Deo, ea non obscuris & indoctis hominibus, sed viris sapientia prudentiaq; præstantibus dari, par erat. In quo fefellit eos, quòd distinctionem diuinorum somniorum, eorum dico quæ  
verà



verè diuina sunt, ab ijs, quæ non sunt, esse tamen  
*Cur damo-* falsò putantur, planè ignorauerunt. Enim verò  
*nes somnia* Dij Gentiliũ, quos fuisse dæmones nobis Chri-  
*olim dare* stianis nequaquã dubium est, quemadmodum  
*soluti fue-* futuros rerum humanarum casus & euentus  
*runt, non* certò providere, ac scire non poterant, id enim  
*doctis &* solius Dei est, ita nec eos certis aut verbis, aut si-  
*prudenti-* gnis prædicere, ac præmonstrare poterant. Qua-  
*bis, sed im-* propter somnia, quibus præsignificabantur fu-  
*peritis, &* tura, non dabant viris doctis & prudentibus, vi-  
*cõtempis-* delicet ne illi eorum somniorum vanitatem, ac  
*fimis homi-* falsitatem deprehendentes, auctoritatem ipsa-  
*nibus.* rum Deorum apud alios contererent, eorumq;  
 oracula tâquam diuinitatis vacua, & inania ve-  
 ritatis, in publicum etiam vulgi ludibrio, & cõ-  
 temptui exponerent: dabant igitur ea somnia  
 indoctis, & veri falsiq; discernendi imperitis,  
 maximè vero superstitiosis, ob idq; ad creden-  
 dum quiduis, satis per se paratis atque propen-  
 sis. At vero somnia, quæ à vero Deo missa sunt,  
 ea legimus plerunq; data viris sanctitate, ac sa-  
 pientia eximijs, vt Abraæ, Iacob, Salomoni, &  
 Danieli. Data sunt tamen etiam nonnulla viris  
 non admodum doctis, sed pietatis tamen, ac in-  
 nocentiæ præstantia clarissimis: excellens au-  
 tem virtus & pietas, dociliorem reddit hominis  
 animum, aptioremq; ad rerum diuinarum per-  
 ceptionem, quàm humana vel prudētia, vel sa-  
 pientia. Qui enim mundana excellunt poten-  
 tia, vel sapiētia, hi ferè sunt aut impij, aut super-  
 bi, aut turpissimis inquinati flagitijs: quæ res  
 cœlestibus doctrinis, diuinisq; illustrationibus,  
 aditum ad animos hominum, penitus occludūt.

Nec



Nec me fugit, etiam quibusdam sceleratis atque impijs hominibus, vt Pharaoni, & Nabuchodonosor, quædam diuinitus somnia contigisse, sed hæc illis, nec ipsorum præcipuè causa, neq; cum intelligentia eorum somniorum data sunt: quo scilicet illi, eorum interpretationem, cum apud suos sapientes inuenire non possent, à veri Dei cultoribus eam petere cogerentur, atque ea ratione verum Deum agnoscerent, ac venerarentur, eiusq; seruos in admiratione & honore haberent: id quod somnia Pharaonis & Nabuchodonosor à Iosepho & Daniele interpretata, manifestè declarant.

*Cur quædam somnia etiam impijs hominibus à Deo sint data.*

## QVÆSTIO VI.

*CVR DIVINA SOMNIA NON NVN-  
quam sint obscura & perplexa.*

SED cur diuina somnia non semper sint clara, & aperta, sed obscura, & perplexa, & aliarum rerum imaginibus, ac similitudinibus inumbrata, & offuscata, nec alijs tantum occulta, sed etiam ijs, quibus dantur, minimè conspicua, causas rimemur & aperiamus. Dij Gentilium, hoc est demones, quia certam futurorum euentuum scientiam habere non poterant, ad significanda futura, dabant illi quidem non rarè somnia, sed obscura tamen, & ambigua, quæq; ad diuersos, etiam cōtrarios euentus facile detorqueri & applicari possent: vt ad quodcumq; cecidisset, somnium quadrare videretur. Quod si somnia euentis minimè responderent, id non falsitati somniorum, sed interpretum inscitæ, qui somnia

*Astuti ad-  
monum in-  
dandis som-  
nijs futura  
significan-  
tibus.*

propter



*Quatuor  
causa cur  
interdum  
diuina so-  
mnia sint  
valde ob-  
scura.*

propter obscuritatem & ambiguitatem non rectè essent interpretati, adscriberetur. At verò somnia, quorum auctorem fuisse Deum ex sacris literis cognouimus, sæpenuerò distinctè & explicatè tradita sunt, qualia legimus fuisse Abimelech, Labā, Iudæ Machabæi, Salomonis, beati Ioseph, & trium Magorum. Non est tamen negandum quædam somnia esse data rectè & obscurè, sed hominibus gentilibus: ad eum nempe finem, vt intelligentiam eorum somniorum, cum non ab alijs, quàm à viris sanctis accipere possent, & ipsos Dei seruos honorarent, & summa Deum reuerentia, ac veneratione prosequerentur. Si quæ verò somnia etiam seruis Dei obscura data sunt, propterea id factum est, vt eorum sensum atque intellectum, summo illi studio, assiduis precibus, multisq; lachrymis à Deo flagitantes, tandem impetrarent, & propter difficultatem impetrandi, pluris facerent, & cariorum haberent. Denotatur præterea obscuritate somniorum, earum rerum, quæ significantur somnijs, obscuritas. Adde quòd per imagines, & similitudines, breuissimè plura & sublimiora mysteria significatur, quàm si apertis & proprijs fuissent expressa vocabulis. Nam quàm multa, quàm varia, quàm profunda mysteria, vna illa statua Nabuchodonosor in quiete visa, adumbrauit, quæ si fuissent proprijs verbis efferenda, vix longissima oratione declarari potuissent. Deniq; vult Deus nonnunquam, somnia esse ad aliquod tempus occulta & incognita, quòd ad nimirum, ipso euentu, rerumq; successu, eorum veritas agnoscatur & comprobetur: quod in duobus



duobus illis Iosephi somnijs, promotionem eius ad summam potentiam & dignitatem præsignantibus, liquidò cernitur.

## QVÆSTIO VII.

AN LICITVM SIT CHRISTIANO  
homini, obseruare somnia.

**D**VAE tanguntur his verbis difficultates, & prior quidem est, an sit fas Christianis, curiosè somnia obseruare: ad quam facilis est, & in promptu responsio. Etenim quædam somnia licitum est obseruare, quædam verò minimè. Principiò, somnia quæ bonam, vel malam corporis affectionem aliquam, morbosq; tam animi, quàm corporis significant, vtiliter à medicis *Quatuor genera somniorum, sine vitio possunt obseruari & curari.* tam animi, quàm corporis obseruantur & expenduntur. Tum, somnia, quæ nos crebrò infestant, territant, cõturbant, & vexant, animaduertere quibus ex causis accidant, vt vel noti effectus ignotas nobis causas scrutemur, ac teneamus: vel vt rationem aliquam ineamus eam à nobis molestiam depellendi, licitum est, & à sanctis viris sæpè vsurpatum. Legimus enim apud Cassianum in Collatione 22. veteres illos monachorum magistros & rectores, in perquirendis, & excutiendis quorundam somniorũ causis, diligenter esse versatos. Postea obseruare somnia, quatenus in illis pernotescit homini veritas aliqua pertinens ad scientias speculatiuas, vel ad res gerendas conferens, nec vt superstitiosum, nec vt vanum damnari debet. Deniq; somnia quæ nos sæpè commoēt, & incitant ad flagitia,



gitia, considerare num à dæmone nobis subij-  
ciantur, sicut contrà, quibus ad bona prouoca-  
mur & instigamur, veluti ad cælibatum, largi-  
tionem eleemosynarum, & ingressum in reli-  
gionem, ea ponderare num à Deo nobis missa  
sint, nō est superstitiosi animi, sed religiosi, pru-  
dentis, ac salutis suæ satagentis, atque solliciti.

AT verò, cuiuscunque somnij, quoquo mo-  
do nobis contingat, etiam si rarò, si temerè, si  
fortuitò eueniat, putare habendam esse rationē,  
curamq; suspiciendam, stolidi hominis est, ne  
dicam stulti. Supra enim ostensum est, maximā  
partem somniorum nihil veri, & certi habere,  
sed vanitatis, ac temeritatis esse plenissimam.  
Præterea obseruare somnia, quasi esset in ipsis a-  
liquid diuinum, scilicet quale Gentiles existi-  
mabant esse in garritu, volatu, cibatuq; auium,  
& in extis animantium, atque ex illis prænosse,  
ac diuinare velle futura, non modò non est lici-  
tum, sed est in scriptura grauissimè reprehen-  
sum, damnatum, & interdictum, non minus sa-  
nè quàm magorum, & incantatorum maleficia,  
quod ex cap. 19. Leuit. ex 18. Deuteron. ex 33.  
posterioris libri Paralipomenon, alijsq; sacro-  
rum voluminum locis perspicuè intelligitur. Et  
verò, scire velle futura, quæ Deus in sua solius  
potestate posuit, arrogans & impia est curiositas.  
Putare autem certa futurorum signa contineri  
in somnijs, quæ nullam cum rebus futuris con-  
nexionem & conuenientiam habent, fatuum  
est: parum dixi, planè impium, & stultum est:  
hoc enim arguit eiusmodi somniorum obser-  
uatores, stultis, impijs, & absurdis opinionibus  
esse



esse infectos, atque deprauatos. Nam, vel isti putant res omnes futuras, ex naturalibus causis pendere, & hoc falsum est: vel eas res quibuscumque somnijs significari posse, quod planè stultum est: vel futura omnia certò prouideri, & sciri à dæmone, quod est perquam impium: vel denique à Deo promiscuè, atque indiscretè per quælibet somnia, & quibuscumque hominibus, præmonstrari futura, quod esse absurdum, nemo non videt. Ad extremum, tanti facere somnia, & usque adeò pendere ex illis, ut ad eorum quasi normam dirigat quis omnem vitæ suæ rationem, & respectu habito ad somnia, actiones, & negotia, vel suscipiat, vel omittat, non modo præstantia hominibus indignum est, sed olet etiam fatalè illam Stoicorum, toties in Ecclesia damnatam, & à melioribus philosophis explosam reiectamque necessitatem. Quod si meritò vituperantur, & à sapientibus redarguuntur astrologi, qui res humanas ex astris, quasi suspensas & religatas omnino pendere arbitrantur: eò magis profectò, reprehendendi sunt superstitiosi somniorum observatores, quò magis astra dignitate naturæ, æquabilitate motus, constantia ordinis, amplitudine potestatis, & præstantia efficacitatis, somnijs antecellunt.

*Maiores  
varietas est  
observan-  
tium som-  
nia, quam  
astra.*

### QVÆSTIO VIII.

CVIVS HOMINIS SIT RITE INTER-  
pretari somnia.

Ad posteriorem quæstionem, qua quæritur,  
cuius hominis sit benè interpretari som-  
nia,

L.

nia,



nia, hunc in modum respondemus. Somniorum quæ vim habent ad aliquid significandum, & obseruatione, atque interpretatione digna sunt, ea non cuiusuis hominis est interpretari. Tria enim huiusmodi somniorum genera distinguere possunt, nam multa sunt naturalia, quædam humana, nonnulla etiam diuina. Naturalium somniorum interpretatio, nõ est dubium, quin solertium & doctorum physicorũ, ac medicorum sit propria: eorum maximè, qui norunt similitudines in somnijs ostensas comparare inter se, & quarum rerum similitudines esse, & ex quibus causis proficisci soleant, discernere: similiter, vt qui figuras aliquas & imagines dilaceratas sumens in manus, earumq; partes dissipatas, benè componens inuicem, apteq; conformans, cuius rei fuerint similitudines, hominisne, an equi, an aliarum rerum, acutè dispicit, vereq; iudicat. Humanorum autè somniorum, ita erit quisque sagacissimus coniector, & idoneus, ac veridicus interpres, vt fuerit rerum humanarum peritissimus, & callidissimus, ingeniorum item, studiorum, morum, & propensionum, quæ in varijs hominibus magnam quoque varietatem habent, exquisitam, multisq; confirmatam experimētis notitiam sit adeptus, quasi venas omnes rerum ciuiliũ & humanarum tenens. Cuius autem sit exponere diuina somnia, in promptu est intelligere: patet enim, neminem interpretari ea posse, nisi diuinitus afflatus & eruditũ. *Nemo enim nouit, inquit Paulus primæ ad Corinth. secundo, quæ Dei sunt, nisi*



nisi spiritus Dei. Præsertim vero cùm diuinorum somniorum significationes, ex solius Dei consilio & voluntate sint institutæ, ob idq; solius Dei reuelatione, notæ hominibus esse possint. Quocirca regem Nabuchodonosor somnij sui, quo maximè territus fuerat, sollicitum & anxium, quod eius somnij rationem ex nullo suorum sapientũ cognoscere potuisset, sic affatº est Daniel, *Mysterium, quod rex interrogat, magi, arioli, aruspices, & sapientes nequeunt indicare regi: sed est Deus in cælis reuelans mysteria.* Daniel. 2.

IAMBLICVS existimat diuina somnia ferè *Iamblici opinio, de tempore quo diuina somnia contingant hominibus refutatur.* non contingere hominibus, nisi aut primo, aut extremo somni tempore: videlicet, quia tunc animus hominis, aut nondum est cibi potusq; vaporibus occupatus, & oppressus: aut iam euanescente somno, vaporumq; discussa caligine, ex illis sordibus emersus animus, purior & acrior est ad diuinas illustrationes accipiendas. Quapropter vates, ac somniorum interpretes, in more habebant, ex deferentibus ad ipsos somnia sciscitari, quo ea tempore ipsis contigissent: nam si profundo somno accidissent, ea planè abijciebant, rati non esse consentaneum, animo tunc obruto & demerso, dari cælitus somnia: sin autem somnia illis accidissent, exeunte somno, & animo ad suas functiones propè ià expergiscente, tunc ea somnia diuinitus missa, Deoq; auctore digna iudicantes, ponderanda sibi & interpretanda suscipiebant. Legendus etiam est Philostratus in cap. 14. lib. 2. de vita Apollonij. Veruntamen Iamblici documenta ex superstitiosis

L 2

Ægy-



Ægyptiorum sacerdotum obseruationibus, vel  
vt dicam veriùs, figmentis, quorum fuit ille stu-  
diosissimus, exprompta sunt. Deus nempe, isti-  
usmodi temporum legibus non est alligatus, nec  
opportunitate temporum eget ad operandum,  
vbicunq; enim vult, quãdocunq; & quibuscun-  
que vult, sua inspirat somnia: potest enim quo-  
uis tempore, imò etiam sine tempore, sedare su-  
bito agitationem humorum, tranquillare spiri-  
tuum animalium iactationem, purgare phanta-  
siam, mentem illustrare, animumq; ad percipiē-  
da diuina somnia idoneè comparare.

## QVÆSTIO IX.

AN IN SOMNO, LIBER VSVS RA-  
tionis, & voluntatis esse queat.

*Sapè in so-  
mno liber  
est rationis  
& vsus.*

SÆPENVMERO in somnijs, præsertim quæ  
doctis, prudentibus, & sanctis viris contin-  
gunt, animus hominis, quod pertinet ad vsum  
rationis, & agitationem mentis, solutus, expe-  
ditus, ac liber est. Etenim nonnunquam ratio  
dormientis planè cognoscit res simplices, easq;  
vel componit inuicem, vel disiungit, ratiocina-  
tur, iudicat, miratur, noua quædã inuenit: quin  
etiam ad se ipse animus conuertitur, & ad suas  
actiones considerandas, & diiudicandas aciem  
suam, vimq; reflectit, cunctatur, hæret, dubitat,  
secum ipse disceptat, an tunc homo dormiat,  
nec ne. Hæc autem liberum esse tunc rationis  
vsum, manifestè demonstrant. Non propterea  
tamen existimandum est, quia in somno inter-  
dum soluta est vis rationis, esse itidem perfectū  
liberi

*Nunquam  
in somno  
est perfe-  
ctus liberi*



liberi arbitrij vsum. Nam ad plenum & perfe- *arbitrij &*  
ctum liberi arbitrij vsum, opus est perfecta ho- *sum.*  
minis libertate, hoc est, solutione omnium sen-  
suum, & potentiarum, ita vt sit ipse homo, qui  
tunc agat, nec aliundè agatur, sitq; dominus sui,  
atque suarum omnium actionum, & in potesta-  
te eius sit tunc hoc, vel illo modo agere, aut eti-  
am nihil agere: id quod in somno nequaquam  
euenit.

## QVÆSTIO X.

DE SOMNIO SALOMONIS, IN QVO  
*donum sapientiæ à Deo promissum ei, &*  
*tributum est.*

CÆTERVM nonnihil habet difficulatis,  
quod legitur in 3. lib. Regum, cap. 3. Deum  
in somno visum esse Salomoni, iussisseq; vt pe-  
teretur ab ipso quodcunq; omnium maximè o-  
ptaret: ipsum autem petijisse sapientiam, & pru-  
dentiam benè regendi populum, cui præerat,  
posthabitis omnibus alijs bonis, quæ tamē, prin-  
cipibus huius mundi, super omnia, cōcupiscen-  
da, & expetenda videntur, : eam porrò petiti-  
onem vsque adeo placuisse Deo, vt summam ei se  
daturum sapientiam, & præterea quæ non po-  
stulasset bona, cumulatissimè largiturum polli-  
ceretur. Ex qua narratione ipsius scripturæ, satis  
intelligi videtur, Salomonem in illo somnio so-  
lutè ac liberè, non tantùm ratione, sed etiam vo-  
luntate esse vsum: neque enim illa eius petitio  
facta in somno, tantopere Deo placere, tantum-  
quæ sapientiæ munus promereri potuisset, nisi



*Solutio tri-  
plex.*

esset ex libera voluntate profecta. Hæc difficul-  
tas tribus modis posset discuti, ac dissolui. Nam  
primò quidem responderi posset, illam Salo-  
monis in somno petitionem, placuisse Deo, non  
per se, sed propter antegressam eiusdem in vigi-  
lia similem quandam petitionem, ex qua scili-  
cet illa in somno extitit. Salomon enim arden-  
tissimè expetierat, & à Deo postulauerat donum  
sapientiæ, ac prudentiæ: hanc eius petitionem,  
Deus illo somnio declarauit fuisse sibi gratissi-  
mam, & optatum habituram effectum. Sed hæc  
fortasse cuiuspiam videbitur nonnihil dura, & cō-  
torta responsio. Quocirca subiiciam alterum  
responsum: posset enim dici, à principio fuisse  
illud quidem somnium, sed postea Deo mirabi-  
liter operante, conuersum esse in ecstasim seu  
raptum, qualis nempe diuo Paulo, & Prophetis  
sæpè contigit: in quo animus Salomonis, licet à  
corporis, & rerum externarum sensu abstractus,  
& similis dormientium esset, per Dei tamen po-  
tentiam factum est, vt solutus, & liber tunc fue-  
rit ad exercendas actiones tum rationis, tum li-  
beri arbitrij, ita vt liberè peteret à Deo Salomō  
quod vellet, & petendo, quæ grata erant Deo, ea  
quoque mereretur ab ipso consequi. Sed non  
placet hoc responsum. Mitto nunc examinare,  
an in raptu & ecstasi, perfect⁹ liberi arbitrij vsus  
esse queat: tantum dico, huic responso minimè  
suffragari diuinam scripturam, quippe, suprà di-  
cto loco narratura visionem illam Salomonis,  
præfatur, Deum apparuisse Salomoni per som-  
nium, & narrata iam visione, subiungit. *Igitur*  
*enigi-*




euigilauit Salomon, & intellexit, quòd esset somnium. quo perspicuè significatur, illam visionem nullatenus fuisse raptum, vel ecstasim, sed totam fuisse somnium, diuinum tamen somnium, scilicet à Deo ad erudiendum docendumq; Salomonem datum. Atque duas hasce solutiones propositæ quæstionis tradit D. Thomas in 1. 2. quæst. 113. art. 3. ad 2.

ERIT igitur, nisi fallor, similis & propius vero tertium responsum, quod etiam Tostado super 3. cap. lib. 3. Regum, in quæst. 12. maximè probatum est. Dicimus, cum Salomon tunc verissimè dormierit, & illa eius visio fuerit somnium, quemadmodum scriptura testatur, hinc necessariò effici, quicquid ibi factum esse dicitur, non reuera, sed per imaginariam tantum dormientis visionem esse factum. Videbatur igitur tunc sibi Salomon petere sapientiam à Deo, videbatur etiam ei Deus petitionem ipsius approbare, cum reuera tamen nulla fuerit tunc petitio, nullum meritum Salomonis, nullum item responsum, nullumq; Dei promissum. Cur igitur, inquires, somnium illud à Deo datum est Salomoni? Videlicet, nisi mea errat cōiectura, tres ob causas. Primò, vt intelligeretur omnium bonorum auctorem, & largitorem esse Deum, & ab eo esse omnia bona expetenda & postulanda. Deinde, vt manifestum fieret, quæ bonorum electio, & petitio, grata esset, & accepta Deo: ea nimirū, qua spiritualia bona corporalibus, cœlestia terrenis, denique ad communem aliorum vtilitatem & salutem pertinentia, inanibus & infructuosis præoptantur, atque præferuntur.

*Cur somnium illud datum fuerit Salomoni.*



Ad extremū , vt exemplo Salomonis appareret  
& extaret, quanta sit Dei benignitas & munifi-  
centia erga seruos suos , quorum optata & po-  
stulata non solūm impleat , sed etiam longè su-  
peret , & abundanter excedat. Ecce Salomon  
solam à Deo sapientiam postulauerat , præ hac  
ceteris bonis , quæ hominibus pretiosissima , &  
carissima sunt, contemptis : cui tamen Deus , &  
sapientiam supra ipsius votum, & reliqua bona,  
præter votum ipsius, largissimè donauit. Verūm  
hæc nostra de somnijs disputatio , hunc habeat  
terminum : vereor enim ne si longius producta  
sit, molesta & odiosa lectori esse incipiat. Quem-  
admodum enim somnus, quoad quietus & pla-  
cidus est , mēbra dulcissimè refouet ac recreat,  
viresq; reficit, ac redintegrat, si tamen in eo ni-  
mis longa nimisq; seria, & graua contingant so-  
mnia , corpus pariter atque animum languefa-  
cit, & debilitat: sic omninò cauendum nobis  
fuit, ne nostra hæc de somnijs disputatio, præ-  
ter modum longa, gratiam perderet le-  
gentium, & quam ex ipsa fortasse  
voluptatem cœperant , in  
fastidium odiumq;  
conuerte-  
ret.



BENE-






# BENEDICTI

## PERERII, LIBER

TERTIVS,

qui est

DE DIVINATIONE ASTRO-  
LOGICA.



**A**NTA est Astrologorum  
(qui vulgo Iudiciarij appellantur)  
vel impudentia, vel amentia, vt e-  
tiam sibi diuinam scripturam sus-  
fragari, suæq; Astromantiæ fidem  
& auctoritatem firmare iactent. Etenim verba  
illa quæ dixit D E V S creans luminaria cœli;  
*Et sint in signa & tempora, &c.* ad suam referunt *Genes. 1.*  
diuinationem astrologicam, per quam ipsi pro-  
fitentur ex obseruatione siderum futura rerum  
euenta posse prædici. Quocirca B. Basilius &  
Ambrosius alijq; permulti Patres in explanatio-  
ne eorum verborum, benè longam & accura-  
tam in refellendis istiusmodi Astrologorū præ-  
dictionibus orationem posuerūt. Quorum nos  
Patrum exemplis prouocati, & grauissimis D E I  
sententijs contra Astrologos multifariam in di-  
uina scriptura proditis permoti, quin etiam iu-  
stissimo aduersus Astrologos odio, propter frau-  
L 5                      dulenta



dulenta & pernicioſa eorum ſigmenta, incenſi, librum hunc ad confutandas eorum prædictiones à nobis ſcriptum, gratum multis atque utilem fore exiſtimauimus. Scripſit aduerſus Astrologos copioſè quidem & eruditè Ioan. Picus Mirandulanus; ſed multos ab eius lectione deterret prolixitas operis. Nos, licet in prædiuiti atque vberi verſemur argumento; eo tamè breues erimus, quod non omnia quæ diſputari poſſent, ſed aptiora duntaxat cauſæ firmioraꝝ tractabimus. Quinque autem erunt huius libri & diſputationis aduerſus Astrologos capita: Primò enim docebimus, ſacræ & Eccleſiaſticae doctrinæ diuinationem Astrologicam eſſe contrariam: Tum oſtendemus, Astrologos eſſe rerum cœleſtium imperitos: Deinde, diuinatricem iſtam artem rectæ rationi ac philoſophiæ aduerſari demonſtrabimus: Adhæc, probabimus, aſtra non ſolum non eſſe cauſas efficiētes rerum futurarum, verùm nec eſſe certa ſigna quæ res futuras prænotent ac præmonſtrent: Ad extremum, cur nonnulla Astrologorum prædicta ſint vera, cauſas exponemus.

INDEX DISPUTATIONVM  
QVÆ SINGVLIS IN PRÆDI-  
ctis capitibus explicantur.

CAPVT PRIMVM.

1. *S*entenſijs diuina ſcriptura; antiquis item Eccleſiaſticis & exen- plis; rationibus etiam theologicis reſelluntur Astrologi.
2. *De Vanitate oraculorum Apollinis.*

3. Cap



3. *Cur Dæmones prædicendo futura sæpè fallant.*
4. *Non posse Veritatem Christiana religionis coherere cum Veritate Astrologia iudiciaria.*
5. *Quàm seuerè olim Ecclesia in istiusmodi Astrologos animaduertit.*
6. *De multis perspicuè falsis & impijs Astrologorum sententijs.*

CAPVT II.

7. *Astrologos iudiciarios esse rerum celestium imperitos.*
8. *Aduersus fictitiã antiquitatem observationum quam iactant Astrologi.*
9. *De noua stella qua superioribus annis Visa est.*
10. *Quàm sit difficile aspectum siderum in oritu cuiusq; hominis exactè annotare.*

CAPVT III.

- II. *Probatnr octo rationibus, non posse Astrologos ex arte & scientia sua prænosse ac prædicere futura contingentia.*
12. *Præter causas celestes, necessariam esse notitiã causarum particularium ad prænosceudos earum effectus.*
13. *De simili oritu & dissimilibus euentis Geminorum.*
14. *Pulcherrima disputatio Barthesanis aduersus Astrologos.*
15. *Virum sit facilius, diuinare quid factururus sit Vir bonus, an Vir improbus.*
16. *Quàm sit Vana ac inutilis prædictio Astrologorum de aliquo, quod sit futurus summus Pontifex.*
17. *Nullam posse esse scientiam vel artem istius Astrologia.*
18. *Vanitas & falsitas multarum prædictionum astrologicarum.*



19. *Errores Astrologorum in Chronologia.*
20. *Astrologiam iudiciariam omni tempore à prudentibus & sapientibus viris esse contemptam & damnatam.*
21. *Cui generi hominum arrideant prædictiones Astrologica, quas S. Ambrosius comparat telus araneorum.*
22. *Disputatur contra tria fundamenta Astrologiæ iudiciariæ.*
23. *Virum a natalitia cuiusque, possint esse certa causa omnium quæ ei eveniunt sunt.*
24. *Virum sit plus momenti in conceptu, an in ortu hominis ad divinandum.*
25. *De Vanitate Astrologorum divinationem suam extendentium etiam ad ciuitates, non solum ad homines.*
26. *Cur Astrologi non, & de hominibus, sic etiam de stirpibus & alijs animantibus ex observatione astrorum vaticinentur.*
27. *De antiquitate istius Astrologiæ apud Aegyptios & Chaldaeos.*

## CAPVT IV.

28. *Virum astra, si non sunt causa, saltem sint certa signa omnium futurorum.*
29. *Virum secundum Augustinum astra sint signa omnium rerum humanarum.*
30. *De natura & Varietate signorum.*
31. *An cometa signa sint humanarum rerum.*
32. *An qui astra faciunt signa rerum futurarum, simul etiam necessario inducant & astruant Fatum.*


## CAPVT V.

33. *De quatuor causis propter quas evenit & nonnunquam Astrologi vera prædicant.*
34. *Instinctu Daemonum agi nonnunquam homines ad divinandum.*

35. Quos




35. *Quomodo Demon futura prænoscit, & hominibus pramonstrare soleat.*
36. *Quo modo & quam grauitè peccent, qui Dæmonum vel istorum Astrologorum opera viuunt ad diuinandum.*
37. *Istiusmodi Astrologos ferè improbos & flagitiosos esse.*
38. *De usu sortium apud Antiquos ad diuinandum futura.*
39. *Permissu DEI, nimis cupidos sciendi futura, laqueis Dæmonum irretiri, & varijs ac perniciosis erroribus implicari.*
40. *Multos diuinare futura; magis ex prudentia & usu rerum humanarum, quam ex arte astrologica.*
41. *Nimis credulitatem ac leuitatem consulentium Astrologos, interdum conducere ut eorum prædicta vera cadant.*

  
 DIVINATIONEM ASTROLOGICAM  
 diuinæ Scripturæ, disciplinæ Ecclesiasticæ, ac  
 doctrinæ Theologicæ esse contra-  
 riam.

## CAPVT PRIMVM.

§. I. *Sententijs diuinæ Scripturæ; antiquis item Ecclesiæ institutis & exemplis; rationibus etiam theologicis refelluntur Astrologi.*


 LAMAT multis in locis diuina Scriptura certam futurarum rerum præscientiam & prædictionem, non esse hominum sed ne dæmonum quidem, verum  
vnius



vnus Dei propriam. Quapropter apud Isaiam cap. 41. ita scriptum est, *Annunciate quæ ventura sunt in futurū, & sciemus quia dii estis vos: & ca. 44. Ego sum Dominus irrita faciens signa diuinorum, & harios in furorem vertens, conuertens sapientes retrorsum, & scientiam eorum stultam faciens: cap. autem 47. deridens Deus Babylonios & Chaldaeos syderalibus suis obseruationibus præfidentes, Sta, inquit, cum incantatoribus tuis, & cum multitudine maleficiorum tuorū, in quibus laborasti ab adolescentia tua, si fortè quid prosit tibi, aut si possis fieri fortior. Defecisti in multitudine consiliorū tuorū: stent & saluent te Augures cœli, qui contemplabātur sydera, & supputabāt menses, vt ex eis annuntiarent ventura tibi. Et paulò ante dixerat: Sapiētia tua & scientia tua, hæc decepit te. Hieremias quoq; c. 10. monet Iudæos vt Astrologicas obseruationes pro nihilo ducant, nihil enim sibi à stellis vel sperandum vel timendum esse. sic autem ait: *Iuxta vias gentium nolite discere; & à signis cœli nolite metuere quæ timent gentes: quia leges populorum vanae sunt.* Salomon autem Ecclesiast. cap. 10. scientiam futurarū rerum denegat homini, Ignorat homo, ait ipse, quid ante se fuerit: & quid post se futurum sit quis poterit indicare? idem cap. 8. eiusdem lib. Homo, inquit, ignorat præterita, & futura nullo scire potest nuncio. Liqueat igitur diuinationem astrologicam in sacris literis contemni, derideri, ac reprobari.*

Cum



Cum doctrina sacrarum literarum, etiam iudicium Ecclesie, vt par erat, mire congruit. Semper enim Ecclesia inde vsque à primordijs suis, Iudiciarios Astrologos odit, fugit, damnauit. Exstant aduersus ipsos plurima & seuerissima decreta Ecclesie, quæ legere licet in secunda parte Decretorum cap. 26. per primas quinque quæstiones, & in Concilio Bracarenfi I. cap. 9. & 10. & in Toletano I. in assertione Fidei contra Priscillianistas. Fertur Alexander Papa huius nominis III. quendam presbyterum qui semel duntaxat consuluerat Astrologum de quodam furto in Ecclesia sua facto, in vnum annum priuasse altaris ministerio. Crebras item reperimus in scriptis sanctorum Patrum aduersus Astrologos, quos illi nunc Chaldæos vel Genethliacos, aliàs Mathematicos aut Planetarios appellant, disputationes, ex quibus apparet quàm fuerit maioribus nostris genus hoc hominum exosum & abominatum. Multa contra illos disputat Basiliius hom. 6. in Genesim, Chrysostomus & Gregorius Magnus in cap. 2. Matth. sed præter cæteros Augustinus lib. 2. super Genesim ad literam cap. 17. lib. etiam 2. de doctrina Christiana cap. 21. & aliquot proximè sequentibus capitibus, subtiliter tamen & copiosè primis aliquot capitibus lib. 5. de ciuitate Dei. Eodem pertinet quæ contra Mathematicos in lib. 14. cap. 4. & in lib. 6. cap. 9. de Præparatione Euangelica argumentatur Eusebius.

Ridiculus fuit, vel potius amens Iulianus Apostata, qui in libris quos aduersus Christianos effutiuit, probare voluit, ex his quæ scripta sunt in

*Decreta  
Ecclesie cõ-  
tra Astro-  
logos Iudi-  
ciarios.*

*Alexander  
Papa.*

*Basiliius.  
Chrysost.  
Gregor. ho-  
mil. 10. su-  
per Euang.  
Augustin.  
Euseb. Cas.*

*Iuliani A-  
postata ca-  
lumnia.*



in cap. 15. Genes. Abraamum & Astrologiam & aruspicinam coluisse. Astrologiam quidem eius, significari putat illis verbis: *Eduxit Deus Abraam foras, & ait illi, Suspice cœlum & numera stellas si potes: Sic erit semen tuum.* Aruspicinæ verò scientiā eius, illis etiam verbis denotari ait, *Sume mihi vaccam triennem, & capram trimam, & arietem annorum trium, turturem quoque & columbam. Qui tollens vniuersa hæc, diuisit ea per medium, & vtriusq; partes contra se altrinsecus posuit: aues autem non diuisit. Descenderuntq; volucres super cadauera, &*

*Iuliani A-*  
*postata ca-*  
*lumnia à*  
*Cyrillo re-*  
*pulsa.*

*abigebat eas Abraā.* Deinde, subiicitur prædictio peregrinationis & seruitutis posterorum eius per quadringentos annos. Sed hunc Iuliani errorem vel potius furorem, egregiè confutat Cyrillus extremo lib. 10. eius operis quod aduersus Iulianum edidit. Alij fidem huic vanissimæ astrologiæ asserere & astruere conantur ex illa stella quæ nato Christo apparuit, cuius aspectu excitati tres illi Magi, ductuq; ad adorandum Christum venerant. Sed istos manifestis argumentis Chrysostomus & Gregorius in homilijs super illud Euangelium scriptis, redarguunt & conuincunt.

*Matth. 2.*  
*Chrys. hom.*  
*6. in Matth.*  
*Greg. hom.*  
*10. in Euāg.*

Cæterum, errorem Astrologorum etiam rationibus ex doctrina Theologica contextis refutare possumus. Principiò, *Nemo*, vt ait Paulus 1. Corinth. 2. *nouit quæ sunt hominis, nisi spiritus hominis; sed homo nescit quid ipsemet post multos annos aut etiam dies acturus sit: nam vt inquit Scriptura, Prouerb. cap. 27. Ne glorieris in-*

*Argumentum*  
*ex sacra*  
*Theologia*  
*ductis, a-*  
*strologica*  
*diuinatio*  
*refellitur.*

*crassi.*



*crastinum, ignorans quid superuentura pariat dies: &, Non est via hominis in manu eius: homo enim proponit, Deus autem disponit.* Est namque non modò quorumlibet hominum, sed etiam Regum cor in manu Dei, & flectit illud quocumque vult. Si igitur ipsemet homo nescit quid futuro tempore facturus sit, quanto minus id scire potest Astrologus? Deinde, ne ipse quidem diabolus certò potest nosse res futuras: si enim futura omnia dæmon sciret, nunquam profecto impulisset Iudæos ad crucifigendum & occidendum Christum Dominum, quippe præuidisset per crucem & mortem Christi, imperium quod tamdiu habuerat in homines, fore labefactandum & funditus euertendum. nec sanè dæmon tentaret & infestaret seruos Dei à quibus in tentatione vincitur, ne videlicet propter victoriam tentationum crescente Sanctorum gloria, magis ipse, quæ eius est superbia & inuidia, torqueretur.

*§. 2. De vanitate oraculorum Apollinis.*

Hoc etiam patet argumento oraculorum, quæ olim reddebant dæmones, cuiusmodi erant responsa & oracula Apollinis delphici quòdam apud Græcos nobilissima & clarissima; quæ ad diuinationem astrologicā pertinuisse, locuples auctor & testis est Porphyrius in libro de Oraculis (refert autem hoc Eusebius lib. 6. de Præparatione Euāgelica, cap. 1.) vbi tradit, quæcunque dii ceu fatis definita prædicunt, ea ipsos stellarum motu ita esse futura significare; id quod maxime Apollo multis respõsis aperuit. In hisce autè oraculis & diuinationibus sæpè mentitum

M                      esse

*Porphyrius.*



esse Apollinem, idem auctor est Porphyrius; exquisitam enim futurorum cognitionem ait non hominibus modo, sed multis etiam deorum incomprehensibilem esse. unde interrogati mentiuntur nonnunquam, sed non sponte: solent enim præmonere, se tunc vera respondere non posse, homines tamen ex amentia perseverant urgere & cogere eos ut respondeant. Apollo igitur delphicus, cum eiusmodi esset cæli & continentis affectio ut verum prævidere non posset, retine, dicebat per Vatem, vim istam, & potentia verba hæc ne proferas; falsa enim dicam, si coges. Et in alio responso, Nihil hodie, inquit Apollo, stellarum mihi via dicendum præstat. Deinde, cōcludens Porphyrius ait, Manifestum iam fecimus unde falsitas ad deorum oracula subrepat. Hæc ex libro Porphyrij de Oraculis, in libro sexto de Præparatione Evangelica, cap. 4. Eusebius commemorat. Fuit etiam olim quidam Oenomaus, vir apud Græcos tam philosophia quam eloquentia nobilis, qui responsis delphici Apollinis sæpè delusus atque deceptus, diligenter & curiosè collegit quamplurima eius oracula, eaque ut vana, futilia & falsa cōfutavit, ut refert Eusebius lib. 5. de Præparatione Evangelica, cap. 10.

Oenomaus  
vehemens  
& disertus  
oraculorū  
Apollinis  
confutator.

§. 3. *Cur dæmones prædicendo futura sæpè fallant.*

QUATVOR porrò ob causas vsuvenit in prænuntiando futura falli dæmonem. Primò, quia nimis asseueranter affirmat quæ pendent ex libero arbitrio hominis, quod cum sit admodum



dum mutabile & ad omnia flexibile & planè liberum, nonnunquam extraordinaria quadam ratione operatur. Deinde, quod nos sæpè diuinitus incitati & adiuti Dei gratia, contra facimus quàm antea facere cogitabamus, & quàm nostro ingenio nostroq; arbitrato facturi eramus. Fit etiam interdum, vt quod dæmon agere constituerat & prædixerat, prohibente impediēte- quē Deo, non possit exequi. Denique, multa Deus solet aliquando præter communem ordinem naturæ, præterq; generalem suam & ordinariam prouidentiam agere. Atque his rebus crebro dæmon in errorem inducitur. Quis ergo credet, Astrologos prædicendis futuris rebus veraces esse, cum in eo vel dæmones falli sæpè contingat? Sed quid ego de dæmonibus loquor? Theologi docent, ne ipsos quidem spiritus cælestes ac beatas mentes quæ liquidò cernunt & clarissimè vident Deum, tenentq; perfectissimā cognitionem cælorum cunctarumque rerum naturalium, certò scire futura quæ nimirū pendent ex libero arbitrio; nisi earum rerum Deus singularem ipsis notitiam impertiat. Cuius autem amentix est, Astrologis tribuere quod nec Angelis nec beatis mentibus concessum est?

§. 4. *Non posse veritatem Christianæ religionis coherere cum veritate astrologiæ Indiciariæ.*

SED illa in primis fortis est argumentatio. Si *Egregiara* Christiana religio & disciplina vera est, vt est *no aduer-* profectò verissima, non potest esse vera, nec *sus Astro-* Christianis probari potest illa opinio Astrolo- *mantiam,*

M 2

gorum,



gorum, vt quam illa vanitatis, falſitatis & impie-  
tatis perſæpè damnauit: ſin autem falſa eſt do-  
ctrina Chriſtiana, cum ipſa totum ferè orbem  
complexa ſit, omnesq; propemodum gètes ſuo  
imperio ſubiecerit, & plus mille quingentos an-  
nos vigeat & regnet in mundo, ſi omnia quæ a-  
pud homines ſunt ex cœlo proueniunt ac pen-  
dent, neceſſe eſt tantam hominum ad fidẽ Chri-  
ſti accipiendam tuendamq; propenſionem tan-  
tumq; ſtudium, ex inſigni aliqua & præpotenti  
conſtellatione prouenire: quare cœlum incli-  
naret & induceret homines ad malum. Si enim  
fides Chriſti eſſet falſa, magis profectò eſſet falſa  
& deteſtabilis quàm alia quælibet ſectæ: ea nam-  
que docet de Deo & rebus diuinis, quæ ſi falſa  
ſunt, nefariam ſanè ſuperſtitionem & execran-  
dam impietatem contineant neceſſe eſt. At verò,  
cum vita quæ ad normam fidei Chriſtianæ agi-  
tur, ſit optima & inculpata, nec laude tātum ſed  
ſumma etiam admiratione digniſſima, hinc ne-  
ceſſariò efficeretur, ab eadem cōſtellatione pro-  
ficiſci bonum & malum: malum quidem, pro-  
pter falſitatem doctrinæ Chriſtianæ; bonum au-  
tem, propter vitæ quæ ad eius doctrinæ regulam  
informatur & dirigitur, probitatem atque præ-  
ſtantiam.

*Præclara  
argumen-  
tatio.*

Ad hæc, maxima probatio & confirmatio fi-  
dei noſtræ & clariſſimum diuinæ prouidentix  
argumentum illud eſt, quæcumque circa Chri-  
ſtum Dominum & eius Eccleſiam euenerunt, ea  
multis ante ſæculis fuiſſe per Prophetas, ad vnũ  
omnia propriè, diſtinctè, explicatèq; prædicta:  
ſi autem eiufmodi prædictio per Astrologiam  
fieri



fieri posset, rueret funditus & ad nihilum recideret firmissimum nostræ religionis fundamētum. Ne multa, istiusmodi Astrologorum doctrina veram Philosophiam moralem, nedum sacram Scripturam & Theologiam, quantum in ipsa est, planè peruertit. qui enim certum habet omnia pendere è cœlo, ob idq; cuncta hominum opera facta, casus & euenta ex cœli observatione præsentiri & prædici posse, huic quoque necessariò persuasum esse debet, materialem & mortalem esse animum nostrū, nullumq; esse liberum arbitrium, nec talem esse prouidentiam Dei qualem Fides nostra prædicat; mysteria item Christianæ religionis pendere è cœlo, cunctaq; miracula tam in veteri quàm in nouo Testamento edita, licet dicantur, vt re vera sunt, supernaturalia, ad cœlestes nihilominus causas & virtutes reuocari. Huic quoque opinionationi consequens est, neglectio & prætermissio bonorum operum, licentia omnium cupiditatum, quorumlibet flagitiorum excusatio, denique inutilitas atque crudelitas humanarum pariter atque diuinarum legum. Caietanus in Summula vbi agit de astrorum obseruatione, simillima docens eorum quæ diximus, verè magis & doctè quàm eleganter & ornate ita scribit, Astrorū obseruatio circa natiuitates hominum & occurrentia humana, tripliciter peccato subijci potest. Primo, si ea quæ fidei Christianæ mysteria sunt, tanquam subsint cœlestibus causis, habeantur: secundo, si futura cōtingentia querantur vel habeantur vt certa ex cœlestibus causis: tertio, si electiones suas quis subijciat cœlestibus

*Caietani  
breuis, sed  
vera et me-  
morabilis  
aduersus  
prædictio-  
nes astrolo-  
gorum sen-  
tentia.*



stibus causis tanquam legi illarum, ita vt vitam & actiones suas regulet secundum cœlos. Et quodlibet horum trium est ex suo genere peccatum mortale: quia primum est contra spiritualitatem Christianæ religionis, quæ super cœlos est, immutare potens etiam ipsos cœlorum cursus iuxta id quod scriptum est in Psal. 148. Confessio eius super cœlum & terram: & hoc experientia testata est. Secundum verò, est contra veritatem doctrinæ Christianæ & liberi arbitrij, quo domini sumus nostrorum operum. Tertium est contra dignitatem gratiæ, legis diuinæ, ac humanæ mentis qua super omnia corporalia sumus cōstituti. Et sicut erraremus subiiciendo nos passionibus iræ, odij, spei, timoris; ita quod haberemus impetus passionum pro lege: ita vilificamus nos, si inclinationes cœlorum pro lege habeamus: corpora enim sunt, & per modum passionum inclinant nos. Hæc Caecilianus.

In Actis autem Apostolorum cap. 19. refert Lucas, multos de his qui Ephesi concionibus & sermonibus B. Pauli conuersi erant ad Christum, & curiosa prius fuerant sectati, attulisse libros suos, & coram omnibus combussisse: fuisse autem eos libros de rebus ad iudiciariam Astrologiam pertinētibus, grauis auctor in Commentarijs super Psalmos dixit Augustinus; qui etiam Mathematicum quendam, hoc est, istam Astrologiam professum, postea pœnitentem professionis suæ, cupientemq; reconciliari Ecclesiæ, nisi publica & solenni pœnitentia præmissa, non recepit. verum sententiam Augustini, quod ea  
maxi-



maximè attingit id quod nunc agitur, totidem  
 verbis hic ascribam. Post enarrationem igitur  
 61. Psalmi, cum Mathematicus ille veniam pu-  
 blice petens coram sisteretur, hæc dixit Augu-  
 stinus: Iste ex Christiano & fidei pœnitens redit,  
 & territus potestate Domini conuertitur ad mi-  
 sericordiam Domini: seductus enim ab inimi-  
 co cum esset fidelis diu Mathematicus fuit, se-  
 ductus seducens, deceptus decipiens, illexit, se-  
 fellit, multa mendacia locutus est contra Deum  
 qui dedit hominibus potestatem faciendi quod  
 bonum est, & non faciendi quod malum est. Iste  
 dicebat quod adulterium non faciebat volun-  
 tas propria, sed Venus; & homicidium non fa-  
 ciebat voluntas propria, sed Mars: & iustū non  
 faciebat Deus, sed Iupiter: & alia multa sacrile-  
 ga non parua. Quàm multis eum putatis Chri-  
 stianis nummos abstulisse? Quàm multi ab illo  
 emerunt mendacium? quibus dicebamus, Filij  
 hominum vsquequo graui corde, vt quid dili-  
 gitis vanitatem & quæritis mendacium? Modo  
 sicut de illo credendum est, horruit mēdacium  
 & multorum hominum interitum: se aliquan-  
 do à diabolo sensit illectum, conuertitur ad  
 Deum pœnitens. Nostis in Actibus Apostolo-  
 rum esse scriptum, cap. 19. quia multi perdit, id  
 est, talium artium homines & doctrinarum ne-  
 fariarum sectatores, omnes codices suos ad A-  
 postolos attulerūt, & incensi sunt libri tam mul-  
 ti, vt pertineret ad scriptorem æstimationē eo-  
 rum facere, & summam pretij conscribere. Hoc  
 vtique propter gloriam Dei, ne tales etiam per-  
 diti desperarentur ab illo qui nouit quærere

*Notabilis  
 oratio quā  
 habuit Au-  
 gustinus in  
 reconcilia-  
 tione cu-  
 iusdā Ma-  
 thematicæ  
 cum Eccle-  
 sia.*

*Psal. 4.*

M 4

quod



quod perierat. Perierat ergo iste, nunc quæsitus, inuentus, adductus est: portat secum codices incendendos, per quos fuerat incendendus, ut illis in ignem missis, ipse in refrigerium transiret. Ante Pascha enim cœpit petere de Ecclesia Christi medicinam, sed quia talis est ars in qua exercitatus erat, quæ suspecta esset de mendacio atque fallacia, dilatus est ne tentaret, & aliquando tamen admissus est ne periculosius tentaretur. Hactenus Augustinus.

S. 5. *Quàm seuerè olim Ecclesia in istiusmodi Astrologos animaduertit.*

B. Epiphanius.

Origenis e-  
gregia con-  
tra Astro-  
logos dispu-  
tatio.

CERTE in primitiua Ecclesia istiusmodi astrologia nō secus quàm ars magica, reprobata, vetita & damnata erat. Narrat Epiphanius in libro de Mensuris & ponderibus, Aquilam Ponticum Scripturæ interpretem ob eam maximè causam fuisse à Patribus ex Ecclesia pulsum, quod natiuitatum obseruationibus ceterisque diuinationibus astrologicis studiose vacaret. Non est pro derelicto habendum, cum sit admodum memorabile, quod Origenem in Commentarijs super Genesim de ista astrologia prodidisse, libro 6. de Præparatione Euangelica, capite 9. tradit Eusebius. sic enim scripsisse illum ait: Non solum Gentiles stellarum coniunctione atque aspectu quæ in terris sunt, necessariò accidere credunt, quam vim Fatum appellant, verum etiam multi ex fidelibus conturbantur, impossibile aliter fieri credentes quàm stellarum cursus effecerit. vnde sequitur nullam in nobis esse libertatem, nullam operationem nostram laudari aut



ri aut vituperari iure posse; ita prædictum à Scripturis Dei iudicium quo alij ad æterna supplicia, alij ad æternam beatitudinem prædestinantur, falso fore prædicaretur. Quid plura? ipsa quoque fides & Saluatoris nostri aduentus, & omnis Prophetarum labor, ac Apostolorum in constituendis Ecclesijs prædicatio, inania erunt: nisi forte Christum quoque quis audeat dicere, cœlestium corporum vi coactum fecisse quæ fecit, passumq; fuisse quæ passus est, nec eius deitatis potentia sed stellarum virtute cuncta euenisse. his impijs verbis etiam illud conficitur, vt fideles Fato ducti in Christum credant: denique, vt vel nullum sit boni & mali discrimen, vel etiam malorum auctor sit Deus: nullusq; hominum propter bene vel male facta præmio aut pœna dignus censi debet, nec orationibus, votis, & Dei obsecrationibus locus aliquis relinquatur. Sic Origenes.

Eat igitur nunc Petrus de Aliaco, & istam Astrologiam amplexetur, exosculetur, præfractæ quæ defendat, atque obnixè conetur eam cum philosophia, quin etiã (si Deo placet) cum Theologia consociare atque coniugare; scilicet falsitatem cum veritate, tenebras cum luce, dæmonem cum Deo. qui nec veritus est scripto prodere, diluuium Noëticum, & ortum Christi Domini, aliaq; summa prodigia & miracula, etiam syderalis scientiæ peritia ex astorum obseruatione prænosci ac prædici potuisse.



M 5

S. De



§. 6. *De multis perspicuè falsis & impijs  
Astrologorum sententijs.*

SED quo manifestius appareat quàm sit impia & execranda istorum doctrina, ponam hic paucas quasdam eorum sententias & decreta, è quibus iudicium fiet de illius artis impietate. Quidam istorum, ex Marte in nona cœli regione feliciter constituto, tantum præstari nobis contendunt, vt ab obsessis corporibus sola præsentia dæmones expellamus. Alij iactant se hac arte, de eius qui nascitur conscientia arcanis & secretis sine errore iudicatu-ros. Vulgatum quoque apud illos est, duos esse planetas auctores felicitatis humanæ, Venerem quidem præsentis, Iouem autem post hanc vitâ futuræ. Maternus.

*Maternus.*

nus porro eiusmodi figmentorū & mendaciorū studiosissimus & curiosissimus, cum multa memoret quæ à Saturno cōstituto in Leone accidūt hominibus, subdit, eiusmodi homines longeuos fore, & post mortem animas eorum in cœlum dijs applicatas euolaturas. Saturnus enim, inquit, in Leone positus, animas eorum qui sic se habuerint in terra, innumeris angustijs liberatas, ad cœlum & originis suæ primordia reducet.

*Albumazar.*

Denique Albumazar scribit, qui Luna Ioui cōiuncta in capite Draconis, Deo supplicauerit, eum quicquid petierit à Deo, certissimè impetraturum: id quod Petrus Apponen- sis.

*Petrus Apponen- sis.*

scientiæ accessionem, sensisse. Hæc autem & alia

eorum



eorum similia, quàm sint nefaria, detestanda, & Christianæ religioni exitialia; quantumq; valeant ad eleuandam, vel potius delendam fidem eorum quæ diuina Scriptura docet immediatè, supernaturaliter, ac miraculose fieri à Deo, nemo est tam hebes ingenio & tardus intelligentia, vt non clarissime intelligat. Si quis autem hæc plenius atque subtilius scire auct, legat quæ in hanc sententiam cum alibi, tum lib. 2. cap. 5. & in lib. 5. cap. 11. & inde vsque ad finem eius libri, Picus Mirandulanus diligenter & copiose tractat.

### ASTROLOGIAM IVDICIARIAM

*Philosophia redargui & conuinci, primò quidem  
ea ratione, quod istiusmodi Astrologi cœ-  
lestium rerum sint imperi-  
rissimi.*

### C A P V T II.

**D**IVINATIONEM Astrologicam futilem esse nulloq; nixam fundamento, Philosophus quidem ad hunc modum argumentabitur, Astrologi nec certò sciunt omnes astrorum vires, defluxus, & effectus; nec si eas res scirent, satis id foret ad certam rerum futurarum præsentationem; ergo prædictiones astrologicas inanes & fallaces esse necesse est. Duo in hac argumentatione sunt posita, explicatius à nobis tractanda & confirmanda; alterum est, imperitos esse Astrologos rerū cœlestium; alterū verò est, vt essent illi peritissimi earum rerū, non ppter ea tamē posse eos futura omnia prænosse. de priori autem dicamus prius.

*Multiplex  
& praua-  
lida contra  
Astrologos  
ex Philo-  
phia argu-  
mentatio.*

§. 7. Astro-



§. 7. *Astrologos Iudiciarios efferrerum celestium imperitos.*

Esse igitur Iudiciarios Astrologos syderali doctrinæ ignaros, patet ex his quæ subijciam Principiò, valde arduum & operosum est, etiam quæ de cælo videntur minus difficilia magisq; nobis obuia, perfectè cognoscere: veluti quæ sit cæli natura, magnitudo, numerus orbium & inter eos ordo & differentia dignitatis, varietas motuum, denique astrorum numerus, eorumque inter se in magnitudine, luce, potestate & effectu comparatio. atque huius difficultatis facit clarissimum indicium tanta opinionum varietas, quantam esse his de rebus inter maximos Philosophos cernimus. Aristoteles certè Philosophorum omnium facilè princeps, ingenue fatetur se multarum rerum cœlestium non exquisitam scientiam, sed opinabilem & coniecturalem tantùm notitiam tenere: Et quia manifestis certisq; rationibus destituatur, cogi se non raro probabilibus duntaxat argumentis & coniecturis vti. Videre hæc licet apud ipsum Aristotelem in secundo libro de Cælo textu 17. 34. 60. & 61. hoc si est, quis credet, Astrologis, quos solis luce clarius est nulla re comparandos esse maximis illis philosophis, quod est in cælo abstrusissimum, & iudicio summorum Philosophorum mortalibus incomprehensibile, veritatem dico rerum omnium futurarum, esse liquidò cognitam exploratèq; perceptam? Deinde, rogemus istos Astrologos vt faciliores quasdam quæstiones de cælo nobis enodent: percuncte-



cunctemur ex ipsis, an cœlum sit natura quæ-  
 dam simplex, an composita ex materia & for-  
 ma; vtrum talis sit materia cœli qualis est rerum  
 omnium sublunarium, an omninò diuersa; sit-  
 nè cœlum animatum an inanimatum; num sua vi  
 & à se moueatur, an extrinsecus ab Angelo; vn-  
 de potissimum in cœlis æstimari & iudicari de-  
 beat dignitatis eorum præstantia; quid causæ sit  
 cur non omnes orbes vno motu circumagan-  
 tur, sed alij vno tantùm, alij pluribus, alij verò  
 paucioribus: aperiant nobis quam habeât pro-  
 priam vim & potentiam singulæ stellæ in ele-  
 menta, metalla, stirpes, atque animantes. hæc, in-  
 quam, & alia horum similia sciscitemur ex istis  
 Astrologis, profecto reperiemus ipsos doctrinæ  
 harum rerum planè rudes & prorsus expertes.  
 Quæ sit igitur credibile, planiora hæc & apertio-  
 ra ignorantibus, mortalium intelligentiæ remo-  
 tissima & occultissima, esse comperta & ex-  
 plorata? Postea, doceât nos isti defluxus & effe-  
 ctus qui nunc ex varijs astris dimanant ad di-  
 uersas & dissitas mundi regiones, sic enim for-  
 tasse credemus illis futuros syderum effectus  
 prænutiantibus. quis enim nescit procliuius &  
 propensius esse præsentia nosse quàm futura,  
 præsertim mutabilia & quæ variè possunt con-  
 tingere, ob idq; incerta? Exponant item nobis  
 occultas proprietates & vires quas habent res  
 sublunares, quas miramur magis quàm intelli-  
 gimus in multis lapidibus, herbis & animalibus;  
 hæc enim cum proxima sint atque nobis con-  
 iuncta & cunctis penè sensibus nostris subiecta,  
 & quæ quotidianis experimentis peruestigari &  
 explorari



explorari possunt; planiorem intelligentiam & faciliorem habent explicatum: cognitio verò rerum cœlestium maximi laboris & difficultatis est, cum tam longè distet à nobis cœlum, nec alio quàm vnico oculorum sensu mortalibus pateat: quem tamen sæpè falli cōtingit propter tantam interualli longinquitatem, vel summam vertiginis cœli velocitatem, vel prauam affectionem mediij aut visus, vel propter vitium astrolabij, tabularum & instrumentorum astronomicorum. Atque hoc etiam apud sacras literas in cap. 9. lib. Sapientix testatum legimus: *Corpus, inquit, quod corrumpitur aggrauat animā, & terrena inhabitatio deprimit sensum multa cogitantem. Et difficile astimamus quæ in terra sunt, & quæ in prospectu sunt inuenimus cum labore. quæ autem in cœlis sunt quis inuestigabit? Sensum autem tuum quis sciet, nisi tu dederis sapientiam, & miseris Spiritum sanctum tuum de altissimis? Extremum autem huius sententiæ, omninò redarguit Astrologos, qui humana omnia euenta quorum multa ex secretissimo Dei consilio & voluntate pendent, diuinare se posse profitentur.*

§. 8. *Aduersus fictitiam antiquitatem observationum quam iactant Astrologi.*

PRAETEREA, iactant Astrologi, habere se innumerabilium annorum observationes rerum euētis comprobatas, è quibus ars ipsorum collecta & confecta sit: nam cum in omni præteriti temporis spatio, penè innumerabiles res eodem modo euenirent, iisdem signis antegressis;



his; ars est effecta eadem sapè animaduertendo  
 atque notando: quare Chaldaeos ferunt qua-  
 dringenta septuaginta millia annorum, monu-  
 mentis huiusmodi obseruationum astrologica-  
 rum comprehensa habuisse. Verùm, hoc quàm  
 sit commentitium & improbabile, vel ex eo li-  
 quet quod Astrologi non potuerunt eiusmodi  
 obseruationes & experientias, non dico millies  
 vt ipsi iactitant, sed ne ter quidem bisue collige-  
 re & comparare potuerunt. nam cœli facies, &  
 omnium signorum cœlestium positura quæ se-  
 mel fuit, eadem omnino vel nunquam, vel non  
 nisi post immensa annorum spatia redire potest:  
 quippe octauus orbis in quo sunt inerrâtes stel-  
 læ, non ante sex & triginta annorum millia cir-  
 cuitum suum absoluit. quin doctissimi quidam  
 Mathematici, optimis rationibus probarunt,  
 motus cœli esse inter se incommensurabiles, ob  
 idq; eandem cœli faciem, eundemq; stellarum  
 positum sapius euenire non posse.

Hanc rationem Phauorinus philosophus a- *Phauori-*  
 pud Gellium lib. 14. cap. 1. paulò enucleatius, *nus contra*  
 certè luculentius & elegantius tractat his ver- *Astrologos.*  
 bis, Si Chaldaeorum isto modo cœpta fieri ob-  
 seruatio est, vt animaduerneretur quo habitu,  
 qua forma, quaque positura stellarum aliquis  
 nasceretur: tum deinceps ab ineunte vita, for-  
 tuna eius & mores & ingenium & circumstan-  
 tia rerum negotiorumq; & ad postremum  
 finis etiam vitæ spectaretur; eaquæ omnia, vt  
 vsu venerant, literis mandarentur: ac postea  
 longis temporibus, cum ipsæ illæ eodem in lo-  
 co eodemque habitu forent, eadem ceteris  
 quoque



quoque euentura existimarentur qui eodem illo tempore nati fuissent: Si isto, inquit, modo obseruari coeptum est, ex eaque obseruatione composita quædam disciplina est, nullo id pacto potest procedere. dicant enim quot tandem annis, vel potius quot sæculis orbis hic obseruationis perfici quiuerit. Constare quippe inter Astrologos dicebat, stellas istas quas erraticas dicerent, quæ esse omnium rerum fatales dicerentur, infinito propè & innumerabili numero annorum ad eundem locum, cum eodem habitu simul omnes vnde profectæ sunt, regredi; vt neque vllus obseruationis tenor, neque memoria vlla, neque effigies literarum tanto æuo potuerint edurare. sic Phauorinus. Adhæc, licet Astrologi cognoscere possent singulares vires & defluxus cuiuslibet astri separatim, tamè quam vim habeant sydera, cum defluxus diuersorum astrorum vnà coeunt & permiscuntur, vel in cælo vel in aëre vel in terra vel etiam cum causis sublunaribus earumque actionibus; ab ipsis nequaquã sciri potest. Audiat lector Origenem, cuius ex Commentarijs super Genesim, hanc Eusebius extremo lib. 6. de Præparatione Euangelica citat sententiam: Quæ autem, inquit, commistione, compositione, ac temperie diuersorum aspectuū fieri asserunt, profecto concedent nullo modo sciri posse. Quomodo enim quantum diminuatur de læsione maligni aspectus propter aspectum benigni syderis percipies? & vtrum auferat malignus quod à benigno conceditur, quoniam locum eius aspexit; aut mutet, aut imminuat, aut mistura quædam

*Origenes.*



dam inde fiat, quis percipiet? quæ omnia si quis altius inspiciat, facile credat non posse ista humano ingenio penitus percipi. Vnde si quis harum rerum periculum fecerit, videbit in pluribus errare, quàm veritatem consequi Genethliacos. Quamobrem Esaias etiam quasi hæc omnibus impossibilia sint, ad filiam Chaldæorū qui maxime ista profitentur ait, *Adfint & sal-* *Esaiæ 47.*  
*nam te faciant Astrologi, cæli Augures annuncient tibi quid euenturum sit.* His enim verbis docemur, vel diligentissimos in hac re Chaldeos, non posse prædicere quæ velit vnicuique genti Deus attribuere. Hactenus Origenes.

His accedit, multas esse stellas quæ vel non clarè cernuntur, vel etiam nullatenus cernuntur: earum verò quæ cernuntur, paucas sibi esse cognititas, permultas verò necdum exploratas latentur Astrologi. qua ratione igitur ex paucis astris quorum vires norunt tam confidenter prænunciant futura, cum per aliorum syderum quæ nesciunt influxus, notorum sibi syderum effectus, aut impediri aut variari possint? nisi fortè astrorum quæ latent ipsos nullas esse vires nullosque defluxus, impudenter & absurdè mentiantur. Certè constat inter Astrologos numerari in octauo cælo mille præterque viginti duas stellas, quarum cum quælibet maior sit terra, necesse est ingentem esse earum vim & potentiam. huiusmodi stellarum, vel nullam vel per exiguam notitiâ habent Astrologi, quippe cum ars eorum iudiciaria ferè cōstet ex planetarum observationibus, in quibus tota propemodum

N

vera



versatur & consumitur. Vidit hoc, quæ erat perspicacia ingenij Seneca, & in libro 2. Natural. quæstionum, cap. 32. eleganter exposuit, Quid est aliud, inquit, quod errorem incutiat peritis natalium, quàm quod paucis nos syderibus assignant; cum omnia quæ supra nos sunt, partem sibi nostri vendicent? Submissiora forsitan in nos propius vim suam dirigunt, & ea quæ frequentius mota, aliter nos, aliter cætera animalia prospiciunt. ceterum, & illa quæ aut immota sunt, aut propter velocitatem vniuerso mundo parem, immotis similia, non extra ius dominiūq; nostri sunt. Hæc Seneca.

9. *De noua stella, quæ superioribus annis visa est.*

SVPERIORIBVS annis vidimus stellâ nouam ante illud tempus nūquam in cœlo visam, & iudicio Astrologorum in eodem loco vbi stellæ fixæ lucent positam: hæc cum ad aliquod tempus conspicua fuisset, repente tota ex aspectu nostro discessit & prorsus euauit. hanc stellam necesse est vel in cœlo esse generatam & postea corruptam, idemque in alijs sæpius euenire, longis tamen temporum interuallis verisimile est: vel esse supra septem planetas alia sydera errantia quæ proprios quidem meatus, sed nobis tamen ignotos habeant: vel denique quas nos in octauo orbe stellas inerrantes & infixas putamus, eas quoque proprios circuitus & motus agere. de quo addubitasse olim Hipparchum nobilissimum in astrologia virum, locuples auctor & testis est Plinius in cap. 26. lib. 2. Hipparchus,

*Hipparchus.*



parchus, inquit, nunquam satis laudatus nouam stellam, & aliam in æuo suo genitam deprehendit: eiusque motu qua die fulsit, ad dubitationem est adductus, anne hoc sæpius fieret, mouerenturq; & ex quas putamus affixas. Quid quod permagni ad artem suam referre censent Astrologi, conuenientiam & discrepantiam quæ est inter duos Zodiacos, alterum octauum alterum noni cœli, exploratam habere? quæ tamen ipsis nota esse non potest: quippe cum nonum cœlum omni stella luceq; careat, nec aliud de ipso quam motus, isque ex motu octauum cœli deprehendi possit. Latet etiam Astrologos quemadmodum isti duo Zodiaci se habuerint in exordio mundi, quod tempus ab origine mundi ad hanc diem exactum, certo teneri nequeat: nam ut annorum eius temporis ratio aliqua iniri & numerus colligi possit, dierum tamen & horarum non potest: quorum tamen subtilis & certa computatio, isti doctrinæ Astrologicæ opus est.

*Duplex Zodiacus apud Astrologos.*

10. *Quàm difficile sit, aspectum syderum qui in cuiusque hominum ortu viget annotare.*

IAM verò vix potest sine errore vllò notari & cognosci positus astrorum qui est in eo momento quo quisque nascitur. Etenim difficillimū est vel punctum temporis in quo quispiam oritur, vel in eo ipso puncto aspectum syderum omnium qui tunc viget, obseruare: sæpè namque cœli & stellarum aspectum, nubila & crassorum vaporum interpositus, vel adimunt nobis,

N 2

vel



vel interturbant & infuscant; & quod caput est rapidissima cœli vertigo facit vt constellatio prius transuolet, quàm à nobis propriè annotetur: quippe per singula ferè momenta, alia & alia cœli facies, & identidem diuersa astrorū positura existit. Profitentur isti Astrologi se cuiusvis hominis euenta omnia prænunciare posse, dummodo sibi ortus eius certum tempus pernotescat: at eiusmodi tempus subtiliter & propriè, ita nimirum vt opus esset Astrologo, ferè nescitur. Nam vt dicatur, exempli causa, Petrum esse natum vigesimo ab hinc anno, die Septembris vltimo, hora noctis decima, vel ineunte vel media vel iam exeunte; at momentum illud, vel potius minimum illud tempus quo Petrus aluo matris fusus & in lucem editus est, nec obstetrix, nec parentes seu cognati, subtilissimè annotatum & perspectum habent: qua tamen temporis illius subtilissima obseruatione & cognitione, ad diuinandum eget Astrologus.

*B. Basilij  
argumen-  
tatio con-  
tra Astro-  
logos.*

*1. Corin. 13.*

Non possum facere, vt ad scribere hoc loco prætermittā verba Basilij quibus ipsa hæc ratio quam nos strictim attigimus, latius ab eo explicatur & acrius vrgetur. Sic enim ille homil. 6. super Genesim scriptum reliquit, Genethliacæ artis inuentores, cum in temporis amplo spatio complures figuras suam ipsorum scientiam fugere percepissent, in angustum admodum temporis contraxere mēsuras, vt minutissimo quoque & subitaneo articulo, quale est quod Apostolus dicit: *In momento temporis, in ictu oculi, plurimum differētiae sit inter natiuitatem & natiuitatem. Vt is quidem qui hoc in momento*  
genitus



genitus est, futurus sit Rex ciuitatum, populo-  
rumq; princeps, locupletissimus, præpotens: Is  
autem qui natus est temporis sequentis monē-  
tis, pauper quidam sit futurus, aut medicus cir-  
culator, vel præstigiator, ex ostijs ostia permu-  
tans quotidiani consequendi causa victus.  
quamobrē eo orbe qui signifer appellatur duo-  
decim in partes diuiso, cum in triginta dierum  
spatio partem Sol eius globi transeat duodeci-  
mam quem inerrantem appellant, triginta in  
portiones singulas illas duodecim partes secue-  
runt. tum singulis portionibus illis in sexaginta  
minuta diuisis, minuta hæc singula rursus in a-  
lia sexaginta modo simili diuisere. Posito igitur  
confinu eorum qui in lucem eduntur, videamus,  
obsecro, si hanc exactissimam temporis diuisio-  
nem Auctores hi sibi valeant conseruare. Nam  
simul atque editus pusio est, mas an femella sit,  
obstetrix explorat: tum vagitum expectat in-  
fantis, nimirum indicium vitæ eius qui natus  
recens est. Quot hoc tempore vis sexagesima  
præterisse minuta? Dicit obstetrix deinde Chal-  
dæo partum qui editus est: quot minutissima  
momenta vis interea dum obstetrix loquitur  
prætercurrisse? præsertim si fortè fortuna fue-  
rit non in conclauī mulierum Chaldæus ille  
præsens, sed in ædium atrio, aut vestibulo, tem-  
pus horamq; reponens. Et cum cum qui defini-  
tus est diligenter tempus ac horam, explora-  
toria nimirum horarum percipere oporteat in-  
strumenta, siue diurna sint siue nocturna: quot  
minutorum hoc quoque tempore, quæso, præ-  
teruolat præteritq; examen? Compertam enim



cam esse stellam qua tempus horaq; sit exploranda, non solum quanta in parte sit duodecima, sed etiam quàm iuxta duodecimæ portionem partis, in quotoque minuto sexagesimæ eorum, in quæ subdivisa sunt singula sexagesima illa prima, necesse est. Atque hanc tamen adeo tenuem subtilemq; temporis inuentionem, quam attingere nequeunt, singulis in stellis errantibus faciendam esse necessariò dicunt, vt qualem ad cælo adfixas stellas ipsæ dispositionem habitudinemue haberent, qualisq; ipsarum esset inter sese, figura, cum in lucem ederetur foetus, compertum sit tandem ac exploratum. Quæ cum ita sint, si fieri non potest vt tempus illud exactissimè quisquam attingat, variatione quæ vel breuissimi temporis sit vt tota via penitus aberretur; deridendi profectò non mediocriter esse videntur, tam ij qui studio huius indulserunt artis quam in ratione rerû nusquam esse constat, quàm illi qui hiantes ab illorum ore pendent intenti: perinde quasi omnia illi scire possint quæ ipsis sunt euentura. Hactenus sunt quæ Basilii eo loco aduersus Astrologos disputat.

ETIAM SI ASTROLOGI SVMMAM  
rerum cælestium cognitionem tenerent, non  
posse tamen eos futura diuinare, probatur octo rationibus.

### C A P V T III.

SED concedamus Astrologis quod ipsi falso  
& impudenter sibi arrogant, perfectam videli-



delicet astrorum & cœli scientiam: hanc ipsam nunc contendo non posse certam futurarum rerum prænotationem & diuinationem efficere; idq; multis & validis rationibus confirmo.

II. *Octo rationes, quibus probatur ex cognitione astrorum etiam perfectæ, non posse diuinari omnia quæ futura sunt.*

PRIMA RATIO. Vera est & trita est in scho- Prima ratio.  
 tis illa Philosophorum sententia, Sicut res se ha-  
 bet ad esse, ita quoque se habet ad cognitionem;  
 hoc est, propter quas causas quæque res fit & est,  
 per eas cognosci debet, si quidem perfectam e-  
 ius rei scientiam adipisci volumus. ad genera-  
 tionem autem futurorum effectuum particula-  
 rium, non modo concurret cœlum sed etiam  
 causa particularis: est enim cœlū causa vniuer-  
 salis, quo fit vt eius vis & efficientia sit etiam v-  
 niuersalis & indeterminata ad producendum  
 quoslibet effectus particulares: determinatur  
 autem vis cœli per causas particulares. quam-  
 obrem verissimum est illud quod dixit Aristo-  
 teles, Sol & homo generant hominē. quin effe-  
 ctus particulares, licet quod attinet ad eorum  
 effectiōem & conseruationem, maximè pen-  
 deant ex causis vniuersalibus; tamen quod per-  
 tinet ad propriam cuiusque eorum naturam &  
 ad naturales proprietates, tam specificas quàm  
 indiuiduales, magis particularem causam  
 quàm vniuersalem æmulantur  
 atque imitantur.



12. *Præter causas cœlestes, necessariam esse notitiam causarum particularium ad prænosceudos earum effectus.*

*Sicut ad generationem rerum futurarum non tantum concurrunt cœli sed etiam causa particularis, ita ad certam eandem rerum prænotationem, non solius cœli notitiam satis esse posse.*

*B. August.*

Cum igitur præter causas cœlestes, ad produceudos effectus futuros opus sit etiam causa particulari efficiente, & materia idoneè præparata, quorum si desit alterutrum, prorsus nullus futurus est effectus, ex his necessariò concluditur, ad prænotationem futurorū effectuum, cœlestium causarum notitiam non esse satis. Atque hoc etiam quotidianis & manifestis experimentis constat. cernimus enim agricolas eodem tempore & sub eodem syderum aspectu varia seminum genera in terram iacere, ex quibus tantum diuersa nascuntur: quæ sanè diuersitas non ad causas cœlestes, sed ad diuersas tantum species & vires seminum referri potest, Ad hanc eandem sententiam, in libro secundo de Genesi ad literam, cap. 17. ita scribit Augustinus: Cum multa corpora diuersorum generum, vel animalium, vel herbarum & arbuistorum, vno simul puncto temporis seminentur, vnoque puncto temporis innumerabiliter multa nascantur, non tantum diuersis sed etiam iisdem terrarum locis, tantæ sunt varietates in progressibus, in actibus, & passionibus eorum, vt verè isti (sicut dicitur) perdant fidera, si ista considerent. Quid autem insulsius & hebetius, quàm cum istis rebus conuincuntur, dicere ad solos homines sibi subiiciendos fatalem stellarum pertinere rationem? sic Augustinus: cuius extremum dictum paulo vberius tractat apud Gellium libro 14. capite



Capite 1. Phauorinus: Si vitæ, inquit, mortisque hominum rerumque humanarum omnium tempus, & ratio, & causa in cœlo & apud stellas foret; quid de muscis aut vermiculis aut echinis, multisque alijs minutissimis terræ marisque animantibus dicerent? an ista quoque iisdem, quibus homines legibus nascerentur, iisdemque itidem extinguerentur? ut aut ranunculis quoque & culicibus nascendi Fata sint de cœlestium syderum motibus attributa; aut si id non putarent, nulla ratio videretur cur ea syderum vis in hominibus valeret, si deficeret in ceteris.

13. *De simili ortu & dissimilibus euentis Geminorum.*

SECUNDA RATIO. Si vera esset istiusmodi *Secunda ratio.*  
Astrologorum doctrina, necesse esset Geminos qui vno tempore concepti & nati sunt, simillimos omnino fore: quod falsum esse, satis perspicuum est. nam ut ceteram eorum dissimilitudinem taceam, euenit nonnunquam ut alter sit mas, alter verò femina. Cicero quidem in altero libro de Diuinatione; Proclum & Euristhenem reges Lacedæmoniorum fratresque geminos commemorat, quorum tamen & exitus vitæ dissimilis, & gloria rerum gestarum dispar fuit. Verum, in sacris literis luculentissimum eius rei habemus exemplum: Iacob enim & Esau eodē concubitu, ut inquit Paulus Rom. 9. sati eodemque tempore nati, dissimillimis tamen ingenijs, studijs, moribus, & euentis fuerunt. Nec verò firmum est illud præsidium in  
N 5 quod



*Similitudo  
Nigidij Fi-  
guli.*

*B. Grego-  
rius homil.  
10. super  
Euangel.*

*Augusti-  
nus.*

quod refugiant Astrologi, cum hoc argumento  
vrgentur; videlicet breuissimam illam moram  
quæ inter Geminorum ortus intercedit, licet ea  
nobis perexigua videatur, in cœlo tamen, ob e-  
ius vastitatem & rapidissimam conuersionem,  
esse admodum insignem magnamq; facere va-  
riationem. Hoc Nigidius Figulus declarabat  
exemplo rotæ, quam incitatissimè contortam,  
cum bis eodem loco signare atramento vel per-  
cutere summa celeritate conatus esset, cessante  
ipsius rotæ circumactione, reperta sunt duo illa  
loca ab ipso percussa vel signata, haud paruo in-  
ter se interuallo disiuncta. Hoc, inquam, præ-  
sidium & refugium infirmum est, parumquæ  
tutum Astrologis. Etenim, licet in ortu Gemi-  
norum aliqua fuerit mora, in eorum tamè con-  
ceptu prorsus nulla fuit. Deinde, si tam breui  
variatur ratio constellationis sub qua quisque  
nascitur, erit profecto proprium tempus ortus  
cuiuslibet, Astrologis incomprehensibile. De-  
nique, valebit hoc loco aduersus Astrologos ar-  
gumentatio illa beati Gregorij: Si propterea Ia-  
cob & Esau non censentur nati sub eadem con-  
stellatione, quod non simul nati sunt, sed vnus  
post alterum; ob eandem profecto causam iu-  
dicandum erit, nullum hominum sub eadem  
constellatione totum nasci. non enim totus si-  
mul ex vtero pcedit, sed particulatim & mem-  
bratim: primò enim effert caput, tum collum,  
deinde pectus, postremò pedes. Iacob enim  
proximè natus est post Esau manu plantam pe-  
dis eius tenens, perinde quasi, sicut inquit Au-  
gustinus libro secundo de Genesi ad literam, ca-  
pite



pite 17. vnus infans instar duorum vel duplo longior nasceretur.

Verum, hanc rationem admodum disertè *Phauorin*  
*Phauorinus* aduersus Chaldaeos disputans, ex- *nus apud*  
 quutus est. Atque id velim etiam, inquit, vt re- *Aulū Gell.*  
 spondeant, si tam paruum atque rapidum est *lib. 14. cap.*  
 momentum temporis in quo homo nascens Fa- *1.*  
 tum accipit, vt in eodem illo puncto sub illo cir-  
 culo cœli, plures simul ad eandē competentiam  
 nasci non queant: & si idcirco Gemini quoque  
 non eadem vitæ sorte sunt, quoniam non eo-  
 dem temporis puncto editi sunt: peto, inquit,  
 respondeant, cursum illum temporis transuo-  
 lantis qui vix cogitatione animi comprehendi  
 potest, quonam pacto aut consulto assequi que-  
 ant, aut ipsi perspicere & deprehendere; cum in  
 tam præcipiti dierū noctiumq; vertigine, mini-  
 ma momēta ingentes facere dicant mutationes?  
 Sic Phauorinus. Ipsum hoc argumētum de Ge-  
 minis diligenter & subtiliter pertractat August.  
 lib. 5. de Ciuit. Dei primis aliquot capitibus; atq; *Augusti-*  
 in 2. lib. de Doctrina christiana, cap. 22. & verò, *nis.*  
 maximū faceſsit negotiū Astrologis: si enim tam  
 breui temporis momēto mutantur omnia, vt nō  
 diuersa modo, sed etiā aduersa plerunq; eueni-  
 ant, quis de nato puero possit quicquā certi præ-  
 dicere, cum illud temporis punctū quo vel con-  
 ceptus vel natus est, ita vti est, nemini possit esse  
 cognitum? Itaque, vt magna in homines vi &  
 potestate pollerent astra, quid ea tamen in sin-  
 gulorum hominum generatione & ortu effice-  
 rent, in compertum esset nobis: quippe cum a-  
 spectus cœli & positus astrorum qui est tempo-  
 re quo



re quo quisque nascitur, certo deprehendi nequeat: incitatissimus enim cœli & astrorum motus, tarditatem nostræ considerationis & observationis præteruolat & anteuertit.

*Tertia ratio.*

TERTIA RATIO. Missos nunc facio Geminos, quorum interruptus partus aliquam præbuit latebram Astrologis. consideremus in præsentia quamplurimos prorsus eodem tempore, & in eadem regione, eodemque syderum aspectu & positura, ex diuersis tamen parentibus progeneratos: de illis non potest Astrologus ex obseruatione syderum, nō eadem euenta prænunciare; cum simul concepti & natī fuerint, & sub eadem constellatione. At longè secus esse, quotidiana demonstrat experientia, quam multi enim toto orbe simul & generantur in vtero, & in lucem eduntur, quorum deinde maxima est ingeniorum, studiorum, morum, religionis, casuum, denique vitæ ac mortis euentorum dissimilitudo? Omnium Romanorum qui Cannensi pugna quamplurimi cæsi sunt ab Annibale, idem fuit vitæ exitus & interitus: quis autem existimet, eodem illos omnes stellarum aspectu, posituq; fuisse natos? Idem dico de tot millibus Turcarum qui nauali pugna ab hinc octo & decem annos, memorabili ad immortalitatem victoria, à Christiana classe profligati, & internecione deleti sunt: quorum omnium eandem fuisse rationem ortus, eandemq; in generatione eorum viguisse cœli constellationem, stultum est dicere. An quo tempore natus est Homerus, Hippocrates, Aristoteles, & Alexander Magnus, non eodem quoque alios



alios complures natos esse putabimus? at quis,  
 illorum similis adhuc extitit? Phauorinus sic  
 argumentationē hanc contexebat, Quam mul-  
 ti homines vtriusque sexus, omnium ætatum,  
 diuersis stellarum motibus in vitam editi, re-  
 gionibus sub quibus geniti sunt longè distanti-  
 bus, omnes tamen isti, aut hiantibus terris, aut  
 abentibus testis, aut oppidorum expugnatio-  
 nibus, aut eadem in naui fluctu obruti, eodem-  
 que genere mortis, eodemque ictu temporis  
 intereunt? Quod scilicet nunquam eueniret, si  
 momenta nascendi singulis attributa, suas v-  
 numquodque leges haberent. Quod si quædam  
 in hominum morte atque vita etiam diuersis  
 temporibus editorum, per stellarū pares quos-  
 dam postea conuentus, paria nōnulla & confi-  
 nilia posse dicuntur obtingere; cur non aliquā-  
 do possint omnia quoque paria vsu venire, vt  
 existant per huiuscemodi stellarum concursio-  
 nes & similitudines, Socrates simul & Antisthe-  
 nes, & Platones multi, genere, forma, ingenio,  
 moribus, vita omni & morte pari? quod ne-  
 quaquam, inquit, prorsus fieri potest. Non igi-  
 tur hac causa Chaldæi probè vti queunt aduer-  
 sus hominum impares ortus, interitus pares.  
 Hæc Phauorinus.

*Phauorinus apud  
 Aulū Gellū  
 lib. 14.  
 cap. 1.*

14. *Pulcherrima disputatio Bardefanis ad-  
 uersus Astrologos.*

QUARTA RATIO. Bardefanes Syrus in *Quarta*  
 doctrina rerum cœlestium excellenter versatus, 110.  
 in eo dialogo, quem rogatu amicorum de Fato  
 & aduersus Chaldæos conscripsit, futilissimas  
 esse



esse Astrologorum obseruationes, & rarè non  
ementientes eorum prædictiones, ad hunc ferè  
modum (vt memorat Eusebius lib. 6. de Præpa-  
ratione Euangelica, cap. 8.) demonstrabat: A-  
pud Seras lex est prohibens occidere, fornicari,  
& adorare simulachra: vnde in illa regione nul-  
lum templum conspicitur, nulla mulier mere-  
trix, nulla adultera, nemo fur, nemo homicida:  
nec voluntatem alicuius illorum ardentissima  
stella Martis in medio cœli constituta ad cædem  
hominis coëgit; nec Venus Marti coniuncta vt  
alienam quispiam sollicitaret vxorem potuit ef-  
ficere. Atqui, singulis etiam apud eos diebus  
in medium cœli Martem peruenire necesse est,  
& in tanta regione singulis horis nasci homines  
non est negandum. Apud Indos autem & Ba-  
ctros, multa millia hominū sunt qui Brachma-  
nes appellātur: hi tam traditione Patrum quàm  
legibus nec simulachra colunt, nec animatum  
aliquid comedunt, vinum aut ceruissiam nun-  
quam bibunt, ab omni demum malignitate ab-  
sunt, soli Deo attendentes. At verò, ceteri om-  
nes Indi in eadem ipsa regione adulterijs, cæde,  
remulencia, simulachrorum cultu inuoluun-  
tur; inueniūturq; ibi nonnulli, immo verò gens  
quædam Indorum est in eodem climate habi-  
tans, qui homines venantes atque sacrificantes  
deuorant: nec vlli planetarum quos felices ac  
bonos appellant, à cæde ac sceleribus istis eos  
prohibent: nec maligni, Brachmanas pellere ad  
malefaciendum potuerunt. Apud Persas lex e-  
rat, filias, sorores, matres quoque ipsas in ma-  
trimonium ducere; nec in Perside solum, ve-  
rum-



rum etiam quicumque Persarum ad alia climata  
 orbis è patria exiuerunt, nefanda hæc diligen-  
 ter matrimonia celebrarunt: quos, aliæ gentes  
 hoc scelus abominatæ, Magusæos appellant.  
 Suntq; vsque ad hodiernum diem in media Æ-  
 gypto, Phrygia, Galatiaq; plurimi Magusæi suc-  
 cessione patrum, eisdem sceleribus contamina-  
 ti. Nec dicere possumus in terminis & domo  
 Saturni, cum Saturno ipso in natiuitatibus om-  
 nium, Marte aspiciente Venerem fuisse. Ama-  
 zones viros non habent, sed tempore veris fi-  
 nes suos egredientes cum vicinis conueniunt.  
 Vnde omnes naturali lege eodem tempore pa-  
 riunt, masculisq; interfectis solas feminas alunt,  
 bellicosæque omnes similiter sunt, magnam  
 exercitationis bellicæ curam gerentes. Stultum  
 autem est opinari, omnes istiusmodi scēminas  
 prorsus iisdem natalitijs astris esse genitas. Fit  
 hoc confirmatius argumento exemploque Iu-  
 dæorum, qui vbiicumque terrarum & gentium  
 sint nati aut versentur, inuiolabili obseruatione  
 & infantes suos octauo die circumcidunt, & om-  
 nem diem sabbathi feriatum festumque reli-  
 giosissimè agunt. Non sunt autem Iudæi om-  
 nes sub eadem constellatione procreati, nec eos  
 à patrijs legibus & institutis vlla vis & potentia  
 cœlestium corporū abstrahere potest. Sed quid  
 dicemus de Christianis? qui innumerabiles to-  
 to orbe sparsi, idem vitæ genus atque doctrinæ  
 custodiunt, nec à disciplina quam ipsis Christus  
 Dominus tradidit, vel promissis vllis, vel minis  
 aut supplicijs vel latum vnguem amoueri pos-  
 sunt, an dicturi sunt, Christianos omnes eodem  
 astro



astro esse natos? Sed illud maximum est argumentum, qui ante susceptam Christi disciplinam patrias leges & instituta studiosissime acerrimequē tenebant, eos postea factos Christianos, illis desertis abiectisq; longē diuersam vitam agere, diuersos mores induere, & diuersissimam religionem & doctrinam colere. Itaque nec multas Parthi Christiani ducunt vxores, nec Medici canibus mortuos obijciunt, nec Indi mortuos suos cremant, nec Persæ cum sororibus aut cum filiabus nefario matrimonio miscentur, nec Ægyptij Apin, aut canem, aut hircum, aut felem colunt; sed vbicumque sunt, eisdem legibus, moribus & institutis viuunt. Quid plura? singulis horis apud omnes gentes homines nascuntur: vbique autem leges atque mores propter liberam hominis potestatem præualere videmus. Nec natalitia sydera nolentes. Seras ad homicidium compellunt, aut Brachmanas ad esum carniū; nec Persas à sceleratis nuptijs remouent; nec Medos prohibent vita defunctos canibus exponere; nec Parthos multas ducere vxores. Singulæ namque gentes, vt volunt & quando volunt, libertate sua vtuntur, legibus, moribusq; obediētes. Haftenus sunt quæ ex disputatione Bardeſanis aduersus Astrologos commemoranda hoc loco censuimus.

*Quintara-  
tio.*

QVINTA RATIO. Stante libero arbitrio hominis & immortalitate animi nostri, ars ista nullo modo stare potest: Si autem ea stet, illa funditus corruere necesse est. quo intelligere licet qualis istiusmodi ars existimanda sit, quæ  
nisi



nisi pessundata & obtrita, sublataq; nostrorum animorum libertate atque immortalitate, nihil progredi, nec vlllo modo consistere queat. Quod autem, si animus noster immortalis & in agendo liber sit, diuination astrologica nulla esse possit, his argumentis concluditur. Primò, Astrologi profitentur se futuras hominum actiones euentaque, ex suæ artis obseruationibus præsentire & prænuntiare posse. hoc autem falsum est; futura enim quæ ex libera hominis voluntate proficisci debent, nullo modo possunt esse nota Astrologis. nam vel cognoscerent futura in se ipsis, quod fieri non potest, quippe, quæ futura sunt, nondum per se actu sunt; quod autem non est, prout non est, non intelligitur, sed prout aliquò modo est, nimirum potestate in suis causis. Nec prænosci queunt futura in ipsorum causis quæ tres sunt, Deus, cœlum, voluntas humana, quæ autem ex Dei proposito, consilio & absoluta voluntate euentura sunt, ea nulli mortalium vel ex cœlo, vel alia quacunque ratione, nisi cui Deus ea voluerit aperire, cognita esse possunt. *Quis enim, inquit Scriptura, cognouit sensum Domini? aut quis consiliarius eius fuit?* *Rom. II. & Isaiæ 40.* & vt scriptum est in 9. capite libri Sapientiæ: *Quæ in prospectu sunt, inuenimus cum labore: quæ autem in cœlis sunt, quis inuestigabit? sensum autem tuum quis sciet, nisi tu dederis sapientiam, & miseris Spiritum sanctum tuum de altissimis?* Ex cœlo autem, futura quæ pendent ex voluntate hominis non possunt cognosci; tum quia cœlum est cau-

Q

sa vni-



sa vniuersalis, quare futuri effectus particula-  
res non nisi vniuersaliter & indeterminatè in  
cœlo contineri & cognosci possunt: tum etiam  
quia cœlum est causa corporalis & materialis,  
quare animus noster qui per se incorporeus &  
expers materiæ est liberquæ in agendo, cœli ef-  
ficientiæ ac operationi directè & necessariò mi-  
nime subiacebit. Voluntas porro humana quæ  
est proxima causa humanarum actionum, re-  
spectu futurorum quæ ex ipsa proficisci debent,  
per se indifferens & indeterminata est: multa  
enim acturi sumus, de quibus nihil dum cogita-  
uimus, nedum deliberauimus: quomodo igitur  
causa indeterminata & indifferens potest de-  
finitam certamquæ futuri effectus cognitionem  
parere? Confirmatur hoc: exteriores actiones  
hominis pendent ex interioribus, ex delibera-  
tione dico & electione: non potest igitur futu-  
ra hominis actio exterior prænosci, nisi cogni-  
ta sit futuræ voluntatis electio vnde illa profici-  
sci debet: at futura hominis electio non potest  
alteri homini esse cognita; si enim propositum  
animi & deliberationem quam quis in præsens  
habet mente conceptam, nemo alius scire po-  
test, quanto minus scire poterit consilium, pro-  
positum, & voluntatem alterius hominis, quæ  
multos post annos futura est?

15. *Vtrum sit facilius, diuinare quid fa-  
cturus sit vir bonus, an vir improbus.*

DEINDE, aut consideratur homo vt viuunt &  
opera-



operatur secundum rationem, aut secundum *Hominem*,  
 sensum & appetitum: si secundum rationem, *ut opera-*  
 sic homo non pendet à cœlo, est enim mens & *tur secun-*  
 ratio experta, materiæ & incorporea: nullum au- *dum ratio-*  
 tem corpus per se agere potest in id quod est in- *nem non è*  
 corporeum. ratio item libera est, suarumquæ a- *cœlo, nec a-*  
 ctionum domina, & suo arbitratu ac volun- *lia ex causa*  
 tate potest ad hoc vel illud agendum se ipsa *illa præter*  
 applicare. nam quamvis vel à cœlo, vel ex natu- *Deum, per*  
 rali constitutione & temperatione sui corporis, *se ac neces-*  
 vel à diabolo, vel aliunde instigetur ad malè a- *sario pen-*  
 gendum; potest ea tamen reniti, & vi sua omnes  
 instinctus, impulsus, & irritamenta extrinsecus  
 ei obiecta, comprimere & irrita facere; quine-  
 tiam contra quàm incitatur agere. Hoc mani-  
 festum fit vel vnius Socratis exemplo, qui ex na-  
 turali corporis affectione & comparatione, &  
 bardus & mulierosus erat; sed eiusmodi vitio-  
 sas naturæ propensiones, adeo animi robore &  
 diligentia magnitudine emendauit, ut omnium  
 sui temporis prudentissimus & continentissi-  
 mus fit habitus. Homo autem viuens secun-  
 dum sensum & appetitum carnalem, tam va-  
 riabilem & incertam vitam agit, ut qualis futu-  
 rus sit, nullo modo prædici queat. Quamobrem  
 Salomon (quod est in 30. capite libri Prouer-  
 biorum) dixit: Alia quædam sibi esse cognitu  
 difficilia; illud autem esse prorsus ignotum,  
 qualis sit via adolescentis in adolescentia sua.  
 Est enim ea ætas adeo lubrica ad quodlibet vi-  
 tium, adeo mollis & flexibilis in omnes partes,  
 adeo vagans & errans per omnia & nulla in re



*Quàm sit  
instabilis  
vita & a-  
ctiones ho-  
minis viue-  
ris non se-  
cundum  
rationem,  
sed secun-  
dum sen-  
sum.*

diu perseuerans; vt nulla certa ratione modoq;  
regi & duci, sed quocumque impellit cupiditas,  
illuc inconsultè & temerè rapi videatur. quo fit,  
vt facilius sit diuinare quid acturus sit qui viuit  
secundum rationem & virtutem, quàm quid  
sit acturus qui rationis & virtutum regula & le-  
ge posthabita, suas duntaxat cupiditates secta-  
tur. Sic etiam facilius est diuinare quid factu-  
rus sit Rex qui secundum rectam rationem iu-  
stasq; leges imperat, quàm quid facturus sit  
Tyrannus qui omnia pro suo commodo & li-  
bidine administrat. Qua ratione igitur Astro-  
logi certa scientia consequi possunt ea quæ ni-  
hil ratum, firmum, fixumq; & certum ha-  
bent?

*Pulchrum  
dilemma  
aduersus  
Astrologos.*

Adhæc, aut istud Fatum coeleste & potentia  
syderum potest ab homine impediri ita vt effe-  
ctus eius non eueniat, aut nullo modo impedi-  
ri potest: Si potest impediri & non euenire, er-  
go sicut effectus est incertus, ita prædictio eius  
certa esse non potest. Si non potest impediri,  
ergo nullum est liberum arbitrium; & ex eo  
conficitur animum nostrum esse materialem  
atque mortalem, vtpote syderum potestati ne-  
cessariò subiectum. Nec verò si ita res se habe-  
ret, quicquam prodesse hominibus prædi-  
ctiones Astrologorum: quid enim iuuaret nos-  
se tanto ante futura, si ea nullo modo declinari  
& caueri possent? quin, vt ego censeo, plus ma-  
li quàm boni afferrent nobis, quos necesse esset  
non solum præsentibus malis torqueri, sed eti-  
am tam longinqua & ineuitabili eorum expe-  
ctatione

*Si Astrolo-  
gorum præ-  
dictiones  
veræ & cer-  
ta essent  
perfecto in-  
utiles & o-  
disa essent  
hominibus.*



etatione acerbissimè cruciari. Probè hoc intellexit Seneca, licet non minorem quàm Astrologi syderibus in homines vim & potentiam tribueret: in libro enim decimo tertio epistolarum, octogesima nona epistola ita scripsit: Venio nunc ad illum qui celestium noticia gloriatur.

*Frigida Saturni quo sese stella receptet,  
Quos ignis cœli Cyllenius erret in orbes.*

Hoc scire, quid proderit? ut sollicitus sum, cum Saturnus & Mars ex contrario stabunt, aut cum Mercurius vespertinum faciet occasum vidente Saturno. Potius hoc dicam, ubicumque sunt ista, propitia esse nec posse mutari. Agit illa continuus ordo Fatorum, & ineuitabilis cursus. Per statas vices remeant. effectus rerum omnium aut mouent sydera, aut notant: sed siue quicquid euenit faciunt, quid immutabilis rei noticia proficiet? siue significant, quid refert providere, quod effugere non possis? scias ista, nescias, fient. Hæc Seneca. Sed vide quàm argutè ac philosophicè hanc ipsam sententiam breuissimis verbis conclusit Phauorinus: Aut *Phauorinus apud Aulū Gellium, lib. 14. cap. 1.* aduersa, inquit, euentura dicunt, aut prospera. Si dicunt prospera & fallunt, miser fies frustra expectando. Si aduersa dicunt & mentiuntur, miser fies frustra timendo. Si vera respondent, eaque sunt non prospera, iam inde ex animo miser fies antequam è Fato fias. Si felicia promittunt, eaque euentura sunt, tum planè duerunt incommoda; & expectatio te spe suspen-



sum fatigabit, & futurum gaudij fructum spes tibi iam deflorauerit. Nullo igitur pacto utendum est istiusmodi hominibus res futuras præfagientibus. Sic Phauorinus.

16. *Quàm sit vana ac inutilis prædictio Astrologorum de aliquo, quod sit futurus summus Pontifex.*

VERVM, illud maximè arguit prædictio-  
num astrologicarum vanitatem : etenim au-  
dent etiam Astrologi prædicere & promittere,  
aliquem futurum verbi gratia summum Ponti-  
ficem ; atqui prouectio alicuius ad summum  
Pontificatum, non ex ipsius vel alterius vnus  
hominis voluntate aut potestate pendet, sed ex  
voluntate atque suffragijs plurimorum Cardi-  
nalem, quorum munus est creare summum  
Pontificem. Quapropter vt certò prænunciari  
possit, Petrum, verbi causa, fore Papam, non  
satis est nosse compositionem astrorum quæ in  
cælo fuit nascente Petro, sed simul etiam opus  
esset, Astrologo perspectos & cognitos esse om-  
nes syderum politus & constellationes, sub qui-  
bus nati sunt quorumcumque voluntatum &  
suffragiorum concursus ad creandum illum Pa-  
pam futurus est necessarius. Quare, si verum est  
quod narrat in Augusto Suetonius, Nigidium  
Figulum in eiusmodi astrologia nobilissimum  
apud Romanos, accepta hora partus Augusti,  
obseruariisque natalitij eius astris, exclamasse,  
Dominum orbis esse natum ; profecto existi-  
man-

*Inanis præ-  
dictio Nigi-  
dij Figuli  
de futuro  
Augusti  
dominatu.*



mandum est id eum nec scienter, nec certa aliqua ratione, sed temerè ac fortuito dixisse, & casu factum esse vt ita contigerit sicut ille prædixerat. Promotio namque Augusti per multos honorum gradus ad summum vsque principatum & Monarchiam, ex multorum hominum studio, gratia, & opera pendebat; vt ad tantum Augusti dominatum & imperium certò prænosendum atque prænunciandum, solius Augusti generationis & ortus consideratio satis esse nequaquam potuerit. neque enim natalitia Augusti sydera vim vllam habere potuerunt in eos qui fuere Augusti suffragatores adiutoresque ad consequendum principatum; scilicet multi eorum compluribus annis, vel ante vel post Augustum nati fuerant.

17. *Nullam posse esse scientiam vel artem istius Astrologiæ.*

SEXTA RATIO. Omnis scientia, & ars ver-  
 fatur in ijs rebus quæ aut semper, aut certè fre-  
 quenter ita contingunt vt ab ea docentur: quæ  
 autem extra hæc sunt & rarissimè accidunt, ea  
 quia nihil habent fixum & certum, propterea  
 nullam possunt scientiam vel artem efficere.  
 Cum igitur prædictiones Astrologorum ferè  
 sint falsæ, nec nisi perquam raro veridicæ sint,  
 satis liquet eas non ex arte aliqua & certis ob-  
 servationibus proficisci, sed inscienter & incon-  
 sultè ac temerè ab illis effutiri. Quamobrem  
 Phauorinus identidem commonebat, vt caue-

*Sexta ratio.*

*Ars & sci-*

*entia in his*

*versantur,*

*qua semper*

*aut pluri-*

*num eue-*

*niunt, qua-*

*lis non est*

*Astroman-*

*tia.*

*Phanori-*

*rentius apud*



*Aulū Gellium lib. 14.  
cap. 1.*

*M. Tullius.*

*Seneca.*

rent homines ne quā ipsis Chaldaei ad faciendam fidem irreperent, quōd viderentur quādam interdum vera effutire aut spargere. Non enim comprehensa, aiebat, neque definita, neque percepta dicunt, sed lubrica atque ambigua coniectatione nitentes, inter falsa atque vera pedetentim quasi per tenebras ingredientes eunt: & aut multa tentando incidunt repente imprudentes in veritatem, aut ipsorum qui eos consulunt, multa credulitate ducente perueniunt callidē ad ea quæ vera sunt: & idcirco videntur in præteritis rebus quā futuris, veritatem facilius imitari. Ista tamen omnia quæ aut temerē aut astutē vera dicunt, præ ceteris, inquit, quæ mentiuntur, pars ea non fit millesima. Hæc Phauorinus apud Gellium. Sed audi quid in eandem sententiam libro secundo de Diuinatione scriptum sit apud Ciceronem. Quid plura, inquit? quotidie refelluntur Chaldaei. quā multa ego Pompeio, quā multa Crasso, quā multa huic ipsi Cæsari à Chaldæis dicta memini, neminem eorum nisi senectute, nisi domi, nisi cum claritate esse moriturum: ut mihi permirum videatur, quemquam extare qui etiam nunc credat ijs quorum prædicta quotidie videat re & euentis refelli. Seneca in eo libello cuius inscriptio est: Ludus in mortem Claudij Cæsaris, initio introducit Mercurium apud Parcas mortem Claudij procurantem; & ut obiter Chaldæorum illudat vanitati, inter alias rationes quibus conatur Mercurius Parcas inducere ad necem Claudij, hanc affert, ne roties



ies videlicet miseri Chaldæi mentiantur : Pate-  
 re, inquit, Mathematicos aliquando verum di-  
 cere, qui illum postquam princeps factus est, o-  
 mnibus annis, omnibus mensibus efferunt. Pre-  
 dicebant enim illi Mathematici Claudium sin-  
 gulis annis & mensibus moriturum : quod eti-  
 am nostri temporis Astrologis contingit, à qui-  
 bus mortes summorum Pontificum in singulos  
 annos atque adeo menses prænuntiari audimus,  
 & ridemus. Beatus Ambrosius lib. 4. in Hexe- *B. Ambros.*  
 meron, cap. 7. Cum, inquit, ante dies paticos es-  
 set sermo de pluuiâ, quæ fore utilis diceretur,  
 ait quidâ, Ecce Neomenia dabit eam. & quam-  
 uis cupidi essemus imbrium, tamen eiusmodi  
 assertiones veras esse nolebam. Denique, dele-  
 ctatus sum quod nullus imber effusus est, donec  
 precibus Ecclesiæ datus, manifestaret non de  
 initijs Lunæ sperandum esse, sed de prouiden-  
 tia & misericordia Creatoris ; quo exemplo &  
 vanitas istius astrologiæ confutata est, & effica-  
 cia Christianæ pietatis visq; religiosarum pre-  
 cum re ipsa comprobata.

18. *Vanitas & falsitas multarum prædictio-  
 num Astrologicarum.*

ALBVMАЗAR princeps huiusce superstitionis *Albumar-*  
 astrologica, ex obseruatione & præceptis huius *zar.*  
 artis, prædixit Christianam legem duraturam  
 non plus annos mille quadringentos sexaginta.  
 sed bene habet, quod post id temporis, exacti  
 iam anni centum vigintiocto falsam esse illius

O 5

præ-



*Abraam  
Iudaus.*

prædictionem apertè demonstrant. Abraam Iudaus prænuñciauit ex obseruationibus astrologis, expectatum à Iudeis Messiam venturum anno post Domini nostri ortum millesimo quadringentesimo sexagesimo quarto; quod nimirum tum futura esset eadē astrorū compositio, quæ fuerat olim cum Moses ex Ægypto populum Hebræum eduxit: cuius prædictionis veritatem dies ipsa redarguit. Petrus de Aliaco scriptum reliquit, quo anno generale Concilium celebratum est Constantiæ ad tollendum schisma quod multos annos afflixerat Ecclesiam, prædixisse Astrologos eius temporis, nullam fore in Ecclesia pacem & concordiam, sed habitu cœli & conformatione astrorum præsignificari maximas fore dissensiones ingēti cum religionis Christianæ detrimento & exitio. Atqui, per illud Concilium Constantiense, diuturnum illud & perniciosum schisma eo anno extinctum est, pace ac tranquillitate Ecclesiæ redita. qui euentus planè contrarius prædictionibus Astrologorum, sanè multum mouere debuerat Petrum Aliacensem, vt is nullam deinceps isti astrologiæ fidem haberet: præsertim verò, cum ipsemet vel suis deceptus obseruationibus, vel alienis occupatus & circumuentus opinionibus, veritus fuerit ne illud tam graue & odiosum schisma breui Antichristum mundo pareret.

*Petrus de  
Aliaco.*

### 19. *Errores Astrologorum in Chronologia.*

*Albama-  
zar.*

ALBAMAZAR istorum Astrologorum cō-  
rypha-



yphæus, nescio quas Saturni reuolutiones di-  
 audat: affirmat enim, quoties Saturnus denas  
 ui orbis conuersiones perfecit, hoc est, exple-  
 is annis trecentis, semper magnas quasdam res  
 & admodū insignes euenire. Post Alexandrum  
 enim, inquit, annis trecentis apparuit Arelasor  
 filius Bel qui Persas contriuit: & proximè post  
 transactis alijs trecentis annis apparuit Iesus ma-  
 gister & dux Christianorū. O turpem *ἀνιστορίαν*, *Aliquot er-*  
 O incredibilem temporum inscitiam. nam nec *rata circa*  
 tunc fuit iste filius Bel qui Persas fregerit & af- *Chronolo-*  
 fixerit; & Christus Dominus noster non sex- *giam Albu-*  
 centis annis post Alexandrum vt iste mentitur, *mazaris.*  
 sed trecentis duntaxat & viginti annis post Ale-  
 xandri mortem natus est. Quamquam quis mi-  
 retur in hoc lapsum Albumazarem, cum tam  
 insigniter errauerit in Ptolemæo Mathematico,  
 quem facit vnum de Ptolemæis Ægypti regi-  
 bus qui post Alexandrum Magnum Ægyptijs  
 imperarunt? cum in confesso sit, nec Ptolemæ-  
 um Mathematicum fuisse regem, & cum Ha-  
 driano Imperatore floruisse, nouissimo Ptole-  
 mæorum Ægypti regum plus centum & sexa-  
 ginta annis posteriorem. Iactant item Astrolo-  
 gi, nullam fuisse apud homines vlllo tempore  
 mutationem legum, nullius Prophetæ nobilis  
 aduentum, nullam nouę religionis introductio-  
 nem, nullam magnorum regnorum conuersio-  
 nem, denique nullum insignem & memorabi-  
 lem casum aut euentum, quin magna aliqua  
 coniunctio syderum, præcipue verò Saturni &  
 Iouis præcesserit. Hæc, inquiunt, constellatio,  
 nascent-



nascentem orbem initiauit : illa præparauit diluuium : alia Abraam vel Mosem genuit : illa Iesu aduentum prænuntiauit : alia Mahumeti legem antecessit. quæ quàm sint futilia, com-  
mentitia & erroris plena, vel vno hoc argumen-  
to constare potest.

*Quã multa  
peccauerit  
contra Verã  
Chronogra-  
phiam Pe-  
trus Alia-  
censis in  
suis ratio-  
nibus A-  
strologicis.*

Petrus Aliacensis istiusmodi figmentis stul-  
tissimè credens ac vanissimè gaudens, in libro  
suo de Concordia historię & astrologię, ad id  
quod ex sensu Astrologorum proximè docui-  
mus probandum, hoc quasi fundamentum sup-  
ponit: Ab initio mundi vsque ad diluuium flu-  
xisse annos bis mille ducentos quadraginta du-  
os : à diluuiio autem ad Christi Domini aduen-  
tum & ortum, ter mille centum & duos annos.  
hoc posito, probare nititur quicquid in orbe  
terrarum valde memorandum & insigne quo-  
cunq; tempore acciderit, eodem tempore ma-  
gnam aliquam constellationem in cœlo appa-  
ruisse. At enimvero, cum perspicuè falsa sit cõ-  
putatio annorum qua velut fundamento illo-  
rum ratio & doctrina fulcitur, nonné conse-  
quens est quæ ducuntur & pendent ex illa com-  
putatione esse falsa? Etenim ab Adamo ad dilu-  
uium, non plus mille sexcentos quinquaginta  
sex annos præterisse cõstat ex sacris literis; pau-  
ciores nempe quàm illi numerant, annis propè  
sexcentis : quo fit, vt constellationem, quam a-  
iunt isti fuisse in exordio mundi, sexcentis an-  
nis mundum præcessisse necesse sit. Deinde  
tempus quod inter diluuium interfuit & Chri-  
sti Domini aduentum, ne numerum quidem  
bis



his mille quadringentorum annorum imple-  
 uit. Ex quo efficitur vt coniunctio astrorum  
 quam aiunt ducentis annis antegressam diluui-  
 um, non nisi sexcentis octogintaquatuor annis  
 post diluuium potuerit existere. Præterea, di-  
 cunt quartam coniunctionem maximam fuisse  
 annis nongentis quadraginta duobus post dilu-  
 uium, sexdecim nimirum annis ante natum  
 Abraam: quem tamen liquet ex sacra Chrono-  
 logia, ducentis nonagintaduobus annis natum  
 esse post diluuium. quare necesse est, quartam  
 illam coniunctionem sexcentis triginta annis  
 post Abræ ortum contigisse. Adhæc, notarunt  
 illi sextam coniunctionem magnam ducentos  
 vigintiquinque annos fuisse ante Christum; ni-  
 mirum falso: nituntur enim supradicta com-  
 putatione annorum à diluuiò ad Christi aduen-  
 tum, quàm nos mendosam esse ostendimus. quin,  
 si veram sequamur Chronologiam, necesse esset  
 sextam illam coniunctionem sexcentis fermè  
 annis post Christi Domini ortum contigisse. Po-  
 stremò, quàm fuerit Petrus Aliacensis veræ  
 Christianæ Chronographiæ rudis & prorsus ex-  
 pers, vel hoc vno indicio manifestum esse po-  
 test: affirmat anno ab ortu Christi septingente-  
 simo, ad quod tempus septimam coniunctio-  
 nem magnam refert, natam esse in Ecclesia pe-  
 stem Hæreticorum, maxime verò eam quæ fuit  
 Arrianorum, quorum tamen hæresis circa an-  
 num Domini trecentesium exorta, ante sex-  
 centesimum extincta est. Quis igitur tam mul-  
 tas istorum prædictiones nixas mendacissimis  
 Chro=



Chronologijs, inanes & mendaces esse dubitet?

Sed quid ego falsarum prædictionum exempla colligo, quorum plena est & historia omnium temporum, & referta vita communis? Equidem reor, quàm difficile est prædictiones aliquas Astrologorum de futuris rerum humanarum euentis, etiam casu ac fortuito, veras inuenire; tam\* facilè reperiri posse innumera eorum prædicta perspicuè falsa, & rebus ipsis euentisque confutata. Scitè dixit Cato, mirari se quod non rideret Aruspex, Aruspicem cum vidisset: quota enim quæque res euenit prædicta ab his? aut si euenit quippiam, quid afferri potest cur non casu id euenierit? Quod de Aruspicibus Cato dixit, id profecto per quam belle quadrat in Astrologos: ut nimirum videri debeat, cum mendaci homini ne verum quidem dicenti credere soleamus, quo modo illis, si vel vnum eorum prædictum verum euasit, simpliciter credamus; & non ex multis potius falsis vni fidem derogemus, quàm ex vno quod casu verum euenit velimus innumerablem falsa confirmare. Verùm dicet aliquis, Astrologos nonnunquam esse veridicos, & ea prædicere quæ rei confirmet euentus. prædicunt sanè; sed inconsultè, inscianter, temerè. quis enim est qui totam diem iaculans, non aliquando collimet? Verissimè dici potest de Astrologis, quod olim dixit quidam de oraculis Apollinis; quæ vera fuissent memoria teneri & prædicari; quæ autem falsa, neminem recordari, aut

*Lepidum  
Catonis dictum & refert Cic. lib. 2. de Divinatione, in Astrologos belle comperens.*

*Notet hoc  
Lector.*



i, aut taceri ab omnibus. nam qui veritatem illorum oraculorum defendebant, pauca quædam vera crebro sermone vsurpabant, pieraq; illa silentio premebant. qui autem omnia cōtinnebant, nec vera nec falsa curabant. Sed causas cur prædicta Chaldeorum sæpè vera esse videantur, extrema hac disputatione aperimus.

O. *Astromantiam omni tempore à viris sapientibus, & prudentibus esse contemptam & damnatam.*

SEPTIMA RATIO. Si hæc diuinatrix a- *Septima*  
 rologia vera esset & certa, sine dubitatione vl- *ratio.*  
 pars esset philosophiæ omnium nobilissima  
 & hominibus optatissima atque honoratissima:  
 um propter materiæ quam tractat, cœlum di-  
 o & sydera, dignitatem atque præstantiam:  
 um propter futurarum rerum, potissimè au-  
 tem vitæ hominum & mortis casuum & euen-  
 torum prænotionem, quas res noscendi avidis-  
 mi sunt & curiosissimi mortales. at cum ea  
 doctrina omni tempore à præstantissimis qui-  
 busque Philosophis, quinetiam Astrologis, cō-  
 emptæ, derisæ & damnatæ fuerit; maximum  
 profecto argumentum est, eam futilem & ina-  
 nem, & ab omni ratione, fide ac probabilitate  
 vacuam ab illis esse iudicatam. Xenophon in li-  
 bro de dictis Socratis, quod etiam refert Euse-  
 bius lib. 14. de Præparatione Evangelica, capite  
 tradit Socratem dicere solitum, cognitionem  
 futurarum rerum quæ in potestate Dei sunt, non  
 esse



*Xenophon.  
Socrates.*

*Pythago-  
ras.*

*Democri-  
tus.*

*Plato.*

*Aristoteles.*

*Sententia  
Aristotelis,  
qua Astro-  
mantiam è  
medio tol-  
lunt.*

esse hominibus procurandam : neque enim posse homines eas res cognoscere, nec Deo gratum esse, si quæ ille occultauit, ea mortales velint nimis studiosè curiosèq; rimari. Pythagoras, Democritus & Plato longissimis peregrinationibus susceptis, Persarum magos, sapiente Chaldaeorum, Ægyptiorumq; sacerdotes adierunt; à quibus occultiora quædam vel ad disciplinas mathematicas, vel ad religionem cultumq; deorum pertinentia cognouerunt; diuinatricem autem astrologiam, vel discere ab illis neglexerunt, vel si eam quoque didicerunt, certè nūquam ea vsos esse ipsos, ex eorum scriptis manifestè perspicitur.

Aristoteles, qui vir & quantus? quàm solers, quàm subtilis & copiosus in doctrina rerū cœlestium? quam cum aliquot libris diligenter explicuerit, nusquam tamen de istiusmodi Astrologia verbum vllum fecit. Cum autem in libris Meteororum, & de Partibus atque Generatione animalium, præsertim autem in libro Problematum, multarum rerum obscurarum & admirabilium causas perquirat; ad nullius questionis enodationem vel admirandi cuiusquam effectus explicationem, istius astrologiæ opera & præsidio est vsus. Quin, multa sunt in eius scriptis quæ istam Astrologorum doctrinam omnino conuellant; veluti est illud, Futurorum contingentium nō esse certam & definitam veritatem: Quæ per accidens quæque rarè vel ad vtrumlibet contingunt, non posse scientia comprehendendi: Versari in rebus humanis casum & fortu-



fortunam quæ fugiant certam hominis intelligentiam: Particularium & corruptibilem effectuum causas proximas & proprias esse particulares atque corruptibiles, ob idque ad perfectam eorum cognitionem non satis esse cœlestes & vniuersales causas contemplari: Cœlum non aliter agere in ea quæ sunt infra lunam, nisi per motum & lumen. Nec vsquam ferè indicauit Aristoteles præter solem & lunam, vim & efficientiam aliorum syderum. illud quoque docuit decretis Astrologorum valde contrarium, cœlestia signa etiam corporeorum & sensibili-um effectuum, per alias causas auerti & impediti posse.

Cicero libro 2. de Diuinatione, laudat Eudoxum ætate Platonis & Aristotelis principem Astrologorum: item Panætium Stoicum, Archelaum etiam & Cassandrum, ac Scylacem Halicarnasseum, Astrologorum sui temporis nobilissimos, qui totam hanc rationem Astrologiæ repudiarunt. Auicenna qui post Hippocratem & Galenum principatum medicinæ obtinet, libro vltimo primæ Philosophiæ negat Astrologis esse credendum in diuinatione futurorum, quia ipsi nec puncta cœlestia teneant, neque naturas rerum inferiorum planè necessarias ad faciendum iudicium de rebus futuris, perspectas habeant; neque nitantur demonstrationibus sed probationibus oratorijs & poëticis. Ptolomæus, quem isti huius artis principem & du-  
*Eudoxus.*  
*Panætius.*  
*Auicenna.*  
*Ptolemaeus.*  
 cem sequi se dicunt, in libro primo de Iudicijs, cap. 2. Non est, inquit, putandum, omnia à  
P  
super-



supernis caūsis directo deriuari necessitate quadam inuiolabili, vt nulla alia vis quin ita operentur, obfistere valeat. Idem tractatu suo quem vulgo appellant Centiloquium, hoc est, Centum sententiarum, prima eius sententia sic habet, Soli numine diuino afflati prædicunt futura particularia. Quinta verò sententia huiusmodi est, Potest is qui sciens est, multos stellarum effectus auertere quando naturam earum nouerit, ac seipsum ante illorum euentum rite præparauerit. vnde manauit illa multorum sermonibus trita sententia, Sapiens dominabitur astris. Porphyrius in libro de Oraculis confessus est, exquisitam rerum futurarum scientiam ex inspectione syderum, non mortalibus modò, sed multis etiam deorum esse incomprehensibilem. Idem in vita Plotini scribit, eum, cum in ista astrologia satis multum temporis, studij, & operæ posuisset, deprehēdisse tandem, Astrologorum iudicijs & diuinationi futurarum rerum non esse credendum; eamque diuinationem tum sermonibus tum scriptis confutauisse. quod manifestum est cuius legenti eius libros de Fato & de Prouidentia, maxime verò eum qui inscriptus est, An stellæ aliquid agant.

*Porphyr.*

*Plotinus.*

21. *Cui generi hominum prædictiones Astrologorum arrideant & probentur, quas S. Ambrosius comparat telis aranearum.*

SI hæc porrò Astrologia vera esset & certa, plurimum sanè adiuuenti asferret, prouisione futuro-



aturorum, ad bene regendam & administran- *Professores*  
 lam rempublicam, ob eamque causam magno *diuinandi*  
 in honore & gloria fuissent Astrologi apud Re- *futura ex*  
 ges & rerum publicarum Principes: at contra *astris, pu-*  
 prorsus euenit; nam seuerissimis multorum *bucis mul-*  
 Principum decretis & edictis explosam & dam- *torum Prin-*  
 natam & grauissimis supplicijs addictam eam *cipum decre-*  
 artem inuenimus. Quoties Astrologi seu Chal- *is effectiui-*  
 dæi Roma eiecti sunt principe Tiberio, Vitellio, *tatibus ele-*  
 Diocletiano, Constantino, Theodosio, Valenti- *dos.*  
 niano, præsertim autem Iustiniano; quibus hu-  
 us artis studium & exercitatio, nō solum vt in-  
 anis & veritatis expers iudicata est, sed etiam vt  
 ciuitatibus & societati hominum noxia & pe-  
 stilens, semper visa est detestabilis? Sed quid at-  
 tinet in re manifesta, quæ turbam testium non  
 desiderat, longiorem orationem ponere? Au-  
 deo dicere, post hominum memoriam vix fuisse  
 quenquam vlllo tempore vel magnitudine in-  
 genij, vel præstantia doctrinæ, vel prudentiæ ci-  
 uilis excellentia, vel eximia morum integrita-  
 te, vel denique insigni aliquo nobilem ac me-  
 morabilem virum, qui natalitia Chaldæorum  
 prædicta non quasi meras nugas & quisquilias  
 floccifecerit, penitusque contempserit. Vulgus *Cui generi*  
 modo stolidum, ad intelligendum hebes, infir- *hominum*  
 mum ad iudicandum, facile credulum, & noua *prædictio-*  
 miraque audiendi & noscendi curiosum, istis nu- *nes Astro-*  
 gatoribus & aures & fidem libenter adhibet. *logorum*  
 Gaudent etiam hisce commētis leuissima quæ- *arrideant*  
 dam ingenia lucri magis quàm veritatis cupida, *& proben-*  
 in republica literarum turbulenta ac seditiosa, *tur.*

P a

&amp; sa-



& sapiētiae optimatibus semper infensa, rerum-  
que vtilium & alijs notarum fastidiosa, noua-  
rum autem & ignotarum, atque adeo etiam in-  
comprehensibilium auidissima: denique qui-  
bus non tam cordi & curae est vera nosse, quàm  
videri vulgo ea ipsos scire quae summi philoso-  
phiae antistites nescire se contentur.

*B. Ambro-  
sij prae-  
dicationes A-  
strologorū  
comparat  
sele ara-  
nea.*

Hanc rationem egregio S. Ambrosij dicto  
concludam. Ita scribit Ambrosius libro 4. in  
Hexameron, cap. 4. Sapiētia Chaldaeorum te-  
læ aranæ comparatur, in quam si culex aut mu-  
sca inciderit, exuere se non potest: si verò vali-  
diorum animantium vllum genus incurrisse vi-  
sum est, pertransiuit, & casses rupit, infirmos at-  
que inanes laqueos dissipauit. Talia sunt retia  
Chaldaeorum, vt in his infirmi hæreant, validi-  
ores sensu, offensionem habere non possint. Ita-  
que vos qui validiores estis, cū videritis Ma-  
thematicos, dicite: Telam aranæ texunt quæ  
nec vsum aliquem potest habere, nec vincula,  
si tu non quasi culex aut musca lapsu tuæ infir-  
mitatis incurras, sed quasi passer aut columba  
casses inualidos præpetis volatus celeritate dis-  
soluas.

22. *Disputatur contra tria fundamenta A-  
strologiae Indiciariae.*

*OCTAVA RA-  
TIO.*

OCTAVA RATIO. Fundamenta & firma-  
menta huius artis, aut nulla sunt aut certè infir-  
missima & fragilissima: hæc igitur ars nulla ra-  
tione firma & stabili vtitur ad diuinandum;  
quamobrem nullam quoque apud homines au-  
ctorita-



toritatem, fidem, ac probabilitatem habere de-  
 bet. Primum fundamentum istius doctrinæ est,  
 astra habere qualitates omnes elementorum;  
 partim enim esse frigida, partim humida & sic-  
 ca, si non formaliter saltem virtualiter, hoc est,  
 si non actu saltem effectu, si non in se habendo  
 eas qualitates, certè habendo facultates earum  
 qualitatum effectrices: Saturnum aiunt esse fri-  
 gidum, Martem siccum, Lunam humidam. Ve-  
 rum hoc, & ratio confutat & experientia. Ra-  
 tio quidem, quoniam sicut astra omnia sunt lu-  
 cida & ex se lucem fundunt, ita quoque calida  
 esse omnia & calefacere necesse est: lux enim,  
 non sicut omnis per se calefacit, ita frigefacere  
 aut per se humectare vel exsiccare potest. Ste-  
 mus decretis Astrologorum aientium, vt Lu-  
 nam, itidem cætera sydera luce à sole mutuata  
 fulgere. Si igitur omnium astrorum vna est ea-  
 demque lucis origo & ratio; quí potest esse tam  
 multiplex, dissimilis atque discrepans ratio &  
 potestas agendi? Experientia item hoc ipsum  
 redarguit: in plenilunio enim, cum est lumen  
 Lunæ plenissimum, noctes quoque, Aristotele  
 & experientia teste, calidiores existunt. Sed A-  
 strologi præter lucem, alias in cælo & syderi-  
 bus vires atque facultates, & à luce & inter se  
 multum diuersas, mirandorumq; operum cau-  
 sas, quas influentias appellant, commenti sunt.  
 Nouitium sanè inuentum; nulli veterum vel  
 Philosophorum vel Astrologorū vnquam pro-  
 batum: ac si licet ex eorum scriptis coniectu-  
 ram facere, ne notum quidem illis. Postquam

*Aristoteles.*

*Non esse  
 ponendas  
 in cælo in-  
 fluentias.*



verò à recentioribus Astrologis influentiæ in-  
uentæ & palàm probatæ, ab alijs quoque doceri  
& defendi cœptæ sunt, quis ex Lyceò paulo gra-  
uior & probatior Philosophus non eas repudia-  
uit atque damnauit? Festinè quidam Asylum  
ignorantiæ eas appellauit: ad influentias enim  
quasi ad vnicum perfugium se se recipiunt, &  
hanc se in latebram coniiciunt, quicumque mi-  
rabiliū effectuum proprias & naturales cau-  
sas, vulgaribus ingenijs nec in Philosophia exer-  
citis occultas, solerter inuestigare ac reperire  
non possunt. Et verò, si admittuntur influentiæ,  
vix dici potest quantoperè debilitetur robur  
Philosophiæ, deteratur eius dignitas, auctori-  
tas eleuetur, minuatur existimatio, denique stu-  
dium eius apud homines cultusq; languescat.  
Quid enim attinet in occultis rerum causis per-  
quirendis & eruendis præclara ingenia Philo-  
sophorum tanto studio & conatu laborare,  
cū in procliui sit, cuiuslibet effectus ex cœle-  
stibus influentijs rationem petere & afferre? quis  
enim effectus est, cuius naturalis & vera causa  
paulo obscurior & abstrusior est, quem non per  
istiusmodi influentias nullo negotio liceat ex-  
plicare? Cur magnes ferrum ad se rapit? confe-  
ssim respondebitur, quia propria eius influentia  
cœlestis eam illi virtutem indidit. Vnde Re-  
mora tantulus piscis vim habet sistendi incita-  
tissimum nauigium? in promptu est responsio,  
nimirum à cœlesti quadam influentia, quæ tan-  
ta pisciculum illum vi ac potestate roborauit.  
Quid moror? nullum erit problema, nihil in  
natura



natura rerum adeo reconditum & ab intelligentia nostra remotum, denique nihil de his quorum peruestigatio summorum Philosophorum ingenia fatigauit & torfit, quod non quiuis è circulo Astrologorum & indoctorum hominum vno verbo, scilicet per istas influentias expedire queat.

Verùm labor equidem longius: reuertar igitur ad propositum. Si Saturnus quia lucidus est, per lucem calefacit, quomodo idem per influentiam frigefacit? nōne absurdum est in eodem astro duas esse facultates, vnam calefaciendi, alteram frigefaciendi, non diuersas modo sed etiam aduersas & contrarias? cernimus ita esse natura comparatum, vt omnibus in rebus in quibus duæ insunt differentiæ vel proprietates (vt more philosophico loquar) vna generalis & quæ vni rei communis est cum alijs multis, altera specialis & propria eius rei (cuiusmodi sunt in homine sentiētem esse & rationalem) vt semper differentia & proprietas specialis, nobilior & perfectior sit generali, vt quæ illam cōtrahit & determinat, nouæ perfectionis gradum & rationem ipsi adiungens: sicut patet in prædicto exemplo hominis, in quo rationale nobilius est quàm sentiens. At contra omninò se habet res in hac mirabili Astrologorum doctrina. Etenim docent ipsi, in Saturno, exempli causa, duas esse proprietates seu facultates agendi, vnam generalem & communem ei cum omnibus astris quæ est vis illuminandi & per illuminationem calefaciendi: alteram specialem &

*Argumentur ad propositum. Si Saturnus quia lucidus est, ratio contra influentias.*



propriam Saturni, qua ratione differt ab alijs astris, quæ est facultas frigefaciendi, vel aliqua alia vis alicuius influentiæ. Certum autem est, lucem cœlestem multo nobiliorem esse quacumque alia qualitate cœlesti, & facultatem calefaciendi præstantiorem esse facultate refrigerandi. Præterea, duas esse in re quapiam facultates & proprietates ei rei naturales, quarum altera, vt diximus, sit generalis, altera particularis, inter se contrarias, quales sunt in Saturno secundum istos potestas calefaciendi per lucem & refrigerandi per influentiam; nec fert natura rerum, & id fieri non posse ratio ipsa decernit. Nam vt in corpore multiformi & quod Græci vocant Heterogeneum, secundum diuersas partes inesse queant contrariæ qualitates & facultates, quemadmodum contingit corpori humano in cerebro & in corde; id tamen conuenire non potest in astrum Saturni quod est secundum omnes partes vnius formæ ac naturæ: neque enim vna pars eius habet lucem, altera verò influentiam, sed vt totum est præditum luce, ita conuenit in eo toto esse influentiam. Ne multa (non enim consentaneum est alieno loco de Influentijs aduersus Astrologos subtiliter disputare) satis argumenti est ad tollendas influentias omnium quæ in natura rerum efficiuntur, tametsi noua, singularia, & mirabilia videantur; veras, naturales & proprias causas, atque rationes ex duobus principijs cœlestibus quæ omnibus sunt conspicua & experimentis quotidianis explorata, motum dico & lucem, plene cumulateq;  
ac



ac probabilissimè peti & duci posse. Figuras porro & effigies stellarum quas designant Astrologi in Zodiaco, similitudinem reddentes quorundam animalium vel hominum, magnâ vim habere in ortu cuiusque censent Astrologi; cum tamen per se ac natura sua non sint tales, sed sola eorum imaginatione cōstent, ab ipsis eo modo confictæ & figuratæ: possent enim fingi etiam ad similitudinem aliorum animalium, domuum, turrium, mensarum, aliarum ué rerum. quare valde friuolum & ridiculum est, in eiusmodi figuris quicquam momenti ad diuinandum esse positum existimare.

23. *Vtrum astra natalitia cuiusquam possint esse certæ causæ omnium quæ ei euentura sunt.*

SECUNDVM fundamentum Astrologorum est; natalitia cuiusq; astra esse obseruanda: ex his enim omnes vitæ casus & euentus prouideri & prænotari posse. Sed quis non videt fundamentum hoc esse infirmissimum? cur enim Astrologi non potius obseruēt tempus, & cœli atque syderum statum quo quisque in vtero cōceptus, formatus & animatus est? cum in eo plus momenti esse videatur ad diuinandum: quippe tunc primum existit homo, & tunc primum vis cœlestis in homine recipitur & imprimitur: Etenim, ante ortum per nouem menses quisque fuit in vtero, potestati & actioni cœlorum subiectus. Cur item non cōsiderant Astrologi alias constellationes & defluxus cœlestes,

*Alium  
Astrologia  
fundamentum.  
Quam inae-  
ne sit, nata-  
litia cuius-  
que homi-  
nis astra  
obseruare  
ad diuinan-  
dum.*



qui contingunt homini sepius post ortum? Cui plerumque vsu veniat vt illæ virtutes cœlestes insigniores sint effectu, & valētiores ad immutandum hominem, quàm quæ tempore ortus eius fuerunt: effectum enim illum & defluxum aſtrorum nascenti homini impressum, necesse est variari cōmutata sæpius humani corporis temperatione, vel ob alias potentes constellationes, vel ob educationem, vel ob variam viuendi cōsuetudinem & rationem, vel ob leges patrias ad

*An aliquid  
primigenia  
materia  
hominis  
maneatur per  
totam vi-  
tam.*

quarum normam cogitur quisque vitam, mores, studia, & actiones conformare. Quid quod fortasse nihil illius materiae primigeniæ quam quisque in ortu habuit, reliquum sit in extrema ætate? hoc enim visum est & multis & magnis Philosophis: nec S. Thomas in 1. par. quæst. vlt. S. Thomas, art. 1. abnuere videtur. Quo concesso, vis illius primi defluxus & effectus cœlestis in ortu hominis ei indita & impressa, necessariò tandem evanescet tota. nisi fingat quispiam eiusmodi virtutem cœlestem migrare ex subiecto in subiectum, tanquam ex domo in domum mutando domicilia: aut cum præsentit interitum suum, aliam pro se sui similem & quasi vicariam virtutem substituere.

24. *Vtrum sit plus momenti in conceptu hominis, quàm in eius ortu, ad diuinandum.*

PLVS autem esse ponderis, aut certè non minus, in conceptu hominis quàm in ortu, magister istorum Ptolemæus locuples testis est. Is enim in tertio Apotelesmatum ita scribit: Cum prin-



principium temporale hominis aliquod statua-  
 tur; natura quidem & per se illud erit principi-  
 um, cum semen vtero genitali admittitur; po-  
 tentia verò & secundum accidens cum hora  
 partus infans egreditur. Qui igitur horam ad-  
 missi feminis vel casu vel obseruatione depre-  
 hendit, illam sequi potius debet in proprietati-  
 bus corporis & animi dignoscendis, confide-  
 rando quæ sint eo tempore stellarum configu-  
 rationes. cum enim semel à principio semen ex  
 ambientis aëris affectione, certa qualitate dispo-  
 nitur, licet per consequentis conformationis  
 tempora varietur, quoniam tamen propriam  
 cognatamq; materiam naturaliter sibi asciscit,  
 magis etiam primæ suæ qualitatis dispositioni  
 assimilabitur. Hæc inibi Ptolemæus. Quibus  
 verbis non obscurè docet, primum & naturale  
 atque efficacissimum hominis principium, esse  
 feminis admissionem hominisq; conceptum;  
 atque huic principio potissimè insistendum &  
 inhærendum esse ad prænoscentas hominum  
 affectiones & euentus, tam qui ad corpus quàm  
 qui ad animam pertinent. Sed quia benè noue-  
 rat Ptolemæus, punctum illud temporis vel ad-  
 missi feminis, vel conceptus, vix cognosci pos-  
 se ab Astrologis; ne illorum iudicia & diuina-  
 tiones quas ipsi ducūt ex ortu hominis infirma-  
 re videretur, mox subiecit, Qui autem horam  
 ignorant principij seminalis, eos necesse est se-  
 qui principium natiuitatis. Haly nobilis Astro-  
 logus in eo libro quem scripsit de Electionibus,  
 ingenue fatetur, efficaciam decernendi Fatum  
 homi-

Haly.



hominis esse in hora conceptionis : sed quia hæc nescitur ab Astrologis, propterea eos ad horam natiuitatis confugisse. Quin cum Astrologi premuntur argumento Geminorum, quorum cum idem sit ortus, dispar tamen euentus & exitus est; respondere solent diuersitatem euentuum qui sunt in Geminis, ex diuersitate conceptus eorum esse profectam.

25. *De vanitate Astrologorum diuinationem suam extendentium etiam ad ciuitates, non solum ad homines.*

*Tarutius Mathematicus, omnia quæ vrbis Romæ contigerunt ad vim astrologorum, sub qua ea vrbis à Romulo condita est referebat.*

SED vide quousque progressa sit istorum audacia & impudentia : etiam urbium, non hominum modò, facta profitentur hac arte posse prænosci & prænunciari : obseruata enim astrologorum compositione quæ fuit cum vrbes conderentur, posse earum casus euentusq; omnes prospici ac prænotari. Fecit hoc in vrbe Roma rogatu Varronis, quidam Tarutius Mathematicus vt in Romulo tradit Plutarchus : quam historiam libro 2. de Diuinatione his verbis Cicero enarrat, Quidam L. Tarutius Firmanus familiaris noster, in primis Chaldæis rationibus eruditus, vrbis etiam nostræ natalem diem repetebat ab ijs Parilibus, quibus eam à Romulo conditam accepimus; Romamq; cum esset in iugo Luna natam esse dicebat, nec eius fata canere dubitabat. O vim maximam erroris. etiamné Urbis natalis dies ad vim stellarum & lunæ pertinebat? fac in puero referre, ex qua affectione cœli



cœli primum spiritum duxerit: num hoc in latere aut in camento ex quibus Vrbs effecta est, potuit valere? Ita Cicero.

26. *Cur observatio astrologica non valeat æquè in stirpibus & animalibus, quàm in hominibus.*

VERVM, quærerem equidem ex istis Astromanticis, num velint eorum diuinationem etiam in animantibus & stirpibus valere vt in homine? Si negent, prodent scilicet suam inscitiam; & suæ artis infirmitatem, inanitatem atque fallaciam. Cur enim non æqualiter valeat in stirpibus atque in homine? immò cur non plus valeat? stirpes namque multo magis quàm homo, à cœlestium corporum potestate & efficientia naturali necessitate pendent. Et cum minus multa & varia atque incerta stirpibus quàm homini soleant accidere, facilius profecto esse deberet eorum diuinatio, quæ stirpibus quàm quæ homini sunt euentura. Sin verò annuunt, similiter in stirpibus vt in hominibus valere astrologicam diuinationem; amicè rogarè ipsos vt diligentissimè obseruarent statum cœli & astrorum, eo videlicet tempore, quo vel prunus, vel cerasus, vel pyrus sereretur; aut cum sementis tritici fieret, & ex illa cœli obseruatione promerent etiam prognostica de illis arboribus, scilicet vt diuinarent quantam illæ arbores prunorum, cerasorum, & pyrorum copiam essent laturæ: quantus item ex illa tritici semente spicarum,



carum, & in singulis spicis quantus granorum numerus esset prouenturus. hæc si negent à se posse prænosci, fateantur etiam necesse est, non posse ab ipsis futuros hominum casus euentusq; prouideri.

27. *De antiquitate istius Astrologiae apud Aegyptios & Chaldaeos.*

*Tertium  
fundamen-  
tum Astro-  
mantia.*

*Aristotel.*

TERTIVM fundamētum eorundem Astrologorum est, artem hanc suam certissimis innumera-  
bilium sæculorum experimentis, & constantissimis obseruationibus esse comprobata-  
tam. aiunt enim, hanc disciplinam profectam esse ab Aegyptijs & Babylonijs seu Chaldæis, mortalium omnium antiquissimis. tradit enim Aristoteles in libro 2. de Cœlo, textu 60. & extremo libro 1. Meteororum, Aegyptios omnium hominum vetustissimos haberi: & in principio operis Metaphysicorum affirmat, Aegyptios omnium hominum vetustissimos mathematica studia tractare & colere cœpisse. Iactabant etiam olim Astrologi, Chaldæos quadringenta & septuaginta annorum millia in periclitandis experiendisq; pueris quicunque nascerentur, posuisse. Verùm adeo in aperto & in promptu sunt omnibus istorum mendacia, vt à nobis ea vel confutari vel etiam indicari non sit opus. Etenim ab exordio mundi ad hanc diem, nec dum sex millia annorum effluxerunt. Ab origine verò gentis Chaldææ, hoc est, post euer-  
sionem turris Babel, facta nempe linguarum diuisione, non sunt adhuc quatuor millia anno-  
rum



um completa. Picus Mirandulanus in cap. 2. *Picus Mi-*  
 libro 12. aduersus Astrologos, testes ad redar- *randula-*  
 guendam Astrologorum mentitam vetustatem *nus.*

adhibet Hipparchum & Ptolemæum, princi-  
 pes sanè astronomiæ; qui vbi pro dogmate ali-  
 quo constituendo veterum obseruationes affe-  
 runt, nullas profecto afferunt vetustiores ijs quæ  
 sub Nabuchodonosoro Chaldæorum rege a-  
 pud Ægyptios & Babylonios fuere: ab initio  
 autem imperij regis Nabuchodonosori ad præ-  
 sentem annum qui ab ortu Domini nostri agi-  
 tur millesimus quingentesimus octogesimus o-  
 ctauus, non plus bis mille ducentos & triginta  
 duos annos præterisse constat. Porro commen-  
 titiam Ægyptiacarum obseruationum antiqui-  
 tatem, perbelle ridet & redarguit Augustinus *Augusti-*  
 in cap. 40. libro 18. de Ciuitate DEI: ita enim *nus.*

scribit: Frustra vanissima præsumptione garri-  
 unt quidam dicentes, ex quo rationem syde-  
 rum comprehendit Ægyptus, amplius quàm  
 centum annorum millia numerari. In quibus  
 enim libris istum numerum collegerunt, qui non  
 multum ante annorum duo millia literas magi-  
 stra Ifide didicerunt? non enim paruus auctor  
 est in historia Varro qui hoc prodidit. sic Augu- *M. Varro.*

stinus. Sed huic disputationi in qua octo ra-  
 tionibus probare volumus diuinatio-  
 nem astrologicam esse contrari-  
 am verè philosophiæ, fi-  
 nem hoc loco sta-  
 tuemus.

NON



NON MODO ASTRA NON ESSE  
*causas, sed nec esse signa rerum futu-  
 rarum.*

## CAPVT IV.

**B**EATVS Augustinus lib. 5. de Ciuitate Dei,  
 cap. 1. tradit fuisse opinionem quorundam  
 non mediocriter doctorum hominum, quibus  
 visum est nō esse quidem astra causas humano-  
 rum euentuum, sed esse tamen eorum vera &  
 & certa signa.

28. *Vtrum astra, si non sunt cause, saltem  
 sint certa signa omnium futurorum.*

ORIGENES quidem certē in tomis suis su-  
 per Genesim, (sic enim memorat Eusebius lib.  
 6. de Præparatione Euangelica, cap. 9.) cum ex-  
 planaret verba illa quæ sunt in primo capite li-  
 bri Geneseos. *Et erunt in signa*, è quibus videli-  
 cet verbis huius nostræ disputationis argumen-  
 tum pertexuimus, prodidit astra esse à Deo po-  
 sita in cœlo, vt per varios aspectus & coniun-  
 ctiones præsignificarent quæ consequentibus  
 temporibus tum vniuersè, tum figillatim euen-  
 tura essent, non tamen ea efficerent. Itaque cœ-  
 lum esse dixit velut quendam librum in quo  
 Deus depinxit atque descripsit quæcumque in  
 toto mundani æui decursu, suo quæque tempo-  
 re futura sunt. Ad hoc probandum, citat Ori-  
 genes librum quendam cui titulus erat, *Narra-  
 tio Ioseph*, olim apud multos in auctoritatem &  
 fidem receptum: in quo Iacob Patriarcha indu-  
 citur

*Liber, qui  
 inscribeba-  
 tur Narra-  
 tio Ioseph,*



citur filios suos alloquens hunc in modum, Le- *ab Origene*  
 gi, inquit, in tabulis cœli quæcunque continget *citatus.*  
 vobis & filijs vestris. Plotinus autem condisci- *Plotinus.*  
 pulus Origenis idem sensit, idq; docet in libro  
 qui inscriptus est, Vtrum stellæ aliquid agant:  
 in libro autem de Fato cap. 6. hunc præterea stel-  
 larum vsum esse tradit, vt qui illas suspiciant &  
 quasi literas considerent, qui nimirum huius-  
 modi literaturam nouerunt, futura legant; ex  
 ipsis figuris comparatione quadam analogica,  
 eorum significationem & intellectum solerter  
 indagantes. Quin, Porphyrius affirmat, cum *Porphyrius.*  
 ipse de se interficiendo vehementer cogitaret,  
 Plotinum hoc cœlitus prouidisse, & à tanto fa-  
 cinore eum prohibuisse.

Hanc sententiam Iulius Sirenius libro 9. de *Iulius Sire-*  
 Fato, cap. 35. minimè damnandam censet: & *nus.*  
 quo probabilem esse ostendat, aliquot ex diuina  
 Scriptura productis sententijs, eam ornat atque  
 confirmat. Hoc enim, inquit, non obscure in-  
 dicat Esaias cum ait in capite 34. *Complicabun-*  
*tur sicut liber cœli:* qua oratione significatur, cœ-  
 los post diem iudicij conuoluendos esse atque  
 complicandos; quasi nunc cœli instar cuiusdam  
 libri sint explicati & aperti nobis, haud dubie  
 ad legendum. Eodem pertinet illud quod est in  
 Psalmo 21. *Annunciabunt cœli iustitiam eius,*  
 & in Psalmo 18. *Cœli enarrant gloriam Dei,* & quod  
 est in primo capite libri Geneseos de stellis,  
*Vt sint in signa,* & in Psalmo 88. *Confitebuntur*  
*cœli mirabilia tua Domine.* Nec verò, inquit Ori-  
 genes;

Q

genes;



*Origenes.* genes, hæc opinatio tollit liberum hominis arbitrium, non magis profecto quam prædicta futurarum rerum à sanctis Prophetis edita, vel præscientia omnium rerum quæ est in Deo. *Plotinus.* Plotinus scientiam astrorum ea ratione ut astra signa sunt humanorum euentuum, contingere homini aiebat vel singulari quodam Dei munere, vel propter eximiam astrologiæ peritiam; ad eam enim comparandam, opus esse acerrima indagatione, summæq; solertia.

*Iulius Sirenus.* Iulius autem Sirenus ne Augustinum quidem ab hac opinione abhorruisse putat: quippe in 2. libro contra Manichæos, cap. 21. cum is ageret de hominibus, quorum dum sunt in corpore mortali occulta sunt corda, ita scribit: Neque enim in illis corporibus cœlestibus sic latere posse cogitationes credendum est, quemadmodum in his corporibus latent, sed sicut nonnulli motus animorum apparent in vultu, & maximè in oculis; sic in illa perspicuitate ac simplicitate cœlestium corporum omnes omninò motus animi latere non arbitror. Hæc ibi Augustinus.

29. *Vtrum secundum Augustinum astra sint signa omnium rerum humanarum.*

*Excutitur locus Augustini.* VERVM, si quis locum hunc non prorsus inconsideratè legat, planè comperiet Augustinum per cœlestia corpora non intelligere orbes cœlestes, sed corpora beatorum hominum, post resurrectionem cœlesti gloria & immortalitate donata; & ponere eum discrimen inter homines in hisce caducis corporibus viuentes, & eosdem



dem post resurrectionem in glorificatis corporibus immortalem & beatam vitam agentes: quod illi arcana cordium multiplici simulatione callidè tegant & occultent, ideoq; sæpè alios fallant: in his verò manifesta erunt omnium corda omnibus, omnisq; prorsus aberit simulatio, fictio atque deceptio. Atque hunc esse verborum Augustini germanum intellectum, ex proximè consequentibus eius verbis palàm est: hæc enim subtexit, Itaque illi merebuntur habitationem illam, & commutationem in angelicam formam, qui etiam in hac vita cum possint sub tunicis pelliceis occultare mendacia, oderunt tamen ea, & cauent flagrantissimo amore veritatis; & hoc solum tegunt quod ij qui audiunt ferre non possunt, sed nulla mentiuntur. Veniet enim tempus, vt nihil etiam contegatur, Nihil est enim occultum quod non manifestabitur. sic Augustinus. Quare cum Augustinus satis explicatè & apertè loquatur de corporibus hominum glorificatis, non autem de cælis vel astris; demiror sanè Iulium Sirenum tam incogitanter & oscitanter legisse hunc locum, vt propter eum maximè, Augustino affinxerit huiusmodi sententiam, cuius nec vllum eo loci vestigium apparet, & extat apud eundem in libro 5. de Ciuitate DEI copiosa & grauis confutatio.

30. *De natura & varietate signorum.*

CETERVM, astra esse signa rerum futura-  
rum, censeo equidem non solum esse alienum à *Astra non esse certa*  
vera

Q 2



*signaverū  
futurū.*

vera philosophia, sed etiam sacris literis contrarium. Ac licet complures earum rationum quas superiori capite tractauimus, etiam valeant ad hoc probandum; nouis tamen aliquot argumentis quæ propriè eiusmodi sententiam refellant, hoc loco vtendum est. Principio, quod est naturale signum alicuius rei, id vel eius rei causam vel effectum esse, vel vtrumque ab eadem superiori & communi causa proficisci necesse est. nam quod, præter hæc, quartum membrum fingi posset, videlicet, vt illud signum necessariò sit coniunctum cum causa rei ab illo significatæ, id non est diuersum à tertio membro: talis enim connexio & coniunctio non aliter esse potest, quàm vt causa illa prius ex se pariat id quod est signum: deinde id quod est signatum; aut vt idem quod causam excitat vel admouet ad agendum, simul etiam adhibeat & applicet id quod est signum ad præsignificandum: vtrumque autem horum ad communem causam refertur. Hinc igitur argumentari licet ad hunc modum: Si cœli & sydera sunt signa omnium rerum sublunarium, vel sunt earum rerum causa, sed hoc negat ista opinio: vel sunt effectus, quod nec illi dicent, nec vllus hominum sanæ mentis audebit dicere: aut, quod tantummodo reliquum est, tam cœlestia quàm sublunaria ab eadem superiori & communi causa proueniunt: quemadmodum Iris signum est serenitatis, non quia sit eius causa vel effectus, sed quia eadem est communis vtriusque causa. At causam communem cœlestium corporum & subluna-



lunarium, necesse est esse vel corpoream vel incorpoream: corpoream quidem nullam, opinor, ponent isti, nullum enim corpus superius cœlis est: relinquitur igitur ut omnia referant ad causam incorpoream, hoc est, vel Deum vel Angelos qui mouent cœlos: ita ut, dum Angeli cœlos mouent, in ipsorum cœlorum statu habituque, & in syderum positu & conformatione, quasi quibusdam suis nutibus, & tanquam notis atque signis inibi descriptis euēta rerum humanarum prænotent atque præmonstrent. At enimvero id multis de causis non est credibile. Etenim qui sic opinantur, fateri eos oportet induci homines ab Angelis ad maxima scelera & execranda flagitia.

Ad hoc, Philosophia docet, necnon & Theologia idem tradit; Angelorum nullam esse actionem quam vocant transeuntem, & quæ proximè ab ipsis prouenit, aliam quam motum localem; nec Angelos posse quicquam proximè agere, præterquam mouere motu locali. Angelos verò qui circumuoluunt orbes cœlestes, nō aliter circa res sublunares operari censent Philosophi & Theologi, quàm per motum & lumen cœli; nam influentias à lumine omninò diuersas paulò superius sustulimus. Per motum autem & lumen cœli, omnes futuros effectus rerum sublunarium, clare distinctè certoque præmonstrari, nemo dicet qui verisimilia & credibilia loqui velit. Deinde, cum eiusdem causæ duo effectus se inuicem necessariò indicant, ut ab eadem causa, sic eodem quoque modo ab il-

Q 3

la pro-



la prouenire debent : alioquin fieri non potest vt se inuicem certò indicent : à Deo autem & Angelis quæ in corporibus cœlestibus fiunt, ea necessariò & inuariabiliter se habent : quæ autem in his quæ sunt infra lunam, valde mutabiliter, & vt ita loquar, defectibiliter contingunt.

Hinc alia quoque subtexuntur argumenta. Etenim, quomodo astra quæ sunt certo numero comprehensa, & semper vniusmodi & necessariò ac immutabiliter ita se habent, signa esse possunt omnium rerum futurarum, quæ prope modum infinitæ sunt multitudine ac varietate, & inter se plurimum differentes atque discrepantes? quomodo eadem syderum positura & conformatio, sub qua vel Gemini, vel alij quamplurimi eodem puncto temporis nascuntur, potest esse certum signum propriè & distinctè præsignificans tot tamque varios ac dissimiles casus & euentus qui in illis cernuntur? quare, si astra sunt signa rerum futurarum, earundem quoque causas esse fatendum est : quod si causas esse negamus, etiam signa esse negandum est.

### 31. *An Cometa signa sint humanarum rerum.*

DICES, cometas qui in sublimi aëre, generantur, signa esse quæ insignes admodum casus futuros portendant, quorum tamen cometa nec causæ sint nec effectus : quare idem quoque astris accidere respectu rerum sublunariû, non esse incredibile. At ego, cometas certa signa humano-



manorum casuum & euentuum nunquam concedam, licet hoc tam vulgo persuasum sit, quàm est à Sapiantibus improbatum. Quod si hoc, cum vulgo consentiens opinarer, dicerem cometas à stellis rerum futurarum effectricibus excitari, vt eas res antegressi præmonstrent. De stellis autem secus est, his enim nulla est corpora causa superior.

32. *An qui astra faciunt signa rerum futurarum, simul etiam necessario inducant & astruant Fatum.*

SED quid multis moror? coguntur istius opinionis Auctores, quanquam id minimè velint, Fati necessitatem inducere: & sanè, magis etiam quàm qui stellas faciunt causas rerum sub-lunarium. Etenim, vt stellæ causæ sint eorum quæ fiunt infra lunam, non ideo tamen Fati necessitas existet; quod enim illarum afflatu defluxuquæ in terris esset efficiendum, id posset vel contrarijs materiæ affectionibus, vel obstantibus causis particularibus impediri. At si astra naturaliter futurarum rerum signa sunt, omnino euenire necessarium est quod ab illis significatur: alioquin essent signa inania & fallacia. Et cum Deus ea instituisset ad significandum, & in cœlo tanquam in quodam volumine ea descripsisset veluti notas futurarum rerum indices; si euentus rerum cum illarum significationibus non congruerent, vel Deus earum auctor & institutor ignorans esset futurorum euentuum,

Q 4

vel



vel fallax. Denique, si astra præsignificant quæ futura sunt; aut præmonstrant quæ facienda sunt à causis particularibus, non quidem omnibus sed aliquibus tantum: sed hoc improbable est ac figmenti simile; cur enim stellæ prænotent futuros effectus aliquarum particularium causarum potius quam aliarum, vel cur non similiter præmonstrent omnes, cum omnium similis ratio sit? aut stellæ præsignificant omnes futuros effectus causarum omnium particularium: hoc si est, nullæ profecto reliquæ hient causæ per quas quo minus eueniat quod à stellis præsignificatur, impediri & prohiberi queat. Ex quo fit necessarium, ut omnia quæ infra Lunam fiunt, immutabili necessitate Fati nexa vinculaque teneantur: quod nec istius sententiæ defensores sentiunt, & id sentire impium est.

*Explicatur  
locus Isaia  
ex cap. 34.*

*Iustinus  
martyr.*

Testimonium autem illud Esaiaæ productum ex 34. capite, *Cæli sicut libri complicabuntur*: quod inter cetera Scripturæ testimonia paulò superius commemorata, solum habere aliquid difficultatis, & non nihil negotij facessere videtur; variè interpretatum reperio: ita tamen, ut nulla interpretatio quæ modo vel probati sit Auctoris, vel sit ipsa probabilis, quicquam illi sententiæ suffragetur. Iustinus martyr respondens ad quæstionem nonagesimam quartam Orthodoxorum, qua quærebatur quemadmodum intelligendum esset quod dicitur ab Esaia, fore ut cælum aliquando velut liber complicaretur, sic ait; Quemadmodum cæli creationem diuinæ literæ per similitudinem conferunt aliquando cum



cum pellis extensione, dicentes : *Qui extendit* *Psal. 103.*  
*cælum sicut pellem*, aliquando cum firmato fumo,  
*Cælum*, inquit, *ceu fumus firmatum est*, aliquan- *Esaiæ 51.*  
do cum rotunditate cameræ, *Qui extendit*, in- *iuxta 70.*  
quit, *cælum velut cameram* : Sic è diuerso, cœli *Interpretes.*  
dissolutionem per comparisonem conferunt  
cum alijs rebus, vt apud Esaiam cum volumine *Esaiæ 40.*  
inuoluendo & implicando, sicut apud Dau- *iuxta 70.*  
idem Psalmo 101. cum vestimento veterascente *Interpretes.*  
& commutando. Sic Iustinus. Hieronymus *Beatus Hieronymus.*  
verò super illis verbis hæc scribit, Consideran-  
dum, quod non dicat interire cœlos, sed repli-  
cari siue complicari quasi librum; vt postquam  
omnia peccata aperta fuerint & relecta, com-  
plicentur qui prius aperti fuerant, vt nequa-  
quam vltra scribantur in eis delicta multorum.  
In Scriptura enim dicuntur cœli annunciare iu-  
stitiam DEI, reuelare iram eius, & probare ac  
testificari hominum scelera.

Sanctus Thomas & Nicolaus de Lyra aliter *B. Thomas*  
exponunt : Complicabuntur, inquiunt, cœli *Lyranus.*  
tanquam liber, hoc est, non exercebunt vltra  
Ethnici astromantiam suam; nec posthac ex a-  
stris diuinare audebunt euenta hominum, quasi  
legerent in syderibus descriptos casus & euen-  
tus futuros. Alij sic interpretantur : Non pate-  
bit amplius introitus in regnum cœlorum, sed  
ianua cœlestis clausa erit. Sunt etiam qui ex-  
planent hoc modo, Ministerium & vsus cœlo-  
rum atq; syderum exhibitus homini ante diem  
iudicij, postea esse desinet : nam licet non pror-



sus interibunt cœli, alio tamen statu erunt, & quibus nunc funguntur ministerijs & obsequijs hominum causa, ab illis post diem iudicij quoquo modo vacabunt: quæ vacatio pulchrè declaratur ab Isaia similitudine libri, quem posteaquam eo vsi sumus, nec amplius nobis vsui futurus est, complicare & claudere solemus.

Nec displicet mihi interpretatio eorum qui aiunt, illa similitudine declarari; tantam fore diuinæ iræ & vindictæ demonstrationem aduersus gentes de quibus illic Esaias loquitur; tantam rerum omnium perturbationem & cōfusionem; tantam denique hominum tristitiam dolorem & conflictationem; vt præ magnitudine mœroris atque doloris, & præ animi perturbatione & oppressione, videantur hominibus cœlestia lumina restingui, stellæ de cœlo cadere, motusq; earum conturbari, denique cœlum complicari & recedere. nam quod hic dicitur complicari, in Apocalypsi dicitur, recedere vel abire. sic enim habes in capite sexto, *Et cœlum recessit sicut liber inuolutus.*

*Antiquus  
ms Hebræo-  
rum scri-  
beret.*

Sed quo planior sit & facilior ad intelligendum etiam non valde doctis similitudo libri qua vsus est Esaias, sciendum est, apud Hebræos antiquitus libros sacros diuersa forma scribi & compingi solitos esse, quàm nunc scribuntur libri apud nos. Habebant enim vnum duntaxat solum siue membranam oblongam, quæ circa cylindrum siue axem ligneum circumplicabatur, instar linæ telæ radio textorio circumuolutæ. Videbantur autem huiusmodi libri aliquam



quam referre cœlorum similitudinem & imaginem; quia sicut axem illum ligneum qui in medio voluminis est, complures ipsius membranæ seu spiræ, altera super alteram ambiunt & circumdant: ita hanc terram quæ medium totius vniuersi axem tenet, cœlestes orbes alter super alterum, collocati in orbem circumplectuntur. Verùm de testimonio Esaïæ satis dictum sit; cuius cum tam multæ ac variæ sint expositiones, nulla earum tamen mirificos istos astrorum Lectores, Interpretes, ac Vates adiuuat.

*QV A R A T I O N E   N O N N V L L I   A S T R O -  
l o g i   m u l t a   v e r a   p r æ d i x e r i n t .*

CAPVT V.

**R**ESTAT, quò tandem ad exitum hæc disputatio finemq; perducatur, vt causas aperiamus, cur permultæ quorundam Astrologorum prædictiones veræ fuerint, & cum rebus ipsis euentisque mirabiliter congruentes. hanc enim quæstionem, cum eius mentio supra incidisset, quo melius, commodiori scilicet loco tractari posset, in extremam hanc disputationem reiecimus.

Licet igitur prædictiones Astrologorum plerumque falsas esse verissimum sit, & à nobis supra satis explicatum; quoniam tamen & olim proditum est à multis, hodieq; admodum vulgare est, quinetiam à grauibus viris, quibus non credere difficile est, pro certo traditur, fuisse quosdam



quosdam Astrologos quorum pleræque omnes prædictiones veræ fuerunt, vsu ipso euentuque comprobata, & vix vnum aut alterum de plurimis eorum prædictis secus euenit quàm illi prænunciauerant: age, nos etiam hoc credere in animum inducamus, ne peruulgata hominum opinioni quasi publica fide & auctoritate confirmata, aduersari videamur. Concessa autem veritate huiusmodi prædictionum, causas eius disquiramus, videlicet qua ratione certò potuerint ab Astrologis futura prænunciari, quæ quod incerta sunt, vim & notionem humanæ intelligentiæ fugiunt. Non longum faciam: equidem asseueranter affirmo, si quæ prædictiones Astrologorum veræ fuerunt, earum veritatem non ex veritate firmitateque artis astromanticæ quam nullam esse satis superque ostensum est, sed alijs ex causis proficisci: quæ autem sint huiusmodi causæ, breuibus explicabo.

33. *Quatuor causæ, propter quas nonnumquam prædicta Astrologorum vera carent.*

34. *Instinctu demonum agi nonnunquam homines ad diuinandum.*

PRIMA CAUSA. Veritas istarum prædictionum nonnunquam prouenit ex pacto & societate quam iniuit Astrologus cum demone; vel ex occulto eius afflatu & instinctu, quo etiam nescientes homines ad diuinandum instigan-



antur. Hoc tradit Augustinus extremo cap. 7. libro 5. de Ciuitate DEI: Non immerito, inquit, creditur, cum Astrologi mirabiliter multa vera respondēt, occulto instinctu fieri spirituum non bonorum, quorum cura est has falsas & noxias opiniones de astralibus fatiis, inferere humanis mentibus atque firmare, non horoscopi notati & inspecti aliqua arte, quæ nulla est. Sic Augustinus.

5. *Quot modis Dæmon futura, aut ipse præsentire, aut homini præmonstrare soleat.*

DAEMON autem suggerit homini quod ab eo diuinetur, vel palàm se oculis eius aspectabilem & conspicuum offerens, eumquæ futura humanis verbis prædocens: vel formatis in æthere vocibus præsignificantibus futura, citra ullam corporis speciem & figuram: vel immissa scriptura aliqua quæ futurarum rerum prædictiones contineat: vel dormienti per somnia aut vigilianti afficiendo & commouendo phantasiam, fingendoquæ phantasmata idoneè ad representandum id quod diuinandum est, atque incitando hominem ad prædicendum id quod repræsentant phantasmata. Scire autem potest dæmon futura quæ prædocet hominem, reuelatione Dei per bonos Angelos ei facta: nonnunquam enim Deus ad agendum aliquid utitur dæmonum ministerio. Solet etiam dæmon prænunciare homini futura quæ ipsemet postea factururus est: solet ob incomparabilem sui motus celeri-



celeritatem quæ in longinquis locis remotis mundi regionibus geruntur, ea ad hominem qui longissimè absunt deferre. Potest item demon ex clandestinis consilijs, verbis, scriptis, & signis quæ in corpore tã exterius quàm interius apparent, occultas hominum cogitationes & deliberationes tam præsentis quàm futuras, solertissimè coniectando, cognitæ habere. Idem quæ conijcit ex præparatione causarum aliarumque rerum quæ ad gerendum aliquid debent concurrere. Denique, ob incredibilem subtilitatem & solertiam mentis, ob tantam totum millium annorum experientiam, propter perfectam rerum omnium naturalium absolutamque scientiam; callidissimus atque sagacissimus est ad præsentendum & prænosendum futura.

*Augustinus.*

Hoc ipsum quod hîc docuimus, quia enucleate aperteque tradit Augustinus in libro 2. de Genesi ad litteram, capite 17. libet verba eius adscribere, De fatijs, inquit, syderum qualeslibet eorum argutias, & quasi de mathefi documentorum experimenta, quæ illi Apotelesmata vocant, omnino à nostræ fidei sanitate respuamus. Talibus enim disputationibus etiam oradi causas nobis auferre conantur, & impia peruersitate malis factis quæ rectissimè reprehenduntur, ingerunt, accusandum potius Deum auctorem syderum, quàm hominum scelera. Ideoque fatendum est, quando ab istis vera dicuntur, instinctu quodam occultissimo dici, quem nescientes humanæ mentes patiuntur. Quod cum ad  
deci-



ecipiendos homines fit, spirituum seductorum peratio est: quibus quædam vera de temporibus rebus nosse permittitur, partim quia sublioris sensus acumine, partim quia corporis subtilioribus vigent, partim experientia allidiore propter magnam longitudinem vitæ, partim à sanctis Angelis, quod ipsi ab omnipotente Deo discunt etiam iussu eius sibi reuelantibus, qui merita humana occultissimæ iustitiæ sinceritate distribuit. Aliquando autem item nefandi spiritus etiam quæ ipsi facturi sunt, elut diuinando prædicunt. Quapropter bono Christiano, siue Mathematici, siue quilibet impiè diuinantium, maximè dicentes vera cauendi sunt, ne consortio dæmoniorum animam deceptam, pacto quodam societatis irretiant. Hæc sunt Augustini verba.

6. *Quot modis & quàm grauitè peccent, qui Dæmonum vel istorum Astrologorum opera vtuntur ad diuinandum.*

CETERVM, granissimo se obstringunt scelerè, quicumque cupidi futura noscendi consulant dæmones, vel Astrologos dæmonum opera vtentes ad diuinandum. Multis autem modis in eo ipso peccari potest: primò si quis consulat dæmonem de futuris, vel dæmonis discipulum Astrologum, ratus esse dæmoni futura omnia exploratè percepta. hoc enim cum vniuersis Dei proprium sit nosse futura, si quis eandem cognitionem etiam dæmoni tribueret, impietatis



tis & idololatriæ crimen esset. Deinde, si crimini vertitur cum excommunicato ab Ecclesia communionem & societatem habere, quantum crimen erit cum diabolo acerrimo Dei & Ecclesiæ inimico & implacabili hominum hoste, pacto & societate coniunctum esse? & quem Deus ab omni societate fidelium ablegavit ad inferas & tartareas sedes, æternisquæ supplicijs mancipavit, eo & amico, & magistro atque doctore uti velle? Postea, qui dæmonis familiaritate utitur in magnum certumquæ periculum animam suam obijcit, utpote quam dæmon eiusmodi prædictionum illecebris circumvenire ac perdere vehementer cupit. Peccat etiam gravissimè, quisquis Astrologos consulit, quo per illos aliorum hominum occulta peccata cognoscant. His accedit, immane flagitium esse, propterea dæmonem vel Astrologum consulere, ut eorum consilio vel auxilio magnum aliquod scelus perpetrari queat.

37. *Istiusmodi Astrologos ferè improbos & flagitiosos esse.*

ISTOS autem veridicos, ut ferunt, Astrologos dæmonum esse familiares & discipulos, multa nec obscura sunt indicia: Primò, improbitas morum vitæque impuritas & sordes: Tum, contemptus omnium quæ ad Christianæ disciplinæ ac pietatis cultum exercitationemque pertinent: Postea, odisse lucem, fugitare conspectum congressumque hominum, rarò versari

in



in publico, ferè in obscuro & abdito, proculquè arbitris viuere: Ad hoc, de ipsorum fide ac religione, mala, nec sanè immerito ac temerè, hominum existimatio: Denique multi de istis capti à censoribus fidei nostræ, quos Inquisitores vocant, vel vltro vel coacti, habita scilicet quæstione admotisq; cruciatibus, suam cum dæmone societatem & familiaritatem confessi sunt. verùm de prima causa satis.

SECUNDA CAUSA. Astrologos diuinare futura, nonnunquam accidit ex occulta diuinæ prudentiæ dispositione quæ, vt in 4. & 7. libro Confessionum inquit Augustinus, cæcas & improbas mentes consultorum aliquoties ignoto *Augustinus.* quodam instinctu sic agit, vt nescientes proferant, quæ consulentes vel ex eorum meritis vel ex abyssu iusti iudicij Dei oporteat audire.

38. *De usu sortium apud Antiquos ad prænosceda futura.*

HVC referre etiam conuenit sortes antiquis vsitatas, quando videlicet versibus alicuius poëtæ sortitò acceptis, quid eis futurum portenderetur, inquirebant: quo modo nonnunquam contingebant illis carmina vel præsentibus, vel futuris negotijs mirè congruentia: velut Alexandro Seuerò etiamnum adolescenti, nec imperium speranti, dum Virgilianas sortes scrutatur, versus ex libro Æneidos 6. exiêre, qui futurum illi imperium præsignificabant his verbis,

R

TH



*Tu regere imperio populos Romane memento :  
Hæ tibi erunt artes, paci<sup>q</sup> imponere morem ;  
Parcere subiectis, & debellare superbos.*

*Numer. 23.* Nec mirum ita evenire, Deo volente ideo-  
que mentem mouente, linguam moderante, &  
*C 24.* fortes aptè ad id quod præsignificari vult mi-  
scente ac temperante: qui non solum ex ore Ba-  
laam arioli & falsi vatis, sed etiam ex ore asinæ  
qua ille ariolus vehebatur, verissima futuro-  
rum edidit oracula.

*39. Permissu DEI, nimis cupidos sciendi  
futura, laqueis demonum irretiri, & va-  
rijs ac pernitijs erroribus implicari.*

*Augusti-  
nus.* NON est hoc loco in præteritis relinquen-  
dum, quod valde sapienter & salutariter monet  
Augustinus in libro 2. de Doctrina Christiana,  
cap. 22. & 23. ait enim permissu Dei nonnun-  
quam vsu venire, vt dæmones vel per ipsos eti-  
am homines multa vera prædicant, quod non-  
nulli eiusmodi diuinationum, etiam cum super-  
stitione atque impietate nimium studiosi atque  
curiosi, noxia persuasione seducti, in maiora &  
magis execranda flagitia, ita se derelinqui à Deo  
promeriti præcedentibus suis peccatis, prola-  
bantur. Sed præstat hic Augustini verba sub-  
scribere. Hinc fit, inquit, vt occulto quodam  
iudicio diuino cupidi malarum rerum homi-  
nes tradantur illudendi & decipiendi, pro meri-  
tis voluptatum suarum illudentibus eos atque  
decipientibus præuaricatoribus Angelis ; qui-  
bus

*Valde ob-  
seruanda  
beati Au-  
gustini sen-  
tentia.*



bus ista pars mundi infima secundum pulcherrimum ordinem rerum, diuinæ prouidentiae lege subiecta est. Quibus illusionibus & deceptionibus euenit, vt istis superstitiosis & perniciosis diuinationum generibus, multa præterita & futura dicantur, nec aliter accidant quàm dicunt: multaque obseruantibus secundum obseruationes suas eueniant, quibus implicati curiosiores fiant & se se magis magisque inferant multiplicibus laqueis perniciosissimi erroris. Hoc genus fornicationis animæ salubriter diuina Scriptura non tacuit, neque ab ea sic deterruit animam, vt propterea talia negaret esse sectanda, quia falsa dicuntur à professoribus eorum, *Sed etiam si dixerint vobis, inquit, & ita euenerit, Deuter. 18. ne credatis eis. I. Reg. 22.* Non enim quia imago Samuelis mortui Sauli regi vera prænunciauit, propterea talia sacrilegia quibus imago illa præsentata est minus execranda sunt: aut quia in Actibus Apostolorum ventriloqua scæmina verum testimonium perhibuit Apostolis Domini; ideo Paulus Apostolus pepercit illi spiritui, ac non potius illius dæmonij correptione atque exclusionem mundauit. *Act. 16.* Omnes igitur artes huiusmodi vel nugatorie vel noxiæ superstitionis, ex quadam pestifera societate hominum & dæmonum, quasi pacta infidelis & dolosæ amicitiae constituta, penitus sunt repudianda & fugienda Christiano. Sic Augustinus. His causis adiungunt quidam alias duas, minus fortasse probabiles, non minus tamen frequentes vsuque compertas.



40. *Multos diuinare futura, magis ex prudentia & usu rerum humanarum, quàm ex arte astrologica.*

TERTIA CAUSA. Non pauci diuinant non tam peritia artis astromanticę quę nulla est, quàm singulari quadam sagacis ingenij solertia, & multiplici humanarum rerum peritia vsuq;, & exquisita eorum hominum quibus diuination fit, negotiorum, morum, studiorum, & ingeniorum obseruatione atque notitia. Etenim quidam sunt qui perspectis quorundam hominum temperamētis & affectionibus corporum, studijs item, exercitationibus, institutis, familiaritatibus, denique virtutibus aut vitijs, multa euentura eis prouident, ipsisque magna asseueratione & auctoritate prænunciant ac plerumque diuinant. Ad hoc genus diuinationum pertinet, si quis principem tyrannicè tractantem ciues, & crudeli dominatu prementem, à suis eum occisum iri prädixerit; hominemquę frequentissimum in furtis & rapinis, suspendio periturum; religionis contemptorem, falsęquę doctrinę profeminatorem contra veritatem fidei & Ecclesię Catholicę auctoritatem, ignis supplicio mulctatum iri. Hoc genere diuinationis vsus est Annibal qui perspecta imperitia atque temeritate Terentij Varronis & C. Flamminij Romanorum Coss. & Imperatorum, Afris victoriam, Romanis insignem cladem valde fidenter & asseueranter prädixit;

eam-

*Diuinationis  
Annibalis.*



eamque prædictionem mox certaminis exitus, plurimis Romanorū millibus interfectis, comprobavit.

41. *Nimiam credulitatem ac leuitatem consulentium Astrologos, interdum conducere ut eorum prædicta vera cadant.*

QUARTA CAUSA. Non raro Astrologorum diuinationo vera existit ob stultam consulentium credulitatem: multi namque scillime credunt quæ dicuntur ipsis de rebus quas vel maxime optant, vel timent vehementer atque perhorrescunt. Solet enim eiusmodi credulitas instillare animis cōsulentium magnam spem rei bonæ à diuinis promissæ, vel ingentem metum iniicere tristium & acerborum casuum calamitatisq; ab illis prænunciatæ. Hi autem duo affectus animi, cū potentissimi sint ad afficiendum & commouendum hominem, crebro efficiunt, certè multum proficiunt, ut humana negotia ad prædictos fines perducantur. Etenim vehemens quædam spes ardensq; desiderium excitant atque incitant homines ut ad bona ipsis promissa sedulo se comparent, & omnibus suis opibus viribusq; contendant: quo fit, ut ob eam rem plerumque quò intendunt, optatorum suorum & alienorum promissorum compotes facti, perueniant. Ex aduerso autem metus, paor, horrorq; prædictorum malorum atque calamitatum, sæpè faciunt homines cunctanter ac dubitanter aggredi negotia, timide ac negligenter persequi, & quocumque obiecto impe-




*T. Livius.**Nicias dux  
cis Athe-  
niensium  
exutalis  
in scitis.*

dimento turpiter & infœliciter deferere, eaque  
ratione in prænuntiata ipsis mala delabi. Lucu-  
lenta eius rei exempla reperimus in Romano  
exercitu, cui (vt scribit Livius) cum auguria &  
auspicia secreto inspecta infaustum belli exitum  
minarentur, auspices & duces ne militem in ar-  
ma euntem funesto nuncio consternarent, ver-  
sis in contrariam partem auspicijs, omnia fausta  
& triumphalia portendi & à Dijs promitti men-  
titi sunt. quo mendacio utiliter decepti milites,  
alacriter prælium inierunt, fortiter pugnarunt,  
& hostes quos auguria victores fore præmon-  
strabant, fœliciter vicerunt. Contra verò cum  
Nicias dux classis Atheniensium, incognita sibi  
lunæ defectione portendi ratus classis naufra-  
gium, si ea nocte portum egrederetur, cum stul-  
to metu occupatus oppressusque discessum  
differt; à Siracusanis cum tota classe captus est.


Verùm ne disceptatio hæc longius quàm  
initio promissimus, & quàm fert instituti  
nostri ratio producat, hîc finem  
disputandi de diuinatione  
astrologica facie-  
mus.

F I N I S.



Libros






Libros hos tres R. P. Benedicti Pererij aduersus fallaces  
 & superstitiosas artes, &c. non modò propter bre-  
 uitatem, perspicuitatem, elegantiam, verùm eti-  
 am propter orthodoxam & accuratam pulcherri-  
 marum & vtilissimarum questionum explicatio-  
 nem, tum luce tum laude dignissimos iudico.

ALBERTVS HVNGERVS, S. Theol.  
 D. Professor, & Procancellarius,  
 atque Theologici Collegij pro  
 tempore Decanus in Catholica  
 Academia Ingolstadiana.



# ERRATA.


Pag. 7. Vers. 13. hoc, lege, hos. Vers. 24. ciere, l. ciet. pag.  
 10. & 20. Pessimunte, l. Pessimunte. p. 46. & 6. possent, l.  
 possunt. p. 47. & 11. adoratu, l. odoratu. pag. 53. & 15. alte-  
 rum, l. alteram. p. 71. & 1. inserat, l. inserant. p. 88. & 5. na-  
 tua, l. natura. p. 89. & 24. fumos, l. furnos. p. 102. & 6. lt. præ-  
 dicat, l. prædicata. p. 123. & 9. idem, l. item. p. 143. & 7. di-  
 uersis, adde, modis. p. 146. & 5. animam, l. animam. p. 147.  
 & 7. existimatorem, l. estimatorem. p. 148. & 16. Auerro-  
 res, l. Auerroes. p. 153. & 6. lt. commocut, l. commouent. pag.  
 154. & 11. suspiciendam, l. suscipiendam.



R 4

IN-





INDEX RERVM PRÆ-  
CIPVARVM IN TRACTA-  
tu de Magia contentarum.

A.

<b>A</b> rchimedis sphaera. fol.	18
Archimedis scientia potentia.	20
Actio Daemonum est duplex.	33
Apollonij fabula leonis.	37
Astronomica Magia quid sit.	55
Aurum chemicum non potest vendi pro vero.	78
Argentum viuum non est materia omnium metal- lorum sicut nec sulphur.	80
Authoris sententia de auro alchimistico.	87
Animalia generari possunt solo calore ignis.	89
Auripigmentum est species veri auri.	90
Alchimie ars cur non videatur esse vera.	90
Alchimie vsus non est permittendus in Republica.	92
An aliquid primigenie materie hominis maneat per totam vitam.	228
Annibalis somnium de vastatione Italiae.	137
Alexandri Magni somnium.	139
Animus noster cur sit habilior in somno ad percipien- das reuelationes diuinas.	146
Argumenta S. Scripturae quibus astrologica diuinitio refellitur.	170

D. Au



# I N D E X.

<i>D. Augustini notabilis oratio in reconciliatione cum Ecclesia cuiusdam Mathematici.</i>	177
<i>Animaduersio in Petrum de Aliaco.</i>	179
<i>Argumentatio valida contra Astrologos.</i>	181
<i>Astrologorum prædictiones si essent veræ, essent odiosæ hominibus.</i>	206
<i>Astrologorum prædictiones cui generi hominum arri- deant.</i>	221
<i>Astrologorum fundamenta.</i>	222. 227. 232
<i>Aristotelis sententiæ tollunt è medio Astromantiã.</i>	218
<i>B. Ambrosius comparat prædictiones astrologorum te- læ araneæ.</i>	231
<i>Astra non esse certa signa rerum futurarum.</i>	239
<i>Annibalis diuinitio.</i>	254
<i>Auctoris sententia quomodo facta sit à Magis Pharaonis virgarum in serpentes mutatio.</i>	121. 116
<i>Amnes retrofluentes.</i>	38

## B.

<i>Boëtij opera mira.</i>	20
<i>D. Basilij argumentatio contra Astrologos.</i>	190

## C.

<i>Columba lignea volans.</i>	20
<i>Caput æneum loquens.</i>	20
<i>Calor cœlestis &amp; elementaris non differunt specie.</i>	88
<i>Cham fuit idem qui Zoroastres.</i>	94
<i>Cassiani opinio de origine Magiæ.</i>	96
<i>Causæ quinq; cur dormientibus multa diuinitus reue- lentur.</i>	146.

R 5

Cau-



# INDEX.

Cause quatuor cur diuina somnia sint aliquando ob-  
scura. 152

Caietani sententia aduersus predictiones astrologorum. 175

Catonis dictum in Astrologos. 216

## D.

Demonum cur simulent animas demortuorum. 70

Deus cur sit passus prodigia fieri à Magis. 121

Demonum natura & munus secundum Platonē. 131

Demonum cur olim non doctis sed imperitis somnia de-  
derint. 150

Demonum astutia in dandis somnijs. 151

Deus varijs modis afficit homines per somnia. 143. 144

Decreta contra Astrologos iudiciarios. 169

Dilemma aliquod contra Astrologos. 206

## E.

Epicureorum opinio de somnijs. 126

## G.

D. Gregorius sex somniorum causas tradit. 135

Eiusdem memorabilis sententia de somnijs. 142

## H.

Historia Iannis & Mambri Magorum Pharaonis. 112

Homeri commentum p distinctione verorum somniorum. 130

Hebraeorum antiquus mos scribendi. 241

## L.

Lamiarum ingenium & libido. 11

Liberi arbitrij vsus nunquā est perfectus in somno. 158

## M.

Magorum figmenta.

Magorum opera varia. 141



# I N D E X.

<i>Magi Persarum quales.</i>	18
<i>Magia naturalis.</i>	14
<i>Magia naturalis triplex.</i>	14
<i>Magi quomodo demonibus imperent.</i>	28
<i>Magiæ variæ species.</i>	53. 71
<i>Magiæ vsus.</i>	107
<i>Magia vetita diuinis legibus.</i>	107
<i>Magiæ vnde tanta authoritas.</i>	102
<i>Magiæ origo prima à Demone.</i>	97
<i>Miraculum quid sit.</i>	48
<i>Miraculorum verorum tres gradus.</i>	49
<i>Miraculorum verorum quinq; differentia à falsis &amp; simulatis.</i>	50
<i>Mortuos nulla vi magica posse reuiuiscere.</i>	13

## N.

<i>Necromantiæ vsus antiquus.</i>	65
<i>Necromantiæ confutatio.</i>	67
<i>Nicie ducis Atheniensium inscitia exitialis.</i>	256

## O.

<i>Opera quæ possunt demones facere.</i>	34
<i>Opiniones tres de serpentibus Magorum Pharaonis.</i>	114
<i>115. 116.</i>	

<i>Oenomaus confutator oraculorum Apollinis.</i>	172
<i>Origenis disputatio contra Astrologos.</i>	178

## P.

<i>Porphyrij dubitationes nouem, quomodo Magi demones inuocent.</i>	29
<i>Philonis sententia de origine Magiæ.</i>	93
<i>Porphyrius quid senserit de veritate somniorum.</i>	133
<i>Pythæ.</i>	



# INDEX.

<i>Pythagoramos &amp; consuetudo.</i>	134
<i>Petrus Aliacus plurimum peccauit contra chronographiam.</i>	214
<i>Professores diuinandi futura, aliquando fuisse eiektos è ciuitatibus.</i>	221

## R.

<i>Remora piscis.</i>	16
<i>Refellitur ars Cabalistica tanquam inanis.</i>	58
<i>Rationes quinq; pro Alchimiſtis.</i>	84
<i>Religio &amp; disciplina Christi tenebras Magicarum artium è mundo discuffit.</i>	102
<i>Ratio cognoscendi ſomnia duplex.</i>	141
<i>Ratio quedam contra Aſtromantiam.</i>	173

## S.

<i>Salomonis Magia naturalis.</i>	21
<i>Statue per ſe incedentes.</i>	35
<i>Statue loquentes more humano.</i>	36
<i>Samuel an fuerit verus qui per Phytoniſſam reſentatus eſt Sauli.</i>	62
<i>Smerdes Magus inuaſit regnum Perſarum.</i>	74
<i>Sulphur non eſt materia metallorum omnium.</i>	80
<i>Somnia omnia eſſe vera Stoicorum &amp; Pythagoræ opinio.</i>	125
<i>Sententia quedam vera de ſomnijs.</i>	127
<i>Somniorum cauſe.</i>	127. 136. 138. 141
<i>Sententiæ variæ de cauſis ſomniorum.</i>	130
<i>Somnium Cyri.</i>	131
<i>Syneſius mira ſed falſa de ſpiritu phantaſtico tradit.</i>	133
<i>Somnio-</i>	



# I N D E X.

<i>Somniorum demonis duo genera.</i>	139
<i>Somnia quaedā impijs hominibus data sunt à Deo.</i>	151
<i>Somniorum quatuor genera sine vitio possunt obseruari.</i>	153
<i>Somnium Salomonis cur illi fuerit datum.</i>	161

## T.

<i>B. Thomæ sententia de operibus Magorum.</i>	11
<i>B. Thomæ argumentum contra Necromantiam.</i>	67
<i>Testimonia scripturæ de somnijs.</i>	128
<i>B. Tertulliani sententia de Necromantia.</i>	69

## V.

<i>Voces quomodo possint esse causæ efficientes rerum aliquarum.</i>	25
<i>Vtilitates artis Chimicæ.</i>	82
<i>Vanitas maior eorum qui obseruant somnia quàm astra.</i>	155
<i>Vsus rationis sæpe est liber in somno.</i>	158
<i>Vita hominis est instabilis, qui non secundùm rationem sed sensum viuit.</i>	206

## X.

<i>Xenophanis &amp; Epicuræorum opinio de somnijs.</i>	126
--------------------------------------------------------	-----

## Z.

<i>Zoroastres Magiæ parens.</i>	93
<i>Zodiacus apud Astrologos duplex.</i>	189





699

700

701

702

703

704

705

706

707

708

709

710

711

712

713

714

715

716

717

718

719

720

721

722

723

724

725





